





2408

9m. 8. 2 / 6. 68





SELECTÆ 329112

*Inc. Tehe Catalogo inscriptus ubi*

QUÆSTIONES

THEOLOGICÆ.

TOMUS SECUNDUS.

DE

ENTE SUPERNATURALI.

Auctore P. JOANNE GUILLEMINOT,  
*Mombarrao, Societatis IESU, Sacra  
Theologia Doctore, ac Professore.*



DIVIONE,

Apud JOANNEM RESSAYRE,  
Typographum & Bibliopolam,  
è regione Collegii.

---

M. DC. LXXXII.

*Cum Superiorum Facultate.*

STREET  
QUESTIONS


THE  
STREET

THE  
STREET

THE  
STREET



DIVISION  
THE  
STREET  
THE  
STREET



# INDEX

## QUÆSTIONUM ET SECTIONUM.

### TOMI SECUNDI.

### SECTIO PRIMA.



#### *De Ente Supernaturali in genere.*

- Señio. I.* Quid sit Ens Supernaturale, pag. 2  
*Señ. II.* Solvuntur objectiones. 7  
*Señio III.* Referuntur ac refelluntur quædam  
sententiæ, præcedenti doctrinæ oppositæ. 17  
*Señio IV.* Dux aliæ sententiæ refelluntur 37  
*Señio V.* An impossibile fuerit hominem sine  
ullo dono supernaturali creari. 49  
*Señio VI.* De Supernaturalibus quoad mo-  
dum. 53

### QUÆSTIO SECUNDA.

#### *De Gratia habituali seu sanctificante.* 7

- Señ. I.* Quid sit Gratia habitualis, seu sancti-  
ficans 85  
*Señ. II.* An & quomodo Gratia habitualis  
homines filios Dei adoptivos, & hæredes  
constituat. 66  
*Señ. III.* Quænam Dei præsentia Gratiæ ha-  
bituali sit annexa. 70  
*Señ. IV.* Solvuntur objectiones. 77  
*Señ. V.* An Gratia sanctificans distinguatur  
realiter ab habitu charitatis, 81

## II. Partis.

- Señ. VI.* An gratia sit remissiva peccati; &  
an cum eo stare possit. 88
- Señ. VII.* Solvuntur objectiones. 96
- Señ. VIII.* In quo consistat ratio peccati  
actualis & qualiter gratia ipsi sit opposita, 101
- Señ. IX.* Expenditur mens sanctorum Patrum  
circa rationem constitutivam peccati. 113
- Señ. X.* Solvuntur adversariorum rationes. 118
- Señ. XI.* In quo consistat peccatum habitua-  
le, & qualiter illud per gratiam destrua-  
tur. 128
- Señ. XII.* An possit peccatum remitti sine infu-  
sione gratiæ & sine retractatione peccato-  
ris. 136

## QUÆSTIO TERTIA.

### *De Gratia actuali.* 143

- Señ. I.* **A**N omnis gratia disputationi Patrum  
subjecta, seu ad salutem utilis, debeat  
esse in entitate supernaturalis. 144
- Señ. II.* Solvuntur objectiones. 156
- Señ. III.* Per quid fiat determinatio gratiæ ad  
causandum actum qui ex ea supernaturalita-  
tem accipit. 162
- Señ. IV.* Solvuntur objectiones. 166
- Señ. V.* Quid sit, & an detur nullique unquam  
desit gratia sufficiens. 183

## QUÆSTIO QUARTA.

### *De objecto formali & ultimo fidei.*

- Señ. I.* **Q**UODNAM sit objectum formale fi-  
dei. 190
- Señ. II.* In quid ultimò resolvatur assensus fi-  
dei. 195
- Señ. III.* Ostenditur in allata resolutione fidei,  
nullum esse neque circulum, neque progres-  
sum in infinitum, neque petitionem princi-  
pii. 202

*Index.*

<i>Señ. IV.</i>	Solvuntur objectiones.	213
<i>Señ. V.</i>	Expenduntur ac refelluntur quædam sententiæ prædictis contrariæ.	221
<i>Señ. VI.</i>	Aliæ sententiæ contrariæ refellun- tur.	240
<i>Señ. VII.</i>	An & per quid revelatio sit evi- denter credibilis.	254
<i>Señ. VIII.</i>	An ad fidem absolutè necessa- rium sit ut objectum fidei proponatur cum motivis evidentem credibilitatem constituen- tibus.	266

## QUÆSTIO QUINTA.

### *De actu fidei.*

<i>Señ. I.</i>	<b>A</b> N assensus fidei sit absolutè certus, & omni scientifico firmior.	279
<i>Señ. II.</i>	Solvuntur objectiones.	286
<i>Señ. III.</i>	An assensus fidei à revelatione ad rem revelatam sit discursivus.	301
<i>Señ. IV.</i>	Solvuntur objectiones.	309
<i>Señ. V.</i>	An ratio formalis fidei se extendat ad conclusionem quæ sequitur ex duabus revelatis, aut ex una revelata & altera evidenti.	324
<i>Señ. VI.</i>	Solvuntur objectiones.	345

## QUÆSTIO SEXTA.

### *De Spe Theologica* 354

<i>Señ. I.</i>	<b>Q</b> uodnam sit objectum materiale Spei.	355
<i>Señ. II.</i>	Solvuntur objectiones asserentium Deum simul & visionem ejus esse objectum materiale spei.	362
<i>Señ. III.</i>	Solvuntur objectiones sententiæ asse- rentis solam visionem Dei esse objectum ma- teriale spei.	368
<i>Señ. IV.</i>	Quodnam sit objectum formale	

Spei Theologicæ.	372
Señ. V. Solvuntur objectiones.	375
Señ. VI. An possimus sperare beatitudinem ex nostris meritis.	383
Señ. VII. An possimus sperare beatitudinem alteri per actum spei Theologicæ.	386
Señ. VIII. An spe nostræ insit certitudo, & quanta.	391
Señ. IX. An spes maneat in Beatis.	396
Señ. X. An timor sit actus spei.	405
Señ. XI. De peccatis spei oppositis.	412
Señ. XII. An possit Deus alicui revelare suam damnationem ob peccata futura.	418
Señ. XIII. Solvuntur Objectiones.	429
Señ. XIV. An is cui facta esset revelatio damnationis sperare aut desperare posset.	437

QUÆSTIO SEPTIMA.

*De Charitate Theologica.* 445

Señ. I. <b>Q</b> uodnam sit objectum formale Charitatis Theologicæ.	446
Señ. II. Solvuntur Objectiones.	454
Señ. III. De objecto materiali charitatis Theologicæ.	461
Señ. IV. An charitas habeat rationem veræ amicitiae erga Deum.	465
Señ. V. Solvuntur Objectiones.	470
Señ. VI. An, quomodo & quando homo teneatur Deum diligere super omnia.	480
Señ. VII. De augmento charitatis.	485
Señ. VIII. An charitas possit imminui; & quomodo corrumpatur.	500
Señ. IX. An Charitas in via possit esse æquè perfecta atque intensa, sicut in patria.	507



ESLECTÆ



S E L E C T Æ  
Q U Æ S T I O N E S  
T H E O L O G I C Æ.  
S E C U N D A P A R S.  
D E E N T E S U P E R N A T U R A L I.



O s t ſpectatum ſecundum ſe Deum, ſeu quoad eſſentiam, attributa, & perſonas, Theologia ipſum conſiderat ut principium eorum quæ ad extra produxit. Et quia inter illos effectus, ſupernaturalia ſuperiorem locum tenent, magisque auctoris infinitam virtutem produnt, ad illa potiffimum Theologiæ conſideratio ſe extendit. Quare hîc agendum de ente ſupernaturali. Et primò quidem de illo in genere; deinde in particulari de ſpecialibus entibus quæ ſub illo univerſali genere continentur.

*Tomus II.*





## QUÆSTIO PRIMA.

*De Ente Supernaturali in genere.*

---

### SECTIO PRIMA.

*Quid sit Ens Supernaturale.*

1. **U**T rectè quæstio instituatur, sciendum est haberi quidem de ente supernaturali conceptum qui ei certò, & necessariò convenit, sed illum ita constantem conceptum esse tantùm descriptivum. Id autem de quo controversia esse potest, est quænam sit ratio primariò constitutiva supernaturalitatis, ex qua fluit omnis proprietas entis supernaturalis, & quidquid ei, quâ tali, necessariò convenit.

2. Conceptus ille certus, & ab omnibus receptus est, quòd ens illud, quòd dicitur supernaturale, superet omnem virtutem, & exigentiam naturæ, ita-ut nulla substantia creata illud possit aut efficere, aut mereri, aut illud quasi sibi debitum postulet: sed tantùm ad illud aut habendum, aut producendum, à Deo elevari possit. Et per se patet hanc notionem non dari per aliquid maximè intimum rei. Nam hoc posito quod ita superet vires



QUÆST. I. *De Supernaturalitate.* 3  
naturæ, quæri potest unde habeat quod  
taliter illas superet. Et sic proposita  
quæstione.

3. Dico primò, Id quo ens in substan-  
tia supernaturale excedit omnem naturæ  
vim, & constituitur in esse supernatura-  
lis, consistit in hoc quòd tale ens posses-  
sionem Dei, & unionem immediatam cum  
eo ut in se est, aut formaliter constituat,  
ut unio hypostatica & visio beatifica,  
aut ad talem possessionem unionemque  
disponat, ut habitus actûsque virtutum  
infusarum, & omnia dona supernaturalia,  
atque auxilia; quæ de se ad visionem Dei  
obtinendam ordinantur, & ad eam pro-  
merendam sufficientiam aliquam, saltem  
remotam conferunt, ita-ut homo talibus  
instructus donis, atque auxiliis, si con-  
formiter ad ea agere velit, iisque ulterius  
semper, atque ulterius correspondere, ne-  
que ex parte sua deesse, ad illam tan-  
dem visionem sit perventurus. Ita multi  
Theologi.

4. Probatur primò ex scriptura, quæ do-  
na Dei & bona supernaturalia per ordi-  
nem ad participationem aliquam divinita-  
tis explicat. 2. Petr. 1. *Maxima & pretiosa*  
*nobis promissa donavit, ut per hac efficiami-*  
*ni divina consortes natura.* Et 1. Ioan. *Ut*  
*societas nostra sit cum Patre & Filio ejus*  
*Jesu Christo.*

4      *De Ente Supernaturali,*

5. Probatur secundò ratione morali, quia possessio Dei quâ ens creatum vel fiat Deus, vel Deo, ut in se est viso, fruatur, debet esse effectus dignationis divinæ. Hæc autem dependentia à dignatione Dei supponit talem possessionem, atque unionem non posse ab ullo ente creato obtineri abique eo quòd tale ens à Deo supra vires omnes sibi proprias, suæque naturæ exigentiam elevetur. Itaque possessio illa atque unio cum Deo, ut in se est, est aliquid quod per se vires omnes naturæ etiam creabilis superat, & supernaturalitatem primariò constituit. Unde & quæ cum illa connexionem habent, sunt quoque naturæ secundum se impossibilia.

6. Probatur tertidò, quia ex natura rei, quod convenit omnibus speciebus sub aliqua ratione generica contentis, per se convenit rationi illi genericæ. Atqui omnibus speciebus participationis, seu unionis immediatæ cum Deo ut in se est, convenit superare absolutè & simpliciter omnes vires, & exigentiam omnis naturæ creatæ, aut creabilis: & excellentia ipsa talis participationis atque unionis est causa ejusmodi excessûs. Ergo tale participationis atque unionis genus est id quod per se excedit omnem vim naturæ creatæ, aut creabilis, quòdque fundat habitudinem ad supremam, & increatam causam, ac

**QUÆST. I. De Supernaturalitate. 5**  
proinde quod primariò supernaturalitatem  
in substantia constituit. Major per se pa-  
tet, quia cum species omnes simul sumptæ  
exæquent, & exhauriant genus, quidquid  
illis omnibus convenit, generi per se at-  
que adæquatè sumpto convenit, & nulla  
ex parte ei-deesse potest. Minor probatur,  
quia participatio Dei ut in se est, seu unio  
immediata cum illo per se sumpto, vel est  
substantialis, ut in Christo; vel acciden-  
talis, ut in beatis Deum videntibus. Utra-  
que autem ratione suæ excellentiæ superat  
omnes vires naturæ creatæ, aut creabilis,  
& Deum respicit ut causam sui particula-  
rem, communicantem se ultra omnem  
exigentiam subjecti uniti, aut videntis.  
Ergo talis excessus supra vim omnem na-  
turæ, etiam creabilis, & habitudo ad  
Deum ut causam particularem, convenit  
omnibus speciebus participationis, atque  
unionis in mediata cum Deo.

7. Hujus syllogismi minor probatur,  
quia primò quidem quod attinet ad unio-  
nem hypostaticam, ipsa est res maximè  
divina: & si quod est bonum naturæ ma-  
ximè perfectivum supra omnem ejus exi-  
gentiam, & quod à Deo solo produci pos-  
sit, id præ aliis omnibus convenit tali  
unioni, quâ nihil absolutè melius extra  
Dei esse necessarium dari potest. Negari  
autem non potest Deum, cujus omnipo-

tentia est infinita, aliquid posse quod superet omnem naturæ seu substantiarum creabilium exigentiam. Quoad visionem autem beatificam, excellentia ejus supra omnis substantiæ creatæ, aut creabilis naturales vires probata est tom. 1. quæst. 4. sect. 1. ex scriptura, & Patribus, nec non rationibus, in quibus hoc præcipuum est quod cum naturaliter objectum cognitum sit in cognoscente per cognitionem ejus secundum modum cognoscentis, impossibile sit omni spiritui creato transcendere naturaliter modum cognoscendi ad similitudinem entis potentialis, sicut impossibile est homini transcendere modum cognoscendi ad similitudinem entis corporei, seu cum aliqua similitudine ac proportionem ad res corporeas ac sensibiles. Hinc nullum ens creatum naturaliter poterit Deum aliter cognoscere, quam per modum entis potentialis. Hoc autem repugnat visioni intuitivæ entis per essentiam, de cujus visionis ratione est ipsum prout in se est, repræsentare.

8. Sic probata impossibilitate absoluta attingendæ per solas naturæ vires unionis immediatæ cum Deo, ut in se est, sequitur ea quoque omnia quæ ad aliquam unionis immediatæ speciem, etsi tantum accidentalem, in visione Dei consistentem ducunt, & ad eam obtinendam, aliquam

QUÆST. I. *De Supernaturalitate.* 7

sufficientiam, etiam remotam conferunt, esse omni naturæ creabili secundum se sumptæ impossibilia, ac proinde supernaturalia: quia cum naturaliter impossibilis est finis, impossibilia quoque sunt naturaliter media quæ de se ad illum finem ducunt, & ad eum obtinendum vim aliquam sufficientem, etsi remotam conferunt. Quia igitur gratia tum habitualis, tum actualis, & omnia illa, saltem remotè ducunt ad visionem beatificam, & homini ad eam acquirendam sufficientiam aliquam conferunt, si nimirum velit donis, etiam non justificativis, sed ad justificationem disponentibus & conferentibus uti, hæc omnia in sua entitate supernaturalia sunt.

---

SECTIO SECUNDA.

*Solvuntur objectiones.*

1. **O**bjicitur primò, Amor naturalis Dei tam immediatè unit animam Deo, quàm supernaturalis, siquidem tam immediatè movetur bonitate divina propter se, quam supernaturalis. Ergo conjunctio immediata cum Deo non est ratio formaliter constitutiva supernaturalitatis. Ita P. Ripalda lib. 1. de ente supernaturali disp. 4. sect. 2.

2. Respondeo supernaturalitatem amo-

ris qui in statu viæ exercetur, non peti, ut hæc supponit objectio, ex immediatione quâ movetur, seu causatur ille amor bonitate Dei propter se, quia ista conjunctio non est cum Deo proposito ut in se est, sed peti ex eo quòd amor ille ducat & conferat ad acquirendam unionem immediatam cum Deo prout in se est: quæ unio in sola patria habetur per visionem intuitivam & per amorem à Deo ut in se est, ejusque visa, ac movente præsentia causatum. Et per solam ejusmodi vim conferendi ad illam unionem, omnes actus supernaturales viæ, suam habent supernaturalitatem: ita ut excellentia quæ hanc facit saltem remotam sufficientiam, sit id quod in illis per se superat omnes naturæ secundum se sumptæ vires. Nulli autem actus naturales, quantumvis boni intra illud genus, ad hoc conferre possunt, aut aliquid habere meriti, ut postea ostendetur. Unde amor naturalis, etsi non per aliud à bonitate Dei, at aliter quàm in se est propositi, motivum causatus, non est supernaturalis.

3. Instabis ex eodem Ripalda, Amor naturalis potest procedere ex visione intuitiva Dei. Itaque per actum naturalem erit unio cum Deo ut in se est: ac proinde talis unio non est constitutiva supernaturalitatis.

4. Respondeo negando à visione Dei



QUÆST. I. *De Supernaturalitate.* 9  
intuitiva alium posse procedere amorem  
quàm supernaturalem, ad quem quidem  
tota vis naturalis animæ concurret, sed  
quia concurret cum principiis supernatu-  
ralibus, nempe cum lumine gloriæ, &  
cum Deo ut causa particulari talis amoris,  
ideo simpliciter, & absolutè erit superna-  
turalis, id est non à sola natura, & con-  
cursu ei naturaliter debito procedens.  
Hinc si ponamus Deum cum homine vi-  
dente ipsum intuitivè, nolle concurrere  
ad amorem supernaturalem, dico nullo  
modo concursurum, quia concursus merè  
naturalis esset concursus, & non esset,  
si quidem esset cooperatio ad aliquid inat-  
tingibile per vires naturales, & concur-  
sum eis naturaliter debitum.

5. Declaratur hoc à pari in ipsa Dei vi-  
sione. Nam licet, ut homo videat Deum,  
nihil ex parte objecti absolutè requiratur,  
nisi præsentia ejus physica, quæ nullibi  
deesse potest; quia tamen non est natura-  
liter attingibilis Deus prout in se est, ab  
ullo ente creato, ideo per nullum concur-  
sum naturalem videri potest, & necessa-  
rius est concursus supernaturaliter effecti-  
vus visionis. Pari ergo modo, licet in ho-  
mine vidente Deum, nihil ad amorem ex  
illa visione aptum sequi requiratur ex par-  
te objecti ultra propositionem ejus factam  
per illam visionem, quia tamen tanta re-



quiritur virtus ad efficiendum qui inde procedat amorem, quanta ut taliter Deus cognoscatur, ideo non poterit à voluntate effici ille amor per ullum concursum merè naturalem, sed necessarium erit ut Deus tanquam causa particularis effectiva coagat supernaturaliter actione speciali, sibi elevanti propria. Et alioqui voluntas sine actu circa Deum ut in se est, remanebit, sicut sine elevatione supernaturaliter effectiva, intellectus noster extra patriam sine intuitiva Dei cognitione manet: & utrobique impotentia agendi erit ob defectum concursus supernaturalis, qui solus inactionem tolleret.

6. Objicitur secundò. Apud eundem Ripaldam, loco citato. Ubi Eucharisticum est, aut saltem esse potest, intrinsecè supernaturale: nec tamen illud creatam substantiam cum divina conjungit. Ergo supernaturalitas non consistit in tali conjunctione. Respondeo objectionem falsum supponere, nempe quod; Ubi ex genere suo sit forma Physicè distincta à re locata & loco unde ubicatio illa quæ tali modo rem corpoream in loco constituat, dicitur fore ita diversa ab ubicatione naturali, ut sit supernaturalis. Contra autem est, quia Ubi ex genere suo non distinguitur realiter, nec modaliter à re locata ut connotante locum: quod totum fieri sine forma





QUÆST. I. *De Supernaturalitate.* 11  
physica superaddita, constat ex eo quod  
talis forma suum effectum formalem præ-  
suppositura esset. Cum enim entitas ejus  
non possit esse nisi in loco, & non possit  
educi ex subiecto distante, neque in illo  
distante recipi, oporteret prius natura  
quàm educatur, & recipiatur in subiecto,  
subiectum jam esse in loco cui per ipsam  
deberet applicari: quod est effectum for-  
mæ ipsi formæ præsupponi. Deinde effe-  
ctum illum formalem sine tali forma esse  
posse constat ex eo quod si Deus talem  
formam destruat, res adhuc ibi futura  
sit ubi erat, quia nulla causa est cur alibi  
sit. Nec negari potest quin Deus illam  
præcisè formam destruere possit aliis om-  
nibus conservatis, quia alia priora sunt  
ipsa, at quod est prius, non pendet à  
posteriori, & ipsa distinctio unius ab alio  
sufficit ut illud sine hoc divinitus saltem  
possit existere. Posito igitur quod ubicatio  
de se, & in genere, non sit aliqua forma  
physica rei locatæ superaddita, nec Ubi  
Eucharisticum Corporis Christi erit reali-  
ter distinctum ab illo corpore, nihilque  
dicet præter ipsum Corpus, & species  
panis & vini quas connotabit: quæ ipsæ  
per se etiam, sicut & quævis aliæ res,  
erunt in loco suo, qui illas ambit, & tan-  
tùm connotatur ab eis.

7. At, inquires, Ubi Eucharisticum

mirabili modo Corpus Christi constituit sub speciebus: quia partes ejus penetrativè intra se invicem omnes includit, & ipsum totum sub quavis parte specierum ponit. Itaque debet esse aliquid ab illius substantia distinctum: quod cum omnem ejus exigentiam superet, erit intrinsecè supernaturalè.

8. Respondeo miracula illa non constitui per ubicationem, quæ illis suppositis, corpus ita affectum hîc vel illic locat: quod est omnino posterius. Penetratio ergo fit per hoc quòd quantitati negatur effectus aliquis formalis secundarius, qui est actualis impenetratio partium. Replicatio autem fit per actionem virtualiter multiplicem, similem ei qua res spiritualis tota in qualibet parte loci quem occupat, producit: quam non distingui ab ipsa virtualiter multiplici existentia rei, constat ex veriori Philosophia non admittente entitates modaliter distinctas: quam doctrinam ex professo probavi in selectis quæstionibus Philosophicis Physicis q. 2. & 3. Quia igitur ubicatio illa non distinguitur ab illa multiplici existentia rei, quæ ipsi quoque rei identificatur, nihil erit ibi supernaturale nisi quoad modum.

9. Objicitur tertio apud eundem, actio qua frigus à calore procederet, esset intrinsecè supernaturalis. Ergo supernatu-

QUÆST. I. De Supernaturalitate. 13  
ralitas • non consistit in conjunctione  
cum Deo , quæ hîc non inveniretur.  
Respondeo primò negando possibilem esse  
talem actionem , quia frustra fingitur in  
quolibet potestas obedientialis ad quidli-  
bet , quæ esset in re finita , cujusmodi est  
res omnis creata , immensa quædam vir-  
tus ad omnia possiblea. Repugnat autem  
vis ejusmodi , putà in oculo corporeo, ad  
videndum Deum : in materia prima , ad  
creandum Angelum , & causandam effe-  
ctivè unionem hypostaticam , & similia.  
Tantumque verum est , cum aliquid ha-  
bet vim inchoatam , & incompletam ad  
aliquem effectum , ut intellectus creatus  
ad videndum Deum , qui etiam continetur  
intra objectum talis intellectûs , quod  
est omne verum , vim illam posse elevari  
à Deo ad talem effectum : non autem quod  
non habet talem virtutem , elevabile esse ,  
quia elevatio non dat rei elevatæ vim ad  
agendum , sed eam supponit , ac complet  
adjunctivè. Dico autem in calore non esse  
vim ullam ad producendum frigus , quia  
calor non potest habere vim ad producen-  
dum suum contrarium , nisi quidlibet ha-  
beat vim illam extensivè immensam ad  
quodlibet , cum nihil influat in effectum ,  
nisi in quantum continet ipsum. Quod  
cum repugnet conditioni finiti entis , ta-  
lis virtus omnino chymica est. Pluribus

impugnari solet hæc potentia obedientialis, sed non est hujus loci de ipsa ex professo agere.

10. Respondeo secundò, si frigus à calore procederet, actionem non fore supernaturalem nisi quoad modum, quia actio illa non distinguetur ab ente in se naturali, nempe ab ipso producto frigore, juxta dicta antea.

11. Objicitur quartò, adhuc apud eundem, citato loco, Modus explicandi supernaturalitatem per unionem immediatam cum Deo ut in se est, vel per connexionem cum tali unionem, non comprehendit supernaturalitatem entibus possibilebus communem. Nam inter possibile, inquit, sunt plura accidentia supernaturalia, quæ solas substantias rationis expertes ornare possunt. Ut enim Deus naturam rationalem vario accidentium ornatu supra exigentiam totius naturæ perficit, nihil prohibet etiam posse Deum naturam irrationalem alio genere accidentium, proprio naturæ irrationalis, ultra ipsius exigentiam perficere. At hæc accidentia minime connectuntur cum unionem immediatam Dei ut in se est. Ergo connexio cum unionem immediatam Dei, non est prima rerum supernaturalium perfectio. Ita ille, quibus addi potest dotes illas gloriæ quibus beatorum corpora perficientur, supe-

QUÆST. I. *De Supernaturalitate.* 15  
rare omnem exigentiam naturalem corporum, ac proinde omnem absolutè exigentiam naturalem, cùm à solis corporibus exigi possint: itaque esse entia intrinsecè supernaturalia, non tamen cum Deo immediatè, neque per se, neque per aliquid à se procedens unientia.

12. Respondeo negando in rebus corporeis rationem supernaturalitatis propriè dictæ, sive supernaturalitatis in substantia, posse reperiri: quia ad talem supernaturalitatem requiritur ut excellentia rei sit radix & causa formalis cur superet omnem exigentiam, & activitatem totius naturæ creabilis. Unde res ejusmodi debet esse perfectior ex se omni effectû à causis naturalibus producibili. Nihil autem corporeum est ejusmodi, quia etsi detur aliquod accidens corporeum quod superet omnem exigentiam subjecti, & non possit produci ab ullo agente naturali, tamen illud non erit æquè perfectum ac verbum nostri intellectûs, seu quodvis accidens spirituale, etiam naturalis ordinis. Unde ratio formalis cur non possit produci ab agentibus naturalibus, non erit excessus perfectionis supra ipsorum vires, quia alioqui nihil possent æquè nobile producere; sed peculiaris limitatio talium agentium, per quam habent vim ad alia, non ad hoc. Nam primò quidem spirituales

substantiæ nihil possunt producere corporeum nisi applicando activa passivis. Agentia autem corporea, si non sunt viventia, non possunt producere tales qualitates, corporis viventis perfectivas. Si autem sunt viventia, cum sint corruptibilia, nihil possunt producere incorruptibile, cujusmodi sunt illæ qualitates. Quare ex peculiari limitatione causarum creaturarum, & multarum quidem, at non omnium inferioritate, oritur illa impotentia in causis naturalibus ad producenda talia accidentia, non autem ex illorum excellentia, quâ superent omnes naturæ adæquatè sumptæ vires, sintque altioris quàm illæ ordinis. Quare talia accidentia non sunt in entitate supernaturalia secundum usitatam notionem supernaturalitatis, sed tantum supra naturam, & exigentiam sui subjecti: cum quo stat quòd sint multis accidentibus naturalibus, putà spiritualibus, minùs nobilia.

13. Confirmatur quia si esse improducibile à causa naturali supernaturalitatem constituit, materia prima, & Angelus, & anima rationalis haberent rationem entis supernaturalis, quia hæc omnia à Deo solo producibilia sunt. Ergo si supernaturalitas explicetur per respectum ad causam productivam omni creata superiori, hoc debet ita intelligi, ut impotentia

QUÆST. I. De Supernaturalitate. 17  
tia illa in causis creatis, proveniat formaliter ex perfectionis excessu supra omnem creabilem substantiam, ita-ut vera sit ista causalis, ideo creatæ substantiæ non possunt rem illam efficere, aut exigere, quia nihil efficit quidquam seipso nobilius: quod non est verum de impotentia Angelī ad creandam materiam primam, aut animam rationalem, aut alium Angelum sive parem, sive inferiorem. Item nihil exigit perfectionem aut formam quæ sit altioris supra se ordinis, cuiusmodi est omnis forma sive proximè & formaliter, sive remotè & causaliter uniens cum Deo ut in se est, ejusque possessionem conferens.

14. Possunt adhuc contra assertam rationem supernaturalitatis afferri objectiones quæ fiunt contra impossibilitatem vivendi Deum naturaliter, quæ inest omni intellectui creato, & creabili. Sed illæ solutæ sunt tomo 1. quæst. 4. ubi actum est de invisibilitate Dei.

---

### SECTIO TERTIA.

*Referuntur ac refelluntur quadam sententia  
precedenti doctrina opposita.*

1. **A**liqui, ut Zumel in 2. quæst. 110.  
art. 4. disp. 5. part. 2. dixerunt  
*Tomus II.* B

supernaturalitatem consistere in respectu ad Deum ut trinum, cum naturalia omnia respiciant tantum Deum ut unum : Probat hęc sententia, quia cognitio naturalis Deum attingit prout unus est, secundum ea quę ipsi ut uni conveniunt, & Deus ut talis manifestatur à creaturis, si quidem illę sunt à sapiente, omnipotente, bono, &c. Quę omnia attributa ex natura, quę una est, oriuntur. Nihil autem est in naturalibus entibus quod ad Deum ut trinus est conducat.

2. Refellitur hęc sententia, primò quia Dæmones & hæretici Trinitatem norunt, & judicant assensu in entitate naturali. Secundò, quia dantur actus supernaturales Deum ut unus est, seu secundum ea quę ipsi ut uni conveniunt, attingentes, ut sunt actus fidei, quo veracitas Dei spectatur; actus charitatis, qui circa solas perfectiones Dei absolutas versari potest, ita-ut personas, quę plures sunt, non attingat : Item actus moralium virtutum infusarum, qui non habent pro objecto nisi conformitatem cum regula morum, & recta ratione. Tertiò refellitur, quia secundum Scotum, & multos Theologos, maximè recentiores, non implicat videri perfectiones Dei absolutas non visis personis, & tamen actus quo essentia, & attributa absoluta viderentur, esset super-



QUÆST. I. *De Supernaturalitate.* 19  
naturalis in substantia. Ergo supernaturalitas non consistit in hoc quòd Deus ut trinus attingatur.

3. Alii ut Herrera in 1. q. 1. d. 1. Conc. 1. Joannes Vincentius relatione de gratia Christi q. 1. fol. 34. Curiel 1. p. q. 100. a. 1. dub. 1. §. 16. Arbella 1. p. disp. 26. num. 9. supernaturalia volunt esse ea quæ Dei essentiam, aut attributa, prout sunt in se, participant; naturalia verò quæ illa participant prout sunt in alio.

4. Hic modus explicandi non probatur, quia multa sunt naturalia quæ nihil aliud à Deo præsupponunt, unde non participant ejus perfectiones prout sunt in aliquo alio. Talia sunt materia prima, anima rationalis, & Angelus, quæ cum per solam creationem produci possint, à Deo solo pendent. Unde non erunt entia naturalia, si naturale constituitur per hoc quòd participet perfectiones Dei prout sunt in alio.

5. Quod si dicas illa participare Dei perfectiones prout sunt in alio, quia participant non qualiter in Deo sunt, sed qualiter sunt in illis ipsis entibus per quandam tantum similitudinem cum eo quod in Deo est: idem dicetur de gratia, & aliis entibus supernaturalibus. Quare nunquam assignabitur ratio primò distinguens super-

naturale à naturali, nisi id ponatur & exprimatur quòd possessionem Dei, seu participationem quâ Deus habeatur ut in se est, contineat sive formaliter, ut unio hypostatica, & visio beatifica, sive causaliter, saltem remotè, ut actus virtutum infusarum & gratiæ actuales quæ conferunt homini aliquam sufficientiam ad illam visionem si iis uti, & consequenter ad eas agere velit, tandem obtinendam. Quod cum illa sententia non dicat neque attendat ad vim illam causativam prædictæ unionis per quam actus multi qui Deum spectant prout in creaturis manifestatur, putà multi actus Religionis, sunt supernaturales, insufficiens est, nec probandus ille supernaturalitatis modus.

6. Ripalda citato lib. 1. de ente supernaturali disp. 4. sect. 3. affirmat proprium donorum supernaturalium conceptum esse connexionem quidditativam cum gratia sanctificante, physicam, aut intentionalem, immediatam, aut mediatam, antecedentem, aut consequentem : quibus connexionis modis comprehendit primò principia ejus acquirendæ, ut sunt gratiæ actuales : secundò proprietates ejus, cujusmodi sunt virtutes Theologicæ, & morales infusæ : tertio effectus ejus, ut est visio beatifica, dotes gloriæ, & alia corporalia dona superantia vires naturæ, quibus

Beatorum corpora perficiuntur : quintò cognitionem ipsam quidditativam gratiæ, & species quæ soli ipsi gratiæ naturales sunt. Probat autem hanc sententiam primò auctoritate scripturæ. Nam 2. Petri 1. ita habetur: *Omnia nobis divina virtutis, sive ad vitam ac pietatem donata sunt : per quæ maxima, & pretiosa nobis promissa donavit, ut per hæc efficiamini divinæ consortes nature.* Quibus verbis indicatur omnia dona quibus meliores reddimur, referri ad consortium divinitatis in ipsa omnino gratia sanctificante consistens.

7. Probat secundò auctoritate Conciliorum, ac Patrum, ostendentium excellentiam actûs fidei, & charitatis, aliorumque similium, quos contra Pelagianos contendebant esse supernaturales, solum quia ad justificationem, & pietatem conducunt : quod est idem secundum Theologos, ac habere connexionem aliquam cum gratia sanctificante. Ex quo sequitur connexionem cum gratia sanctificante, esse excellentiam propriam rerum supernaturalium.

8. Probat tertiò, quia in illa connexionne omnia supernaturalia conveniunt, & ab iis quæ non sunt supernaturalia differunt : quod probat inductione omnium supernaturalium donorum : idque ita vult esse universale, ut sect. 4. contendat ip-

ſam gratiam ſanctificantem habere ſecum connexionem Logicam, aut Metaphyſicam per unionem identitatis, & in tali connexionem conſiſtere ejus ſupernaturalitatem, quia, inquit, ſi ea quæ unione reali, aut cauſalitate, aut notitia quidditativa, aut alio modo Phyſico gratiæ ſanctificantis cognata ſunt, ob illam ipſam connexionem ſupernaturalia aſſeruntur & ad gratiæ excellentiam pertinent; à fortiori illa quæ unione identitatis Logica eam excellentiam participant, ſupernaturalia cenſeri debent. Quod declarat exemplo eorum quæ materialia dicuntur. Si enim res per unionem Phyſicam cum quantitate materiales & corporeæ ſunt, à fortiori ipſa quantitas per unionem identitatis quam ſecum ipſa habet, materialis & corporea erit. Quare idem erit de gratia in ratione ſupernaturalitatis. Unde communis rerum ſupernaturalium conceptus per connexionem cum gratia ſanctificante abſtrahentem à Logica aut Phyſica connexionem, conſtituetur.

9. Probat quartò, quia eſſe ſupernaturale apprehenditur eſſe quoddam elevatiſſimum, ac ſupra omnem naturam creatam, ad cognitionem cum divina natura eveniens: at talis elevatio fit per gratiam ſanctificantem. Quod probatur, quia D. Petrus loco citato gratiam ſanctifican-

QUÆST. I. *De Supernaturalitate.* 24  
tem ait donari *ut per illam efficiamini divi-  
na consortes naturæ.* Et Catechismus Pii V.  
in materia de baptismo conformiter ad  
Tridentinum Concilium eam appellat  
*divinam qualitatem.* D. Cyrillus lib. 4. in  
Esaïam oratione secunda, *formam divinam.*  
Dionisius c. 2. de Ecclesiastica Hierarchia,  
*divinam nativitatem.* Et communis est sen-  
sus Theologorum ac doctorum omnium,  
justos ratione gratiæ in eam dignitatem  
evehi ut aliquo modo sint Dei, & de illis  
verificetur, *Ego dixi Dii estis.* Itaque  
gratia est id quod per se est maximè super-  
naturale, & quod omnia supernaturalia  
per ipsam suam supernaturalitatem respi-  
ciunt.

9. Hæc sententia non probatur, primò,  
quia illud non est principium, ac termi-  
nus, & mensura supernaturalitatis, quo  
datur aliquid nobilius in genere rerum su-  
pernaturalium, & magis conjungens cum  
Deo naturam, quæ ultra suam conditio-  
nem, & exigentiam elevatur. Atqui da-  
tur aliquid tale. Ergo. Major probatur,  
quia primum in unoquoque genere, est  
mensura cæterorum: & malè, quod ex-  
cellentius est, æstimatur ac definitur per  
respectum quem habet ad aliquid ignobi-  
lius se. Minor probatur, quia stando intra  
genus supernaturalium quæ sunt homini-  
bus Angelisque communia, & non pro-

cedendo usque ad unionem hypostaticam, lumen gloriæ & visio beatifica sunt aliquid nobilius gratiâ, & præstantiorem constituens participationem Dei. Quod sint aliquid per se nobilius, probatur, quia finis est omnium per se optimum, & melius iis quæ ad ipsum ordinantur, si ex natura rei est finis, & illa ex natura rei ordinantur ad ipsum. Atqui ex natura rei, & per se, gratia sanctificans ordinabilis est, & de facto ordinatur ad visionem beatificam, & propius etiam ad talem visionem accedit habitus illam efficiens, sive lumen gloriæ, quàm gratia sanctificans. Ergo visio beatifica est aliquid nobilius quàm gratia sanctificans, ipsum quæ lumen gloriæ est adhuc ipsâ superius: unde gratia ipsum non causat nisi per moralem exigentiam, interveniente Dei munificentia, quem decet eum qui ita dispositus est, sic evehere altius, ac beare. Quod confirmatur, & declaratur, quia cum Deus justis retribuit præmium visionis beatificæ propter gratiam, & opera per ipsam dignificata, non servat proportionem arithmeticam, veluti cum homo solvit mercedem operario, sed geometricam, consistentem in hoc quòd præmiatur ut Deum decet, eo modo quo rex majori compensat præmiò sibi dicaturn quàm compensaret inferior Dynasta. Quæ proportio non tollit  
condignitatem



QUÆST. I. *De Supernaturalitate.* 25  
condignitatem operum ad tale præmium,  
quia ad eam satis est si mereantur id à tali  
præmiatore, tam potente, ac munifico ac-  
cipere. Et hanc doctrinam tradit ipse Ri-  
palda disp. 16. sect. 6. & probat. primò ex  
Sancto Thoma in 2. dist. 2. q. 1. 3. in cor-  
pore, ubi dicit justos non accipere à Deo  
præmium secundum æqualitatem rei ad  
rem, sed secundum æqualitatem propor-  
tionis, ut quemadmodum posuimus opus,  
quod ut à nobis existens, aliquid conside-  
rabile fuit, ita ipse liberaliter compenset,  
prout ipsum decet. *Secundum æqualitatem,*  
*inquit, proportionis ex condigno meremur*  
*vitam æternam. Attenditur enim æqualitas*  
*proportionis, quando æqualiter se habet hoc*  
*ad illud, sicut aliud ad alterum. Non enim*  
*majus est Deo vitam æternam tribuere, quàm*  
*nobis actum virtutis exhibere: sed sicut hoc*  
*congruit huic, ita illud illi. Id est, sicut nos*  
*hoc facere laudabile & magnum fuit, ita*  
*illum decet, & conveniens est tantum re-*  
*pendere præmium. In quo Sanctus Thomas*  
*non comparat duo tantum, nempe opus*  
*cum præmio, sed duo jam comparata, cum*  
*duobus item comparatis, ita ut quemadmo-*  
*dum se habent duo priora ad se invicem,*  
*nempe homo & opus, ita se habeant duo*  
*posteriora similiter ad se invicem, nempe*  
*Deus & præmium, præsuppositis illis duo-*  
*bus prioribus, & servatâ non æqualitate*

arithmeticâ cum ipsis, sed proportionem geometricâ, quæ jam collata confert ad se invicem, ac totalem ordinem ex omnibus inter se comparatis resultantem facit.

11. Probatur secundò hoc ipsum ratione, quia quod proponitur ut præmium & bravium, debet esse ipso opere, seu re in qua consistit meritum, considerabilius, & melius. Alioqui non satis appareret Agonothetæ in proponendis præmiis, & honorandis meritis munificentia. Et quanto ipse Agonotheta est major, ac potentior, tanto debet meritis præstantiora constituere præmia. Atqui visio beatifica, & quæ ex ea consequuntur, proponuntur à Deo, etiam justis & habentibus gratiam, ut præmium & bravium certantibus in stadio. 1. Cor. 4. & ad Philipp. 3. Et licet respectu eorum quibus datur tantum ut hæreditas, nempe respectu eorum qui non habent gratiam nisi sacramentalem in Baptismo acceptam, itémque respectu aliorum quatenus habent ex opere operato in aliis sacramentis infusam, talis visio non habeat propriè rationem præmii, non minùs Deus se gerit liberaliter, & compensat ut Deum decet, attenditque æqualitatem, non rerum, sed proportionis, ita ut taliter compenset qualiter convenit hominem habentem talem gratiam, à tali præmiatore compensari, non minùs, inquam, id facit, quàm quando



compensat opera, quia habentibus gratiam ut duo, isto modo acceptam, tantam dat gloriam, seu tam perfectam visionem, quantam daret si esset parva per opera, seu quantam dat habentibus talem gratiam per sua opera acquisitam. Quare titulus ille hæreditatis non constituitur per jus aliquod altius faciens majorem condignitatem cum gloria, & minuens prædictæ munificentiae proportionem, sed per negationem operum, ratione quorum possit propriè appellari præmium. Unde stat semper præmium gratiæ esse ipsâ gratiâ majus ac præstantius; & gratiam habere cum illo non æqualitatem rei ad rem, sed proportionis ad id quod Deum dare decet. Quo posito, cum visio beatifica sit essentiale præmium gratiæ, dicendum est visionem esse gratiâ præstantiorem. Et similiter lumen gloriæ, quod est causa per se visionis, & magis illam continet, quàm gratia, quæ non potest illam causare nisi intercedente munificentia præmiatoris rependentis bonum ipsâ re meritoriâ per se sumptâ majus; ipsum, inquam, lumen gloriæ excellentius est quàm gratia, & supra naturæ conditionem magis elevatam.

12. Jam quòd per visionem, & ipsâ mediante per lumen gloriæ, perfectius possideatur Deus, quàm per gratiam, probatur primò, quia possessio quæ fit per visionem

est formalis beatitudo, & fundamentum fruitionis, & per eam videns transformatur in Deum, juxta illud 1. Ioan 3. *similes ei erimus quia videbimus eum sicuti est.* Quæ omnia non conveniunt gratiæ, nec continentur in ea nisi ut in principio moraliter causativo, mediante motione voluntatis divinæ, quæ prædicto modo compensare velit. Probatur secundò, quia participatio divinitatis per gratiam, consistit potissimum in hac similitudine cum sanctitate Dei, ut quemadmodum Deus non nisi bene & honestè agit, & ab omni malo est aversus, ita gratia sit principium ad omne bonum inclinans, & sic avertens à malò, ut homo per gratiam operando non agat nisi bene, & per eam malè non possit agere. Hæc, inquam, est participatio divinitatis, maximè intrinseca gratiæ, & propter hanc participationem Deus specialiter diligit justos, & per dilectionem ac complacentiam moraliter habitat in illis, & ut diligens ipsos, hoc ipso possidetur ab illis: non autem aliter illis conjungitur, quasi gratia esset vinculum divinitatem physicè uniens justis. Quam sententiam ipse Ripalda disp. ult. sect. 10. num. 127. vocat suspectam, singularem, & Theologis indignam, ex qua nimirum sequitur justos esse physicè Deos, sicut quod habet albedinem est album, quia omnis forma physicè unita sub-

QUÆST. I. *De Supernaturalitate.* 29

jecto, dat ei physicam suam denominationem. Posito igitur quòd gratia non faciat justos Dei participes, nisi prædictis modis, nempe per similitudinem cum sanctitate Dei, inclinando scilicet tantum in bonum, per moralem inhabitationem Dei sibi in illis complacentis, & per eam quæ inde oritur Dei ut diligentis velut passivam possessionem, dico lumen gloriæ, & visionem beatificam melius illa omnia præstare, quàm gratiam sanctificantem, quia non dant tantum aptitudinem & potentiam cum inclinatione ad bonum, sed necessitant ad actionem quæ est maximæ bonitatis, nempe ad amorem Dei, qui etsi non sit meritorius in beatis defectu imputabilitatis, quæ oritur ex libertate, habet tamen in eminenti gradu honestatem, & conformitatem cum ratione, quæ sit esset imputabilis per libertatem, maximè esset meritoria. Item non tantum hoc habent illa principia quòd iis utens non possit male operari, sed habentem faciunt necessariò positivè aversum ab omni malo, siquidem odium omnis mali virtualiter saltem & æquivalenter est inclusum in perfecto amore Dei, cuiusmodi est beatificus quem illa causant. Præterea Deus potiori jure diligit beatum, cui communicavit lumen gloriæ, & visionem sui, quique ipsum ita perfectè diligit, quàm viatorem existentem præcisè in statu gra-

tiæ, quia quod excellentius & melius est, ab eo magis diligitur. Quòd si gratiæ id quasi proprium attribuitur, quòd reddat Deo charos, id intelligitur hoc sensu quòd ab ipsa sit prima causalitas & motio, qualis potest esse ex parte nostri, sive potius ab ipso Deo in nobis, ad promerendum ejus in nos amorem, inquantum scilicet per gratiam reddimur Dei amore digni, cum antea non essemus digni: sed non debet illud hoc sensu intelligi, quòd nihil superveniens gratiæ reddat amabiliores quàm ipsa gratia, neque amabilitati per eam constitutæ aliquid majus addi possit, quia ad hoc necessarium esset ut nihil daretur gratiâ excellentius, nec magis inclinans ad bonum, nec efficacius avertens à malo: quod omnino est falsum. Et hinc Deus etiam potiori jure inhabitat in beatis inexistentiâ morali, quàm in justis non beatis, itémque magis possidetur ab illis, cum hæc inhabitatio & velut passiva possessio constitutatur per amorem & complacentiam, quæ est major circa beatos. Quare absolutè major est & perfectior participatio divinitatis per lumen gloriæ, & visionem beatificam, & amorem inde sequentem, quàm per gratiam præcisè sanctificantem. Et hinc ulterius sequitur non bene, nec satis explicari supernaturalitatem luminis gloriæ, & visionis beatificæ, & amoris beati-

QUÆST. I. *De Supernaturalitate.* 31

fici ipsis proportionati per connexionem cum gratia sanctificante, quia quod excellentius est, & excellentiorem Dei possessionem, ac fruitionem constituit, melius per se supernaturale asseritur, quàm per respectum & connexionem cum alio minùs excellenti dono, & inferiorem constituyente participationem Dei.

13. Quòd si stando intra supernaturalia quæ sunt puris creaturis communia, dantur aliqua quorum supernaturalitas non bene explicatur per connexionem cum gratia sanctificante: multo magis si supernaturalitas sumatur universaliùs & abstractiùs, dabitur aliquid cujus supernaturalitas minùs adhuc bene constituatur in eadem connectione cum gratia sanctificante, quæ respectu talis boni adhuc excellentioris & infinitè præcellentis, ignobilior sit. Nam unio hypostatica seipsa essentialiter sumpta, est omnium extra Deum possibilium excellentissimum opus, ac proinde per suam essentiam, seu per unionem immediatam, & substantialem cum Deo, præcisis omnibus aliis, maximè est supernaturalis. Verum quidem est ei deberi summam gratiam sanctificantem, & eam per seipsam maximè sanctificare, reddendo impeccabilem naturam quam unit personæ divinæ, & exigendo visionem beatificam, efficiendo dignam cultu latriæ: sed ista omnia sunt tan-

tum effectus secundarii illius unionis, quibus non cogitaris potest concipi hoc quo nihil est majus, nempe unio cum Deo in identitatem personæ, faciens hominem Deum, & filium Dei naturalem. Perinde igitur est cum ipsa dicitur supernaturalis per connexionem cum gratia, ac si quis beatitudinem constituat formaliter ac differentialiter non in possessione Dei, sed in aliquibus ejus planè accidentalibus complementis.

14. Refellitur præterea illa sententia, quia ipsius gratiæ supernaturalitas malè constituitur in connexionem logica per unionem quam gratia habeat cum seipsa, quia absolutè connexio duo dicit, physica quidem connexio, duo realiter distincta; metaphysica autem, seu logica, duo formaliter ac virtualiter distincta, sicut est differentia cujusque rei, & quævis proprietas ejus, putà rationale ac risibile. Quia igitur inter rem quamlibet & essentiam ejus non est distinctio formalis, putà inter hominem & animal rationale, cum sint tantum duo conceptus formales ejusdem conceptus objectivi, unus implicitus, alter explicitus: nihil habet connexionem cum seipso, & connexio per identitatem in iis quæ etiam formaliter sunt idem, est aliquid per se implicans, sicut distinctio inter idem & seipsum, etiam formaliter idem. Quare incongruè

dicitur gratia esse supernaturalis per connexionem cum seipsa, sicut si homo diceretur rationalis per connexionem cum seipso.

15. Atque ex his argumentis solutio habetur ad rationes Ripaldæ. Nam ad id quod dicit, connexionem cum gratia esse aliquid omnibus supernaturalibus commune, & distinctivum eorum à non supernaturalibus, respondendum in ipsa gratia non dari talem connexionem, & ipsam non esse primum, neque præcipuum in multis supernaturalibus, nempe in lumine gloriæ, in visione beatifica, & amore item beatifico, & maximè in unione hypostatica, quæ ante illam connexionem, etiam secundum nos, rationem supernaturalitatis habent multò melius quàm per ipsam. Præterea ex prædictorum præeminentia, & excessu excellentiæ supra gratiam, refellitur illa alia ratio quâ dicit gratiam esse id quod est elevatissimum inter omnia quæ naturam supra omnem suam exigentiam evehunt. Itaque nulla firma ratione subsistit ejus sententia.

16. Ad authoritatem scripturæ & Conciliorum, concedo rectè argui supernaturalitatem donorum quæ ad pietatem & justificationem conferunt, ex eo quòd ad habendam gratiam conducant: sed nego habitudinem illam & connexionem cum gratia præcisè sanctificante, esse id per quod maximè,

& universaliter omnium supernaturalium ratio intelligitur, cùm, ut dictum est, unionis hypostaticæ, & visionis beatificæ supernaturalitas sine hac connexionè priùs & meliùs, quàm per ipsam intelligatur, & ipsa dona quæ ad gratiam sanctificantem conferunt, meliùs etiam omnem naturæ exigentiam secundùm nos superent per hoc quòd ducunt ad immediatam participationem Dei secundùm se, quæ sit per visionem, quàm per hoc præcisè quòd ad gratiam sanctificantem conferunt, cùm ipsius etiam gratiæ supernaturalitas non meliùs quàm per causalitatem quam habet in illam ipsam participationem & visionem, quæ est ipsâ gratiâ multo præstantior, innotescat.

17. Alia est recentiorum opinio apud Ripaldam citatâ disp. sect. 2. non posse unam assignari rationem supernaturalitatis absolutè sumptæ, quia radix & causa rationis illius in qua omnia supernaturalia conveniunt, nempe quòd superent omnes vires & exigentiam omnis naturæ creatæ, aut creabilis, non una est, sed omnino varia in diversis. Idque declarari potest à contrario, quia si quæritur quænam sit radix & causa naturalitatis sumptæ prout opponitur supernaturalitati, seu consistentis in eo quòd nihil in re aliqua includatur quod sit supra vires, aut exigentiam causarum naturalium,



QUÆST. I. *De Supernaturalitate.* 35  
non una omnino est, sed totuplex quot sunt  
species perfectionum naturalium, quibus  
res creatæ secundum suam propriam exigen-  
tiam complentur.

18. Hæc sententia quoad aliquid pro-  
batur, & simpliciter impugnatur. Nam  
verum quidem est supernaturalitatem cu-  
jusque rei in differentia ejus ultima potissi-  
mum consistere, cum talis differentia sit id  
quod in illa re nobilissimum est, & negari  
non possit rem quæ est supernaturalis, hoc  
maximè habere per id quod est in ipsa no-  
bilissimum. Verum quia illa supernaturali-  
tatis explicatio parum notitiæ ingenerat,  
dum nimirum recurritur, non ad naturam  
unius rei, quod jam non multum lucis affe-  
ret, sed ad totidem naturas quot sunt su-  
pernaturalium rerum species, nihil in eis  
distinguendo unde proveniat ille excessus  
quo superant exigentiam omnis substantiæ  
creabilis; non est dubium quin si possit ab  
illis omnibus quæ supernaturalia sunt, ab-  
strahi aliqua communis ratio, saltem ana-  
logicè una, per respectum nimirum ad  
unum, etsi illa non sit in singulis specialiter  
differentialis, modò tamen sit ejusmodi, ut  
ex ipsa secundum nostrum concipiendi mo-  
dum congruè inferatur ille excessus; non  
est, inquam, dubium quin sit melius talem  
assignare rationem, quàm respondere nul-  
lam esse ejusdem excessus determinatam

rationem, & illam esse ex singulis supernaturalium rerum speciebus ac naturis pendendam: quod plane non satisfacit, & nihil propriè docet. Atqui allata est una ejusmodi ratio ab omnibus entibus supernaturalibus abstracta, & analogicè una, nempe per respectum ad unionem immediatam cum Deo, & per eam rectè secundum nos explicatur quare ea quæ supernaturalia sunt, superent exigentiam omnis substantiæ creabilis, quia nimirum entibus potentialibus, & infinitè à supremo divinitatis gradu distantibus, non convenire potest per proprias ipsorum vires id quod in causa sui principali requirit identitatem ordinis cum ipso Deo cujusmodi est potestas attingendi ipsum immediatè ut in se est, cujus rationis congruitas supra est explicata. Ergo meliùs est hanc afferre rationem supernaturalitatis secundum nos constitutivam, quàm recurrere ad omnes entium supernaturalium species, nihil in illis assignando aut distinguendo, unde prædictus excessus proveniat. Et similiter in assignanda naturalitatis prout supernaturalitati opponitur ratione, dico meliùs satisfieri si dicatur eam consistere in hoc quòd iis quæ naturalia sunt, nec per se formaliter conveniat unio immediata cum Deo ut in se est, nec potestas eam per proprias vires acquirendi, quàm si ad singulas talium entium rationes speci-

QUÆST. I. *De Supernaturalitate.* 37  
ficas, nihil ulterius assignando aut distinguendo, recurratur. Illa enim impotentia & defectus rectè & congruè constituit omnia naturalia infra genus entium quæ vel formaliter faciunt illam unionem, vel ad eam ducunt ac conferunt: ille autem recursus ad específicas diversitates, etsi hoc habeat boni, quòd nihil includat falsi, non satis affert lucis, & nihil explicat. Debemus autem in assignanda ratione rei constitutiva aliquid assignare quòd rem ipsam, quantum fieri potest, aptè & melius ac congruentius, quàm quidvis aliud notificet.

---

## SECTIO QUARTA.

*Duæ aliæ sententiæ refelluntur.*

1. **P**Ræter relatas ac refutatas generales de supernaturalitate sententiæ, duæ sunt aliæ quarum una particularem actuum, altera habituum simul atque actuum supernaturalitatem aliter explicat, quàm supra est statutum. Quare illæ hîc quoque refellendæ sunt.

2. Prima sententia quam tenent Delugo, de fide disp. 9. sect. 1. Herice disp. 48. c. 4. Konink disp. 5. dub. 1. & 2. Granadus disp. 5. proæmiali sect. 5. docet supernaturalitatem actuum peti ex principiis effectivis, & nihil aliud assignat in quo illa

supernaturalitatis ratio consistat. Nempe dicit actum fidei esse supernaturalem, quia non potest ille, secundum suam differentiam & modum quo fit ab homine iusto & utiliter ad salutem, fieri per solas vires naturæ, sed ad ejus productionem connaturalem requiritur habitus fidei, & illustratio prævia supernaturalis, & imperium supernaturale voluntatis, & præterea Deus debet se habere ut causa particularis ejus, conferens id quod non potest esse ab alia causa principali.

3. Hæc sententia, etsi nihil falsum dicat, deficit tamen in modo explicandi id de quo est quæstio, quia non assignat rationem illam ob quam talis actus indiget talibus causis, & maximè Deo ut causa sui particulari. Hæc autem ratio assignata est à nobis, & constituta in hoc quod in tali actu sit vis remotè causativa unionis immediatæ cum Deo secundum se spectato: ita ut si quis agat conformiter ad hunc actum, ad illam unionem ac possessionem sit perventurus: quâ ratione nihil secundum nostrum concipiendi modum est prius in illis omnibus donis supernaturalibus, per quod intelligentur indigere causa supra naturam elevata. Quare cum nihil tale assignet illa sententia, idque præcisè afferat quod supernaturalitas relativè sumpta, & secundum vim vocis importat, meritò quo-ad hoc non probatur.

QUÆST. I. *De Supernaturalitate.* 39

4. Multi communiter eandem sententiam impugnant quia universim non bene ex principio productivo colligitur qualitas, & species actûs, siquidem possunt actus ejusdem speciei produci per principia diversæ rationis, & à principiis ejusdem ordinis possunt esse actus diversæ speciei: quod utrumque diversis exemplis patet. Primum quia motus quos Angeli specie diversi cœlo imprimunt, sunt ejusdem speciei, si sunt ad similes loci differentias; & duo calores quorum unus à sole, alter ab igne sunt producti, sunt ejusdem essentiæ. Secundum autem, quia ab intellectu potest esse assensus & dissensus circa idem, & à voluntate amor aut odium, itémque volitio & nolitio, stante identitate objecti. Ergo non bene supernaturalitas explicatur per hoc quòd aliquid à tali causa principali produci debeat, nempe à Deo, & non possit à substantia creata nisi elevata causari.

5. Hæc impugnatio non valet, quia aliud est si dicatur, hoc talis est speciei, quia est à tali principio: aliud si dicatur, hoc ob suam excellentiam non potest esse nisi à tam excellenti principio, nempe à Deo ut causa particulari, & ab habitibus infusis ut instrumentis, itémque ab auxiliis supernaturalibus creatam substantiam elevantibus: ergo est præstantissimum. Prima consequentia non valet, quia idem prin-

cipium, etsi de se excellentissimum, potest causare effectus omnino diversos, & aliquos infimi ordinis. Unde ex dependentia effectûs ab ipso non bene colligitur species, neque nobilitas effectûs. Secunda autem valet, quia universaliter illud quod non potest esse nisi à causa nobilissima, idque non quia ante ipsum non datur aliquod subiectum ex quo educi possit, quo modo materia prima & anima rationalis & Angeli sunt à Deo, sed quia licet detur & præexistat subiectum à quo educi possit, nulla alia causa inferior, ipsi proportionata est, illud, inquam, præstat de se omnibus effectibus illarum causarum inferiorum, éstque altioris ordinis quàm illæ ipsæ causæ. Impugnant autem prædicti auctores explanationem supernaturalitatis petitam ex respectu ad principia, quasi primo modo ex talibus principiis ipsa inferretur, non autem secundo modo, quod falsum est.

6. Secunda sententia supernaturalitatem actuum & habituum petit ex objecto, quod formaliter sumptum semper sit diversum respectu actûs naturalis & supernaturalis circa idem objectum materiale. Hanc tenent Suares lib. 2. de gratia cap. 11. Vasquez. 1. 2. disp. 86. c. 6. & apud hos multialii, éstque communior Theologorum opinio. Probant eam multi, quia cùm universim actus specificentur ab objectis,  
id



QUÆST. I. *De Supernaturalitate.* 41  
id quoque debet verum esse de actibus supernaturalibus.

7. Sed facile ad rationem ita propositam respondetur, hoc sensu specificari actus ab objectis, quòd quando objecta sunt diversa, actus necessariò differant specie: sed non quod circa idem objectum non possint esse actus specie diversi, putà si idem cognoscant homo & Angelus, imo mille Angeli omnes specie diversi. Item si homo idem amet cum magna appretiatione, vel sine tali appretiatione; efficaciter, vel ineffaciter: ad quæ omnia est liber circa idem sibi cum indifferentia propositum objectum.

8. Aliter ergo ab aliis proponitur illa ratio, nempe in hunc modum. Antequam actus attingat objectum, objectum est attingibile, putà intelligibile, aut expetibile: & antequam taliter attingatur, est tali modo attingibile. Itaque antequam attingatur modo naturæ indebito, seu supernaturaliter, est attingibile illo modo. Quo posito bene redditur ratio cur actus sit supernaturalis, quia objectum attingit pro-ut erat modo naturæ indebito attingibile.

9. Ad hoc respondeo primò in hoc discursu supponi falsum, nempe quòd attingibilitas illa sit objectum formale actus, quo objectum tali modo attingitur. Nam, ut bene notat in alia materia Tannerus

disput. prolegomenâ in Theologiam q. 3. dub. 3. id quod non cognoscitur, non est objectum formale cognitionis : & quod non amatur, non est objectum formale amoris. Atqui attingibilitas illa neque cognoscitur per actum cognitionis supernaturalis, neque amatur per actum amoris item supernaturalis. Nam actus fidei, verbi gratiâ, non habet pro motivo nisi auctoritatem Dei, non autem attingibilitatem illius auctoritatis per actum qui circa eam versetur modo naturæ indebito. Item actus amoris habet pro motivo bonitatem, & excellentiam Dei, quia hoc solum cognoscit qui Deum amat : unde hoc solum vult. Nihil enim volitum nisi cognitum. Itaque attingibilitas illa non est objectum formale actûs supernaturalis. Et universim id quod dicitur objectum formale sub quo in actibus ac scientiis, quod non est aliud nisi dirigibilitas actûs, aut rei intelligibilitas, non est objectum propriè loquendo, quia non obicitur neque dirigitur, aut consideratur, sed est conditio in objecto materiali præsupposita, quæ nisi inesset ei, non posset circa illud versari ars aut scientia. Positò igitur quòd attingibilitas illa propriè loquendo non sit objectum, male per ejus diversitatem formalem probatur ubicumque sunt actus specie diversi, illis semper præsupponi objecta formalia specie diver-



QUÆST. I. *De Supernaturalitate.* 43  
sa, à quibus proinde semper actus specificari possint.

10. Dices, etsi attingibilitas illa non propriè mereatur nomen objecti, est semper ratio sub qua actus fertur in objectum: & quoduplex est actuum differentia, totuplex est diversitas ejusmodi rationum, quæ semper ipsis præsupponuntur. Quo posito, rectè dicitur actum talis esse speciei, quia attingit objectum sub tali ratione, & esse supernaturalem, quia attingit objectum pro ut erat modo naturæ indebito attingibile. Nam hoc bene actum illum distinguit ab omni alio, & in primis à naturali, qui idem quoque objectum attingit, sed sub alia ratione, nempe quatenus erat modo naturæ debito attingibile. Contra hoc.

11. Respondeo secundo, objectum, antequam taliter attingatur, habere quidem quòd sit taliter attingibile, sed non habere nisi dependenter à tali principio, & per ordinem ad ipsum. Quod ut melius intelligatur, adverte aliud esse quod objectum sit de se attingibile per actum intellectûs aut voluntatis, suæ intelligibilitati aut amabilitati conformem: aliud quòd sit attingibile per actum, qui cum sua illa conformitate habeat talem aut talem perfectionem specificam, sitque vel naturalis, vel supernaturalis, humanus, Angelicus, aut divinus. Primum quidem omni objecto de se con-

venit. Nam ex eo quòd res est , repræsentabilis est per conceptum sibi conformem, idquæ est consequens ad esse ipsius. Secundum autem non habet res ex se , sed per relationem petitam à qualitate principii. Alioqui cum idem concipitur ab homine & Angelo , differentia conceptûs Angelici ab humano non erit à natura Angeli & hominis , sed ab objecto ; quod suppono esse corporeum. Et quia res illa videtur quoque à Deo per visionem infinitè perfectam , infinita perfectio visionis divinæ petetur non ex perfectione intellectûs divini , sed ex re illa pro-ut est attingibilis per conceptum infinitum : itaque ipsa sub sua illa propria ratione formali erit radix & causa suo modo illius infinitatis. Idquæ verum erit etiam de ipso malo, putà de peccato Anti-Christi futuro , quod ideo per præscientiam infinitè in se perfectam præcognoscetur , quòd habeat in se attingibilitatem terminativam conceptûs infiniti. Quæ cum absurdissima sint , dicendum est objectum habere quidem ex se quod sit intelligibile aut amabile per conceptum aut amorem sibi conformem , sed nihil ultra , quia nihil ultra sequitur ex eo quod sit tale ens , aut talem habeat bonitatem , seu convenientiam. Quòd autem sit intelligibile , aut amabile conceptu aut amore qui sint talis determinatè speciei quoad suam entitatem , pu-

QUÆST. I. *De Supernaturalitate.* 45  
tà quòd sit humanus, vel Angelicus, vel  
divinus, dicendum est hoc habere ex rela-  
tione ad potentiam talem, nempe huma-  
nam, Angelicam, aut divinam. Unde &  
idem erit de attingibilitate per actum natu-  
ralem, aut supernaturalem. Itaque absolute  
ratio talis actûs effectivè petetur à potentia,  
formaliter autem consistet in sua propria  
ratione, putà in tali repræsentationis aut  
adhæSIONIS modo; qui tendentiæ modus  
postulet tale principium; & à possibilitate  
illius tendentiæ per tale principium in ejus-  
modi objectum, objectum ipsum dicetur  
atingibile per talem actum. Confirmatur,  
& declaratur ulterius, quia non potest in  
re ignobili & infima contineri aliquid ex-  
cellentissimum: alioqui plus esset in effectu  
seu consequente, quàm in causa seu radi-  
cè. Atqui circa rem corpoream, putà cir-  
ca solem potest dari cognitio supernatura-  
lis ad ipsum ut objectum formale termina-  
ta, qualem habuit Christus de omnibus  
creatis, & innumeris possibilibus, præter  
visionem eorum in Deo. Igitur supernatu-  
ralitas talis cognitionis non petitur ex ob-  
jecto. Minor quo-ad illud, quòd talis cog-  
nitio habere possit solem pro objecto for-  
mali, & non sit opus ut per talem actum  
aliud attingatur, in quo sol videatur, pro-  
batur quia unumquodque ens per se sum-  
ptum est repræsentabile per quodlibet in-

telligendi principium, ita-ut dato tali principio habeat ad illud relationem repræsentabilis, & Deus ipse, præterquam quòd omnia novit in seipso, habet cognitionem quæ directè & immediatè fertur in ea omnia sumpta in seipsis. Cujus rei ratio est quia ut ostendi agendo de scientia Dei, intellectus non minùs infinitus quàm finitus, & multò potiori ratione infinitus, habet pro objecto formali per se repræsentabili, omne verum. Et sic illud immediatè ac directè cognoscere est perfectio simpliciter simplex, & contrarium est defectus, ut pote limitatio cognitionis directæ, quod proinde locum non habet in Deo. Et nisi Deus res creatas etiam directè & immediatè in seipsis intelligeret, aliquid erit verum, & pro eo naturæ instanti in quo jam erit verum, nondum erit cognoscibile à Deo, cùm tamen jam sit à nobis affirmabile. Sumo enim determinationem Petri ad certum actum conditionatè futurum, & illum specto ut priorem origine determinatione Dei ad concurrendum, quia verè causa creata libera determinat Deum ad concursum: & sic determinatio ejus est prior origine quàm determinatio Dei. De illa igitur determinatione ut antecedente suo modo determinationem Dei, sic dico. Jam illa est in se intelligibilis, quia habet rationem formalem entis: & si quis de illa

fic sumpta diceret, Petrus se determinabit ad talem actum, etsi id temere esset dictum, esset tamen verum, quia diceret futurum quod re ipsa futurum est. Deus tamen in illo priori talis determinatæ futuritionis & veritatis ejus, nondum intelligeret futuram illam determinationem si res non videt in seipsis directè & immediatè; quia posito hoc non videbit illam nisi in sua potentia ut determinanda, quod est ratione & originis ordine posterius ad determinationem ipsam ut futuram à creaturâ. Non videbit, inquam, nisi sic, quia nihil est in Deo prius quod habeat necessariam connexionem cum illa futuritione determinationis, ante quam omnia sunt indifferentia ad illam, non tantùm in ipsa creatura libera, sed etiam in Deo. Igitur aliquid non erit intelligibile à Deo cùm primùm erit verum, nisi quidlibet sit ab eo directè & immediatè cognoscibile. Posito igitur quòd Deus rem creatam, etiam infimam, seipsa cognoscat, cognitione utique infinita; possibilis quoque est circa rem merè naturalem, & infimam cognitio supernaturalis ad eam per se sumptam directè terminata. Nam circa quod potest dari cognitio divina infinitè perfectâ, non implicat dari supernaturalem creatam finitè perfectam. Et quia ejus quod nobilissimum est, perfectio non potest provenire ex re infima & ignob. lis super-

naturalitas quæ erit in tali cognitione non petetur ab objecto ipsius : & tam id erit verum quàm verum est infinitatem cognitionis divinæ de tali objecto per se sumpto non peti ex ipso. Quoad hoc enim non est disparitas. Et argumentum adversariorum, si valeret pro uno, valeret etiam pro altero.

12. Instabis pro adversariis, supernaturalitas visionis beatificæ non probatur nisi ex objecto. Par autem est ratio de aliis actibus supernaturalibus. Ergo. Respondeo negando antecedens. Probatur enim ex propria tendentia visionis circa tale objectum, nempe quia circa tale objectum immediatio cognitionis, & ejus ut in se est notitia, tantæ est excellentiæ, ut postulet pro causa principali principium ejusdem ordinis cum ipso objecto, quod non potest esse nisi ipse Deus. Et hæc ratio ulterius astringitur, & stabilitur, quia omne aliud principium attinget Deum per modum ipsius principii; ac proinde per modum entis potentialis eo modo quo nos spiritualia attingimus, & repræsentamus nobis per modum corporum, quod est contra rationem visionis.

13. Hic adverte etsi in probanda supernaturalitate visionis interveniat consideratio objecti, & excellentiæ ejus infinitæ, non tamen inde probari supernaturalitatem  
nisi

QUÆST. I. *De Supernaturalitate.* 49  
nisi supposito quòd tale objectum directè  
& immediatè, & prout in se est, attingatur : quia alioqui circa illud idem potest dari notitia per discursum quæ non erit cognitio ejus ut in se est. Itaque formaliter loquendo probatio supernaturalitatis petitur ex modo illo tendendi : qui modus est medius terminus ex quo à priori & per differentiam ipsius visionis, supernaturalitas ejus infertur hoc pacto. Omnis actus immediatè Deum ut in se est attingens, est in entitate supernaturalis. Visio Deum immediatè ut in se est attingit. Ergo visio est in entitate supernaturalis.

---

## SECTIO QUINTA.

*An impossibile fuerit hominem sine ullo donò supernaturali creari.*

I. **C**Um fieri possit ut alicui negari non debeat id ad quod ex se jus non habet, eò quòd indigentia ejus tanta sit, ut qui eam sublevare potest, non rectè sit acturus, nisi id præstet ; existimarunt multi, nec defunt qui censeant, hominis naturam ita de se indigam esse, & impotentem ad bonum, ut necessarium fuerit, posito quòd Deus hominem creare vellet, aliquod ei supernaturale donum infundi, & gratiam concreari, non quasi

proprietatem aut complementum ejus naturæ debitum, sed ut subsidium, ac principium sine quo homo non posset bene vivere, neque à vitiis abstinere; unde homo innocens, qualis fuit in sui creatione ante omnem suum actum, non potuerit à Deo infinitè bono in tam misero statu deferri. Sic impossibilem fuisse dicunt puræ naturæ statum; & gratiam, etsi non debitam fuisse hominis per se sumpti exigentiæ, at indigentia negari à Deo non potuisse, contendunt.

2. Refellitur hæc sententia, primò quia nimium affinis est, & reipsa conformis, etsi verbis & modo explicandi differat à doctrina asserentium gratiam esse homini naturalem, & complementum ipsi in sua creatione debitum, quod docebat Bajus, cujus istæ propositiones à Pio V. & postea à Gregorio XIII. damnatæ sunt, prima, quæ inter septuaginta quinque erat ordine vigesima, *Humana natura sublimatio, & exaltatio in consortium divina natura, debita fuit integritati primæ conditionis, ac proinde naturalis dicenda est, non supernaturalis.* Secunda, quæ erat numero vigesima sexta. *Integritas primæ conditionis non fuit indebita humana nature exaltatio, sed naturalis ejus conditio.* Nimiùm, inquam, affinis est illa sententia huic damnatæ doctrinæ. Nam ideo



QUÆST. I. *De Supernaturalitate.* 51  
tantum debitam & naturalem gratiam  
volebat Bajus, quia sine ea dicebat homi-  
nem totum de se in malum pronum, non  
potuisse rectè agere, unde nec potuerit à  
Deo ante peccatum in tali indigentia de-  
seri. Neque enim debitam fuisse volunt  
gratiam excellentiæ hominis, quo modo  
collatio ipsius gratiæ non fuisset sublima-  
tio & exaltatio, sed impotentia ad fa-  
ciendum sine ea bonum, & ad evitandum  
malum, à quo abstinendi debuit à Deo  
habere potestatem.

3. Refellitur secundò, quia verè non  
est talis hominis natura, maximè ante  
peccatum spectata, ut sit impotens ad  
bene vivendum, & abstinendum à vitiis.  
Habet enim homo rationem quæ dicat  
virtutem esse vitio præferendam, & vi-  
tium esse maximum malum: unde potuisset  
homo, etsi difficulter, illud evitare. Et  
licet non perfectè sine lumine gratiæ &  
fidei cognosceret spiritualia bona & ani-  
mæ mala, sufficienter tamen cognovisset  
ad amandam virtutem, & fugienda quæ  
planè rationi repugnant: ac proinde in ta-  
li statu à Deo relinqui potuit. Quod ex-  
pressè docet D. Augustinus lib. 3. de li-  
bero arbitrio, c. 2. ubi sic habet. *Ignoran-  
tia & difficultas, etiamsi essent hominis  
primordia naturalia, id est, etiamsi Deus  
hominem ita condidisset, ut non dedisset*

ei gratiæ lumen ac vires, *nec sic culpandus esset Deus, sed laudandus*, de bono scilicet, non tanto, sed verè bono. Et hæc, quæ fuisset, laudabilitas conditi talis statûs, contradictoriè opponitur impossibilitati derelictionis in illo ipso statu. Quare indigentia hominis ea quidem fuit ut congrueret eum elevari, sed non talis ut id necesse esset.

4. Refellitur tertiò, quia si ex defectu gratiæ in statu puræ naturæ, secutura esset in homine necessitas ac determinatio ad malum, creatura rationalis, sumpta secundùm ea præcisè quæ ipsi essentialia sunt, esset de se perversa & mala: ac proinde non posset à Deo produci, etiam cum gratia corrigente malignitatem ejus & determinationem ad malum, quia per se est illicitum producere principium determinatum ad malum, etsi producat cum principio impediante effectum ejus. Unde non potest Deus infundere alicui habitum mendacii, etiam cum visione beatifica, quæ ad omnis mali, ac proinde & mendacii odium necessitaret. Falsum igitur est naturam humanam esse de se determinatam ad malum, cum impotentia ad bonum: Unde nulla est ratio negandi ipsam posse à Deo secundùm ea præcisè quæ ipsi propria & essentialia sunt, sine ullo dono supernaturali produci.

SECTIO SEXTA.

*De Supernaturalibus quoad modum.*

I. **N**ON ea tantum naturæ vires superant, quæ sunt altioris ordinis in ratione entis quam omnes substantiæ creabiles; sed modus etiam producendi quovis effectus naturales sine certis concausis, aut dispositionibus, aut contra naturæ ordinem; itémque destructio eorum quæ intra naturæ ordinem à Deo solo pendent; hæc omnia sunt omni creatæ atque creabili substantiæ impossibilia. Etenim non quævis causa potest producere quomodo-cunque id quod non est supra virtutem ejus: & limitatio virtutis connexam habet indigentiam dispositionum in subiecto, & multo magis indigentiam subiecti, & concursus qui non debetur bis ad eundem effectum, cujus proinde reproductio intra naturam est impossibilis. Quare ratio supernaturalitatis in talibus non est ista, quod causa non habeat virtutem paris ordinis, sed quod non habeat virtutem ad quidlibet aut paris aut etiam inferioris ordinis, nisi taliter producendum, nempe cum talibus dispositionibus aut concausis, quæ non adsunt in effectione quoad modum supernaturali. Et formalissima diffe-

rentia inter utramque supernaturalitatem est, inde quidem præcellentia effectûs, hinc autem causæ limitatio in modo agendi, eò quòd non se extendat nisi ad res taliter producendas, neque concursus exigat contra naturæ ordinem, neque quidquam possit destruere nisi per introductionem contrarii, unde nihil potest destruere aut impedire eorum quæ contrarium non habent, aut quæ de se à Deo solo pendent, qui potest ea annihilare per solam defitionem concursus. Declaratur hoc totum inductione plurium quoad modum, seu secundum quid supernaturalium. Nam ratio cur suscitatio mortui, aut restitutio oculi sit supra naturam, est quia causa specifica & propria talium effectuum, nempe causa generativa compositi viventis aut oculi, requirit materiam in tali statu positam, & certis qualitatibus ac dispositionibus affectam ad formas partiales educendas. Quæ omnia cum in cadavere defint, aut in oculo corrupto, tales effectus vim naturæ superant. Ratio cur accidentia non possint produci naturaliter sine subjecto, est quia omnis causa creata limitata est ad hunc agendi modum ut ex nihilo nihil faciat. Unde nunquam producit nisi compositum ex subjecto & forma. Et nunquam forma est totus effectus, sed compositum, sive substantiale sive accidentale. Et causa



QUÆST. I. *De Supernaturalitate.* 55  
materialis per hoc est causa, quòd licet  
non influat in formam ( hoc enim est pro-  
prium causæ efficientis quæ per hoc est  
efficiens ) necessarium sit illam conferre  
subjectivè ad productionem ipsius formæ,  
& agens non possit illam producere nisi  
adsit subjectum recipiens terminum for-  
malem actionis. Ratio cur destructio ma-  
teriæ, qualis fit in consecratione panis ac  
vini, sit naturaliter impossibilis, est quia  
materia à Deo solo pendet, & contrarium  
non habet, cum sit susceptiva omnium  
contrariorum. Quæ autem contrarium non  
habent, non sunt destructibilia nisi à cau-  
sa illorum productiva, per cessationem  
influxûs & actionis ad illa. Ratio cur cor-  
porum penetratio sit etiam quoad modum  
supernaturalis, est quia cùm quantitati  
nihil sit contrarium, & ei à Deo debeatur  
concursum ad suum proprium effectum, qui  
est extrapositio partium, & exclusio alte-  
rius cujuscunque corporis à sui penetra-  
tione; nulla causa creata habet vim impe-  
diendi illum effectum formalem, nisi per  
productionem aut introductionem op-  
positi, & Dei est non negare quantitati  
suum quoad hoc qualemunque concur-  
sum. Ratio cur Angelis secreta cordis non  
sint naturaliter nota absque consensu ejus  
cujus illa sunt secreta, est quia cùm crea-  
tura intellectualis debeat esse capax secre-

ti respectu cujuscunque alterius , præter-  
quàm respectu Dei, non debetur ad viden-  
da ejus arcana sine consensu ipsius , aut  
sine præternaturali Dei , supremi omnium  
domini voluntate , concursus ad talem vi-  
sionem necessarius.

2. Porro rationes ob quas supernatura-  
lia quoad modum naturaliter impossibilia  
sunt causis secundis , extendunt se ad om-  
nes omnino tam creabiles , quàm creatas  
substantias propter communem omnibus  
creatis entibus limitationem. Et per se pa-  
tet non nisi per desitionem concursus ea  
posse destrui , quæ per se à Deo solo pen-  
dent : & nulli causæ secundæ deberi con-  
cursum ad aliquid quod sit contra gene-  
ralem à Deo statutum , & per se congruum  
naturæ ordinem. Unde nulla causa nisi ex  
speciali Dei voluntate , ac providentia  
particulari , potest tale quid facere.

3. Hinc patet naturam , prout est id  
supra quod ens supernaturale quoad mo-  
dum elevatur , eodem modo accipi , &  
tam latè patere , quàm naturam prout est  
id cujus vim omnem & exigentiam ens  
supernaturale in substantia transcendit ,  
nempe esse omnem substantiam tam crea-  
bilem , quàm creatam.

4. Quod confirmatur , quia quando  
Deus existentiam suam & Christi divini-  
tatem & alia revelata credibilia reddit per

QUÆST. I. *De Supernaturalitate.* 57  
opera quoad modum supernaturalia, ne-  
cesse est illa, saltem collectivè sumpta,  
transcendere vires omnis entis alterius à  
Deo, & ipsi soli esse possibile, saltem  
miracula primi generis, quæ simpliciter,  
& absolutè sunt quoad modum superna-  
turalia. Alioqui non sufficienter veritates  
illas attestaretur, &, ut ita loquar, si-  
gillum quo eas consignat, non esset, ut  
Deum decet, infalsificabile.



## QUÆSTIO SECUNDA.

### *De Gratia habituali seu sanctificante.*

**I**Nter ea quæ sunt in entitate superna-  
turalia, primum omnino locum, na-  
turæ ordine, gratia habitualis sibi ven-  
dicat, eò quòd cæterorum ipsa sit aut ra-  
dix, aut principium illa erigens eo modo  
quo natura quævis suas exigit proprieta-  
tes & accidentia. Et licet ad infusionem  
gratiæ in justificatione hominis, quædam  
supernaturales dispositiones, & media  
item supernaturalia requirantur, ut fides,  
spes, & auxilia gratiæ actualis; id se ha-  
bet per accidens, & oritur ex destructo  
per peccatum gratiæ statu, in cujus repa-  
ratione ultimò reproducitur id quod erat  
optimum, nempe ipsa forma sanctificans,

ad quem effectum Deus congruè aliquam hominis ex peccati statu per interna auxilia vocati cooperationem & dispositionem prærequirit. In prima autem conditione statûs supernaturalis, Deus ita rectum creatur hominem, ut gratia esset in eo veluti natura supernaturalis, cui additæ erant infusæ virtutes, tanquam proprietates, & data semper fuissent interna auxilia, ut media necessaria ad agendum conformiter ad illam elevationem: siquidem qui dat esse, seu naturale seu supernaturale, dat consequentia ad illud esse. Sequendo igitur in consideratione & tractatione rerum supernaturalium, connaturalem ipsarum ordinem, spectanda est ante cætera gratia habitualis, seu sanctificans, de qua erit hæc quæstio.

---

## SECTIO PRIMA.

*Quid sit Gratia habitualis, seu sanctificans.*

1. **A**Dverte primò duobus modis perfectiones Dei posse à creaturis participari. Primò participatione formali. Secundò participatione secundùm quid virtuali. Participatio formalis in eo consistit, quòd eadem perfectio quæ est in Deo formaliter, etiam creaturæ conveniat univocè secundùm eundem conceptum



QUÆST. II. *De Gratia sanctif.* 59

genericum illius perfectionis, ut verbi gratiâ, ratio substantiæ, immaterialitas, vita, sapientia, &c. aut saltem analogicè, ut ratio entis, quæ omnia genericè sumpta Deo sunt communia cum creaturis, licet convenient Deo secundum aliquam rationem specificam imparticipabilem extra ipsum, nempe secundum rationem infinitatis, & alias cujusque divini attributi differentias, qualis est in scientia, ipsa omnium comprehensio per unicum actum, &c.

2. Participatio secundum quid virtualis in eo sita est, quod in creatura sit non illa perfectio quæ est formaliter in Deo, sed aliquid in illa perfectione eminenter contentum, id est modo nobiliori, & sine imperfectione cum qua est in creatura. Sic potentia motrix est participatio secundum quid virtualis immensitatis Dei, quia per illam potentiam habetur, non quidem esse ubique & indivisibiliter, quod præstat immensitas, sed aliquid quod in illa perfectione includitur, nempe esse alicubi, & applicari certo loco, quod eminenter continetur in immensitate sine imperfectione circumscriptionis ac limitationis. Idem dic de duratione finita & successiva respectu æternitatis, quæ est interminabilis vitæ tota simul & perfecta possessio.

3. Adverte secundò inter entia creata illa esse nobiliora, quæ plura & minùs universalia participant Dei prædicata. Unde præstant plantæ elementis, quia præter esse, & per se subsistere, participant vitam: & animalia plantis, quia cognitionem: Et homo animalibus, quia rationem entis intellectivi sine ordine ad phantasmata. Et hinc apparet quomodo homo & Angelus sint creati ad imaginem Dei, quia in nulla creatura sunt plures magisque propriæ & formales divinæ naturæ participationes. Nam adhuc ex intelligentia sequitur voluntas; & hæc duo sunt ex quibus est in Deo, stante unitate naturæ, Trinitas personarum, cùm divinæ processiones per intellectum & voluntatem earumque potentiarum actiones fiant.

Adverte tertio unam eandemque communicabilem Dei perfectionem posse intra idem participationis sive formalis sive virtualis genus, magis ac magis in infinitum participari. Unde entia illa creata nobiliora sunt quæ non modò, ut dictum est, Dei attributa & prædicata participant, sed etiam quæ cùm eadem participant, ea nobiliori ratione in se continent. Quare cum participatio erit supernaturalis, seu tam excellens, ut ex modo sibi proprio transcendat omnem exigentiam naturæ creabilis, per illam maximè perficietur

QUÆST. II. *De Gratia sanctif.* 61

creatura, & tunc maximè dicetur habere in se similitudinem Dei, & participatio- nem excellentiæ ejus. His prænotatis.

4. Dico, Gratia sanctificans est specialis participatio divinæ naturæ, sita in hoc, quòd sicut natura divina est in Deo radix sanctitatis infinitæ, ita gratia in nobis est principium amandi supernaturaliter omne bonum, & supernaturaliter averlandi omne malum. Et quia hunc amorem & hoc odium gratia efficit per virtutes sibi additas, & per auxilia sibi connaturaliter debita, ideo ipsa est in nobis natura quædam supernaturalis, ut pote radicale illorum principium.

5. Probatur, quia per hanc definitionem, & explicationem assignatur id quod in gratia est primus conceptus objectivus distinguens illam ab omni alio supernaturali dono.

6. Primò dicitur specialis participatio divinæ naturæ. Ita sanctus Thomas 1. 2. q. 110, a. 2. 1. Et probatur primo ex scriptura 2. Petri 1. *Per quem maxima & pretiosa nobis promissa donavit ut per hac efficiamini divina consortes natura.* Quæ verba licet ad alia dona à gratia habituali distincta extendi possint, maximè tamen propriè de ipsa intelliguntur, ut docent communiter interpretes.

7. Probatur secundò autoritate Patrum.

Athanasius orat. 21. contra Arianos. *Qui filii participes sunt per spiritum gratia, Dei participes fieri dicuntur: Et hoc est quod Petrus dixit, ut divina natura consortes efficiamini.* Ambrosius lib. 6. epist. 36. Idem ex eodem Petri loco docet. *Quid illa at-  
texam quòd hominem Deus divina fecit con-  
sortem natura, sicut in epistola Petri legi-  
mus. Unde non immeritò quidam ait. Ipsius  
& genus sumus. Dedit enim nobis de cognat-  
ione sua, ut queramus illud divinum quod  
non longè est ab unoquoque nostrum, in quo  
vivimus & movemur & sumus.* Augustinus  
Epist. 110. c. 4. *Manens filius in natura  
sua, factus est particeps natura nostra, ut  
nos manentes in natura nostra, efficeremur  
participes natura ipsius.*

8. Probatur tertio ratione, quia ibi  
est specialis & excellens participatio divi-  
nae naturae, ubi creatura evehitur nobi-  
lissimo modo intra genus entium intel-  
lectualium quæ jam de se facta sunt ad  
imaginem Dei: unde accedente perfectio-  
ne quæ superet eorum exigentiam natu-  
ralem, fit excellens similitudo cum Deo.  
Atqui per gratiam creatura intellectualis  
evehitur nobilissimo modo intra illud  
suum genus, quia evehitur modo supe-  
rante omnem exigentiam ejus naturalem,  
ut pote qui dicit ordinem ad visionem Dei  
intuitivam: Ergo.

QUÆST. II. *De Gratia sanctif.* 63

9. Dicitur secundò illa participatio sita esse in assimilatione & conformitate cum natura divina, sumpta ut est radix & principium sanctitatis. Id quoque docet sanctus Thomas 3. p. q. 3. a. 4. ad 3. ubi dicit haberi per gratiam participationem divinæ naturæ secundum quandam assimilationem ad bonitatem illius. Et probatur primò ex scriptura. Nam Divus Petrus loco citato, ubi dixit, *maxima, & pretiosa nobis à Deo donata, ut per hæc efficiamini divinæ consortes naturæ*, addit fugientes ejus quæ in mundo est concupiscentia corruptionem. Et 1. Joannis 3. *Omnis qui natus est ex Deo, peccatum non facit, quoniam semen ipsius in ea manet: & non potest peccare, quoniam ex Deo natus est. In hoc manifesti sunt Filii Dei & filii Diaboli.*

10. Probatur secundò ex Patribus. Augustinus lib. 1. contra duas epistolas Pelagianorum c. 2. *Non vivunt, inquit, homines bene, nisi prius fiant Filii Dei, nempe quia Filiatio Dei quâ naturam ejus participant est hominibus radix bene vivendi.* Idem Epist. 120. c. 13. *Dei gratiâ justī sumus, ut ipsa Dei justitia nos simus, cum piē & justī vivimus.* Cyrillus lib. 11. in Joan. c. 25. *sanctificatione Spiritūs suprema naturæ participes reddimur, reformantes nos ad sanctificationem & imaginem*

64      *De Ente Supernaturali,*  
*primam. Nam si peccatum à Deo separat,*  
*justitia certè conjungit.*

11. Hinc ducitur ratio assertionis, quia id per quod fit in homine interna ipsius reparatio, debet esse de se contrarium malo quod in homine restat ex peccato. Atqui malum quod in homine restat ex peccato, est propensio ad vitium & aversio à vero virtutis bono: Ergo id per quod fit in eo interna reparatio, debet esse principium inclinans ad bene vivendum, & avertens ab eo omni quod illicitum est. Quia igitur gratia est id per quod fit interiorius reparatio hominis, gratia est in eo principium de se inclinans ad omne & solum bonum, & avertens ab omni malo.

12. Objicies primò, Bonitas moralis non est constitutiva naturæ divinæ in ratione naturæ: est enim tantum attributum ejus. Ergo quòd gratia sit participatio bonitatis moralis divinæ, non propterea est participatio naturæ divinæ.

13. Respondeo primò distinguendo antecedens, bonitas moralis sumpta in actu primo proximo & immediato, quo modo omnes virtutes complectitur, concedo. Sumpta in actu primo radicali, & remoto, nego. Hoc enim competit naturæ divinæ pro ut est radix bonitatis, & illius sic sumptæ gratia est participatio.  
Nam.

QUÆST. II. *De Gratia sanctif.* 65

Nam ipsa est radix non immediatè bonorum actuum, ut principium ipsorum effectivum, sed habituum supernaturalium fidei, spei & charitatis, à quibus illi actus effectivè procedunt.

14. Respondeo secundò non agi de participatione tam stricta, & similitudine omnimoda cum natura divina, sed de ea quæ potest haberi à creatura stando intra limites esse creati, per aliquid accidentale ipsi additum ex dono Dei ipsam elevantis.

15. Objicies secundò, Habitus fidei, & spei supponuntur ad formam sanctificantem. Ergo non sunt aliquid ab ipsa procedens, ut dictum est.

16. Respondeo illos habitus non præcedere gratiam nisi per accidens, cùm gratia per meritum aliquod ab homine, qui ab illa excidit, acquirenda est: Et tunc quoque præcedere per modum dispositionis, eo modo quo calor præcedit formam ignis, quando ipsa per alterationem subiecti producit ut virtus ipsi debita. Quod non impedit ne forma ignis sit absolutè & secundum se prior calore, in quantum ipsa illum exigit, & ex natura rei in ignis esse perfectò, quale à Deo creatum est, præcedit. Ita similiter gratia est absolutè prior fide & spe, in quantum illas virtutes ut proprietates in suo esse com-

pleto similiter exigit. Unde cum gratia consequenter ad illam infunduntur.

17. Objicies tertio convenientiam gratiæ cum natura divina posse constitui in gradu intellectualitatis seu immaterialitatis, cui ut primo principio debeatur conaturaliter visio intuitiva Dei, quæ est doctrina Suaris lib. 7. de Gratia. c. 1. num. 26.

18. Respondeo verè quidem inesse gratiæ hanc convenientiam cum natura divina, sed eam minus ad essentiam gratiæ pertinere, cum sit posterior ad illam quæ supra allata est. Nam ex eo quòd gratia sit participatio bonitatis moralis, reddit hominem Deo gratum, & filium adoptivum, ut proxima sectione ostendetur: unde sequitur morale debitum gloriæ, quæ præcisè & sine meritis operum, habenti gratiam datur titulo hæreditatis, ut infantibus baptizatis.

## SECTIO SECUNDA.

*An & quomodo Gratia habitualis homines filios Dei adoptivos, & hæredes constituat.*

1. **D**ico primò, Gratia homines filios Dei adoptivos constituit, ac proinde & hæredes. Prima pars probatur primò



QUÆST. II. *De Gratia sanctif.* 67

ex scriptura in qua habetur. *Ego dixi: Dii estis, & filii excelsi omnes* Psal. 81. 6. Quod ex omnium Patrum, atque interpretum consensu constat fieri per gratiam, sive id per ipsam solam fiat, sive per aliquid etiam consequens ipsam, de quo infra dicetur.

2. Probatur secundò ex illo testimonio Ambrosii lib. 1. de Spiritu sancto cap. 4. *Utique Spiritus sancti gratia Filios Dei facit.*

3. Probatur tertio ex Concilio Tridentino, sess. 6. c. 4. definiente justificationem esse *translationem ab eo statu in quo homo nascitur filius primi Adæ in statum gratiæ & adoptionis filiorum Dei.*

4. Probatur quarto ratione congrua, quia cum ex sancto Thoma 3. p. q. 23. a. 1. adoptio sit personæ extraneæ in filium legitima assumptio, congruum fuit ut Deus homines supernaturaliter ad omne & solum bonum per gratiam propensos, & in hoc quandam divinæ naturæ similitudinem habentes, actu suæ voluntatis eligeret in filios, quos paternæ charitate diligeret, atque in jus hæreditatis vocaret, quæ est secunda pars assertionis, sequens ex prima, juxta illud Pauli. *Si filii, & hæredes: hæredes quidem Dei, cohæredes autem Christi.* Adde quod adoptio civilis maxime consistit in jure ad hæreditatem. Unde

hoc in adoptione divina deesse non debet.

5. Ex supradicta adoptionis definitione Collige, Christum per gratiam habitua-lem non fieri filium adoptivum Dei, cum ad hoc requiratur ut persona sit extranea, id est filiationem naturalem naturali & physica generatione non participet. Itaque in Christo est ex parte subjecti exclusio potentialitatis ad talem effectum potius quam defectus capacitatis ad ipsum; quod ultimum imperfectionem sonat.

6. Dico secundò, Adoptio illa quæ gratiæ rectè tribuitur ut radici & causæ quam inseparabiliter sequitur, est reipsa & formaliter beneficium Dei ab ipsa gratiæ collatione distinctum.

7. Probatur primò, quia importat actum charitatis divinæ, habentem pro motivo ipsam bonitatem hominis gratiâ affecti. Nam ex quo est per gratiam sanctus, Deus illum sic diligit ortâ inde complacentiâ & amicitia.

8. Confirmatur quia ut homo ab alio adoptetur, præter similitudinem in natura necessariam ad filiationem, & quodcunque meritum ejus ac virtutem, requiritur gratiosa acceptatio illius cujus fit filius adoptivus. Ergo à pari in adoptione divina præter similitudinem in natura comparatam per gratiam, quæ infinito

QUÆST. II. *De Gratia sanctif.* 69

intervallo in ratione similitudinis inferior est similitudini essentiali duorum hominum, necessaria erit formalis acceptatio Dei.

9. Objicies, si adoptio divina est beneficium distinctum à gratia, non erit verum homines per gratiam fieri filios Dei adoptivos. Respondeo distinguendo, non erit verum formaliter Metaphysicè ac præcisè loquendo, concedo: non erit verum moraliter, & in sensu necessariæ connexionis, ex eo quòd gratia sit motiva Dei ad acceptationem hominis in filium, & de facto moveat illum, nego.

10. Dico tertio, Exigentia naturalis gratiæ respectu hæreditatis æternæ non est talis, ut si homini gratiam habenti negetur illa hæreditas, aliqua vis inferatur gratiæ, eo modo quo vis infertur alicui naturæ, quando privatur aliqua proprietate, aut actione quam determinatè ex innata propensione exigit. Ita Bellarminus, Lessius, Ægidius, & alii apud Ripaldam cum eodem de Ente supernaturali disp. ult. sect. 10.

11. Probatur quia non magis gratiæ per se sumptæ debetur gloria, quàm operi factò ex gratia, ipsamque augenti. Atqui tali operi gloria non sic debetur, ut seclusa promissione, Deus eam negare non possit absque ulla vi quæ justo operanti

fiat. Ergo. Major clara est à fortiori. Minor probatur, quia non potest à legislatore in præmium & coronam proponi id quod seclusa promissione & munificentia præmiantis, ita debitum est operanti, ut ei sine vi aliqua negari non possit. Atqui justo ex gratia operanti proponitur à summo legislatore Deo in præmium & coronam æterna gloria. Ergo ipsa non sic est debita ipsi operanti, ut sine ulla vi quæ juri & exigentiæ ejus inferatur, non possit à Deo denegari. Et hinc patet, opera justi, etiam ut dignificata per gratiam habitualement, non habere cum gloria æterna absolutam æqualitatem rei ad rem, sed solum æqualitatem proportionis, quæ ex genere suo sufficit ad condignitatem meriti respectu præmiantis, qui vult munificentiam se ipso dignam ostendere supposito tali merito, quod vult habita ratione sui superare.

---

### SECTIO TERTIA.

*Quanam Dei presentia Gratia habituali sit annexa.*

1. **D**ico primò, Deus peculiari quodam modo inhabitat in iis qui gratia habituali sunt affecti, ita ut non solum creatum donum, sed ipse etiam

QUÆST. II. *De Gratia sanctis.* 71

Deus illis detur, & Spiritus sanctus ultra vim ipsius doni per se sumpti, ad eos mitti dicatur. Ita Divus Thomas. 1. p. q. 43. a. 3. argumento 1. Ubi errorem appellat sententiam dicentium non dari Spiritum sanctum, sed ejus dona. Alensis. 1. p. q. 73. memb. 4. a. 1. Suares lib. 12. de Trinit. cap. 5. num. 8. Pétavius lib. 8. de Trinit. cap. 4. §. 6. Lessius lib. 12. de perfectionibus divinis cap. 11.

2. Probatur ex scriptura. Nam Joan. 14. Ita loquitur Christus. *Si quis diligit me, Sermonem meum servabit, & pater meus diliget eum, & ad eum veniemus, & mansionem apud eum faciemus.* Et ibidem de Paraëto à Christo mittendo dicitur, *Apud vos manebit, & in nobis erit.* Eiusdem Joannis 1. epist. c. 4. *Qui manet in charitate, in Deo manet, & Deus in eo.* Paul. ad Rom. 5. *Charitas Dei diffusa est in cordibus nostris per Spiritum sanctum qui datus est nobis.* In quibus omnibus sermo est non de donis tantum Dei, aut Spiritus sancti, sed de ipso Deo, & persona Spiritus sancti, cui appropriativè hic tribuitur effectus. Speciatim autem illa verba Paul. 1. Chor. 6. *Membra vestra templum sunt Spiritus sancti, qui in nobis est, quem habetis à Deo.* Illa, inquam, verba de ipsa Spiritus sancti persona intelligi debent, quia templum soli Deo dicatur, non

donis creatis, quæ tantum accidentia sunt.

3. Confirmatur assertio auctoritate sanctorum Patrum, quorum testimonia amplissimè refert Petavius loco citato. In primis Augustinus, sermone in feriam secundam Pentecostes, *In vasa, inquit, non jam odor balsami, sed ipsa substantia sacri defluxit unguenti.* Quod non de solis illis in quos tunc Spiritus sanctus missus est, accipiendum est, sed & de omnibus justificatis, qui idem quoad substantiam, licet non pari modo nec cum tanta donorum copia, beneficium accipiunt. Et Cyrillus dial. 7. de Trinit. dicit Spiritum sanctum esse in nobis *οὐνωδῶς*, id est, *substantialiter*, ita ut ista vox non unionem, sed rem quæ nobis unitur, qualificet. Et juxta eundem Thesaur lib. 34. p. 362. Idem Spiritus dicitur *αὐτοῦργον*, id est per se ipsum sanctificans.

4. Dico secundò, Peculiaris modus quo Deus habitat in anima per gratiam habitualement sanctificata, in hoc consistit, quòd præter præsentiam realem quam habet ubique, in illa sit cum complacentia quâ cò attraheretur, si præsentia ejus ad omnia, non esset necessaria ex natura rei, sed arbitraria. Ita Suares, loco citato, num. 11. ubi sic loquitur. Dona gratia vi sua & quasi connaturali jure postulant  
intimam



intimam ac personalem præsentiam Dei in anima per taliâ dona sanctificata. Quod per hanc conditionalem optimè declaratur, quia si per impossibile fingamus Spiritum sanctum non esse aliàs realiter præsentem intra animam, eò ipso quòd anima talibus donis afficeretur, ipsemet Spiritus sanctus veniret ad illam per præsentiam personalem, & in ea esset, & maneret quandiu gratia illa duraret. Atque hac ratione, licet nunc aliàs habeat illam præsentiam ratione suæ immensitatis, meritò dicitur nunc habere illam speciali titulo, ratione gratiæ, & charitatis: & idèò meritò dicitur venire vel mitti ad animam mediantibus iis donis.

5. Sic explicata conclusio probatur primò, quia sic & non aliter possunt explicari supradicta, & alia tum Scripturæ, tum Patrum testimonia. Hanc autem nullum sequitur absurdum, ut patebit ex solutione objectionum.

6. Probatur secundò ratione morali & congrua, quam affert loco citato Suares. Nam per gratiam & charitatem quæ ab ipsa inseparabilis est, perfectissima, & tam amicitia inter Deum & hominem constituitur. Amicitia verò ex se petit unionem inter amicos, non solum per conformitatem affectuum, sed etiam per inseparabilem præsentiam, & conjunctio-

nem quoad fieri possit. Unde amicitia perfectissima & divina, suo jure ac debito postulat intimam Dei præsentiam in homine. Quæ quidem præsentia, etsi aliunde necessaria sit, & sub illa ratione non habeat rationem beneficii, tamen prout huic motivo ac titulo subest, est maximum Dei beneficium: sicut præsentia regis terreni ad domum alicujus quam subit, non intuitu ejus, sed alia de causa, non est magnus favor, imò posset esse poena, si eò se conferret ut infensus: At verò eadem, si sit ex motivo benevolentiae in ipsum, prout tali motivo substabit, erit beneficium singulariter æstimabile & honorificum.

7. Dico tertio, peculiaris ille modus quo Deus inhabitat in anima per gratiam sanctificata, divinam adoptionem, quæ sine hoc quoad essentiam constare potest per participatam, ut dictum est, similitudinem divinæ naturæ & jus ad gloriam æternam, plurimum perficit, eique eximium dignitatis & excellentiæ gradum quoadjicit, stando intra ipsum adoptionis <sup>beati</sup> naturalis genus. Ad hoc melius statuendum.

8. Adverte primo, sicut is qui amat, hōc ipso quod amat, amore scilicet amicitiae eoque perfecto, possidetur ab amato; ita eum qui amatur, hōc ipso



QUÆST. II. *De Gratia sanctis.* 75

quod amatur, possidere illum à quo perfectè amatur. Unde fit ut cum Deus hominem existentem in gratia maximè diligat, amore scilicet de se effectivo præsentiæ intimæ indefectibilis, hòc ipso ab illo verè possideatur, idque perfectiùs quàm ullus alius amans ab amato, cum ubi causæ alicujus effectûs sunt perfectiores in ea ipsâ ratione sub qua causant, ibi effectus ille perfectiori modo reperiatur. Certè Deum sic adesse præsentem ex complacentia erga hominem, est aliquo modo possideri ab homine.

9. Adverte secundò, eum qui aliquid possidet, etsi possessio & unio talis boni cum ipso sit tantùm moralis, aut quæcunque esse potest, ab illo bono vel formâ à se possessâ aliquo modo denominari. Sic qui possidet divitias, etsi illas non nisi aliquo jure morali, & modo valdè extrinseco & imperfecto possideat, tamen denominatur dives, & dominus bonorum ita possessorum. Cujus rei ratio est, quia impossibile est formam ex qua sumitur denominatio aliqua alicui uniri, & non conferre illi effectum formalem tali unioni correspondentem ac proportionatum. Hinc quia divinitas ab homine qui est in gratia, supradicto modo valde perfectè possidetur, sequitur talem hominem rectè dici divinitatis compotem, atque aliquo

modo Deum. Quod Boëtius lib. 3. de Consol. philos. prosa 10. sic exprimit. *Ut justitia adeptione justī, sapientia sapientes fiunt: ita divinitatem adeptos, Deos fieri, simili ratione necesse est.* Et similiter sequitur eum qui sic Deum possidet, non modò per amorem illius erga se, sed per talem amoris effectum, si jam per ipsam gratiam erat filius adoptatus, adhuc perfectiori modo titulum illum sortiri, quod erat probandum. Et confirmatur quia si inter homines aliquis adoptatus à principe, ita præterea ab illo diligeretur ut is cor principis perfectè possideret, hoc ipso adoptio perfectionis incrementum acciperet: ita ergo cùm hominem in gratia existentem Deus non tantùm adoptet in filium, diligendo eum amore verè paterno, & in jus hæreditatis vocando, quod totum esse posset sine complacentia præsentia supradictæ effectiva, sed eò usque amando progrediatur, ut illo tam mirabili modo possideri ab illo velit, quis neget inde adoptionem perfici? maximè cùm filiatio de se requirat ut ipsum esse patris participetur. Ex quo sequitur quantò participatio illa erit intimior, & excellentior, tantò ipsam fore nobiliorem.

## SECTIO QUARTA.

### *Solvuntur objectiones.*

1. **Q**uia doctrinam jam assertam de participatione divinitatis, & con-  
surgente inde adoptione, quidam ita ac-  
cipiunt atque intelligunt, quasi simile  
quidpiam in justis atque in Christo,  
cui Deus substantialiter est unitus, assera-  
tur. Hinc in sententiam illam ut suspe-  
ctam, singularem, & Theologis indig-  
nam (sic enim eam notat Ripalda disp. ult.  
de Ente supernaturali sectio. num. 127.)  
gravius insurgunt, & invehuntur. Nihil  
autem in præsentiam Dei intellectam prout  
jam explicata est, objectiones illas efficere  
ex earum solutione mox patebit.

2. Objicitur primò, Implicat unio ali-  
qua immediata naturæ creatæ cum natura  
divina. Unde in mysterio incarnationis  
unio naturæ assumptæ terminatur, non  
ad naturam, sed ad personam divinam.  
Hic autem ponitur aliqua unio inter ani-  
mam & divinitatem, quæ unio fit per  
gratiam ut nexum ac vinculum. Ergo id  
totum implicat.

3. Respondeo implicare unionem phy-  
sicam ac realem, prout reale opponitur  
morali; non autem implicare unionem

moralem & affectivam, seu quæ præter præsentiam realem aliunde necessariam, nihil dicat nisi morale, & affectivum; nempe complacentiam Dei, quæ illam præsentiam, prout sibi substantem, in alio genere, nempe boni moralis, & intra illud genus in ratione favoris planè divini constituat. Quòd si qui hujus sententiæ auctores ita de illa præsentia per gratiam loquuntur, ut gratia videatur esse velut forma, quæ per se præcisè Deum uniat animæ, ut quidam modus inter duo extrema, quorum per se formaliter & ex natura rei sit nexns. Id meritò arguendum est, nec propterea ab scripturæ & Sanctorum Patrum sensu recedendum.

4. Objicitur secundò, Si datur talis unio divinitatis in anima justì, ipsa infinite sanctificabitur, quia forma infinite sanctificans, etsi applicetur per unionem finitam, infinite sanctificat, ut contingit in Christo, in quo unio hypostatica, cum sit aliquid creatum, est finitæ perfectionis in se, sanctitas verò quam confert divinitas sic unita, est infinita.

5. Respondeo negando sequelam, & ad probationem distinguo. Si sermo sit de unione physica, & quæ modo supradictò sit realis, concedo: si de unione morali, & aliquid morale tantum ad unionem localem adjiciente, nego. Idque patet in

QUÆST. II. *De Gratia sanctif.* 79

Eucharistia ; quæ ab homine sumpta sicque illi unita , non eum sanctificat infinite.

6. Objicitur tertio , Si per illam participationem divinitatis homo constituitur filius , non constituitur filius adoptivus , sed naturalis , quia de ratione adoptionis est non habere eandem naturam cum patre , sed illi extraneam.

7. Respondeo negando sequelam , quia ad filiationem naturalem , requiritur talis participatio , ut ipsa natura participata sit propria substantia filii per se essentialiter sumpti. Ad id quod dicitur de extraneitate , respondeo non eam talem requiri ad rationem adoptionis , ut natura quæ communicatur moraliter , non sit ipsa natura communicantis , & elevantis ad esse filii , sed tantum requiri ut neque natura & substantia quæ constituit esse physicum filii , sit idem cum natura communicantis quod in Dei Filio accidit : neque natura item filii promanet à communicante per generationem strictè sumptam ; quæ tendat in similitudinem naturæ , ut contingit inter homines : nec denique illa natura sit hypostaticè unita personalitati ab ipso communicante procedenti , quod contingit in Christo , ut Christus est.

8. Objicitur quarto , si divinitas est forma principalis adoptionem divinam

constituens, ipsa etiam poterit esse ratio propter quam peccatum remittatur, præsertim in sententia quæ est etiam Lessii, asserente remissionem peccati esse beneficium ab infusione justitiæ distinctum. Sequela autem primò repugnat Concilio Tridentino, quod sess. 6. c. 7. ita definit. *Unica formalis causa justificationis est justitia Dei, non quâ ipse justus est, sed quâ nos justos facit.* Secundò eadem sequela convenit cum sententia Bucerii, qui ad justificationem præter justitiam inhærentem requirebat ut natura divina esset complementum formæ remittentis peccatum.

9. Respondeo negando sequelam quia non potest divinitas speciali illo modo communicari, nisi supposita remissione peccati, quæ non fit de facto sine infusione gratiæ. Quod si ponamus, quod possibile esse postea ostendetur, per gratiæ infusionem non remitti peccatum nisi ex concomitante beneficio condonationis ipsi additæ, nego sic posse homini gratiam præcisè habenti, communicari divinitatem, quia in animam habitualiter malevolam, seu in qua præteritus actus malus habitualiter maneat, quandiu non est condonatus, non introibit sapientia increata, neque habitabit in corpore subdito peccatis.

## SECTIO QUINTA.

*An Gratia sanctificans distinguatur realiter ab habitu charitatis.*

1. **N**egant Alensis, Scotus, Bonaventura, Durandus, Bellarminus, Lessius, &c. Affirmant sanctus Thomas 1. 2. q. 110. a. 3, S. Antoninus, Alexander, Cajetanus, Medina, Scotus, Suares, &c.

2. Horum sententia probatur primò ex scriptura, quæ gratiam & charitatem enumerat ut distincta dona Dei, vel ea dicit ex quibus id arguitur. 1. ad Cor. 13. *Gratia Domini nostri Jesu Christi, & charitas Dei.* Et ad Rom. 5. *Charitas Dei diffusa est in cordibus nostris, per Spiritum sanctum qui datus est nobis.* Hinc apparet gratiam, & charitatem distingui, quando quidem charitas infunditur per Spiritum sanctum habitantem in nobis, ut fructus ejus: Spiritus autem sanctus inhabitat in nobis consequenter ad gratiam habitualementem.

3. Probatur secundò ex Concilio Moguntino, quod cap. 7. de justificatione, sic habet. *Cum venia peccatorum, homo etiam Dei gratiam, & per Spiritum sanctum, unà cum fide, simul & charitatem in corde diffusam, & spem accipit.* Quibus verbis &

confirmatur supra-data explicatio loci epistolæ ad Romanos, & clarissimè ab omnibus virtutibus Theologicis gratia distinguitur.

4. Probatur tertio ratione, quia cum sit in justis natura quædam supernaturalis, ut loquitur S. Thomas, charitas non est secundum rem hujusmodi natura, sed gratia; ac proinde entitativè distinguuntur.

5. Quod sit in justis natura quædam supernaturalis, probatur, quia ibi est quædam veluti natura, ubi est novæ vitæ principium. Atqui in justis, cum sit nova vita transcendens omnes vires naturæ humanæ atque Angelicæ, datur talis vitæ principium. Et hoc est quod nomine naturæ supernaturalis intelligitur. Ergo in justis est quædam natura supernaturalis.

6. Confirmatur, quia justī in Sacra scriptura dicuntur. *Ex Deo nati.* Ioan. 1. 14. & propterea *Filii Dei.* Ioan. 3. 10. Et dicitur illorum *vita abscondita cum Christo in Deo.* Coloss. 3. ve 3. hoc autem denotat formam supernaturalem talis vitæ in actu primo constitutivam. Et talis actus primus, ante quem non sit alius in illo genere secundum se prior, est hæc natura supernaturalis, cum natura sit id quod secundum se est in re primum.

7. Jam quòd charitas non sit illa natura, probatur, quia datur in justis aliquid se-



QUÆST. II. *De Gratia sanctif.* 83  
cundum se antèrius charitate, quod illa  
reali ordine supponit: Et secundum omnes  
talis est fides, quæ tamen per illam priori-  
tatem nondum est ipsa supernaturalis natura  
quæ excellentem iustorum vitam constituit:  
quia homo per peccatum mortale non op-  
positum fidei, amittit illam vitam non amis-  
sa ipsa fide. Igitur datur aliquid ipsa adhuc  
fide prius, quod sit talis vitæ formale con-  
stitutivum, & omnium quæ ad illam spe-  
ctant principium, cui illa subordinentur,  
idque non est aliud quàm gratia sancti-  
ficans.

8. Confirmatur, quia in Beatis charitas  
est secundum se reali ordine posterior lu-  
mine gloriæ, quia ut actus intellectus sunt  
priores naturâ actibus voluntatis, ita &  
habitus qui de se tendunt ad illos actus. Lu-  
men autem gloriæ est de se posterius gratia  
sanctificante, quæ est suo modo causa ejus.  
Nihil autem est neque in iustis neque in  
Beatis, quatenus habent vitam supernatu-  
ralem, gratia sanctificante prius secundum  
se, etsi sit aliquid in reproductione gratiæ  
per peccatum amissæ, ipsâ ut reproductâ  
prius, quod ad illam per se sumptam acci-  
dentaliter se habet. Igitur ipsa est actus  
primus illius vitæ, quod est esse naturam  
quandam supernaturalem.

9. Dices charitatem esse de se priorem  
lumine gloriæ, siquidem illa ipsa quæ est in

beatis, jam erat in via, & tantum aliter in illis agit, quam prius, nempe necessario, & multo excellentius, quia aliter ei proponitur objectum ipsius.

10. Respondeo ita esse tempore & generatione priorem lumine gloriæ, ut non extiterit unquam nisi posterior aliquo intelligendi principio, quod minus quidem excellenter id præstaret respectu ejus quod facit lumen gloriæ, sed tamen sufficienter ad actus ejus supernaturales. Et hoc principium in via est fides. Itaque per se loquendo charitas est posterior principio intelligendi supernaturali: & hoc principium disjunctivè est vel fides vel lumen gloriæ, quorum alterum illam necessario reali ordine antecedit. Quod igitur est reali ordine posterius aliquibus quæ non sunt primum vitæ supernaturalis principium sed illud supponunt, non est illud ipsum principium. Et sic charitas non est natura supernaturalis nihilque aliud assignabile est quod sit tale principium, quam gratia sanctificans, quæ proinde à charitate ratione talis in existentia ordinis, realiter est distincta.

11. Objicies primò, si gratia est distincta à charitate, erit otiosa, quia non influet in actus virtutum, ad quos exercendos habebit virtutes distinctas. Implicat autem forma quæ non sit operativa vel operatio ipsa. Præterea gratia ita otiosa, seu non

QUÆST. II. *De Gratia sanctif.* 85  
activa, non poterit esse participatio sancti-  
tatis divinæ, quæ ita est activa ut sit à suo  
actu indistincta.

12. Respondeo primò, negotium for-  
mæ in subjecto non esse agere, sed infor-  
mare & perficere. Et multi Philosophi di-  
cunt formas substantiales non esse activas  
immediatè per seipsas sed per accidentia.  
Et ad hoc citatur Aristoteles, qui dicit ig-  
nem calefacere, non quia ignis est, sed  
quia calidus est. Idque probant ex eo quòd  
sæpe producit substantia ubi sola adsunt  
accidentia quæ illam causent. Unde inferunt  
illa esse totam virtutem substantiæ ad agen-  
dum, & licet substantia esset præsens, illa  
sola immediatè actura.

13. Respondeo secundò negando ex  
distinctione gratiæ à charitate sequi ipsam  
non esse activam: & dico illam agere cum  
virtutibus sibi subordinatis, sicut ex ve-  
riori Philosophia, formæ substantiales  
agunt cum suis accidentibus, ita-ut actio sit  
indivisa & à forma substantiali & ab acci-  
dente tanquam ab uno toto, ex causa prin-  
cipali & ex velut instrumentali aut virtute  
ipsi subordinata conflato; quod reipsa fieri  
probat quia plus producit luminis in  
partibus aëris ad quas à sole duci possunt  
lineæ rectæ, quàm in illis ad quas non pos-  
sunt duci tales lineæ. In illis enim est splen-  
dor lucis, in istis autem opaci corporis ta-

les lineas impredientis umbra. Cujus rei ratio est quia in partes spatii ad quas possunt duci à sole rectæ per diaphanum lineæ, sol agit cum lumine à se procedente, in alias autem lumen obliquè vicinum per se præcisè agit eodem modo ac si à sole non procederet. Et idem est de candela quæ existens in uno cubiculo, plus producit luminis per apertam januam in eas vicini cubiculi partes ad quas à candela possunt duci lineæ absque interjectu corporis opaci rectæ, quàm in eas ad quas non possunt duci tales lineæ. Et par etiam est ratio de igne existente in furno quoad diffusionem caloris per apertum os furni. Et nostra anima plus agit cum calore vitali inserviente ad digestionem & conversionem alimenti in nostram substantiam, quàm posset calor ipse per se sine anima coagente. Dico igitur cum aliqua proportionem, ac similitudinem, gratiam habitualement, quæ est forma primaria & actus primus vitæ nostræ supernaturalis, sic coagere cum charitate & aliis virtutibus infusis: & si quæ ex illis possunt destructâ gratiâ remanere, sicut quædam accidentia manent destructo composito substantiali, minorem esse activitatem quàm cum aderat gratia, idque patere videtur in peccatoribus, qui minùs bene credunt & sperant, quàm iusti. Qua in re non nego alias esse causas istius minoris

activitatis, putà quòd minùs digni sint  
uberioribus gratiis actualibus; quòd malos  
contraxerint habitus avertentes indirectè  
ab exercendis actibus fidei & spei, &c.  
Sed nec immeritò asseri potest hanc quoque  
esse unam, eámque potissimam illius debi-  
litis causam, quòd desit illis primum,  
principale & maximè universale princi-  
pium omnium supernaturalium actuum, ad  
quos istud principium cum singulis virtuti-  
bus sibi subordinatis de se concurrir: nec  
tantùm imperativè se habet, quo modo  
charitas confert ad actus fidei & spei, sed  
etiam effectivè, quo modo anima coagen-  
do cum omnibus, & singulis organis ac  
facultatibus quæ nobis insunt, omnia in  
nobis operatur.

14. Objicies secundò, Charitati con-  
veniunt quæcunque gratiæ tribuuntur.  
Ergo gratia non distinguitur à charitate.

15. Respondeo negando antecedens.  
Nam charitati non competit esse naturam  
quandam supernaturalem, & primum de  
se in nobis vitæ supernaturalis principium,  
ut suprà ostensum est. Item charitati non  
convenit esse formaliter remissivam pecca-  
ti. Nam si id ei convenit, vel charitati  
actuali, vel habituali. Non actuali, quia  
forma remissiva peccati parvulis infundi-  
tur in baptismo, cum nullum habeant actum  
vitæ supernaturalis, imò nec rationalis:

non habituali, quia quando peccator exercet actum contritionis, non rectè dicitur justificari, quia acquirit habitum virtutis quàm exercet. Nam potius censendus esset justificari per suum actum, cùm virtutis actus magis moveat Deum ad veniam, quàm habitus. Bene autem dicitur justificari formaliter, quia accipit gratiam, ad quam obtinendam actus contritionis habet aliquod de congruo meritum, quo misericordiam Dei moveat ad dandam ei formam sanctificantem; idque constabit ex sequenti sectione.

---

## SECTIO SEXTA.

*An gratia sit remissiva peccati: & an cum eo stare possit.*

1. **D**ico primò, Gratia habitualis ex sua natura quandam habet congruentiam & aptitudinem peculiarem ad delendum peccatum mortale. Ita Theologi extra controversiam quoad rem, etsi Aliacus, & Nominales verbo tenus aliter docere videantur, ut rectè notavit Suares tomo 3. de gratia lib. 7. cap. 1. num. 14.

2. Probatur primò ex Concilio Tridentino quod sess. 6. cap. 7. definit Gratiam esse causam formalem justificationis. Non posset autem esse causa formalis justificationis,

QUÆST. II. *De Gratia sanctif.* 89

tionis, nisi peccatum depelleret actu: nec depellere actu formaliter, nisi ex se illius esset depulsiva. Nam alioquin esset ad summum peccati depulsi signum & tessera: Quod non esset esse causam formalem justificationis.

3. Probatur secundò à priori, quia forma quæ hominem reddit ab omni malo morali supernaturaliter alienum, & ad omne bonum aptum ac propensum, & ob hoc est participatio & expressa similitudo sanctitatis divinæ, apta est conciliare amicitiam inter Deum & hominem, ac proinde peccatum mortale, quod illam amicitiam tollit, delere.

4. Dico secundò, Non remittetur de facto ullum peccatum sine infusione gratiæ. Probatur quia ex Concilio Tridentino jam citato, *Gratia est unica causa formalis justificationis*, id est nulla alia est ab ipsa divisa, aut cum ea non conjuncta, eamque non sequens.

5. Dico tertio, Gratia habitualis non ita est ex natura sua deletiva peccati mortalis ut absolutè non possit cum peccato consistere, si Deus vellet ea peccatorem non privare. Ita Scotus, Gabriël, Ocham, Major, Medina, Suarez, Lessius, Bellarminus, & multi alii.

6. Probatur primò, quia si gratia est necessariò deletiva peccati, non fuit abso-



lutè necessaria Incarnatio ad perfectam ejus deletionem. Consequens est falsum, & repugnat Ecclesiæ sentui, & unanimi sanctorum Patrum doctrinæ. Ergo & antecedens.

7. Major probatur, quia abstrahendo à statu hominum consequente peccatum Adami, potuit Deus creare purum hominem quem gratiâ cumlaret, ita-ut tanta esset illius gratia, quanta erit omnium sanctorum collectivè sumpta, etiâque infinita, si possibile esset infinitum creatum. Item potuit dare illi homini potestatem transferendi merita suorum excellentissimorum operum in eos in quibus nullus esset obex absolutè impeditivus talis translationis. Hoc posito, simulque admissa impossibilitate peccati cum gratia, potuisset ille purus homo mereri formam necessariò deletivam peccati, nempe gratiam, non modo justis, si qui fuissent, sed etiam iis qui peccassent: quia quod est auferibile per adventum formæ, non est obex introductioni ejus: & agens quod potest producere formam aliquam, potest per illam ipsam destruere contrarium ejus, quando nihil obstat nisi illud contrarium. Sic quia sol potest producere lumen, potest depellere tenebras, si nihil obstat illi depulsioni nisi ipsæ tenebræ per lumen destructibiles. Quia igitur in adversariorum sententia, gratia sic est oppo-

QUÆST. II. *De Gratia sanctis.* 91

sita peccato sicut lumen tenebris, nec minus cum eo impossibilis, non minus in facta hypothese is qui poterit mereri gratiam, poterit mereri destructionem peccati, quàm sol potens producere lumen potest depellere tenebras.

8. Confirmatur quia ideo satisfactio Christi, gratiam nobis obtinuit non obstante indignitate nostri peccati, quia per satisfactionem Christi à Deo acceptabilem, indignitas illa erat auferibilis. Atqui non minus auferibilis est in adversariorum sententia, illa eadem peccati indignitas per positionem gratiæ. Ergo posito quòd Deus dederit potestatem transferendi meritum gratiæ ad alias à merente personas, malitia & indignitas peccati non impediet illius translationis effectum.

9. Dices transferibilitatem meriti esse propriam meriti infiniti, & potestatem transferendi non posse alteri à Christo concedi.

10. Sed contra est, quia hoc ipso quòd Christus non sibi sed nobis est meritus gratiam, per se non implicat illa translatio: & finitudo virtutis meritoriae hoc tantum efficit ut merens finitum in virtute meritoria non nisi minus transferre possit. Ratio autem cur absolutè omnis merens transferre possit, est quia non implicat id ad quod aliquid jus habet, alteri dari ex voluntate

ejus, malentis illi alteri dari quàm sibi Et de facto in nostro præsentì statu transfer-  
tur secundùm nostram intentionem ac pe-  
titionem, bonorum nostrorum operum im-  
petratio, quæ est aliquod meriti genus &  
jus aliquod de congruo ad gratias actuales.  
Itémque satisfactio, quæ est alius fructus  
eorundem operum transfertur ad animas in  
purgatorio detentas. Quòd si meritum  
spectans gratiam sanctificantem, quod est  
maximè & propriissimè meritum, nun-  
quam transfertur, id provenit ex ordina-  
tione Dei, qui bene noluit ut quod est ve-  
luti substantia nostræ vitæ supernaturalis &  
mensura obtinendæ in cælo gloriæ, alteri  
cedi posset, cùm nos ipsi tali bono maximè  
indigeamus. Nullus autem est in re ipsa  
possibilitatis defectus, præsertim si Deus  
dedisset alicui tantam gratiam, ut ea pro-  
portionatè sicut in Christo summam plen-  
itudinem constitueret; quo posito, nulla  
esset in illo homine indigentia gratiæ, &  
non adesset ratio propter quam meritum  
gratiæ jam non transferretur. Sic igitur sine  
incarnatione posset esse perfecta peccati  
deletio per meritum quoad valorem & suf-  
ficientiam condignum, cujus translationi  
non magis posset obesse peccati indignitas,  
dara potestate transferendi, quàm tenebræ  
per se diffusioni luminis.

11. Nec valet contrà, si dicas, potesta-

tem illam fore favorem indebitum, itaque ibi non esse condignitatem meriti ad illam deletionem peccati: quia quod favor aliquis sit indebitus, id non impedit ne ipso concessio, sit condignitas in consequente effectu: quod patet in nostra redemptione & incarnatione Christi, quæ quod fuerit nobis indebita, id non impedit ne concessio per summum favorem Christo, & acceptatis à Deo liberè per summam bonitatem pro nostra salute meritis ejus, satisfactio non fuerit infinitè condigna & superabundans: Quare in dicto casu satis fuerit quod acceptata à Deo mediatione illius hominis, ipse poneret opera condignè meritoria gratiæ de se necessariò peccatum excludentis.

12. Probatur secundò, quia si gratia necessariò excludat peccatum, vel id facit, per seipsam, vel mediante adjuncta ipsi condonatione Dei. Non primum, quia nihil sic determinatè inter formas physicè reales oppositum est peccato habituali. Et per se implicat illud destrui sive condonatione Dei, aut actum condonationis non habere per se sed per aliquid aliud illius destructionis effectum. Quod si quid aliud à condonatione Dei, esset per se formaliter necessariò destructivum peccati, maximè actus virtutis actui peccaminoso contradistinctè oppositus, putà actus charitatis

ita destrueret maculam ex odio Dei relictam, quia nullius rei entitas realis & physica sic opposita est actui odii, ex quo orta est illa macula, sicut actus charitatis. Atqui actus charitatis, etsi physicè & absolute incompossibilis cum peccato actuali, non tollit tamen necessariò reatum culpæ ex odio in Deum relidum, sed tantum merendo ex congruo condonationem liberam Dei. Ergo nullius formæ entitas physica sic peccatum depellit per se ipsam ex natura rei sine condonatione Dei. Quod si dicas gratiam depellere peccatum necessariò per hoc quòd moveat necessariò Deum ad condonationem ejus, ad hoc requireretur ut complacentia Dei erga gratiam esset major displicentiâ de peccato, aut saltem ei par. Quod secundùm omnes est falsum, cum ratio offensæ Dei sit aliquid majus in ratione mali, quàm excellentia gratiæ in ratione boni.

13. Probatur tertio, quia non est impli-  
cantia in hoc quòd aliquis sit aptus ad omne  
bonum supernaturaliter amandum, quod  
est habere gratiam, & sit tamen reus pec-  
cati à se antea commissi, quia Deus illud  
peccatum non remisit. Habebit autem gra-  
tiam, sive quia Deus illam non ademit pec-  
canti, quem sic punire noluit: sive quia  
illam postea dederit non addens ipsi quod  
connaturaliter addi potuisset, condonatio-  
nis beneficium.

14. Probatur quartò, quia non magis gratia est deletiva peccati, quàm peccatum gratiæ destructivum, cum potiùs peccatum debeat esse magis destructivum gratiæ, quàm gratia peccati, eo quòd peccatum sit aliquid, ut dictum est, majus in ratione mali, quàm gratia in ratione boni. Atqui peccatum neque actuale, neque consequenter habituale ex actuali consequens & nullum præ illo vim habens, necessariò necessitate absoluta gratiam destruit. Ergo. Minor probatur, quia destructio & privatio gratiæ est pœna peccati, idque à nullo Theologo negatur, & probatur ex Concilio Moguntino, quod cap. 4. ita habet. Homo cum mandatum Dei prævaricatus esset, gratiam & justitiam in qua erat constitutus, justissimo Dei judicio amisit. Jam autem pœna peccati non potest esse malum quod inevitabiliter ex peccato sequatur. Siquidem debet esse malum quod sit objectum & effectus justitiæ vindicativæ ac proinde liberè infligendum.

15. Dices si homo hypostaticè unitus personæ divinæ peccaret, puniretur à Deo privatione illius unionis, quæ tamen privatio necessariò sequeretur ex illo peccato.

16. Respondeo illo casu per impossibile supposito, privationem non fore propriè & formaliter pœnam, siquidem, ut jam

dictum est, de ratione pœnæ est ut sit in iudice objectum actûs liberi quo infligatur laudabiliter. Quare erit malum sequens ex indispositione subjecti ad formam, quæ in illo esse desinet.

---

## SECTIO SEPTIMA.

### *Solvuntur objectiones.*

1. **O**bjicies primò, in sacra scriptura comparatur gratia cum peccato tanquam lux cum tenebris. Ephes. 1. tanquam vita cum morte Rom. 5. & 6. & tanquam justitia cum iniquitate 2. Cor. 6. Ergo gratia est absolutè cum peccato incompossibilis, sicut lux cum tenebris, vita cum morte, & actus bonus cum malo circa idem.

2. Respondeo primò, esse sermonem de gratia sumpta non præcisè secundùm se, sed ut pendente à liberalitate Dei, & adjunctam habente condonationem, quod est illam sumi prout se habet in præsentis providentiæ statu.

3. Respondeo secundò, ex illa comparisone rectè inferri paritatem quoad effectum expellendi contrarium, sed non quoad modum & necessitatem ex natura rei, illius expulsionis.

4. Objicies secundò 1. Joan. 3. *Omnis qui*



qui natus est ex Deo, peccatum non facit, quoniam semen illius in eo manet, & non potest peccare, quoniam ex Deo natus est. Quod sic saltem intelligendum est, ut iustus in sensu composito gratiæ non possit peccare, cum certum sit in sensu diviso eum posse peccare.

5. Respondeo aliud esse significatum illius loci. Sensus enim est, eum qui natus est ex Deo per gratiam, non posse peccare, quatenus talis est, cum gratia non possit esse principium malè agendi, & de se ab omni malo avertat. Et sic interpretatur S. Augustinus lib. 1. de gratia Christi c. 2. & lib. de perfectione justitiæ, c. 18. & lib. 3. contra duas Epistolas Pelagianorum c. 3.

6. Objicies tertio, Ex Concilio Tridentino, *Unica formalis causa justificationis est justitia Dei, &c.* Qua definitione excluditur consortium alterius formæ partialis justificantis, ac proinde favor ab extrinseco gratiæ annexus.

Respondeo, definitione Concilii non excludi à ratione formæ justificantis id quod ad effectum justificationis gratiam comitatur, & per quod connaturaliter fit proximè depulsiva peccati, sed excludi id quod asserebant hæretici esse formalissimè causam justificationis, nempe justitiam Dei aut Christi, quæ nobis imputaretur.

idque probatur ex ipsis Concilii verbis. *Unica formalis causa justificationis est justitia Dei non quâ ipse justus est (en quod excluditur) sed quâ nos justos facit, quâ videlicet ab eo donati, renovamur spiritu mentis nostræ, & non modò reputamur, sed verè justī sumus, justitiam in nobis recipientes.*

7. Objicies quartò, sanctus Thomas 2. 2. q. 24. a. 1. dicit per peccatum destrui charitatem effectivè & meritoriè. Ergo vult gratiam esse impossibilem cum peccato.

8. Respondeo hos destruendi modos nullam importare ex natura rei necessitatem. Ac primò quidem ex eo quòd per actum peccaminosum producat habitus contrarius habitui charitatis, quod est destruere charitatem effectivè, ac proinde remotè & consequenter gratiam, non sequitur Deum non posse conservare habitum ipsum charitatis non obstante illo contrario habitu. Potest enim Deus in subjecto in quo producit qualitas alteri præexistenti contraria, conservare illam præexistentem, & sic unire præter ordinem naturæ contraria, etiam in summo gradu. Sic dum producit frigus, potest simul conservare calorem: & in homine qui malè agit, conservare habitum acquisitum oppositæ virtutis, sive ille habitus

QUÆST. II. *De Gratia sanctif.* 99

fit qualitas quædam simplex, sive species objectorum honestorum & actuum præteritorum circa illa. Quòd si hoc verum est de habitibus acquisitis, qui naturaliter destrui debent aut minui ac tandem destrui per actus oppositorum vitiorum, multò magis poterit à Deo conservari habitus charitatis infusæ, qui à sola Dei actione pendet. Quoad secundum destruendi modum, nempe meritoriè, non sequitur ex eo quòd peccatum hoc modo destruat charitatem, istum effectum non posse impediri. Nam destruere illam meritoriè, est mereri destructionem ejus ut pœnam peccati. Pœna autem, ut dictum est, est objectum actûs liberi quo infligatur.

9. Objicies quintò, Implicat eundem esse amicum Dei, justum, & dignum vita æterna, quod fiet per gratiam, & inimicum, injustum, indignum vita æterna, quod fiet per peccatum.

10. Respondeo hominem non fore amicum Dei, justum, & dignum vita æterna simpliciter & absolutè, sed tantùm amicum secundùm quid, justum hoc sensu quòd sit aptus ad bene operandum, non verò dignum proximè vita æterna, quia tunc gratia non faciet filium adoptivum, seu non habebit adjunctam illam Dei dilectionem per quam fit adoptio, & erit



obex merito ipsius gratiæ etiam per bona opera acquisitæ.

Dices, sic homo habens gratiam, si moriatur, damnabitur. Respondeo negando sequelam intellectam de damnatione prout pœnas positivas continet: quia fieri poterit, & congruum erit, ut Deus non ita puniat, reum quidem, sed cui congruum sit condonari peccatum.

11. Objicies sextò, Gratia est vita animæ: peccatum autem est mors ejus. Ergo gratia & peccatum impossibilia sunt.

Respondeo, peccatum si non privat actu gratia habituali, non esse mortem in omni sensu in quo est cùm actu privat, sed tantum in quantum privabit vita æterna, Est autem de se semper & necessariò animæ macula.

Objicies septimò, Non repugnat gratia alterius generis, quæ ex natura rei inimpedibiliter ex hypothesi suæ in anima inexistentiæ depellat ab ea peccatum. Cur autem gratia quæ nunc est, non censeatur talis?

12. Respondeo negando antecedens, quia si daretur talis qualitas, creatura illâ affecta posset mereri condignè, non modò sibi illius augmentum, sed alteri quoque etiam peccatori talis gratiæ aliquem gradum, concessa à Deo meriti translatione, quo modo juxta prædicta, pura

QUÆST. II. *De Gratia sanctif.* 101  
creatura, remissionem peccati mortalis  
condignè obtineret.

13. Objicies ultimò, Peccatum consistit  
in privatione gratiæ. Ergo impossibili-  
lis est gratia cum peccato, quia impos-  
sibilis est forma cum privatione sui.

14. Respondeo neque actuale neque  
habituale peccatum in privatione consi-  
stere, ac proinde aliter opponi gratiæ  
quàm privativè, ut patebit ex sequentibus  
sectionibus.

---

## SECTIO OCTAVA.

*In quo consistat ratio peccati actualis, &  
qualiter gratia ipsi sit opposita.*

1. **A**D statuendam rationem differen-  
tiallem peccati, judicandūque  
an in positivo consistat an in negativo,  
qua de re est præcipua difficultas, suppo-  
no primò species quæ sub aliquo genere  
relativo sibi essentiali continentur, non  
posse esse formaliter nisi relationes. Quod  
cū per se sit evidens, ex eo quoque  
ostenditur, quòd si alicui generi relativo  
advenirent differentiæ quæ non essent mo-  
di peculiare habendi se ad aliud, illæ cum  
ipsa non constituerent species, sed entia  
per accidens in ordine ad Prædicamenta,  
sicut si quid adveniat ex Prædicamento



qualitatis alicui generi ex iis quæ in Categoria substantiæ continentur, putà animali talis figura & conformatio corporis, id non constituet cum illo speciem ipsi subiectam, sed ipsum afficiet planè accidentaliter, in ordine saltem ad nostros conceptus. Et universim quidquid alicui generi advenit ex alio Prædicamento, non contrahit ipsum essentialiter nec cum illo speciem ipsi substantem componit.

2. Suppono secundò, bonitatem & malitiam esse species contentas sub genere relativo, nempe sub ratione moralitatis quæ in eas dividitur sive solas, sive adhuc in tertiam speciem quæ est indifferentia actûs moralis seu liberi, quem consulta regula morum & ad ipsum applicata neque præcipiat neque prohibeat sed permittat. Probatur quia nec moralitas in communi consistit in alio quàm in habitudine ad ipsam morum regulam abstrahendo à differentiis illius habitudinis: nec ipsa in alias species dividi potest: nec assignabile est aliud genus proximum quod sit illarum præcisè commune & essentialè abstractum prædicabile de illis in quid incompletè quàm ratio entis moralis. Ergo bonitas & malitia, quidquid sit de indifferentia actûs moralis, sunt species sub genere relativo contentæ. His positis.

3. Dico primò, Ratio peccati, seu

**QUÆST. II. De Gratia sanctif.** 103  
formalis malitia consistit in positivo, indistincto ab actu; nempe in relatione difformitatis cum lege per dictamen rationis proposita.

4. Probatur primò ex præsuppositis, quia nimirum species sub genere relativo contenta per specialem modum se habendi ad aliud constituitur. Atqui malitia est species sub genere relativo, nempe sub moralitate, contenta. Ergo per relationem constituitur, quæ non potest esse alia quàm difformitatis cum lege & discrepantiæ ab ipsa.

5. Confirmatur, quia malitia actualis formaliter includit oppositionem actûs contra id, quod cognitum voluntatem obligat ad abstinendum à tali actu. Nam inde actus est illicitus quòd repugnet dictamini obliganti ad non actum illum: & sublata tali oppositione contra cognitam abstinendi obligationem, non est homo reus neque punibilis. Atqui id quod cognitum obligat ad non ponendum actum peccaminosum, est lex per dictamen rationis proposita. Ergo ratio formalis peccati consistit in oppositione actûs ad legem. Jam illa oppositio non est privativa, quia peccans non privatur lege, quæ stat cum actu ejus, ipsum damnans: neque est forma aut perfectio apta ipsi inexistere, quod ad privationem requiritur: sed est



aliquid extrinsecum, ipso homine peccante prius & indestructibile. Igitur illa oppositio consistit in aliqua contrarietate, non quidem qualis est inter absoluta, cum ex dictis ipsa sit modus se habendi relativè ad legem, sed qualis est inter multas relationes disquiparantiæ, nempe inter eas quæ non modò disparitatem extremorum important, ut dominium & servitus, ratio principis & ratio subditi, itémque ducis ac militis: sed etiam pugnam includunt, ut jus proprietarii in rem & furtum illius rei; ratio principis & rebellio subjectionem detrectantis; ratio ducis & defectio transeuntis ad hostes. Hinc sanctus Augustinus lib. 22. contra Faustum cap. 27. peccatum definit, Dictum, factum, vel concupitum contra legem æternam. Quorum verborum formalissimum significatum est ipsa contrarietas actûs ad legem, quæ contrarietas pro differentia peccati constitutiva ponitur.

6. Confirmatur præterea assertio, quia si ratio peccati in privatione constituatur, non poterit assignari quænam sit illa perfectio in cuius privatione malitia consistet, neque quodnam sit subjectum cui per se primò & immediatè perfectio illa in esse debeat. Primò non poterit assignari illa perfectio, quia ut malitia peccati consistat in privatione perfectionis, oportet

tet debitam esse homini pro omni instanti quo peccat perfectionem tantam in ratione boni quantum est peccatum in ratione mali. Privationis enim malum mensuratur per magnitudinem boni quo privat. At nulla est homini debita tanta perfectio in ratione boni, quantum est peccatum in ratione mali, ut constat ex antedictis. Et si quæ perfectio est semper pro omni instanti debita, non violare ullum ex præceptis; talis perfectio, prout ad eam quovis tempore obligatio est, minima est; siquidem potest haberi per actum indifferenter sine merito vel per non actum, etiam à dormiente. Itaque si malitia odii Dei commensuratur talis perfectionis bonitati, eique proportionatè respondet, non erit gravis. Et omnino minor erit quàm malitia actûs quo quis mentietur cùm tenebitur dicere verum, quia perfectio quæ debebitur in illo casu, quâque mendacium privabit, nempe dicere verum, quod est actus veracitatis, est aliquid melius, quàm abstinere ab odio Dei sine ullo actu bono, ad quod solum tali tempore, quo supponitur homo Deum odisse, obligatio est.

7. Nec dici potest perfectionem illam esse magnam in quantum summè necessaria est homini ad sui finis consecutionem. Nam si hoc tantum modo perfectio illa

magna est, privatio ejus erit magnum malum tantum consequenter, non verò ex natura sua formaliter, sicut illa perfectio erit magnum bonum non essentialiter, sed consequenter ad essentiam suam, & per ordinem ad aliud. Atqui ratio ipsa malitiæ de qua agitur, est aliquid de se essentialiter malum, non verò tantum consequenter. Ergo ipsa non potest consistere in privatione alicujus quod sit magnum malum tantum consequenter ad essentiam suam.

8. Jam verò quòd non possit assignari subjectum cui debeatur illa perfectio, ac rectitudo in cujus privatione formalis malitia consistet, probatur, quia vel illa debetur actui voluntatis, vel ipsi voluntati, cum nihil ulterius excogitabile sit cui deberi possit. Neutrum dici potest. Ergo. Primum non debetur actui talis rectitudo, quia si actui debetur, vel actui malo quem voluntas producit, specificè sumpto, vel actui sumpto genericè, vel actui contrario qui excluditur per ipsum actum malum. Nihil horum dici potest. Ergo. Non primum, quia impossibile est actum odii Dei habere rectitudinem. Implicat autem debitum ad aliquid per se impossibile. Secundum item dici non potest, quia si actui genericè sumpto debetur rectitudo, tale debitum conveniet omnibus actuum

QUÆST. II. *De Gratia sanctif.* 107  
voluntatis speciebus & individuis. Consequens est falsum ob rationem jam allatam pro actu malo, quia nimirum multæ species, & consequenter earum individua non possunt habere rectitudinem. Ergo & antecedens. Sequela majoris probatur, quia quod actui genericè sumpto convenit, convenit omni speciei, & individuo sub eo contento, sicut quia esse progressivum aut quomodocunque motivum sui, convenit animali ex ratione generica, convenit omnibus speciebus & individuis animalis.

9. Quodd si dicas debitum illud convenire generi sumpto disjunctivè, id est ratione alicujus speciei, nempe vel hujus vel illius: Respondeo id, si detur, nihil prodesse adversariis, quia debitum ita vagum, non erit determinabile ad eos actus qui rectitudinis sunt incapaces, sed ad solos capaces: ac proinde nunquam determinabitur ad eos qui de se sunt illiciti. Unde nec privatio rectitudinis cadet in istos, quia non est privatio formæ nisi ubi forma debita est.

10. Præterea si actui genericè sumpto rectitudo debetur, sic odium Dei non erit malum nisi secundum rationem genericam, quia in tantum erit malum, in quantum habebit debitum rectitudinis.

11. Ad hoc respondent fieri posse ut

aptitudo & debitum conveniat generi ,  
privatio autem speciei quia differentia speciei excludit formam ad quam est aptitudo.

12. Sed contra est, quia privatio est carentia formæ in subjecto apto vel debente habere formam, ita-ut ibi sit carentia, ubi est aptitudo & debitum, quemadmodum docet Aristoteles lib. 5. *Metaph. cap. de privatione*. Et confirmatur, quia si quis homo habeat figuram monstri, non illa figura monstri formaliter erit privata conformatione humani corporis propria quam non potest habere, sed humanitas, quæ est in illo homine dicetur privata & malè affecta, quia ipsa est quæ debet habere figuram sibi conformem. Pari igitur modo ratio actûs sumpta præcisivè à differentia odii Dei, esset privata & mala, quia ipsa dicitur esse id quod debet habere rectitudinem, quam differentia odii Dei habere non potest : unde talis differentia non esset privata, ac proinde nec formaliter mala, sed tantum causaliter. Et in hoc sensu ipsa non majoris esset malitiæ quàm differentia cujusvis alterius actûs quæ excludat à ratione generica actûs rectitudinem illam ad quam supponitur debitum. Itaque odium Dei non esset pejus quàm iste actus, nolo amare Deum, vel iste, volo furtum, aut quivis alius amorem Dei impediens.

13. Instant, & dicunt posse esse privationem in specie, cum aptitudo sit tantum in genere, quia talpa est privatus visu qui non est ei debitus, sed animali.

14. Respondeo falsum esse quod talpæ non debeat visus, quia habet oculos, & de facto visum habet, facile quidem amissibilem, quia ejus oculi facile læduntur dum terram fodit, cui incommodo ut occurreret naturæ auctor, durâ tunicâ oculos illi obduxit, ita ut nullum animal munitiones habeat. Quod si talpa diceretur privatus visu qui non ei deberetur sumpto specificè, brutum diceretur privatum rationalitate, & homo pennis ob paritatem rationis.

15. Tertium ex membris in quæ actus disjunctivè divisus est, dici non potest, quia si actui contrario, id est actui bono per malum excluso, debetur rectitudo cujus defectus privationem constituat, ut vult Scotus in 2. dist. 37. q. 1. ille ipse actus erit privatus, cum tamen non existat, quia supponitur esse privatio, quæ non potest esse nisi in illo. Item actus ille, etsi ex natura sua bonus, ut pote malo contrarius, erit tamen malus, quia cum esse malum nihil aliud sit quam esse privatum, erit, ut dixi, privatus, privatione scilicet quæ jam esse asseritur, nec potest esse nisi in eo cui rectitudo debeat.

16. Jam quòd non possit dici voluntatem esse subjectum, cui rectitudo illa debeat in cujus privatione malitia consistat; probatur, quia hoc posito, cum homo peccat, ipsa voluntas erit privata rectitudine, non verò actus. Itaque ipsa erit mala, & habebit rationem peccati; ipse autem actus non erit malus nisi causaliter, in quantum privabit voluntatem rectitudine ipsi debita; quod omnino dici non potest: Nam odium Dei, præcisa per mentem tali causalitate, & exclusione rectitudinis quæ per actum contrarium haberetur, est de se rationi repugnans & summè illicitum. Et si compossibile esset cum actu amoris, in quo casu non privaret rectitudine, adhuc esset peccatum, quia esset voluntarium, liberum, contra regulam morum, & legem æternam. Item non minùs odium Dei est de se formaliter malum, quàm actus charitatis formaliter bonus. Sicut igitur voluntas fit bona per causalitatem formalem amoris qui est de se bonus, ita qui Deum odit, fit formaliter malus per causalitatem item formalem odii, quod ideo voluntatem reddit malam, quia ipsum est malum, sicut omnes formæ quæ alicui subjecto insunt, communicant tali subjecto denominationem & vim sibi propriam. Sic doctrina facit formaliter doctum, & justitia justum: & in formis



QUÆST. II. *De Gratia sanctif.* 111

materialibus calor per suam formalem inexistentiā constituit calidum, & frigus frigidum. Neque est ratio cur hęc extensio illa & communicatio rationis formalis locum non habeat.

17. Denique si odium Dei non esset malum nisi causaliter, excludendo rectitudinem in cuius privatione consisteret formalis ratio malitiæ, idem contra hoc sequeretur quod jam illatum est contra malitiam sitam in exclusionē rectitudinis ab actu genericè sumpto; nempe odium Dei non fore aliquid pejus quovis alio actu malo, quia similiter non esset malum nisi per idem per quod quivis alius actus cum charitate impossibilis esset malus, nempe per hoc quod causaret privationem rectitudinis: ad quod parum refert si ab actu genericè sumpto, si ve à voluntate illam excludat, cum ad illam causalitatem hoc vel illud subiectum materialiter se habeat.

18. Ex his patet rationem constitutivam peccati non consistere adæquatè in privatione, sed neque illam esse aliquid partim positivum, partim privativum, quia similiter contra illud inadæquatum formale privativum recurreret eadem impossibilitas assignandi tum perfectionem quæ deberetur, & per illud formaliter tolleretur, tum subiectum quod per illam

formalem exclusionem esset privatum.

19. Sic constitutâ ratione malitiæ inpositiva disconvenientia actûs peccaminosi cum lege, facile est statuere quomodo gratia & peccatum actuale opponantur. Primò enim non opponuntur privativè, quia ambo sunt positiva, & simul stare possunt ex ante dictis. Deinde non opponuntur per relationem disquiparantiæ quæ sit ejusdem rationis cum ea per quam peccatum opponitur legi illud vetanti. Talis enim relatio est ad terminam cognitum contra quem fiat actus hoc ipso illicitus. Neque etiam opponitur ut duo directè, & contradistinctè contraria, quia malitiæ sic opponitur actûs boni honestas sub communi utrique genere moralitatis. Quare restat ut peccatum remotè opponatur gratiæ, tanquam principio omnis bonitatis ipsi peccato directè contrariæ: itémque ut opponatur tanquam principium ipsius gratiæ destructivum per demeritum quo exigit à Deo privationem ipsius ut pœnam suæ cum lege oppositionis & discrepantiæ: ex quo sequitur illa duo esse de factio incompatibilia, sed non absolutè impossibilia cum, ut dictum est, pœna peccati liberè à Deo irrogetur.

SECTIO NONA.

*Expenditur mens sanctorum Patrum circa rationem constitutivam peccati.*

I. **O**bjiciunt contra prædicta, qui rationem peccati in privatione constituunt, hanc esse communem sanctorum Patrum sententiam, eosque universali consensu id quasi certum atque indubitatum docere. Nego tamen sanctos Patres pro illorum sententia stare. Quod ut constet, quædam notare convenit.

2. Primum est sanctos Patres in pluribus locis ac textibus qui proferuntur ab adversariis, dum dicunt malum non esse rem, aut naturam, nullo modo negare quod malum materialiter sit actus, formaliter autem ipse actus prout legi Dei positivè oppositus, & dicto modo contrarius, sed tantum negare quod sit natura, quod substantia, quod res, intelligendo per hæc id quod ad solam substantiam pertinet, quodque Aristoteles in Categoriis, capite de substantia, vocat hoc aliquid, quodque in physicis principium motus & natura appellatur. Minimè autem per illa operationem intelligunt, quam nullo modo excludunt à ratione peccati, sicut nec

quod eam essentialiter qualificat, ac distinguit malam à bona ipsi opposita. Hæc explicatio & acceptio probatur ex S. Augustino, qui lib. de perfectione justitiæ, ratiocinatione 4. disputat quid sit peccatum, actúne, an res: quia, inquit, *si res est, necesse est habeat auctorem: & si auctorem habet, jam alter erit auctor quàm Deus, alicujus rei. Quod si impium est hoc dicere, necesse est dicere, peccatum esse actum, non rem.* Hoc manifestè ponit discrimen inter rem, seu substantiam, & operationem, in qua supponit peccatum consistere. Idem facit Auctor Hypognosticon apud eundem Augustinum lib. 1. ubi sic habet in fine. *Diabolus naturà est Angelus, sed quòd natura est, Dei opus est: quòd verò Diabolus, vitio suo est, utendo malè naturæ suæ bono. Opera verò ejus mala, quæ vitia dicuntur, actus sunt, non res.* In hoc eodem sensu loquuntur alii sancti Patres, dum docent peccatum esse nihil, substantia carere, nullam habere radicem, & similia. Ratio est, quia refellebant antiquos hæreticos, Manichæos, Marcionistas, Gnosticos, & quosdam Ethnicos, qui ponebant duo principia rerum seu substantiarum, unum purè bonum, à quo essent omnes res seu naturæ ac substantiæ bonæ; aliud purè malum, à quo essent res, seu substantiæ

QUÆST. II. *De Gratia sanctif.* 115  
malæ. Unde asseriebant Manichæi duas esse  
in nobis animas, unam bonam quæ bona  
opera, alteram malam, quæ peccata fa-  
ceret. Neque enim opera mala volebant  
esse immediatè ab illo summo malorum  
principio, sed tantùm mediatè, qua-  
tenus ab illo esset anima mala. Hos igi-  
tur dum confutant sancti Patres, di-  
cunt malum non esse rem, non essen-  
tiam, non naturam, non aliquid, non  
substantiam, sumendo scilicet istos ter-  
minos ut sumebant adversarii, & ne-  
gando ullam rem aut substantiam esse ma-  
lam: ideóque non esse quærendam mala-  
rum rerum, id est substantiarum quæ ma-  
læ essent, principium. Ea omnino mens  
fuit Epiphanii, Justini, Athanasii, Chry-  
sostomi, Fulgentii, & aliorum qui con-  
tra Manichæos disputantes prædictum  
tantùm errorem confutarunt, non nega-  
runt autem peccatum esse aliquid positi-  
vum, eo modo quo in naturalibus opera-  
tio aberrans à scopo naturæ, aut in arti-  
bus operatio aberrans à fine artis, putà in  
musica concentus dissonus, est aliquid  
positivum & disconveniens. Hinc Au-  
gustinus lib. de perfecta ratione justitiæ,  
malitiam comparat claudicationi, atque  
nec peccatum, nec claudicationem esse  
res, sed actus tantùm. Quare neutrum  
vult esse planè nihil, etiam formaliter &

differentialiter sumptum. Nam claudicatio ut sic, aliud est quàm negatio, & rectitudini motûs opponitur contrariè, & non tantùm uno modo, quod contingeret si esset tantùm privatio; sed diversis etiam inter se positivè contrariis modis ob diversa recti motûs impedimenta. Quare est disconvenientia aliqua talis effectûs cum potentia progressiva sumpta prout est de se capax perfectioris motûs, sive est discrepantia talis ambulationis ab ejusmodi perfecto motu & recto. Unde simili modo ratiocinandum est de ratione malitiæ.

3. Secundum quod notare convenit, est sanctos Patres, dum per privationem peccatum explicant, nullo modo loqui de privatione illius perfectionis quam adversarii per rationem peccati excludi volunt, nempe perfectionis negativæ, aut volitionis honestæ quæ debuerit esse in voluntate, & multò minùs de privatione rectitudinis debitæ actui genericè sumpto, aut actui contrario qui non est: sed de privatione conjunctionis cum Deo & gratiæ & justitiæ habitualis, quæ privatio secundùm communem adversariorum doctrinam non est essentialis peccato, sed ipsum consequens. Sic sanctus Augustinus lib. 2. de libero arbitrio, dicit peccatum esse motum defectivum à Deo: &



QUÆST. II. *De Gratia sanctis.* 117  
lib. 11. de Civit. asserit malum esse amissionem boni, quod utique prius habebatur sive habitualis. Et similia passim dicunt alii sancti Patres, qui proinde ab adversariis in constituenda ratione differentiali peccati multum discrepant, siquidem privationes per formas quas tollunt, à se invicem differunt. Sed quia ex illis privationibus per quas sancti Patres peccatum exprimunt adversarii hoc saltem inferunt, quod secundum illos ratio peccati in aliqua privatione constet, ut huic illationi respondeatur.

4. Notandum tertio est, sanctos Patres sæpe peccatum describere potius per destructionem bonorum quæ nos spectant ac beatos reddere possunt, ut sic horrorem ejus facilius in nobis imprimant, quam definire per primarium ejus ac differentialem conceptum: quod tamen non omittunt, & omnino expressè faciunt. Nam in primis Augustinus, ut constat ex prædictis, peccatum constituit in ea ipsa disconvenientia cum lege, in qua dico consistere rationem formalem malitiæ. Et non tantum loco citato, sed alibi etiam id repetit, ut tractatu imperfecto de genesi ad litteram c. 1. ubi peccatum definit, *superbum voluntatis assensum, cum inclinamur ad ea quæ justitia vetat, unde liberum est abstinere.* Quod idem est ac si diceret, pec-



catum esse assensum liberum recto rationis dictamini contrarium. Idem inculcat lib. de duabus animabus contra Manichæos, atque hanc definitionem esse veram & ad intelligendum facillimam. Divus Bernardus lib. de diligendo Deo, peccati malitiam sic exprimit: *Tunc autem dixerim quemque sibi fecisse suam legem, quando communi, & aeternæ legi suam prætulit voluntatem, perversè utique volens suum imitari creatorem, ut sicut ipse sibi lex sui que juris est, ita is quoque seipsum regeret, & legem sibi suam faceret voluntatem.* In hac declaratione malitiæ quæ peccato inest, formalissimum significatum est contrarietas, & oppositio voluntatis cum lege. Et clarum est talia in omnibus S. Patribus inveniri. Quare ex illis non habetur differentiam peccati non consistere in positivo.

---

## SECTIO DECIMA.

*Solvuntur adversariorum rationes.*

1. **O**bjiciunt primò, si ratio peccati consistit in positivo, Deus erit causa illius positivi, quia ad omne positivum ex munere causæ primæ & indigentia causæ secundæ concurrat. Ergo erit causa peccati.

QUÆST. II. *De Gratia sanctif.* 119

2. Respondeo negando sequelam. Ad probationem dico esse aliqua positiva quæ non producuntur, nempe relationes quæ positæ præcisè extremis resultant, cujusmodi est prædicta disconvenientia cum lege. Notum ac receptum illud est, Ad relationem, nempe intrinsecus advenientem, id est quæ non indiget alia determinatione ad sui existentiam quàm positione extremorum, non datur motus.

3. Instabis, etsi relationes illæ non producantur per se, at producuntur per accidens, in quantum producitur fundamentum ex quo resultant. Sic datur motus per se ad albedinem, per accidens autem ad similitudinem, & causa per se dealbationis, est causa per accidens & consequenter similitudinis. Pari igitur modo, quia Deus producet istius relationis fundamentum, eam quoque per accidens & consequenter producet: & sic per accidens & secundariò erit causa peccati.

4. Respondeo primò, si hoc argumentum valeret, posse retorqueri in adversarios constituentes rationem malitiæ in privato, sic enim ratiocinari licebit. Quisquis est causa fundamenti cui per se privatio inest, vel ex quo in alio resultat, tam est causa privationis, quàm is qui producit fundamentum relationis, est causa illius. Atqui Deus est causa illius entitatis quæ

est fundamentum privationis in qua consistit ratio peccati. Ergo est causa illius privationis.

5. Quod si respondeant non omnem causam quæ producit fundamentum seu subjectum privationis, esse causam ipsius privationis, sed eam tantum quæ producit entitatem illam fundamenti quatenus est fundamentum illius privationis: Deum autem non producere entitatem actûs mali quatenus ex illa sequitur, aut ei annexa est privatio rectitudinis, quia hoc provenit ex causa defectuosa, quæ est creata libertas.

6. Respondeo quoque non omnem causam quæ producit fundamentum relationis, esse etiam secundariò & consequenter causam relationis, sed tantum eam quæ producit fundamentum illud quatenus est fundamentum, seu à quo entitas illa fundamenti habet id ut sit fundamentum talis relationis. Itaque similiter Deum non producere entitatem volitionis malæ, quatenus ex ea resultat relatio difformitatis, neque actum illum, quatenus est ab ipso, habere rationem fundamenti respectu talis respectûs, sed quatenus est à causa agente contra debitum & legem, quæ est sola causa secunda, cum prima agat ex officio causæ universalis, cui congruit accommodare se determinationi agentium liberorum.

QUÆST. II. *De Gratia sanctif.* 121  
liberorum. Unde ipsa bene agit, & actus,  
quatenus est ab illa, est conformis dicta-  
mini sapientiæ ejus & rectæ rationi.

7. Confirmatur à pari in multis aliis.  
Nam motus claudicationis, qui est discon-  
veniens potentiæ quam habet anima ad  
motum rectum, etsi producat ab anima,  
non tamen ab ea producit quatenus est  
fundamentum talis relationis, sed hoc ha-  
bet ab organo inæquali aut distorto. Item  
quando nascitur monstrum ad cujus esse  
Deus & sol concurrunt quasi causæ univer-  
sales, Deus quidem omnium universalissi-  
ma & suprema, sol verò inter corporeas  
maximè universalis illi primæ & summæ  
subordinata; entitas illa monstri, quæ est  
fundamentum difformitatis, non habet hoc  
à Deo, aut sole, quòd sit ejusmodi funda-  
mentum, sed id provenit aut ex causæ par-  
ticularis debiliore virtute, aut ab excessu  
defectivæ materiæ. Pari ergo modo po-  
terit Deus esse causa actûs physici, qui  
est fundamentum hujus relationis, nec  
esse ullo modo causa fundamenti ut sic.  
Cujus rei ratio est à priori, quia, ut di-  
xi, actus habet illam rationem funda-  
menti, quatenus est à causa contra legem  
agente.

8. Objiciunt secundò, si malitia est ali-  
quid positivum, erit formaliter ens: itaque  
in ratione entis cum Deo conveniet, ip-

ſâque erit quædam divinæ perfectionis participatio.

9. Respondeo primò, negando fore cum Deo convenientiam in ratione entis ſecundùm ſe ſumpti; quia cùm ens de Deo & de malitia prædicatur, prædicatio non eſt univoca. Ratio eſt quia ens ſecundùm ſe continet omnes rerum differentias, etiam infimas, à quarum nulla de ſe abſtrahit. Quod autem differentias, quæ ſe totis differentiæ ſunt, formaliter continet, non eſt univocum, neque unum ſecundùm ſe: & ea de quibus ſecundùm ſe dicitur, non propterea ſecundùm ſe conveniunt.

10. Quod ſi tamen ens, non ſecundùm ſe abſolutè, quo modo à ſolo Deo omnium rerum poſſibilium differentias introſpiciente, adæquatè cognoscitur, ſed prout à nobis imperfectè concipitur, eſt univocum. Respondeo illud univocum conſiſtere in aliquo formaliter negativo, ſeu quod non poteſt à nobis niſi per negationem explicari: quòdque adverſarii negare non poſſunt eſſe Deo & peccato, etiam in privatione conſtituto, commune: illud enim eſt eſſe poſſibile. Eſſe autem poſſibile ſecundùm nos eſt non involuere contradictionem, ſive eſſe aliquid ex quo poſito non ſequitur ipſum eſſe & non eſſe: quod omnino eſt negativum, & extra eſſentiam eorum quibus convenit, & poſterius ad

QUÆST. II. *De Gratia sanctif.* 123  
illud esse, cujus veritas impossibilem reddit  
illam implicantiae illationem. Nec possunt  
negare adversarii quin possibilitas ita con-  
cepta, possit etiam de peccato privationem  
formaliter includente verificari. Nam ex  
illo posito non sequitur ipsum esse & non  
esse. Est enim verè peccatum actui reali  
identificatum: & alioqui non posset à Deo  
puniri. Ergo entis, sumpti eo modo quo  
concipitur à nobis, verificatio de Deo &  
de peccato formaliter sumpto, nec repug-  
nat Deo nec rejici potest ab adversariis.

11. Addo, non repugnare Deo, quòd  
aliquid positivum de eo & de malitia,  
sive in positivo sive in privativo posita,  
prædicetur univocè, modò illud ejusmodi  
sit, ut non tollat infinitam utriusque sub-  
jecti differentiam ac distantiam. Nam cum  
quis concipit Deum & peccatum infinite  
inter se repugnare, ens & malitia peccati  
quomodocunque constituta, univocè de-  
nominantur cognita: Præterea tria pecca-  
ta habent communem cum tribus Personis  
Trinitatis rationem ternarii numeri, etsi  
quoad rem infinite dissimilem ac primò  
diversam. Repugnat ergo tantùm de Deo  
verificari aliquid imperfectionem invol-  
vens, quatenus imperfectionem involuit.

12. Instabis si malitiæ convenit ratio  
entis, conveniet etiam bonitas, quia ens  
& bonum convertuntur, & hoc est illius



124. *De Ente Supernaturali,*  
attributum necessarium. Consequens ratio-  
ni repugnat. Ergo & antecedens.

13. Respondeo distinguendo majoris  
hypotheticæ consequens. Conveniet bo-  
nitas moralis seu honestas, nego: trans-  
cendentalis, concedo. Bonitas transcen-  
dentalis consistit in eo quòd unumquodque  
ens sit conveniens alicui sive subjecto sive  
formæ sive principio sive fini ad quem sit  
medium. Dico autem rationem difformita-  
tis quæ in est actu malo, putà odio Dei,  
bene esse convenientem illi actui, quia  
bonum est actum illum esse ex natura rei  
illicitum & odio dignum ut fugiatur. Et  
hoc habet actus ille ex oppositione sua ad  
legem naturalem ac rationem. Et præterea  
à Deo etiam prohibetur, ut sit etiam ex  
ejus præcepto illicitus & magis odibilis.

14. Objicitur tertio, Non potest esse  
relatio realis, nisi ad terminum realiter exi-  
stentem. At non dabitur semper terminus  
realis, quem relatio illa difformitatis cum  
lege, connotare possit, cum nimirum ali-  
quis peccat contra legem falsò apprehen-  
sam. Ergo malitia non est relatio realis.

15. Respondeo negando majorem, quia  
in actu quo quis cognoscit negationem  
plurium mundorum, est relatio realis, si-  
quidem est veritas realis, quæ est confor-  
mitas talis actûs cum objecto, & objectum  
illud non est nisi negatio. Ratio à priori est,



Quæst. II. De Gratia sanctis. 125  
quia ad esse relationis satis est, si id quod  
connotatur, eo modo sit quo connotatur  
secundum esse sive positivum sive negati-  
vum, sive præsens sive præteritum sive  
futurum, sive à parte rei sive secundò inten-  
tionaliter existens. Hîc autem lex quæ est  
difformitatis terminus, eo modo existit quo  
existere debet ad eam terminandam ac spe-  
cificandam, nempe secundum esse inten-  
tionale, quia cùm voluntaria esse debeat  
illa difformitas, debet esse circa regulam  
cognitam, & contra eam ut cognitam. Et  
licet non sit reipsa lex quæ fallo esse puta-  
tur, est tamen specificativum difformitatis,  
nempe dictamen objectivum, seu lex ob-  
jectiva prohibens actum qui inde habet  
contrarietatem per quam est formaliter ma-  
lus. Et inde patet relationem illam esse ex  
iis quæ fundantur in mensurabili, & spe-  
ctant mensuram. Et eandem mensuram  
spectat bonitas formalis actûs honesti, sed  
modo plane diverso, nempe per habitudi-  
nem conformitatis.

16. Objicitur quartò, Relatio quæ con-  
venit rei prout subest actibus animæ, non  
est realis nec prædicamentalis. Atqui dif-  
formitas in qua ratio peccati ponitur est  
hujusmodi. Ergo.

17. Respondeo primò negando majo-  
rem, quia etiam universalitas, prædicabi-  
litas & similes relationes sunt reales, prout

reale opponitur non enti, aut etiam prout opponitur enti rationis, licet non sint reales prout reale opponitur secundò intentionali, sive denominationibus quæ conveniunt rebus prout fuerunt objectæ actibus intellectûs aut voluntatis, cujusmodi sunt esse cognitum, volitum, ordinatum ad finem, & similes. Nihil autem vetat quominus illæ quoque sint Categoricalæ, cum Categoriæ debeant omnia entium genera continere.

18. Respondeo secundò, difformitatem illam non esse relationem quæ conveniat rei prout substanti actibus animæ, si sermo sit de difformitate actûs interni voluntatis, quia actus ille neque cognitus neque volitus est, etsi sit voluntarius, Quare est relatio primò intentionalis, conveniens illi prout à voluntate producitur non obstante lege per intellectum proposita, absque eo quòd sit ipse præcognitus.

19. Objicitur quintò, Dato præcisè hoc quòd actus non sit conformis dictamini rationis, vel non habeat totum quod regula morum exigit, malus est. Ergo malitia consistit in privatione conformitatis cum ratione, & regula morum.

20. Respondeo distinguendo antecedens, malus est primò & formaliter per illam negationem, nego: arguitivè, & per locum à posteriori, eò quòd omnis actus

qui non est conformis dictamini rationis, saltem permittenti, sit difformis, & contrarius prohibenti, concedo. Simile erit argumentum si dicas, dato quòd aliquod animal non sit brutum, est homo. Ergo homo constituitur per negationem bruti. Quare sicut hîc non valet consequentia, & negatio bruti est tantum medium à posteriori concludendi humanitatem in animali, ita negatio conformitatis cum dictamine rationis in actu morali, est tantum similiter medium à posteriori ad inferendam in illo actu difformitatem positivam, per quam formaliter in esse peccati constituitur.

21. Objicitur sextò, saltem quorundam actuum malitia in privatione consistit. Ergo nec universaliter malitia in privatione consistit, nec rationes ad id probandum allatæ per se ex natura rei valent. Antecedens probatur, quia peccatum omissionis habet malitiam præcisè per privationem actûs imperati. Et in peccatis commissionis aliquando est malitia, non ex objecto quod disconveniat, neque ex circumstantia quæ adsit & repugnet, sed ex defectu circumstantiæ quæ in actione requirebatur.

22. Respondeo negando antecedens. Ad probationem, dico defectum actûs imperati, & circumstantiæ debitæ esse malum objectivè & causaliter, non verò forma-

liter, quia malitia formalis circa illa objecta consistit in hoc quòd aliquis velit illos defectus contra dictamen rationis, seu contra legem per illud dictamen propositam.

23. Instabis, cùm aliquis peccat, per omissionem puram liberam, in tali peccato non potest inveniri relatio, quia in eo nihil est positivum.

24. Respondeo posito quòd detur omisio libera sine actu, quam non admitto, illa posse convenire aliquid logicè positivum, seu conceptibile conceptu, quo non aliquid ab ea removeatur, nec ipsa præcisè sola concipiatur, sed aliquid ei tribuatur, nempe aliqua habitudo ad aliud. Nam negationibus possunt advenire relationes, nempe negationi plurium mundorum advenit ex conceptu quo quis dicit, non dari plures mundos, relatio objecti & mensuræ ad actum illum veri judicii. In denario numero negationum quinque negationes habent relationem partis & medietatis ad totum, & similia.

---

## SECTIO UNDECIMA.

*In quo consistat peccatum habituale, & qualiter illud per gratiam destruat.*

1. **S**upponenda sunt hoc loco duo, quæ extra controversiam sunt. Primum

est, transacto peccato sive mortali, sive veniali, hominem vetè esse, & manere peccatorem quandiu peccati admissi remissionem non consequitur. Idque probatur, tum ex scriptura, quæ peccatores appellat eos qui peccarunt, etsi actu non peccent, quandiu per pœnitentiam non obtinuerunt peccati veniam: tum ex communi sensu hominum qui homicidam appellant eum qui, licet non actu occidat, tamen ante occidit hominem, aliterque putant eum se habere moraliter, quàm si non occidisset.

2. Secundum est, istud habituale peccatum esse aliquid quomodocunque aliud quàm hominem & peccatum præteritum, seu quàm hominem admisisse illud peccatum, quia si hoc tantùm esset, impossibile esset peccatum habituale deleri, cum fieri non possit ut quod factum est non fuerit factum. Deleri autem potest peccatum habituale juxta illud 1. Joan. c. 1. v. 9. *si confiteamur peccata nostra, fidelis est & justus, ut remittat nobis peccata nostra, & emundet nos ab omni iniquitate.*

3. His suppositis, restat ut peccatum habituale sit peccatum præteritum aliquo modo permanens, vel in se vel in effectu aliquo. Neque enim est aliquid absolutum ab omni respectu ad illud peccatum, seu quod ipsum nullo modo importet.

4 Aliqui dicunt esse actum præteritum, in se moraliter perseverantem per hoc quod non est retractatus.

5. Sed contra est primò, quia per se loquendo, defectus retractationis non facit permanentiam actûs voluntatis præteriti. Alioqui qui semel voluit ambulare aut emere equum aut legere librum, esset moraliter per totam æternitatem idem volens moraliter pro illo tempore, si non retractaret talem actum; & vir sapiens qui non semper severiorem moderationis regulam observavit, sed aliqua leviter egit de quibus postea non cogitavit nec retractavit, semper esset moraliter & prudenter censeretur eadem volens, quod est absurdum. Hinc si aliqui actus præteriti manent potius moraliter quàm alii, quo modo actus injuriosus quo quis alium offendit, manet potius quàm alius actus nihil efficiens morale; dicendum est tales actus causativos alicujus moralis effectûs manere tantùm in ipso effectû obligationis ex ipsis ortæ, non verò habere in seipsis moralem permanentiam; quo modo constituerent semper idem volentes, putà semper volentem lædere, quod est falsum.

6. Quod si dicas actus aliquos habere effectum. moralem quando non sunt amplius secundum suum esse physicum, ut patere videtur in donatione facta hæredi:

itaque tales actus permanere in seipsis moraliter.

7. Respondeo effectum moralem immediatum talium actuum non causari ab illis actibus nisi quando habent suum esse physicum, etsi effectus ille remaneat post transactos actus: quod patet in ipso quod contra affertur, exemplo. Nam effectus immediatus prædictæ donationis est jus legatarii ad obtinendam post mortem legatoris hæreditatem: quod jus tunc esse cœpit quando facta est illa donatio. Quod autem adveniat jus in re, seu actuale dominium & possessio hæreditatis, est effectus tantum mediatus illius præteritæ donationis; Et non est necesse ad inceptionem effectûs mediati, ut causa illius mediata in se formaliter habeat permanentiam ullam, cum ad ejus productionem sufficiat existentia causæ proximæ & immediatæ, quæ hîc est jus ad rem, ex quo oritur, posita conditione mortis, jus in re, seu proprietas & possessio rei. Quare non sequitur ex isto exemplo, actum præteritum, postquam desit, in se moraliter remanere.

8. Refellitur præterea habitualis permanentia peccati ut constituta per negationem retractationis, quia potest peccatum remanere habitualiter, etsi retractetur, putà si id fiat tantum per actum attritionis, qui etsi de se laudabilis, non



132 *De Ente Supernaturali,*  
tamen sufficit ad abolitionem peccati.

Aliqui dicunt peccatum habituale esse peccatum præteritum non condonatum. Et hi quoque supponunt actum præteritum remanere in se moraliter, quandiu nihil ponitur destructivum illius. Quare cum falsò asseratur, ut jam ostensum est, illa peccati in se moralis permanentia, hinc jam non subsistit hæc sententia.

9. Sed & eadem, quoad negationem condonationis ut inclusam in ratione & constitutione peccati habitualis, refellitur; quia generaliter loquendo negatio causæ, aut formæ, quæ si adesset, destrueret aliquid, non est causa durationis & permanentiæ ejus. Hinc malè diceretur ignis accipere continuationem & conservationem suæ existentiæ à negatione aquæ, quæ si injiceretur illum extingueret, nec dici etiam potest durationem ejus formaliter constitui per illam negationem.

10. Ex refutatione illarum sententiarum quæ asserunt peccatum habituale esse actum præteritum aliquo modo in se manentem, sequitur illud esse actum præteritum remanentem in aliquo effectû. Multi autem sunt effectus morales per quos actus præteritus potest dici manere moraliter. Nam ex peccato illo præterito sequitur quòd homo sit dignus odio Dei, quòd privatus gratiâ, quòd aversus à fine beatitu-

QUÆST. II. *De Gratia sanctif.* 133  
dinis, & incapax in eo statu ad eam obtinendam, ac denique quòd debitor subeundæ pœnæ æternæ. Hi sunt præcipui effectus ex transacto peccato restantes. Quare in aliquo istorum constituenda est permanentia illa in qua consistit peccati habitualitas.

11. Dico, Peccatum habituale consistit in eo quòd homo propter peccatum præteritum restet odibilis Deo. Probatur quia odibilitas illa, seu dignitas odii divini est malum inter ea quæ ex peccato præterito restant, omnium pessimum, Posito igitur quòd illud peccatum non maneat nisi in effectu, eoque morali, in isto maxime consistit. Alioqui peccatum non esset summum in ratione mali. Antecedens probatur, quia displicere Deo & esse illi objectum odii, est aliquid pejus quàm privari gratiâ, quàm carere dispositione ad beatitudinem, & quàm esse obligatum ad subeundam pœnam æternam. Recta enim ratio præcipit ut creatura potius ista velit, aut certè, minùs principaliter nolit quàm displicere Deo, & esse illi objectum odii. Et esset actus summæ charitatis, qui Dei amicitiam ex congruo mereretur, si peccator illa alia posthaberet displicentiæ & odio Dei. Ergo in tali odibilitate consistit ratio peccati habitualis.

12. Dices esse idem, privari gra-

154 *De Ente Supernaturali,*  
tiâ & esse objectum divini odii.

13. Sed contra est, quia esse odibilem Deo, est aliquid prius quàm privari gratiâ. Illud enim est de se prius à quo ad aliud non valet existendi consequentia. Atqui ab illa odibilitate seu dignitate odii divini non valet ad privationem gratiæ existendi consequentia, quia in statu puræ naturæ, si quis peccasset, odium Dei incurrisset, nec tamen fuisset privatus gratiâ, siquidem privatio est carentia formæ subjecto debitæ: Non fuisset autem homini in tali statu debita gratia. Ergo dignitas odii divini est aliquid prius de se in habitualitate peccati, quàm privatio gratiæ; ac proinde non sunt idem formaliter: & in priore potius quàm in posteriore constituenda est illius peccati permanentia, cùm præsertim, ut dictum est, odibilitas illa sit id quod est de se omnium quæ ex peccato præterito restant pessimum.

14. Dico secundò, Gratia destruit peccatum habituale per hoc quòd connaturaliter exigit, habétque de facto adjunctam complacentiam Dei circa personam, & condonationem offensæ, ac cessionem juris ad odium & indignationem: Probatur, quia cùm ex dictis, habitualitas peccati consistat in hoc quòd reddat odibilem Deo personam quæ peccavit, non potest congruentius destrui illa odibilitas quàm per

formam quæ reddat dignum amore. Et quia talis forma non necessariò exigit illum Dei amorem absolutum, & complacentiam circa personam, id quod adhuc requiritur est, ut de facto Deus amet personam tali qualitate affectam, & sibi in ea complac-  
ceat.

15. Et hoc valet ad explicandam destructionem peccati originalis, quia cùm illud sit habituale in posteris Adami, consistatque in odibilitate causante privationem supernaturalium quæ Deus homini destinavit, odibilitas illa non potest melius destrui, quàm collato dono supernaturaliter sanctificante, & habente annexam ex beneplacito Dei condonationem offensæ, & cessionem juris ad indignationem & odium.

16. Dices, Etsi diligatur homo à Deo condonante, ac remittente jus ad indignationem, tamen semper est dignus hoc ipso quòd peccavit, maxime si peccatum ejus personale proprium actuale fuit.

17. Respondeo non esse dignitatem ad impossibile. Posito autem tali amore Dei, est impossibile odium. Igitur in sensu composito talis amoris cessat absolutè dignitas odii. Quia verò is qui peccavit, etsi diligatur realiter actu à Deo, potest considerare seipsum præscindendo ab eo quòd sit amatus, quòdque peccatum ejus sit remissum,



hinc sub tali præcisione potest agnoscere se dignum odio non quidem positivè per exclusionem remissionis, sed præcisivè, per solam considerationem peccati cujus reus fuit. Et potest illud odisse, ac retractare illa peccata quæ ipse per se commisit, & absolvi de novo ab illis, recipiendo per absolutionem gratiam ut remissivam illorum, & magis ac magis deletivam. Cum quibus stat quòd realiter & de facto ante posteriores absolutiones jam esset justificatus ab illis peccatis à quibus adhuc absoluitur.

## SECTIO DUODECIMA.

*An possit peccatum remitti sine infusione gratiæ & sine retractione peccatoris.*

1. **A**Dverte primò, Deum necessariò quidem odisse peccatum, sed liberè odisse peccatorem, ita-ut personam quæ peccavit, possit, quando volet, non odisse. Ratio est quia ipsum quidem peccatum est ex natura rei merè malum: persona autem fit mala per aliquod accidentaliter & contingenter superveniens, quod Deus potest ab ea tollere: & restabit in persona aliquod bonum, quod potest esse Deo, si non motivum & objectum formale, saltem subjectum & objectum materiale

teriale amoris, nempe capacitas ad formalem amicitiam cum illo habendam.

2. Adverte secundò, Deum posse amare hominem vero amore amicitiae, absque eo quòd illi conferat ullum supernaturale donum. Quod probatur, quia in statu puræ naturæ, quem possibilem probavi quæstione 1. sect. 5. Deus diligeret homines, quibus destina- ret beatitudinem naturalem, consistentem in cognitione illius abstractiva, & in amore illi cognitioni proportionato. Et ipsi homines Deum reciprocè diligere potuissent amore naturali, & sic beatitudinem mereri. His positis.

3. Dico, Potest Deus remittere peccatum sine infusione gratiæ. Probatur, quia cùm Deus liberè oderit personam peccatoris potest illam non odisse, & remittere jus ad odium & indignationem, & diligere illum hominem eo amore quo diligeret in statu puræ naturæ infantes beatitudinis capaces. Hoc posito destructum erit peccatum quod restabat primariò & principaliter in odibilitate, seu dignitate odii divini: & tamen in hoc non erit infusio gratiæ. Ergo potest remitti peccatum sine infusione gratiæ.

4. Quod si quæras, quænam tunc erit forma talis justificationis constitutiva. Respondeo fore moralem formam, nempe jus quod habebit homo ex illa condonatione

& amore, ut non odio habeatur à Deo, & perinde ac si non peccasset, ad beatitudinem naturalem obtinendum accipiat ab eo cogitationes pias ad bonum inclinantes, & præparationem concursûs ad bona opera secundum providentiam illi statui congruam. Quare actus Dei quo condonaret & amaret, esset causa moraliter effectiva istius justificationis, quæ proinde dicitur fieri per condonationem extrinsecam. Illud autem jus, quod esset in homine illius condonationis effectus, esset forma intrinsecè constitutiva.

5. Porro jus illud non esset strictæ justitiæ, neque fundatum in aliquo quod haberet ipse homo, aut quod ab illo procederet, sed esset fundatum in eo quòd Deus condonans & amans, non posset sibi contradicere, sicut jus quod in præsentì statu habent justì ad beatitudinem; non est strictæ justitiæ, aut fundatum in valore operum Deum obligante, sed in eo quòd Deus, qui eam promissit justis in justitia perseverantibus, non possit non stare promissis.

6. Dico secundo, Potest peccatum remitti non modò sine infusione gratiæ, sed etiam sine retractatione peccatoris, ita ut in eo nulla facta sit mutatio nisi moralis, consistens in prædicto jure ad non odium Dei, & ad accipienda ab eo beatitu-



dinis naturalis media atque auxilia.

7. Probatur primò, quia falsum est principium ex quo asseritur necessitas retractationis ad deletionem peccati: & aliundè prædicta condonatio & jus sufficiunt ad deletionem ejus. Ergo. Antecedens probatur, quia principium illud est, quod maneat in se moraliter actus peccati præteritus, quandiu non retractatur. Atqui ex dictis sectione præcedenti, non manet actus ille in se moraliter, licet maneat in effectu morali; in quo tantùm sensu dicitur moraliter manere. Quod si ille secundùm suam rationem formalem moraliter remaneret, homo semper peccaret, quandiu non retractaret actum præteritum, quia semper esset moraliter idem volens contra legem, quod priùs voluit. Posito autem quòd non maneat moraliter in se, non est cur ad ejus deletionem, ultra condonationem Dei, requiratur peccatoris retractatio.

8. Probatur secundò, quia princeps terrenus pòtest delictum hominis physicè immutati nec veniam petentis, delere per solum suum actum illius remissivum. Ergo multò magis Deus id poterit per decretum liberum suæ voluntatis.

9. Dices disparitatem esse, quia princeps terrenus ipse physicè mutatur per suum actum à sua voluntate distinctum: itaque

non implicare quod alter ad ipsius immutationem aliter se habeat, quia constat uno ex duobus mutationem patiente, alterum posse aliter se habere, ut constat in relativis: at verò duobus omnino immutatis, non potest unum aliter se habere dependenter ab altero. Quare cum Deus per suum præcisè actum liberum non mutetur, si etiam homo in se mutationem non patitur, non poterit aliter se habere dependenter à Deo.

10. Respondeo in Dei actu inesse eminenter vim quæ est in actu mutante hominem, itaque illum habere posse eosdem effectus extrinsecos. Neque verò in homine actus quo remittit culpam, ideo est illius deletivus, quia est distinctus & mutationem efficit, sed quia est volitio de abolitione offensæ, & causat jus ad non odium. Et hoc etiam invenitur in actu Dei.

11. Instabis, Non destruitur peccatum, quandiu non tollitur ratio voluntarii ab actu moraliter remanente. Non tollitur autem illud voluntarium per condonationem Dei, quia illa non reddit involuntarium illud objectum quod homo semel approbavit & nunquam reprobavit: nec hominibus tollitur fundamentum quod habebant judicandi hunc hominem esse malum: nec deletur macula contracta ex fœditate peccati & oppositione contra legem na-

QUÆST. II. *De Gratia sanctis.* 141  
turæ & dictamen rationis, sed tantum  
offensa Dei.

12. Respondeo rationem voluntarii de-  
fuisse in se per cessationem actûs, & non  
esse opus ut aliter definat, sed tantum ut  
dignitas odii divini, in qua maximè con-  
sistit reatus culpæ, tollatur, quod fit per  
Dei condonationem. Quod si ratio volun-  
tarii in se maneret, nec posset destrui nisi  
per retractationem hominis, retractatio  
esset de se unica causa destruendi peccati  
quoad rationem culpæ voluntariæ: & hoc  
esset præcipuum in deletionem peccati, &  
homo, etsi reus coram Deo & dignus odio  
ejus & pœna æterna, jam tamen non esset  
malus malitiâ peccati habitualis. Quod cum  
dici non possit, non consistit illa habitua-  
lis malitia in permanente quoad se ratione  
voluntarii; neque in ullo quod sine actu  
Dei destruat, sed in prædicta dignitate,  
quæ potissimum tollenda restat, & per ip-  
sam condonationem tollitur.

13. Ad fundamentum judicandi illum  
hominem esse malum, dico, si constet  
Deum condonasse, illud esse destructum,  
quia jam non restat id quod supererat ex  
præteriti actûs malitia, nempe dignitas  
odii divini, & certum etiam est ex eadem  
condonatione hominem illum jam nullam  
habere malam voluntatem, quia si habe-  
ret volitionem malam, Deus ei non con-

donaret offensam neque eum amaret modo supradicto.

Ad maculam dico illam non remanere in se, ne quidem moraliter, actu præterito, quia ipsa nihil erat in se nisi difformitas hominis ex difformitate actûs ipsum denominans legi contrarium. Unde actu præterito id quod potest vocari macula in alio sensu, est dignitas odii divini quæ restat. Hâc autem sublatâ per condonationem, imò Deo bene effecto erga hominem illum in ordine ad finem ejus naturalem, dico nihil restare maculæ nisi id quod in justificatis sufficit ut à peccatis jam remissis semper possint absolvi.

Objicitur præterea contra possibilitatem decreti divini quod nihil efficiat nisi morale. Non potest intelligi novum Dei decretum, quin intelligatur novus aliquis terminus, isque realis prout reale opponitur morali, quia cùm morale fundetur in physico, debet efficientia seu causalitas per hoc in illud tendere.

14. Respondeo negando terminum novum debere involvere aliquid physicum novum, quia satis est si id adsit pro termino, quod erit objectum novi decreti. Potest autem esse novum decretum de aliquo merè morali, cùm id per se sumptum sit aliquid volibile, etiam seorsim ab omni alio. Itaque hoc loco objectum quod Deus

volet & sua voluntate efficiet, erit jus hominis ad non odium Dei, & ad media naturalia, beatitudinis naturalis, cujusmodi sunt cogitationes à vicio avertentes & ad virtutem inclinantes, pro opportunitate accipiendæ.

15. Ad id quod dicitur, ex eo quòd morale fundetur in physico, non posse poni novum morale quin fiat aliquod novum physicum. Respondeo distinguendo, si non detur aliquid physicum quod in se immutatum æquivalet pluribus physicè à se distinctis, concedo: si datur aliquid tale, nego. Datur autem aliquid tale, nempe Dei volitio, quæ propter suam infinitatem in se immutata æquivalet & præstat omnibus physicè distinctis creaturarum volitionibus: unde per se immutatam præstare potest omnia quæ per illas effici possunt.



## QUÆSTIO TERTIA.

### *De Gratia habituali.*

**C**Um gratiæ habituali debeantur per se gratiæ actuales, sine quibus ipsa non potest operari: subjicienda est considerationi gratiæ habitualis, quæstio de actuali; de qua tria hic expendentur.

Primum est. an omnis gratia disputationi Patrum contra Pelagianos ac Semipelagianos subiecta, seu ad salutem utilis, sit in entitate supernaturalis. Secundum per quid fiat determinatio gratiæ ad causandum actum qui ab ea supernaturalitatem accipit. Tertium, quid sit & an detur, nullique unquam desit gratia sufficiens.

---

## SECTIO PRIMA.

*An omnis gratia disputationi Patrum subiecta, seu ad salutem utilis, debeat esse in entitate supernaturalis.*

1. **S**upponit hæc quæstio necessitatem gratiæ Christi ad omne opus bonum: quæ necessitas est de fide, & constat ex illis Christi verbis. *Sive me nihil potestis facere.* Ioan. 13. 3. & ex aliis multis Scripturæ locis: itémque ex unanimi Patrum consensu, nec non ex definitione Conciliorum & condemnatione eorum qui vel gratiam sustulerunt ut Pelagiani, vel non ad omnem boni inchoationem necessariam duxerunt ut Semipelagiani. Posita autem hac necessitate, quæritur an omnes gratiæ actuales, seu cogitationes & motus interni ad bonum tendentes sint in entitate supernaturales, an tantum quoad modum, qui modus in hoc consistat, quod tales cogitationes



tationes & excitationes ad bonum, etsi in entitate naturales, sint indebitæ homini lapso, & acquisitæ per Christum, & utiles ad abstinendum à vitiis, & ad exercenda virtutum moralium opera, quæ in homine iusto dignificata per gratiam habitualement, sint hoc modo meritoria gloriæ.

2. Circa hoc non est ita aperta sanctorum Patrum sententia, ut non sit opus aliquo discursu ad mentem eorum assequendam, quia dum de auxiliis contra Pelagianos egerunt, eorum necessitatem non asseruerunt cum hac expressa distinctione supernaturalium quoad entitatem ab aliis supernaturalibus quoad modum: ideóque videndum est an auxiliis à se assertis ea tribuant quæ posita distinctione supernaturalium quoad substantiam & quoad modum, conveniant tantum supernaturalibus quoad substantiam.

3. Ex Theologis multi censent secundum sanctos Patres & reipsa non esse opus ut omnia auxilia salutis sint supernaturalia quoad substantiam, voluntque sufficere ad multa bona opera moralia quæ in iusto sint meritoria, si sint supernaturalia quoad modum. Alii autem, etiam multi, docent omnes cogitationes & motus quibus nos Deus excitat ad opera salutis utilia, necessariò esse in entitate super-



146 *De Ente Supernaturali*,  
naturalia ; & hanc esse sanctorum Patrum  
mentem. Ad rem dirimendam.

4. Adverte primò non bene negari aliquem actum esse supernaturalem quoad substantiam, ex eo quòd non habeat pro objecto nisi aliquid ordinis naturalis. Nam absolutè naturalitas vel supernaturalitas actûs non petitur ex naturalitate vel supernaturalitate objecti. Unde actus naturalis in substantia potest attingere objecta supernaturalia, ut patet in assensu quem dant hæretici mysterio Trinitatis, itémque Incarnationis, & aliis objectis fidei quæ non negant.

5. Neque dicas posse quidem dari actum naturalem de objecto tum naturali tum supernaturali, eo quòd aliquando actus non sit proportionatus objecto : at verò non posse dari actum supernaturalem de objecto naturali, quia deesset aliquid ad supernaturalitatem requisitum.

Contra enim est, quia absolutè vilitas objecti non necessariò redundat in actum quo attingitur. Unde de eodem objecto corporeo etiam per se sumpto & per se non terminante tantùm, sed & suo modo movente aut determinante, putà de albedine, sensus internus habet cognitionem nobiliorem quàm oculus, & intellectus excellentiorem quàm sensus ille internus, & Angelus quàm homo : & Deus de illa

per se sumpta, quo etiam modo illam videt, utpote habens pro objecto sui intellectus omne ens ut sic, Deus, inquam, habet infinitè præstantiorem cognitionem quàm Angelus. Quare cum Deus peculiari modo concurret cum intellectu hominis in ratione causæ, etiam particularis elevantis, poterit de objecto ordinis merè naturalis haberi cognitio absque comparisone nobilior eâ quam alioquin idem intellectus de eodem objecto per se præcisè cum naturali concursu haberet.

6. Adverte secundò non bene etiam negari supernaturalitatem actus ex eo quòd ille nobis non innotescat nisi per modum actus naturalis. Nam in hoc aliquid contingit simile ei quod circa nostros actus naturales experimur. Cùm enim aliquis de eodem objecto corporeo duplicem habet apprehensionem internam, unam corpoream in sensu interno, qualis est in belluis, aliam verò spirituales in intellectu; non advertit utriusque discrimen, nec aliter illam spirituales apprehendit aut experitur, quàm illam animalem ac materialem quæ est in phantasia; quia videlicet homo spiritualia apprehendit per modum sensibilibus. Unde nec anima seipsam sibi exprimit nisi per modum alicujus quanti corporei. Sicut igitur illa imperfectio nostri conceptus non obest imma-

rialitati cognitionum quas experimur corporeis similes, ita nec oberit supernaturalitati earum quas apprehendimus & experimur per modum naturalium.

7. Adverte tertiò auxilii supernaturalitatem rectè peti, consequenter ad prædicta de supernaturalitate in communi, ex eo quòd vim habeat relativam ad consecutionem visionis beatificæ. Nam quòd dat homini vim sufficientem ad attingendum finem supernaturalem, sive vis illa sit immediatè conferens ad illum finem, sive remotè, hoc ipso est supernaturale. Si igitur cogitatio aliqua circa objectum naturale, ita excellens est de se ex ratione sibi intrinseca, ut ex ea aptus sit sequi actus voluntatis circa idem objectum, ob suam præstantiam meritorius, saltem de congruo, aut impetrativus alicujus doni ulterius ad visionem Dei disponentis, non potest illa cogitatio esse in substantia naturalis: alioqui daretur effectus ad quem causa ejus nullam proportionem haberet, quod maximè rationi repugnat. Satis est igitur ad supernaturalitatem connexio virtutis atque activitatis cum fine supernaturali. Et in hac connexione rectè secundum nos, qui absoluta, nobis intuitivè non nota, relativè ut plurimum concipimus, auxiliorum supernaturalitas collocatur. His positis.

8. Dico, omnia auxilia de quibus Patres cum Pelagianis, ac Semipelagianis disputarunt, hoc est omnes cogitationes, ac motus interni quibus Deus homines excitat ad opera salutis utilia, cujusmodi sunt omnes actus honesti, sunt in entitate supernaturales.

9. Probatur à priori ex notabili tertio, quia illud est supernaturale in substantia, quo, natura de se impotens ad attingendum aliquod bonum supernaturale, constituitur potens ad aliquid tale obtinendum. Atqui prædicta auxilia sunt ejusmodi, quia per illa homo habet potestatem tendendi ad finem salutis, & quoties bene agit, in ea via, proficit, & saltem remotè ad beatitudinem se disponit, nec debet ex parte Dei, deesse id per quod opus reddatur utile ad finem per bona opera consequendum. Ergo omnia illa auxilia sunt in entitate supernaturalia. Certè homo non potest aliud ex parte sua agere quàm ut cogitationi bonæ, sive illa sit in entitate supernaturalis sive naturalis, quod ei non appareret, consensum præbeat. Si igitur consensus sit tantùm naturalis in entitate, ac proinde non utilis ad finem salutis supernaturalem, idque quia cogitatio quæ est ejus principium, non fuit nisi naturalis in entitate, defectus se tenebit ex parte causæ in cujus potestate erat dare cogita-

tionem in entitate supernaturalem, & à qua hoc postulabat ordinatio hominis ad finem supernaturalem: Et talis causa est Deus. Non potest autem ex parte Dei contingere talis defectus. Ergo quoties homo est in actu primo expeditus ad bene agendum moraliter, habet auxilium supernaturale ut actus sit supernaturalis.

10. Dices, In eo qui habet gratiam habitualement, sufficiet ad meritum æternæ vitæ, naturalis in entitate cognitio honesti, & amor ejusdem boni habens honestatem ordinis naturalis, quia dignitas personæ operantis conferet tali operi valorem ex seipsa petitus, ut dignitas Christi confert operibus ejus finitis valorem infinitum. Ergo non omne auxilium conferens ad vitam æternam est necessariò in entitate supernaturale.

11. Respondeo primò, etsi concederetur valor ille actûs in entitate naturalis ex gratia dignificante petitus, non hoc tantum necessarium esse in auxiliis quæ dantur in præsentis statu, ut justus operando cum illis possit mereri augmentum gratiæ & novum gradum gloriæ: sed hoc quoque requiri ut peccator etiam possit ex illis proficere, & mereri saltem de congruo, si non remissionem peccati, quia actus ad quod datur auxilium non erit justificativus, at ulteriora auxilia, quibus ad con-

tritionem excitetur & ad justificationem perveniat. Si autem non habet supernaturale auxilium, non proficiet neque merebitur quidquam, etiam de congruo, neque impetrabit, etsi subveniat egenis & resistat gravibus tentationibus ex motivo veræ honestatis, cujusmodi est honestas cujusvis virtutis moralis, quia cum auxilio in entitate naturali non faciet actus internos nisi naturales in entitate. Ergo requiritur ut quoties peccator recipit à Deo actuale gratiam, recipiat supernaturalem in entitate, ne frustra bene agat si ei consentiat. Et hanc supernaturalitatem bonorum operum quæ fiunt à peccatore, etsi nondum sint justificativa, supponit scriptura, dum eis tribuit vim aliquam dispositivam ad plenam in Deum conversionem, ut cum Propheta Daniel, principi non existenti in Dei gratia, dicit: Peccata tua eleemosynis redime. Dan. 4. 24. Quod idem est ac, obtine à Deo per meritum eleemosynarum gratias tales ut per eas conteraris & veniam peccatorum recipias. Quod si peccator, ut agat utiliter ad salutem, debet accipere auxilia in entitate supernaturalia, non debet justus accipere inferioris ordinis, nec quoad hoc pejoris esse conditionis, quia est melior. Itaque omnia auxilia quæ dantur hominibus in hoc præsentis viæ statu, debent esse in

152      *De Ente Supernaturali,*  
entitate supernaturalia , ut singula sint  
de se principium , quo , qui ea accipit ,  
proficere aliquo modo ad salutem pos-  
sit.

12. Respondeo secundò , falsum esse  
illud , quòd si fiat à justo actus bonus in  
entitate naturalis , dignificetur per gra-  
tiam sanctificantem , ita-ut mereatur aug-  
mentum gratiæ & jus ad novum gradum  
gloriæ , quia dignificatio gratiæ consistit  
primò in hoc quòd opera in entitate super-  
naturalia reddat de condigno meritoria  
gratiæ & gloriæ , cum in peccatore ipsa  
contritio , etsi in entitate supernaturalis ,  
non sit meritoria gratiæ , nisi de congruo.  
Secundò in hoc consistit illa dignificatio  
quòd ex duobus justis , is qui majorem  
habet gratiam sanctificantem , posita pa-  
ritate operis boni , plus mereatur quàm  
alius : quod communiter admittunt Theo-  
logi. At verò bene negatur dignificatio-  
nem gratiæ eò sese extendere , ut reddat  
dignum nova gratia & gloria , opus ordi-  
nis merè naturalis. Nam si ita esset , vel  
meritum , & acquisitio novæ gratiæ , &  
jus ad novum gloriæ gradum causabatur  
tum ab illo actu , tum à gratia tanquam à  
duabus causis simul in eundem effectum  
concurrentibus : vel tota causalitas erit à  
gratia , ita-ut actus se habeat tantum per  
modum conditionis , sine qua gratia talem



effectum non haberet. Neutrum dici potest. Ergo. Non primum, quia, ut ostendi quæst. 1. de ente supernaturali in genere, sect. 1. est supra vim omnis actûs naturalis causare aliquid in entitate supernaturali, & illud siue physicè, siue moraliter, siue effectivè, siue meritoriè attingere. Nec dici potest actum illum, non per se, sed ut dignificatum, esse concusam novæ gratiæ, & novi gloriæ gradûs in cælo recipiendi. Nam dignificatio illa est ipsa causalitas gratiæ habitualis, quæ non aliter concurrit ad illos effectus, quàm per talem dignificationem. Itaque ab ipsa erit tota causalitas in novam gratiam & gloriam, & ipse actus ad illam causalitatem se habebit ut conditio nihil operans nec aliter erit meritorius, quàm opus externum substans actui interno per se meritorio. Sed neque hoc alterum dici potest, quia nihil magis ad meriti constitutionem intrinsecè pertinet, quàm bonitas actûs, quæ etiam seclusâ dignificatione gratiæ, est objectum formale movens Deum ad dandam gratiam & gloriam, ut patet in justificatione peccatoris per contritionem, quæ proinde debet esse in entitate supernaturalis. Quare dici non potest actum esse tantùm conditionem ad meritum, aut veluti subjectum extrinsecè & denominativè meritorium: sed dicendum

est actum debere esse per se dignum præmio, quod cum hîc sit supernaturale in entitate, nempe nova gratia, cui correspondere debeat novus in cælo gloriæ gradus, ipse quoque actus debet esse in entitate supernaturalis, ut sit tali præmio aliquo modo proportionatus. Ad quod accedit in justis, quod actus etiam per habituales eorum gratiam dignificetur, plûsque justus mereatur per parem quoad cætera, dilectionem aut contritionem, quàm peccator in prima justificatione per actum quo veniam obtinet. Et meretur, ut dictum est, de condigno, cum hic mereatur tantum de congruo. Nec valet ad probandam dignificationem actus naturalis per gratiam, argumentum ductum ex Christi meritis opera supernaturalia quidem, sed finita in se, infinitè dignificantibus. Non valet, inquam illud argumentum quoad talem dignificationis extensionem, ob dignitatum impropportionem.

13. Ex iis patet, nullum fieri in præsentî statu actum bonum, qui non sit in entitate supernaturalis, quia actus bonus in entitate naturalis non modò non prodesset ad salutem homini peccatori, ut ostensum est, sed nec justo ex jam data secunda responsione. Debet autem omnis actus bonus esse cuivis homini de se utilis,

QUÆST. III. *De Gratia act.* 155  
ad salutem, ne sit in præsentî providen-  
tiæ statu defectus se tenens ex parte Dei,  
qui homini facienti quod in se est, dum  
nimirum determinat se ad bonum, non  
suppeditaret id ex quo provenit superna-  
turalitas, sine qua non potest esse utile  
illud bonum. Itaque omnis bonus actus est  
de facto supernaturalis; Et quia non po-  
test esse supernaturalis, nisi sit ex auxilio  
supernaturali, datur ad omnem bonum  
actum auxilium supernaturale.

14. Probatur præterea ista sententia, quia  
Pelagiani & Semipelagiani non negabant  
auxilia gratiæ qualia ponunt adversarii, in-  
entitate naturalia, interna; nempe cogi-  
tationes bonum proponentes, etiam pra-  
cticas, & motus voluntatis ad id incitan-  
tes: & talia auxilia ex adventu Christi &  
exemplis effusioque sanguine petebant: in  
quo est ejusmodi auxiliorum quædam su-  
pernaturalitas quoad modum. Id totum  
constat ex Augustino, apud quem lib. 1.  
de gratia Christi cap. 7. Pelagius ita lo-  
quitur. *Adjuvat nos Deus, dum cordis  
nostri oculos aperit; dum nobis, ne præsen-  
tibus occupemur, futura demonstrat; dum  
Diaboli pandit insidias, dum nos multiformi  
& ineffabili dono gratiæ celestis illuminat.*  
Et cap. 18. *si ante legem, ac multò ante  
Domini nostri & Salvatoris adventum, justè  
quidam & sanctè vixisse referuntur, quantò*

*magis post illustrationem adventûs ejus, illustratos id posse credendum est, nos, qui per Christi gratiam in meliorem hominem renati sumus, qui sanguine ejus expiati atque mundati ipsiusque exemplo ad perfectionem excitati justitia, meliores illis esse debemus qui ante legem fuere. Hæc tamen Patribus non satis erant, quia nihil admittebant internum quod positis extrinsecis non esset aut esse posset à principiis naturalibus & concursu Dei universali, ex hypothesi talium objectorum illis debito. Volebant autem Patres gratiam quam supra naturæ vires & exigentiam Deus, non per concursum naturalem, sed per actionem sibi propriam, in nobis efficeret, quæque esset medium sufficiens per Christi merita nobis acquisitum ad finem omnino supernaturalem, itaut hoc non posset provenire nisi ex meritis ejus, in ratione causæ moralis effectivæ id nobis à Deo obtinentibus.*

---

## SECTIO SECUNDA.

### *Solvuntur objectiones.*

1. **O**bjiciunt primò, Auxilium indubitum, & distinctum à dono creationis, legis & doctrinæ, congruè excitans ad bene vivendum, & prævilum

efficax, pertinet ad gratiam Christi de qua est quæstio. At tale potest esse in entitate naturale. Ergo.

2. Respondeo primò, auxilium illud esse quidem indebitum subjecto, siue huic homini, quia nemo jus habet ad auxilia selecta & prævisa efficacia, sed tantum ad sufficientia, quæ dent ei potestatem boni: non esse autem indebitum naturæ, quia spectata hominum universalitate, ratio postulat ut multis dentur ea auxilia quæ sint effectum obtentura, idque pertinet ad munus providentiæ naturalis, ut de facto multi beatitudinem naturalem consequantur, & tota species in suis omnibus individuis non careat suo fine.

3. Respondeo secundò, non posse poni in definitione auxilii pertinentis ad gratiam Christi, quod sit selectum, congruum, & prævisum efficax. Primò quia Pelagiani non negabant auxilia ex quibus fiunt bona opera, esse efficacia, & talia à Deo prævisa. Et negabant tamen omnem gratiam actualem de qua contentio erat inter ipsos & Doctores Catholicos. Ergo illa prævisio efficacitatis non constituit formaliter auxilium gratiæ. Secundò quia si efficacia auxilii prævisa esset de essentia gratiæ, auxilium sufficiens datum ad multa bona opera, non esset gratia Christi: Et qui peccant, carerent tali gra-

tia, nec possent peccato per bonum actum oppositum resistere, quia *sine me*, inquit Christus, *nihil potestis facere*. Joa. 15. 5.

4. Respondeo tertio auxilium de quo agitur, quodque ad gratiam Christi pertineat, non satis esse si conferat ad vivendum bene bonitate morali, sed requiri ut conferat ad bene vivendum bonitate supernaturali, quæ sola utilis est ad salutem. Et nego id competere auxilio in entitate naturali.

5. Objiciunt secundo, si nulli affectus naturales honesti sunt utiles ad salutem, verum erit non esse necessariam gratiam Christi ad ullos tales actus, etiam heroicos; neque ad superandas gravissimas tentationes; neque ad observandam totam legem naturalem. Hoc autem videtur falsum, quia sic nimis extolluntur vires naturæ.

6. Respondeo non esse quidem necessariam in statu puræ naturæ ad illa omnia, quia alioquin impossibilis esset ille status, ac de se malus. At verò ad illa eadem esse necessariam in statu præsentis providentiæ, juxta quam non modò præcepta supernaturalia, sed etiam lex naturalis servari debet per actus de se ad salutem utiles, quales soli esse possunt supernaturales in entitate, ac proinde ex auxilio in entitate supernaturali procedentes. Hinc fit ut



quisquis eam servat, id omnino ex talibus auxiliis faciat. Neque ei liberum est, ex hypothesi quòd servet, aliter servare, sicut ei qui habet habitum, non est liberum, ex hypothesi quòd velit facere id ad quod inclinatur ille habitus, non agere ex tali habitu.

7. Objicitur tertio, Auxilia omnia gratiæ per Christum acquisitæ sunt asserta à Patribus. Atqui auxilia in entitate naturalia, prævisa efficacia, & sic indebita homini existenti in statu peccati, sunt per Christum acquisita, & sic quoad modum supernaturalia. Ergo sic sumpta sunt à Patribus asserta.

8. Respondeo auxilia gratiæ asserta à Patribus, esse ea quæ ita sunt acquisita per merita Christi, ut non potuerint nisi per ea condignè obtineri. Unde & fuerunt finis per se adventûs & mortis Christi. Et talia sunt ea per se sola, quæ vim habent hominibus justitiam conferendi, ac proinde entitativè supernaturalia. Concedo autem secundariò per merita Christi acquisita esse dona naturalia, ut sunt bona indoles, occursus causarum naturalium, & cogitationes item naturales quæ sunt occasio supernaturalium. Sed nego Patres ista per se sumpta, seu spectata divisim ab auxiliis in entitate supernaturalibus, inter gratias per Christum acquisitas recen-



fuisse, quia non valent conferre hominibus id propter quod Christus mortuus est, nempe justitiam & salutem.

9. Objicitur quartò, Cogitationes naturalis ordinis, ut contemplatio elementorum & similes, recensentur à Patribus inter vocationes gratiæ. Nam sanctus Prosper lib. contra Collat. cap. 14. exponens illud Christi tom. 6. 44. *Nemo potest venire ad me nisi Pater meus traxerit eum*, ita habet. *Trahit igitur ad Deum contemplatio elementorum, & omnium quæ in eis sunt ordinatissima pulchritudo. Invisibilia enim ejus à creatura mundi per ea quæ facta sunt, intellecta conspiciuntur. Trahit rerum gestarum cognitio, & divinorum operum calatura animum audientis inflamment, &c.* Ergo non est necessarium ad rationem gratiæ, ut ipsa sit in entitate supernaturalis.

10. Respondeo distinguendo antecedens, cogitationes illæ seorsim à supernaturalibus inspirationibus, quibus Deus illustrat mentem talia considerantis; recensentur inter vocationes gratiæ, nego: simul sumptæ cum illis, concedo: & dico Deum ex occurſu talium objectorum, & occasione naturalium de illis cogitationum, agere supernaturaliter in mente hominis, & eadem ipsi repræsentare modo apto ad excitandum in ejus corde amorem illius

illius bonitatis, & sapientiæ quæ ista omnia ad nostrum bonum ordinatissimè disposuit. Et ita sanctos Patres intelligere, constat ex eo quòd potissimùm spectent illam actionem, seu tractionem internam Dei, qui à visibilibus ad invisibilia, & ab infimis ad summa, atque ad hominis finem, modò non obstant, perducit.

11. Objicitur quintò, Multi fiunt boni actus absque eo quòd ullum supernaturale objectum menti occurrit, ut cùm quis parentes honorat, aut moderationem in cibo servat ex intuitu honestatis moralis, quæ est in illa moderatione. Ergo illi actus non sunt supernaturales in entitate.

12. Respondeo ex dictis quæst. 1. & in notabili primo sectionis præcedentis, supernaturalitatem non peti ex objecto. Et negari non potest quin circa Deum summè amabilem, & summo cultu ob infinitam excellentiam dignum, possint dari actus in entitate supernaturales. Et tamen talia objecta sunt naturalia, seu naturaliter homini cognoscibilia & amabilia.

13. Objicitur ultimò, Multos actus morales bonos non experimur nisi per modum naturalium. Ergo non sunt in entitate nisi naturales.

14. Respondeo ex secundo notabili, non tantùm illos actus qui pertinent ad virtutes morales, sed etiam actus Theolo-

gicarum virtutum, fidei, spei & charitatis, eodem tantum modo nobis apparete, idque non impedire ne sint illi in substantia supernaturales. Ratio autem cur non appareat supernaturalitas, est quia ipsa est supra sphaeram nostrae mentalis intuitionis naturalis.

---

### SECTIO TERTIA.

*Per quid fiat determinatio gratiae ad causandum actum qui ex ea supernaturalitatem accipit.*

1. **R**atio difficultatis est, quia si gratia seipsa determinat voluntatem ad consensum, non libera videtur fore voluntas: si vero determinetur gratia à voluntate, sic ipsa subjicietur voluntati creatae, & homo gratiam reddet efficacem: quorum neutrum debet admitti, quia gratia est principium altius omni facultate naturali, & quatenus efficax, est Dei donum, non verò effectus ab homine proveniens. Hæc & alia circa determinationem gratiæ objiciuntur ut infra patebit.

2. Ad rem statuendam adverte primò sæpe contingere ut una causa sit ex seipsa antecedenter determinata ad coëfficiendum effectum cum alia causa, ex hypothesis quòd hæc, quæ sine illa adjuvante

aut etiam elevante non potest illum effectum saltem taliter producere, suam propriam determinationem, prius prioritate originis ponat: quæ prioritas in hoc tantum consistit quòd ideo hæc causa agat, quia alia, cui associata est, agit. Patet hoc in habitibus sive artium sive virtutum, tum intellectûs tum voluntatis, qui de se determinati sunt ad rectitudinem inducendam in operationem, & semper inclinant sive in verum sive in bonum, & quoad hoc sunt semper parati, sed si potentia quam perficiunt, agat circa objectum ipsorum. Patet item in quibusdam causis moraliter effectivis, cujusmodi sunt consilium, adhortatio, jussio, quæ de se determinatè inclinant in id quod consulitur aut suadetur aut jubetur, nec tamen habent effectum in actu secundo, nisi ex consensu ejus cui datur consilium, aut fit suasio aut jussio. Et notandum, gratiam actualem, de qua hîc agitur, habere se in nobis per modum consilii aut adhortationis ad bonum, & per eam nobis intimari obligationem bene agendi, aut non peccandi.

3. Adverte secundò etiam contingere ut una causa, quæ quomodocunque ab alia determinatur ad effectum ut sic, determinet ipsa ad modum, & qualitatem illius effectûs, in quo scilicet erit una

ratio formalis, apta provenire ab illa causa, & non ab alia. Patet hoc in multis causis quæ ita cum una concurrunt, ut unaquæque effectui conferat aliquid ex se petitum ac sibi correspondens. Sic dum quis scribit, determinat quidem calamum & atramentum ad formandos characteres, sed per acumen calami determinatur ad formandos minutiores, & per nigredinem atramenti ad formandos nigros. Et si, dum scribit, Deus atramentum verteret in aurum liquatum ac fluidum, per illam Dei actionem determinaretur ad formandos characteres aureos. His positis.

4. Dico, Gratia est principium de se antecedenter determinatum in actu primò ad causandum bonum actum, non tamen absolute, sed ex hypothese quòd voluntas quam parata est elevare ad agendum supernaturaliter, ipsa se determinet ad consensum ut sic. Posita autem determinatione voluntatis ad consensum ut sic, ad quem gratia excitat, determinatio ad supernaturalitatem consensûs, est à gratia.

5. Conclusio probatur per partes. Ac primò quidem quòd gratia sit principium in actu primo antecedenter determinatum ad actum bonum, probatur, quia illa causa quæ non potest producere nisi unum ex duobus effectibus contrariis, est determinata antecedenter ad illum, eumque

de facto producit, nisi ex parte principiorum aliquis influxus aut aliqua conditio ad actionem requisita desit. Atqui gratia est causa quæ non potest producere nisi actus bonos, vitiolis oppositos, & nemo per illam malè operari potest. Ergo ipsa est principium de se antecedenter determinatum ad bonos actus.

6. Quod non determinetur in actu secundo nisi ex hypothese quòd voluntas se determinet ad consensum ut sic, probatur, quia alioqui necessitaret voluntatem, & adimeret indifferentiam ad meritum requisitam.

Deinde non apparet per quid gratia actualis, de qua hîc sermo est, possit voluntatem determinare ac necessitare ad bonum actum, adimendo ei indifferentiam ad oppositum. Nam cùm non moveat voluntatem nisi proponendo objectum, etsi illud sit infinitum, ut Deus, non tamen proponit videndum intuitivè ut in se est. Sola autem talis propositio infiniti boni determinat voluntatem ad amorem ejus, non relinquendo indifferentiam ad actus amoris oppositos.

7. Jam quòd posita per voluntatem determinatione voluntatis ad consensum ut sic, determinatio ad supernaturalitem consensûs sit à gratia, probatur, quia quando ex multis causis una tantùm vim habet ad



aliquam rationem formalem quæ est in effectu, determinatio ad illam rationem formalem aut qualitatem & excellentiam, est ab ea causa, non verò ab alia quæ talem vim non habet. Atqui ex omnibus causis secundis quæ concurrunt ad actum supernaturalem, sola gratia vim habet ad supernaturalitatem talis actûs, non autem voluntas, neque ulla cognitio aut habitus naturalis. Ergo ex gratia petitur determinatio ad supernaturalitatem boni actûs.

---

## SECTIO QUARTA.

### *Solvuntur objectiones.*

1. **O**Bjicies primò, omne bonum, ac proinde omnis determinatio ad bonum debet esse à Deo, maximè cum determinatio sit id quod in omnibus operibus eminet, & propter quod effectus maximè imputabilis est agenti. Non est autem à Deo determinatio nostri boni actûs sine intermedia causa per quam nostram voluntatem ita moveat ut in sensu composito talis motionis, non possit ferri in oppositum. Et causa illa non est nisi gratia, quâ voluntatem prævenit. Ergo per gratiam fit determinatio ad bonum actum sine ulla hypothese determinantis se ex parte sua, priùs prioritate originis ad consensum ut sic, nostræ voluntatis.



2. Respondeo omne bonum secundum suam entitatem debere esse à Deo ut à causa efficiente, sed non universaliter ut à causa determinante, quia sic nullum bonum esset causæ secundæ liberum, nec meritorium. Nec Deus debet esse causa ipsius determinationis formaliter sumptæ, sed identicè ac realiter acceptæ, quia sic esset solus causa libera, siquidem esset solus causa determinans. Nulla enim est causa libera quæ se non determinet ad suum effectum: & in hoc quòd seipsa se determinet per suum actum, cùm esset antecederet indifferens, consistit libertas ejus. Et satis pendet à Deo per hoc quòd non possit sese determinare absque eo quòd Deus & concursum indifferentem offerat, & simul ad eundem effectum concurrat ex sua etiam propria determinatione, quâ illius determinationem comitatur juxta dicta quæst. de Ente increato

3. Ad id quod dicitur determinationem esse id quod in omnibus operibus eminet, respondeo id verum esse de determinatione quæ fit moraliter per imperium in subditos, vel per dominium voluntatis in subordinatas sibi potentias: itémque de ea quæ fit à causa intelligente per motionem instrumenti quod illa sibi subjicit ad causandum effectum ad quem illud est de se

indifferens, & vim non habet nisi motum. Sic in pictura quia pictor per suam artificiosam motionem penicillum determinat ad efformandam præstantem imaginem, ideo non penicillo, sed pictori adscribitur quidquid in tabella excellens est. Et par est ratio de descriptione poëmatis, quæ poëtæ tribuitur, non calamo, quo assumpto & motioni illius subdito, versus sunt exarati. At verò cum causa inferior determinat superiorem, ac nobiliorem, cuius concursu indiget, & sine qua non potest agere, aut saltem taliter agere, cum inquam determinat tantum per positionem prærequisiti ad illam cooperationem, negotalem qualemcunque determinationem esse id quod in tali effectione eminet. Nam potius id quod in tali productione est nobilissimum, est concursus causæ superioris, sine qua impossibile est esse talem effectum. Sic in omnibus actionibus causarum secundarum, id quod est divinum, est concursus Dei sine dependentia à causa superiore. Et in productionibus nostrorum bonorum operum, id quod post Dei concursum est optimum, est elevatio nostræ voluntatis ad actum supernaturalem: quæ elevatio fit per gratiam de se paratam non modò ad cooperandum, sed ad conferendam actui supernaturalitatem.

4. Adde quoad Deum, ipsum in ratione  
causæ

causæ primæ ac supremæ, quæ omnia, antequam essent, præordinavit, multò altiori modo esse causam omnis humanæ atque Angelicæ determinationis ad bonum, quàm si creatas voluntates vel per se immediatè, vel per aliud necessitando determinaret. Modus ille consistit in hoc quòd omnis determinatio ad bonum sit primò sub prævisione quam habuit Deus quòd si voluntas sic præveniretur ac præmoveretur, tali dato auxilio, ipsa seipsam determinatura esset ad consensum: deinde ex decreto sic præveniendi ac præmovendi eam; cui decreto accedit complacentia Dei circa talem dispositionem ac futuritionem. Sic enim maximè imputabilis est illi determinatio creaturæ ad bonum, quia effectus maximè adscribitur causæ quæ primò illum intendit, & remotè atque antecederenter ordinavit alias intermedias, etiam liberas causas, per quas ille effectus obtinetur: maximè si non tantùm conjecturaliter & cum probabilitate, ut contingit inter homines, sed cum summa atque infallibili certitudine id totum prænoscat, quod est proprium Dei: Et sic Deus est optimo modo causa cui tribuitur omnis determinatio ad bonum, absque eo quòd causas liberas, vel immediatè per se, vel per aliquid necessitatem importans determinet.

5. Objicies secundò, si per priorem

170 *De Ente Supernaturali,*  
prioritate originis determinationem liberam voluntatis, gratia quomodocunque determinetur ad suum actum secundum, idque necessaridò, in tali hypothefi gratia subdita erit hominis libertati, & similiter habitus supernaturales qui cum ea producant actus suos. Non debet autem subdi gratia libertati creatæ. Ergo aliter determinatur gratia ad suum effectum quàm per priorem prioritate originis determinationem liberam voluntatis.

6. Respondeo negando esse subjectionem in causa quæ non movetur ab alia, nec quidquam ab ea patitur, sed eam potiùs elevat ad agendum supra naturæ suæ vires: Gratia autem, & habitus supernaturales non patiuntur quidquam à voluntate creatæ, sed sunt in nostra anima dependentes à solo Deo effectore talium donorum & qualitatum: & voluntas ab iis elevatur ad hoc ut possit agere supernaturaliter. Ergo nulla est subiectio gratiæ aut habituum supernaturalium respectu creatæ voluntatis.

7. At, inquires, pendet ab homine quòd gratia agat, vel non agat. Ergo gratia ipsi subdita est.

8. Respondeo primò malè dici quòd agere gratiæ pendeat ab homine, etsi illud agere sequatur determinationem hominis ad consensum ut sic, quia gratia, ut dictum

est, antecederet determinata est in actu primo ad suam actionem, ex hypothefi quòd non defuit determinatio hominis ad consensum. Et hac posita determinatione hominis, ipsa de se determinatur ad suum actum secundum, seu ad coëfficientiam consensûs, cui etiam supernaturalitatem confert. Sic autem prædeterminari per positionem prærequisiti, non est pendere. Aliò qui Deus qui etiam tali modo determinatur ut concurret ad nostras actiones liberas, penderet in suo concursu à nobis.

9. Respondeo præterea quoad non agere gratiæ, bene dici ipsum pendere ab homine, quia id ex nulla alia causa provenit, siquidem Deus & gratia sicut & habitus supernaturales sunt causæ paratæ & propensæ ad causandum bonum actum. Verùm in hac causalitate non actionis, non est potestas sed defectus, cùm hoc tendat ad non ens. Et negari non potest causam imperfectam, cujusmodi est homo, posse causare maxima mala, quia potest errare & malè agere circa superiora se, & se infinitis bonis privare, offendendo graviter ens infinitum, quod est Deus.

10. Obicies tertio, si determinatio voluntatis ad actum quem facit cum gratia, est origine prior quàm determinatio gratiæ in actu secundo, ipsa voluntas sola poterit producere actum illum, quod implicat,

quia actus ille esset supernaturalis, & non esset.

11. Respondeo negando sequelam, & dico satis esse ad illam prioritatem quod voluntate ex parte sua exerente vim suam, adsit gratia cooperatura cum illa, ut pote de se in actu primo ad illam cooperationem antecedenter determinata. Quod patet in determinatione habitûs charitatis per voluntatem, ad actum quem voluntas non potest efficere sine illo habitu. Nam non obstante hac impotentia, voluntas prius origine agens producit illum actum cum habitu qui non ageret nisi ipsa se determinaret; ipsa autem se determinante, simul concurrit, cum ad hoc esset in actu primo pro tali hypothesei determinatus. Quod si valeret argumentum, per illud probaretur hominem qui ad effectus liberos prius, prioritate originis sive influxûs, agit quàm Deus in actu secundo concurrat, in quantum ideo Deus concurrit, quia homo ex parte sua agit, & se ad hoc determinat, oblato prius à Deo concursu indifferenti, sequeretur inquam hominem posse agere sine Deo. Et huc spectant quæ dicta sunt supra citata quæstione de Ente increato Sect. 9.

12. Instabis, Nimirum adhuc tribuitur homini, dum dicitur ipsum antecedenter ad influxum gratiæ, & prius prioritate

originis posse aliquid, quo posito, gratia cum illo operatur, nempe dum ipse suam ponit determinationem ad consensum, quam sequitur necessario & realiter comitatur cooperatio gratiæ.

13. Respondeo nimum tribui, si hoc tribuitur homini non prævento & elevato per gratiam quâ ad id excitetur, quæque antecederet sit parata, ut dictum est, ad coagendum cum illo. Non tribuitur autem id homini præcisè, seu homini ut sic, sed taliter prævento & excitato, & præhabenti causam elevantem taliter de se determinatam, nec futuram ex parte sua nisi ipse resistat. Hinc in statu puræ naturæ, hominis determinationem ad bonum non sequeretur ulla determinatio principii elevantis ad aliquid supernaturale. Quare homo non habet de se ullam vim ponendi determinationem quam consequatur ordine originis seu influxûs, & realiter comitetur cooperatio gratiæ, sed tantum habet hoc per ipsam gratiam, dum eâ prævenitur. Unde verificatur illud Pauli 1. Cor. 15. 10. *Non ego autem, sed gratia Dei mecum.* Cum quo stat & consentit illud ejusdem Apostoli, *Non quod simus sufficientes cogitare aliquid à nobis quasi ex nobis, sed sufficientia nostra ex Deo est.* c. 2. Cor. 3. 5.

14. Obicies quartò, si gratia non determinat voluntatem, sed ipsa ad suam in



actu secundo determinationem supponit ordine originis determinationem ipsius voluntatis, homo gratiam reddet efficacem, quia per suam prærequisitam determinationem ad consensum ut sic, determinabit eam ad illum ipsum consensum suo modo supernaturali coëfficiendum.

15. Ad hanc objectionem respondeo nullam causam in statu absoluto neque per seipsam, neque per quidquam aliud, reddi efficacem, sed esse talem per aliquid quod in statu conditionato præcedit existentiam ejus, si est ens potentiale quod possit carere existentia.

16. Idque ut intelligatur, sciendum est non per idem formaliter causam dici potentem, efficacem, & efficientem: quia inter esse potentem, & esse efficacem, etiam latissimè sumpto nomine causæ efficientis, pro ea quæ vel habuit, vel habet actu, vel absolutè habebit effectum, datur aliquid medium, minus universale quàm posse, universalius autem quàm sic habere absolutè pro aliqua differentia temporis effectum: idque est esse habituram effectum si existat & in talibus ponatur circumstantiis, taliterque applicetur: quod potest esse verum de causa quæ nunquam ponatur, & nunquam habeat effectum. Id, inquam, primò est minus universale quàm esse potentem, quia loquendo de causis omnibus tam po-

fitis, aut futuris, quàm nunc è possibilibus omnes quidem habituræ effectum si ponantur, sunt ex se potentes, sed non omnes potentes, si applicarentur, efficerent; & multæ de facto habentes potentiam, etsi nihil desit ad agendum, non habent effectum, quia vel sunt liberæ per se, vel non agunt sine determinatione causæ liberæ, ut habitus voluntatis, & facultates inferiores libertati subordinatæ. Itaque causam esse potentem, latius patet, quàm esse habituram effectum si exillat & applicetur ad agendum. Jam quòd hoc secundum latius pateat quàm habere effectum, probatur, quia omnes quidem causæ quæ habent effectum, antequam existerent, erant habituræ conditionatè, verùmque erat dicere de illis, istæ causæ habebunt effectum si existant: & de omnibus quæ aliquando erunt actu efficientes, verum nunc est, habituras effectum si existant & applicentur: sed non omnes quæ haberent effectum si ponerentur & applicarentur, de facto habebunt, quia conditio illa sub qua essent habituræ; nempe existentia & applicatio earum nunquam ponetur. Illas igitur causas omnes quæ si existant & applicentur, habituræ sunt effectum, vocamus efficaces. Et hinc patet quod dixi, nullam causam in statu absoluto, neque per se, neque per quidquam aliud reddi efficacem, quia priùs

de illa quæ nunc in statu absoluto est efficiens, verum erat in statu conditionato qui absolutum præcedit, utpote non requirens existentiam rei, esse habituram si existeret; quod est esse efficacem. Positâ igitur hæc doctrinâ, malè contenditur hominem reddere gratiam efficacem per hoc quod facit in statu absoluto, dum ponit ex parte sua id quod est prærequisitum ad cooperationem gratiæ & cum ea connexum, nempe propriam suam determinationem quam comitatur determinatio gratiæ, quia gratia jam erat efficax in statu conditionato per futuram in tali hypothefi talis determinationis concomitantiam.

17. At inquires, prioritas illa statûs conditionati non impedit ne determinatio gratiæ conditionatè futura, jam in ipso statu conditionato pendeat à determinatione hominis, quia cùm n homo, etiam in illo statu, habeat liberam potestatem consentiendi gratiæ, habet hoc ipso potestatem faciendi ut gratia sit efficax. Et sic semper tota determinatio procedit ex hominis libertate.

18. Respondeo in statu conditionato hominem habere quidem illam potestatem, sed sub conditione ipsi impossibili, & à Deo solo pendente, nempe si detur ei talis gratia, cujus collatio nondum decreta est, & forte nunquam decernetur. Itaque in illo statu, ad quem jam pertinet efficacitas

gratiæ, potestatem habet qualem innumeri qui nec sunt nec erunt, & talibus gratiis si existerent ipsi, & tales eis darentur, bene uterentur, Unde quia universaliter loquendo, illud non est in potestate alicujus, quod ipse non potest obtinere nisi sub conditione quæ non est in ejus potestate, sequitur in suspensione talis statûs, non esse simpliciter & absolutè in potestate hominis talem qualemcunque determinationem gratiæ. Sic etsi sit in potestate hominis habentis dotes gloriosorum corporum, penetrare murum & quævis solidissima corpora, id tamen non potest dici simpliciter in potestate hominis, quia habere illas dotes non est in ejus potestate. Item, licet sit in potestate hominis habentis in actu primo supernaturale atque extraordinarium Dei auxilium ad suscitandos mortuos, & patranda quævis miracula, cum fiducia speciali quòd Deus talia per ipsum sit factururus, licet, inquam, in ejus taliter elevati potestate sit ista præstare, non sunt tamen hæc in potestate hominis quem Deus non sic prævenit, quia talem præventionem mereri non potest. Pari igitur modo, etsi sit in potestate hominis habentis gratiam, ponere consensum cum quo connexa est ejus efficacitas, & sic ejus causalitatem aliquo modo determinate, ista tamen qualiscunque determinatio non est absolutè in

potestate hominis ut sic, sed in potestate hominis affecti gratiâ, quam nondum habet in illo suspensionis statu, in quo jam gratia est efficax: ad quod non requiritur ut sit absolutè habitura effectum, sed tantùm ut sit habitura, si ipsa homini detur.

19. Instabis contra illam prioritatem efficacitatis, statum absolutum antecedentis. Videtur efficacia, quæ in statu conditionato à Deo prævidetur, pendere à determinatione libertatis in statu absoluto, quia si in eo statu homo consentit gratiæ, ipsa est efficax: si non consentit, est inefficax. Quia igitur consentire ut sic, vel non consentire est in hominis potestate, erit quoque in ejus potestate ut gratia sit efficax, vel inefficax. Consequentia probatur, quia si quid est in mea potestate, ea etiam omnia quæ sunt necessariò cum eo connexa, aut per necessariam consequentiam inferuntur, sunt in mea potestate, hoc saltem sensu, quòd possim facere ut sint, etsi non sim propriè causa illorum, quia ad faciendum ut sint, satis est si cum aliquo quod possim facere, connexionem habeant, & vel ex eo sequantur, vel illud comitentur.

20. Respondeo negando antecedens, quia si efficacia gratiæ penderet à determinatione voluntatis in statu absoluto, ita ut ante illum non fuisset efficax, Deus inter gratias infinitas quas nunquam dabit, nul-

lam videret efficacem. Atqui innumeræ sunt efficaces in thesauris ejus reconditæ, quas posset dare, & de quibus verum est habituras effectum, si darentur, in quo consistit efficacitas earum. Ergo efficacitas gratiæ, licet supponat determinationem voluntatis ad consensum ut sic, non supponit eam in statu absoluto positam, sed ponendam ex hypothesi quod voluntas tali gratiâ præveniatur: quod totum est ante statum absolutum, imò etsi nihil tale in statu absoluto sequatur, nec detur unquam talis gratia.

21. Ad probationem in oppositum, respondeo distinguendo illud, si homo consentit gratiæ, ipsa est efficax, id est ipsa tunc primum, & per hoc est efficax, nego: est quidem efficax, sed antecederet ad hoc, & per aliud formaliter, nempe per futuritionem conditionatam suæ cooperationis in consensum, quæ futuritio statum absolutum præcedit, concedo: & dico hinc non fuisse concludendum illud, Ergo in potestate hominis est facere ut gratia sit efficax: sed potius, Ergo aliquid est in potestate hominis, ex quo posito licet inferre gratiam jam antecederet fuisse efficacem. Ad probationem consequentiæ, concedo quidem, ex quo aliquid est in mea potestate, ea omnia quæ consequuntur, aut concomitantur necessario existentiam ejus,

esse in mea potestate, in quantum possum facere ut sint, etsi non sim necessariò causa illorum, propriè sumpto nomine causæ pro principio quod influit esse. At verò quoad ea quæ in futuritione, sive absoluta sive conditionata, mei actûs, fundata erant, nego in mea potestate esse ut nunc primùm sint. Hinc, quia verum est Anti-Christum peccaturum, idque ex hypothese illius futuritionis, erit quidem in potestate Anti-Christi, ut peccatum, ita & omnia quæ cum peccato sunt connexa; non poterit autem efficere ut tunc tantùm vera sit ista propositio, Anti-Christus peccabit, quia sola præsuppositio futuri peccati eam jam reddit veram: Imò tunc non erit vera, nisi ad præteritum tempus relata. Item quia verum fuit, antequam D. Petrus Christum negaret, ipsum negaturum, fuit quidem in potestate ejus facere ut essent omnia cum illa negatione connexa, pura inimicitia Dei pro illo tempore, & privatio gratiæ, sed non fuit in potestate ejus efficere ut tum tantùm esset vera illa prædictio negationis, quæ potius antea vera fuit quoad futuritionem quam importabat. Unde similiter, si vera est ista propositio, hæc gratia, si detur, habebit effectum, is cui dabitur talis gratia, habebit quidem potestatem faciendi ut sint omnia quæ consensum consequuntur, sed non ut tunc primùm



vera sit illa propositio quæ ipsam futuritionem significat & in ea fundatur.

22. Objicies quintò, sumamus id solum quod conceditur, nempe quòd hoc sit verum in statu conditionato, si hic homo talem gratiam accipiat, consentiet: hoc sufficit ut moveatur Deus ad dandam ei talem gratiam potius quàm ad dandam alteri quem Deus videt non consensurum, etsi ei daretur. Ergo sic homo erit causa aliquo modo meritoria talis receptionis. Hoc autem dici non potest, quia Semipelagiani damnati sunt, eo quòd dicerent Deum efficere ut aliqui infantes ante mortem baptizarentur, quia videbat eos, si adolevissent, bona opera facturos: permittere autem ut alii morerentur sine Baptismo, quia prævidebat eos, si pervenissent ad usum rationis, fore peccatores & impios.

23. Respondeo distinguendo antecedens, sufficit ut moveatur in genere causalitatis quæ reducatur ad efficientem moralem, cujusmodi est meritoria, nego: ut moveatur in genere causalitatis quæ reducatur ad finalem, concedo: & dico, posito quòd Deus velit convertere aliquem, vel sua erga eum bonitate motus, vel exoratus ab aliquo aut Viatore aut Beato, tunc movendum per illam futuritionem consensûs, eo modo quo finem intendens movetur per media aptiora, absque eo

quòd sit in illis ratio meriti , quæ in præ-  
senti casu , seu in homine spectato in sta-  
tu conditionato , reperiri non potest , quia  
qui nihil facit nec facturus absolutè vide-  
tur , nihil meretur.

24. Ad id quod dicitur de Semipela-  
gianis , respondeo eos esse damnatos , non  
eò quòd admitterent talem veritatem de  
futuris conditionatè operibus bonis & ma-  
lis , & illius futurationis in Deo cognitio-  
nem ; sed eò quòd dicerent Deum punire  
parvulos privatione Baptismi ob peccata  
quæ facturi essent si fuissent adulti : quod  
asserere omnino impium est. Nam Deus  
non punit ubi non est demeritum. Non est  
autem demeritum , ubi non est positum ab-  
solutè peccatum. Alioqui sanctissimi qui-  
que homines possent dici punibiles , eò  
quòd Deus videat eos in circumstantiis in-  
numeris , si fuissent in illis positi , fuisse  
peccatores. Quare dicendum est , Deum  
permittere ut illi parvuli non assequantur  
Baptismum ob rationes alias ipsi notas , &  
in primis quia non tenetur , nec congruum  
est ipsum ad impediendas mortes , quæ ex  
causis naturalibus proveniunt , facere in-  
numera , quod planè necessarium esset ,  
miracula.

## SECTIO QUINTA.

*Quid sit, & an detur, nullique unquam  
desit gratia sufficiens.*

1. **Q**Uoad primum, adverte gratiam sufficientem duobus modis posse sumi. Primò pro ea quæ habet vim efficiendi, præscindendo ab hoc quòd habitura sit, vel non habitura effectum, si detur. Et hoc modo gratia efficax est sufficiens, quia vim efficiendi non tollit futuri-  
tio causalitatis in effectum, sed eam supponit, estque argumentum illius à posteriori: Et nulla est gratia quæ non sit in hoc sensu sufficiens, quia nulla est cui non possit homo consentire, per eam elevatus ad agendum supernaturaliter. Secundò potest accipi gratia sufficiens pro ea quæ ita habet vim efficiendi, ut non sit habitura effectum, etsi detur, impediante scilicet homine causalitatem ejus in bonum actum, per suam propriam determinationem ad oppositum. Et in hoc sensu defectus causalitatis in consensum est id quod distinguit gratiam sufficientem ab efficaci. Itaque gratia sufficiens idem est ac quæ est tantum sufficiens. Quæ distinctio non provenit ex gratia, sed ab homine impedituro activitatem ejus, etsi talis gratia illum ad

184 *De Ente Supernaturali,*  
consensum excitatura sit, si ei detur.

2. Dico, Gratia sufficiens prout à Theologis sumitur, est ea quæ ita vim habet causandi consensum, ut tamen non sit eum causatura, etsi homini detur in illum finem. Probatur quia posita distinctione gratiæ in efficacem, & sufficientem, sufficiens id potissimum, & differentialiter importare debet per quod opponitur efficaci, ut membra divisionis sint formaliter contradistincta. Atqui per hoc formaliter & differentialiter sufficiens opponitur efficaci, quod jam in statu conditionato de illa verum sit, etsi detur ut principium supernaturale consensûs, non tamen causaturam consensum. Ergo.

3. Quoad secundum, Dico, datur in dicto sensu Gratia sufficiens, idque est de fide. Probatur primò ex scriptura Nam Prov. c. 1. v. 24. ita loquitur Deus: *Voca-  
vi, & renuistis; extendi manum meam, &  
non fuit qui aspiceret. Despexistis omne con-  
siliium meum, & increpationes meas negle-  
xistis.* Quæ omnia intelligenda sunt de vera gratia, internâque motione, sine qua illi quos increpat Deus, non poterant consentire vocationi ejus. Et nisi sic intelligantur, non erit justa increpatio, quia non rectè arguitur aliquis quod non fecerit id quod erat ipsi impossibile.

4. Probatur secundò ex unanimi sancto-  
rum

rum Patrum sensu, inter quos Augustinus lib. 2. de peccatorum meritis c. 17. sic habet. *Cum voluntate humana, gratiâ adjuvante divinâ, sine peccato in hac vita homines possent esse, cur non sint, possem facillimè ac verissimè respondere, quia homines nolunt.* Ibi manifestè defectum innocentis vitæ ascribit voluntati nolenti uti adiutorio gratiæ. Sanctus prosper Augustini discipulus lib. 2. de vocatione gentium. c. 26. de gratiæ opitulatione ita loquitur; *Quod à multis refutatur, ipsorum est nequitia: quod à multis suscipitur, divinæ est gratiæ & voluntatis humane.*

5. Probatur tertio ex Concilio Tridentino, quod sess. 6. can. 4. ita decernit. *Si quis dixerit liberum hominis arbitrium à Deo motum, & excitatum, nihil cooperari assentiendo Deo excitanti, nec dissentiri posse, si velit, anathema sit.*

6. Probatur quarto ex Constitutione Innocentii X. quâ istam propositionem, *Interiori gratiæ in statu naturæ lapsæ nunquam resistitur*, hæreticam declaravit. Eamque Constitutionem Alexander VII. nova Bulla confirmavit.

7. His auctoritatibus, & decisionibus accedit ratio petita ex providentia divina, quæ cum homines destinarit ad finem supernaturalem, debet dare illis media saltem sufficientia ad eum acquiendum, &

qui tanto bono privabuntur, & supplicia æterna patientur, sint inexcusabiles. Et hæc ratio probat omnibus omnino hominibus, etiam Ethnicis, dari gratias sufficientes ad salutem. Cui veritati non obest quòd non cognoscant quid sit gratia, quidve supernaturalitas ejus, cum ex dictis antea, actus nostri supernaturales non cadant sub nostram experientiam nisi per modum naturalium, eò quòd supernaturalitas sit supra nostræ mentis intelligentiam atque intuitionem naturalem.

8. Objicitur ab hæreticis, Monstruosum est auxilii genus quod nunquam habuit effectum, nec habiturum est.

9. Respondeo hanc objectionem procedere ex ignorantia, vel ex dissimulatione veræ doctrinæ. Si enim ista distinctio gratiæ in sufficientem & efficacem peteretur vel à natura gratiæ sufficientis, ita ut ex defectu virtutis in ipsa procederet dissensus: vel ex parte Dei illam seligentis ut caritativam effectum, esset mirum ac portentosum talem gratiam à Deo dari: sed si petatur illa distinctio ex aliquo posteriori ad illam gratiam per se & essentialiter spectatam, quòdque non sit Deo motivum ad illam eligendam, & dandam homini, sed tantum tale ut hoc non obstante Deus illam ut bonam & potentem det homini, hoc non magis erit mirum, quàm si dicatur esse

aliquas gratias quibus homines resistunt, & alias quibus utuntur. Similis enim est illa, & æquè accidentalis, & tam à posteriori, eoque per humanam libertatem impedibili atque auferibili petita distinctio, nempe à dissensu conditionatè futuro, si talis gratia homini detur. In quo adverte gratiæ efficacis habitudinem ad consensum conditionatè futurum provenire formaliter ex ipsa: unde homo non facit formaliter efficaciam ejus, licet faciat id quo posito est efficax, nempe consensum ut sic, at vero inefficaciam gratiæ sufficientis ex solo homine provenire, quia provenit ex causa quæ si illam acciperet impediret influxum ejus in consensum, determinando se ad oppositum. Talis autem causa est hominis libertas. Hoc igitur posito, quòd gratiæ sufficientes sint illæ quarum homo, si dentur, impediet suâ culpâ effectum, ita ut hæc denominatio planè sumatur ex illo non usu, qui est ad gratiam accidentalis, ejusque naturâ posterior, non mirum est si gratiæ sufficientes nunquam habuerunt, nec habituræ sunt effectum, cum id omnino supponatur, & posterius ad talem suppositionem, quæ ab homine impedibilis erat, talem denominationem sortiantur. Hoc non magis est mirum, quàm si dicatur, omnium consiliorum humanorum quæ respuuntur ab iis quibus dantur, nullum habere effectum.



10. Porro qui talem gratiam non admittunt, necesse est ut dicant aliquid quod divinæ bonitati, etiâque justitiæ repugnat; nempe Deum æternis ignibus punire homines propter peccata ad quæ evitanda nullam potestatem habuerunt.

11. Restat videndum an ita detur omnibus hominibus gratia sufficiens, ut in omni occasione adsit, & nulli unquam negetur.

12. Circa quod adverte aliud esse gratiam alicui negari, aliud eam ipsi non dari. Nam si quis in eo statu sit in quo non sit physicè dispositus ad illam, putà si non sit mentis compos, si dormiat, si planè intentus ad alia quàm ad ea quæ spectant mores, Deus in tali casu non debet illi ullam gratiam. Itaque etsi careat gratia, non tamen ipsi negatur, quia eam negari, dicitur non dari cùm habet aliquo modo jus ad illam pro illo tempore & in tali casu accipiendam. Hinc.

13. Dico primò, Quotiescunque homo ex propositione objectorum est in actû primo expeditus ad agendum bene vel malè moraliter, expeditus, inquam, quoad facultates naturales & advertentiam rationis, habet quoque præter ista gratiam saltem sufficientem. Probatur, quia bonus ordo & indefectibilitas divinæ providentiæ exigat ut si homo bene agat, id sit ei utile ad

salutem, saltem remotè, & dispositivè per meritum ulterioris auxilii. Non potest autem esse isto modo utilis actus ejus, nisi sit in entitate supernaturalis: nec potest esse supernaturalis, quin sit ex auxilio supernaturali. Ergo quisquis est in statu proximè expedito ad bene aut male agendum moraliter, habet gratiam actualem saltem sufficientem. Et quisquis peccavit, habuit talem quoties peccavit, quia poterat per bonum actum utiliter ad salutem abstinere à peccato: nec erat in potentia proxima ad talem bonum actum sine ejusmodi gratia.

14. Dico secundò, Contingit aliquem qui peccavit, mori in statu peccati absque eo quòd proximè ante mortem accipiat gratiam sufficientem ad agendam pœnitentiam, & eliciendum actum contritionis. Probatur, quia si quis ita violenter opprimatur, ut per ipsam causam mortis adimatur ei usus rationis, putà si in caput ejus sclopetum repente, incogitante ipso, displodatur, Deus non faciet miraculum, impediendo causam mortis naturalem, ut det ei gratiam actualem ad formandum actum contritionis. Erit tamen verum illum hominem habuisse auxilium supernaturale quo posset evitare damnationem, quia quando peccavit, ante ipsum actum peccati, habuit, ut dixi, gratiam sufficientem ut abstineret à peccato. Et quoties postea

occurrit cogitatio de salute, ex aliqua occasione aut tentatione, aut auditione verbi Dei, Deus non defuit muneri providentiæ suæ, quæ ad salutem hominum procurandam nihil omittit eorum quæ congruit ab ea expectari.



## QUÆSTIO QUARTA.

*De objecto formali & ultimato fidei.*

---

### SECTIO PRIMA.

*Quodnam sit objectum formale fidei.*

1. **C**Um gratiæ sanctificanti, præter gratias actuales, quæ ad omnes ejus operationes necessariae sunt, debeantur etiam circa diversos specie actus diversa principia permanentia, quæ sunt virtutes tum Theologicæ tum morales; & inter Theologicas quæ dignitatis ordine priores sunt, prima sit quæ aliis præluet, fides: de fide nunc agendum post quæstiones de gratia sanctificante & de actuali.

2. Cum autem habitus specificentur ab objectis, ita ut pro varietate objectorum formalium diversificentur speciè habitus, & consequentur actus: statuendum hîc

primò circa fidem, quodnam sit ejus ob-  
jectum formale ad hoc autem.

3. Notandum primò in habitibus spe-  
culativis objectum formale, seu motivum  
assentiendi alicui veritati, posse peti, non  
modò ex aliquo loco intrinseco, sed etiam  
ex loco extrinseco. Locum intrinsecum,  
cum Aristotele in Topicis, appello quidquid  
rei convenit aut cum illa connexionem ha-  
bet à parte rei, sive antecedenter ad cog-  
nitionem speculativam, quâ homines de  
illa judicant; & sic ad locos intrinsecos per-  
tinent non modò ipsa rei natura, propieta-  
tes, & accidentia, sed etiam causæ, effectus,  
antecedentia, concomitantia, subsequen-  
tia, similia, dissimilia, majora, minora, &c.  
Locum extrinsecum appello, cum eodem  
Philosopho, omnem autoritatem petitam  
ex alieno judicio de re proposita, sive auto-  
ritas illa sit publica, & quæ continetur in  
legibus & judiciis, sive privata, qualis  
inest testimonio sapientum, doctorum, &c.  
Potest enim intellectus aliquid judicare ve-  
rum, quia id visum est hominibus fide  
dignis, nempe scientibus & fallere nolen-  
tibus, aut qui tales putentur. Et hinc in  
divisione habitûs speculativi discursivi, una  
species est fides. Dividitur enim in scien-  
tiam, & opinionem, quarum motiva pe-  
tantur ex locis intrinsecis, sive ex natura,  
conditione & accidentibus rei: & fidem,

192      *De Ente Supernaturali*,  
quæ ab alieno judicio assentiendi motivum  
petit.

4. Notandum secundò inter omnes au-  
toritates nullam esse cum Dei autoritate  
comparandam. Ad quod stabiliendum sup-  
pono Deum posse hominibus loqui, tum  
infundendo conceptus quibus doceat ali-  
quid esse verum, & se illud asserere, quo  
modo loquitur privatim uni personæ; tum  
sensibilibus miraculis, quæ vires naturæ  
superent, veritatem aliquam declarando,  
& probando, juxta illud divi Augustini,  
Epistola 149. q. 6. *Deus mirabilibus factis*  
*loquitur*. Quia videlicet, loqui est dare  
signum sui conceptûs, & rei à se conceptæ  
ac judicatæ. Talia autem opera juncta præ-  
dicationi factæ ab homine misso & inspi-  
rato à Deo, sunt signum manifestans hanc  
doctrinam esse à Deo, & Deum per hæc  
loqui. Ergo potest Deus illo modo loqui,  
& sic palam multis audientibus & videnti-  
bus loquetur, sicque Christus suam divini-  
tatem declarabat & asseribat. Hoc autem  
posito, Deus sic loquens erit infinitè dig-  
nus fide nostra, quia autoritas ejus qui nec  
falli potest in judicando de rebus, nec fal-  
lere significando contrarium ejus quod ju-  
dicat, est summa fide digna. Atqui impli-  
cat Deum aut falli aut fallere: Ergo auto-  
ritas ejus est summa fide digna, & inter  
omnia motiva extrinseca, ob quæ possumus  
judicare

judicium de aliqua re ferre, nullum est quo istud non sit infinitè præstantius.

5. Notandum tertio, Ad Dei testimonium pertinere, non modò signa illa & miracula quibus loquitur, & declarat id quod vult suo nomine prædicari, sed etiam signa & miracula quibus quod priùs revelavit, vult quasi suo appposito sigillo, certum reddi omnibus qui nec loquentem audierunt, nec miracula viderunt per quæ facta est revelatio. Id constat ex eo quòd fit inter homines. Nam cùm edictum principis ejus syngraphâ consignatur, & appposito sigillo munitur, per illam syngrapham, & per sigillum princeps ratum habet, & certificat quidquid in edicto à se pronunciato & suo jussu scripto continetur, & qui pronunciantem non audierunt, dum ex syngrapha, & sigillo, vel ex solo sigillo, edictum principis agnoscunt, non minùs ejus auctoritate per hoc manifestata moventur, quam qui loquentis verba suis auribus perceperunt. His prænotatis.

6. Dico, objectum formale fidei est Deus ut supernaturali ac divino modo loquens, & respectu eorum qui loquentem non audierunt, ut suam locutionem infalsificabili modo notificans atque attestans. Probat, quia illud est objectum formale fidei, quo præcisè posito, intellectus movetur ad credenda objecta fidei



materialia, eo modo quo illa credimus, Dei scilicet honorativo, per summam nostri intellectûs ac judicii ex ejus auctoritate dependentiam ac submissionem; quo verò præcisè sublato, & positis quibuscunque aliis, non movebitur ad talem assensum. Atqui talis est prædicta Dei revelatio & attestatio. Nam nihil ultra requiritur ad credendum illo modo, & nihil aliud ad talem fidem sufficit. Ergo Deus sic revelans & attestans est objectum formale fidei.

7. Confirmatur, quia posito quòd Deus sit locutus hominibus, & iis qui loquentem non audierunt, revelationem suam operibus & signis vires naturæ superantibus, quasi sigillo suo notificare ac certificare voluerit, possibilis est habitus, & consequenter actus, quo rebus revelatis ob rationem illam & attestationem assentiamur, talis autem est fides, & nullus alius habet tale objectum formale. Ergo hoc est objectum formale fidei.

8. Objectiones quæ contra hoc fieri possunt, melius solventur cùm ostensum fuerit, fidem in hoc ultimatè resolvi quod jam pro ejus objecto formali assignatum est.



## SECTIO SECUNDA.

*In quid ultimò resolvatur assensus fidei.*

1. **C**um unumquodque pro diversitate principiorum à quibus pendet, aut ex quibus constat, variè in ea resolvi possit, triplex esse potest resolutio assensus fidei. Prima est in motiva, seu objecta quibus intellectus ita inducitur ad credendum, ut nullum sit aliud ex quo tale iudicium procedat. Secunda in prædicata fidei essentialia, cujusmodi sunt quòd sit actus supernaturalis in substantia, quòd sit liber propter evidentiae defectum, quòd firmissimus, quòd virtualiter saltem discursivus à motivo formali fidei ad res revelatas. Tertia est in causas efficientes actus fidei, cujusmodi sunt habitus in intellectu à quo eliciatur, habitus in voluntate à quo imperetur, auxilium gratiæ actualis, & iudicium supernaturale voluntati credendi prælucens. De prima resolutione, in qua est præcipua difficultas, hîc agitur, quaeriturque quomodo sine ullo assensus vitio, hoc est sine circulo, sine processu in infinitum, & sine petitione principii, fides objecto suo formali adhæreat, & ex eo revelata credat: Et circa hoc.

2. Adverte, fidem ex genere suo prout

est assensus ob testimonium alicujus posse non resolvi ultimò in suum objectum formale specificum, quod est illud testimonium, & posse aliquando in illud resolvi. Non resolvitur, si testimonium asserentis non sit mihi per se cognoscibile, sed manifestatum aliunde, putà ex relatione alicujus, qui quidem ipse fortasse non idem de re sentiet, & judicium illius improbabat, sed hoc ipso illum ita sentire declarabit, in quo casu meum de re judicium habet pro objecto testimonium asserentis rem illam, sed resolvetur in relationem sine qua testimonium illud mihi non innotuisset, quia illud est primum per se cognitum ex quo cognosco id unde rem talem judico. Præterea potest testimonium alicujus mihi non esse motivum sufficiens ad aliquid judicandum, nisi mihi ex aliquo antecedenti constet ipsum esse veracem, putà ex bonis moribus, & piis operibus quæ vidi ab eo fieri : unde meus de re ab illo dicta assensus, nitetur quidem testimonio ejus tanquam motivo specifico, unde habebit rationem fidei humanæ, sed ulterius pendebit à cognitis bonis illius moribus & piis operibus : unde non resolvetur in suum proprium essenziale motivum. Potest autem in illud resolvi fides etiam humana, si tale sit testimonium ut & per se mihi proponatur, & ei per se

QUÆST. IV. *De objecto & resol.* 197  
sumpto judicem non subesse falsum, sic  
quia sexcenties audiui de Urbe Romana  
loquentes, quorum consentientibus & si-  
mul sumptis testimoniis non potest huma-  
no modo subesse falsum, propter hoc ip-  
sum, sine processu ad aliud, credo esse  
Urbem Romam, & mea fides in suum ob-  
jectum formale motivum resolvitur.

3. Adverte secundò, ut aliquid sit de  
se cognoscibile aut sensibile aut visibile,  
non esse opus, ut quidquid in ipso est,  
sit tale; sed satis esse si ex iis quæ illud  
componunt, aut ad illud integrandum  
pertinent, aliquid sit se ipso, respectu  
nostri, cognoscibile, aut sub sensus ac vi-  
sum cadat. Sic ut homo sit de se visibilis,  
non est opus ut anima ejus, quæ est forma-  
liter constitutiva & distinctiva ejus, sit  
per se visibilis, sed satis est si corpus ejus  
sit tale, Et in moralibus, ut testimonium  
alicujus sit de se perceptibile, non est  
opus ut videam conceptum ejus ad me di-  
rectum, satis est si locutio externa, quæ  
pro illo conceptu supponit, & cum illo  
testimonium ejus constituit, sit mihi de se  
perceptibilis, aut, si ad me scriberet quod  
sentit, satis est si scriptura ejus sit mihi  
per se nota. Et si per alium scribat, satis  
est si in syngrapha, & sigillo attestatio  
ejus mihi appareat. Quo posito, testifica-  
tio ejus erit mihi de se cognoscibilis, quia

innotescet per aliquid conceptui quidem extrinsecum, sed ipsi testificationi intrinsecum, & in ipsa necessariò inclusum. Bene autem in totum per se cadit, quidquid ipsi convenit ex una parte ejus, imò & ex accidentali complemento ejus, ut homini visibilitas ex colore qui est accidens corporis ejus.

4. Adverte tertio, inter ea quibus aliquid cognoscibile est, voces, scripturam, syngrapham, & sigillum, habere aliquid valde peculiare in ratione signi eò quòd voces & scriptura supponant pro actu interno locutionis, syngrapha autem & sigillum pro actu interno attestationis circa rem enunciata aut scriptam, ita ut illa perinde se habeant ad audientem aut legentem aut videntem syngrapham aut sigillum, ac si videret locutionem internam aut attestationem item internam. Quare illa moraliter tenent inter signa principatum, signum autem nihil potest amplius in ratione signi, quàm ut pro re significata, propter æquivalentiam accipiatur. Hinc si quis audito sermone alicujus, aut lectâ scripturâ, fidem ei adhibet, movetur ad illum assensum propter locutionem ejus internam, cujus locum tenent in ordine ad nos, verba externa & scriptura, & si credit perspectâ syngrophâ, ac sigillo alicujus appposito, scriptæ, licet aliena ma-

QUÆST. IV. *De objecto & resol.* 199  
nu, declarationi aut ordinationi, move-  
tur per attestationem internam illius cujus  
illa signa representativè vices gerunt.

5. Differunt autem locutio, & attesta-  
tio per hoc quòd locutio rem enuntiat, &  
judicium loquentis declarat, & addit di-  
rectionem totius conceptûs ad audientem,  
sicque potest exprimi. Ego tibi affirmo tale  
quid contigisse. Attestatio autem, si præ-  
cisè attestatio sit, supponit illa omnia, &  
illis suppositis adjicit approbationem no-  
stram seu confirmationem, & potest his  
verbis exprimi, ita est, ita cenleo. Qui-  
bus verbis signa externa æquivalent. His  
præmissis.

6. Dico fidei assensus resolvitur in re-  
velationem Dei, quatenus ipsa est locu-  
tio inimitabilis omni enti creato, facta  
nimirum modo planè divino, per miracu-  
la, & effectus qui vires naturæ superant:  
itémque quatenus ipsa est modo etiam di-  
vino per tales effectus notificata & con-  
firmata.

7. Probatur quia fides debet resolvi in  
aliquid per se cognoscibile ac divinum,  
ex quo credantur cætera ad quæ illa se se  
extendit. Atqui revelatio taliter facta &  
confirmata, est ejusmodi, ergo in eam  
ita sumptam resolvitur fides. Major pro-  
batur, Primò quidem quoad primam par-  
tem, quòd fides debeat resolvi in aliquid

per se cognoscibile, quia alioquin esset alterius ad aliud judicandi motivum progrediendum; Et universaliter loquendo omnis assensus mediatuſ resolvitur in aliquid per se primò cognoscibile. Quoad secundam partem, quòd debeat resolvi in aliquid divinum, probatur, quia alioqui fides non esset strictè & perfectè virtus Theologica, si Deum non haberet pro ultimato motivo. Minor probatur similiter quoad utramque partem: Ac primò quidem quòd revelatio, ut facta est hominibus, & confirmata, sit aliquid per se cognoscibile, probatur, quia ex dictis, ut aliquid sit de se cognoscibile, satis est si, licet includat aliquid quod seipso solo non esset attingibile à nostro intellectu, includat etiam aliud quod seipso cognoscibile sit. Atqui revelatio, ut facta per effectus omni enti creato impossibiles, includit præter locutionem internam ad homines directam, illos ipsos effectus qui sunt de se perceptibiles, nempe miracula sensibilia, & licet fieret sine sensibilibus miraculis, includeret præter jam dictam locutionem Deo internam, illapsuſ in mentem hominis, cui soli ipsa fieret: quem illapsuſ ipsi constaret, non esse nisi à Deo, à quo solo possibilis est. Itémque respectu eorum quibus Deus non est immediatè locutus, revelatio ut notificata,

& comprobata per opera vires naturæ suppurantia, includit præter additam sibi internam attestationem Dei, quæ non est de se perceptibilis, illa ipsa opera, quæ sunt effectus sensibiles illius attestationis internæ designativi. Ergo revelatio ut taliter facta, & comprobata, est aliquid de se cognoscibile, seu cognoscibile independentem ab omni extrinseco ad illam ejus attestationem non pertinente.

8. Quoad secundam partem, probatur minor, quia revelatio externa, & attestatio item externa supponunt pro interna revelatione, & attestatione Dei: Et quoad hoc ita se habent ad illos intrinsecos Deo actus, sicut nostræ voces externæ, & sigilla ad nostras intrinsecas locutiones, & attestations seu ratihabitiones, pro quibus illa supponunt: Ergo sic sumpta revelatio est objectum divinum, omnemque naturam transcendens ad quod sufficit si in illo objecto aliquid includatur quod in eo primò per se spectabile sit. Quare fidei assensus in revelationem ita sumptam, ac proinde in ipsum fidei objectum formale resolvitur.

9. Confirmatur, quia nihil ad fidem pertinet quod ipsa non attingat vel taliter factam & approbatam revelationem cognoscendo, vel dependentem ab illa ut à Deo dictum credendo. Quod de ipsa



### SECTIO TERTIA.

*Ostenditur in allata resolutione fidei,  
nullum esse neque circulum, neque pro-  
gressum in infinitum, neque petitionem  
principii.*

1. **C**ontra resolutionem fidei, in qua pro ultimo credendi motivo nihil afferatur non divinum, tria objici solent vitia discursûs, saltem virtualis, nempe circulus formalis seu vitiosus, qui fit quando conclusio probata per aliquod principium, assumitur non melius, neque aliter cognita, ad probandum illud principium: progressus in infinitum, & petitio principii, seu præsuppositio in præmissis ejus quod per illas probandum est. Sic autem illa tria proponuntur.

2. Primò quoad circulum, ita proceditur. Dum rogatur fidelis propter quid credat fidei dogmata, respondet quia Deus ea revelavit; & rursus quærenti unde habeat ea esse à Deo revelata, respondet vel quia traditio, vel quia scriptura aut Ecclesia id testatur. Ulteriùs, si quærat propter quid credat cum summa certitudine traditioni, vel scripturæ, vel Eccle-

QUÆST. IV. *De objecto & resol.* 203  
fiæ rem tantam non per se notam asserenti,  
respondet quia regulas illas esse infalli-  
biles Deus revelavit, in quo revelatio est  
ultima ratio credendi, quæ non probata  
fuerat nisi per aliquid quod per eam denuo  
probaretur.

3. Progressus in infinitum sic astringitur.  
Cum fides sit assensus virtualiter saltem  
discursivus, habens pro objecto formali  
motivo duo ista principia, Deus est verax,  
& Deus revelavit, ob quæ alia fidei dog-  
mata creduntur; vel illa duo principia  
creduntur per actum fidei, vel per aliud  
genus assensûs. Si per aliud à fide genus  
assensûs, fides nitetur motivo cui intelle-  
ctus assentietur per actum ipsa fide igno-  
biliorem. Nam omnis assensus, post visio-  
nem intuitivam, cedit actui fidei quoad  
excellentiâ, ac certitudinem. Assensus  
autem ignobilior non potest causare nobi-  
liorem, cùm nulla causa det quod non  
habet. Quare dicendum est juxta commu-  
nem doctrinam, actum quo assentitur in-  
tellectus duobus illis principiis, Deus est  
verax, & Deus revelavit, esse actum fi-  
dei. Jam hoc posito, processus in infini-  
tum sequitur, quia ad hoc ut credam Dei  
veracitatem, necesse erit me hunc discursum,  
saltem virtualiter, formare, Deus  
summè verax dixit se esse veracem: Ergo  
est summè verax. Ac rursus de illo virtua-

liter saltem priore iudicio, eadem quaestio fiet, idemque consentaneè respondendum erit, eademque recurret probatio, & sic in infinitum procedetur in veracitate credenda ob se ipsam, & ob revelationem aliam semper atque aliam prius saltem naturâ cognitam.

4. Petitio principii sic obijcitur. De fide est Deum esse: Ergo id fide divina creditur. Jam ut credatur, oportet fidem haberi Deo dicenti se esse. Ergo antequam quis credat Deum esse, supponitur etiam in mente ejus, Deum esse. Non enim potest intelligi asserens se existere, nisi prius intelligatur existens. Et sic à presupposita existentia Dei proceditur ad indicandam ejus existentiam, quod est petere principium, & assumere pro motivo assensus hoc ipsum de quo est assensus. Idem vitium discursûs repertum est supra in probanda Dei veracitate. Nam qui credit Deum esse veracem, quia Deus summè verax id dixit, accipit ex parte motivi, ac supponit veracitatem ut eam credat. Repertum quoque est idem in probando circulo, dum contenditur non posse credi revelationem, nisi per aliquid quod ex ipsa revelatione constet. Unde à primò ad ultimum, revelatio per se ipsam probatur. Et hinc patet tria illa discursûs vitia, circulum, progressum in infinitum, & pe-

QUÆST. IV. *De objecto & resol.* 105  
titionem principii, non esse adæquatè  
distincta, quando quidem accidit ut unum  
alia duo includat, nempe petitio principii,  
circulus & progressum in infinitum,  
Adde quod circulus nunquam sit sine pe-  
titione principii, licet petitio principii possit  
esse sine circulo, putà in uno Enthyme-  
mate, cum circulus necessariò duo saltem  
dicat argumenta, quibus fiat progressus  
ab uno ad aliud, & redeatur ab hoc ad  
illud,

5. Jam pro istorum trium solutione,  
Respondeo in prædictis argumentationi-  
bus, quæ malè tribuuntur credenti fidei,  
quasi ipsæ sint processus nostræ fidei, fal-  
sum assumi, nempe revelationem non  
posse credi seipsâ, nec quidquam aliud  
nisi ex præcedenti revelatione de ipso, &  
ex credita priùs veracitate Dei. Contra  
enim ostensum est primum circa Deum  
assensum posse haberi ex revelatione per  
se sensibili & miraculosa, hoc spectando  
in ea quòd sit impossibilis enti creato talis  
loquendi modus, etsi nondum attendatur  
quid sit illud quod per illam enuntiatur.  
Et respectu eorum quibus non est facta  
revelatio, ostensum est primum assensum  
circa Deum peti ex signis divinæ auctori-  
tatis, quibus ipsa, ut sigillo Dei, confir-  
matur: quæ signa, & sunt per se cognos-  
cibilia, & non possunt esse nisi à Deo. Et

talis primus assensus erit fidei, in quantum per se spectat motiivum fidei, quod est revelatio & autoritas Dei. Prius enim ad fidem divinam pertinet attingere suum objectum formale, quàm objecta materialia, seu res revelatas, & ab eodem habitu elicitur tum assensus ipsius motivi formalis, tum assensus eorum quæ illi subsunt. Et ad utrumque assensum imperandum inclinatur idem ex parte voluntatis motiivum, de quo postea dicetur, nempe dignitas quam Deus habet, ut proposita eum evidenti credibilitate, revelatione quæ non possit esse nisi ab ente supremo & infinito quod sit naturâ superius, & ipsum esse qui loquitur, & vera esse quæ dicit, summa & tota per voluntatem imperabilis judicii firmitate credamus.

6. Respondeo præterea distinctiùs ad singulas illas argumentationes. Ac primò quidem ad id quod in probatione circuli affertur, fidelem quærenti unde habet revelata esse fidei dogmata, respondere quia traditio, vel scriptura, vel Ecclesia id testatur: Respondeo negando in resolutione ultimata fidei ita respondendum, sed dicendum, revelationem constare ex apparente in ea Dei auctoritate, quia Deus mirabilibus factis locutus est: & mirabilibus item factis quasi suo proprio sigillo dicta à se confirmavit, quo modo veritas

QUÆST. IV. *De objecto & resol.* 207  
ipsa divina est per se assentiendi moti-  
vum.

7. Concedo quidem quando fit resolu-  
tio, non fidei generatim, seu assensûs  
quem damus omnibus simul Ecclesiæ dog-  
matibus, sed alicujus particularis assensûs,  
putà hujus quo credimus hominem, ac-  
cepta gratia actuali, esse indifferentem ad  
consentiendum, aut dissentiendum, si  
quæratur cur veritatem illam particularem  
credamus, rectè responderi quia Ecclesia  
id definiit. Et rursum si quæratur ulte-  
riùs cur credamus Ecclesiæ id definienti,  
nos respondere quia Deus revelavit Ec-  
clesiam esse infallibilem in definiendis re-  
bus fidei. Sed nego primò id ad fidei ul-  
timatam, de qua agitur, resolutionem  
pertinere, cùm fidem supponat circa com-  
munia, & recepta dogmata, valeátque  
tantùm ad controversiam aliquam deci-  
dendam inter eos qui fidei regulas ex ipsa  
fide tenendas, aut admittunt, aut tenen-  
tur admittere hoc ipso quòd se fideles pro-  
fidentur.

8. Nego præterea per hoc reditum  
fieri ad idem, quia valdè sunt diversæ illæ  
revelationes per quarum unam Deus  
enuntiat hominis indifferentiam ad con-  
sentiendum aut dissentiendum gratiæ: per  
aliam verò potestatem, & infallibilitatem  
Ecclesiæ ad decidendas fidei controversias,

Neque mirum si illa per hanc probetur, quia proprium est eorum quæ controversa sunt, ut probentur per ea quæ sunt certa, dum ex illis bene sequuntur, ut hîc contingit. Posito enim quòd Ecclesia sit infallibilis, si definivit indifferentiam illam esse à Deo revelatam, de facto est revelata, & pro tali habenda. Quod si quæras ulterius undenam constet revelatam esse à Deo Ecclesiæ infallibilitatem, respondeo id haberi ex motivis communibus credibilitatis spectatis prout sunt sigillum quo doctrina Ecclesiæ, ut revelata à Deo, ab ipso Deo confirmatur.

9. Hic adverte motiva credibilitatis communia non probare nobis, hoc vel illud esse revelatum à Deo, nisi in quantum probant generatim ea quæ Ecclesia credit, aut scriptura continet, aut revelatio docet, esse revelata. Et pro aliquibus quidem articulis fidei dantur aliqua particularia motiva, putà ad probandam Eucharistiam dantur miracula quæ per eam sunt facta: sed plurima sunt fidei dogmata quæ non constat aliter ad fidem pertinere, & esse à Deo revelata, ni in quantum illa continentur in communi doctrina Ecclesiæ, quæ illa ut talia credit, & doctrina illa Ecclesiæ per motiva communia credibilitatis proponitur ut à Deo revelata. Quo posito, propter ipsam in signis illis elucentem



QUÆST. IV. *De objecto & resol.* 209.  
elucet Dei authoritatem talis doctrina  
creditur.

10. Ad processum in infinitum, respondeo ex jam dictis, in discursu fidei sive formali, sive virtuali solos assensus mediatos procedere ex illis anterioribus principiis, Deus est verax, & Deus dixit: & illa principia simul & indivisim cognosci ex inimitabilitate locutionis divinæ, & infalsificabilitate: sic enim homo suppositâ propositione fidei apud se judicat. Hæc locutio quæ fit & notificatur per opera vires naturæ superantia, est primi entis naturâ superioris, in quo judicio implicitè includitur veracitatis assensus, in quantum tanta apparet illa auctoritas, ut per eam omnis formido & suspicio falsi excludatur. Iste igitur assensus non nititur aliquo motivo ipsi testificationi Dei extrinseco; & erit fidei, modo supra dicto, licet non sit assensus ex revelatione, sed ipsius revelationis assensus.

11. Ad petitionem principii, Respondeo primò ex hoc ipso modo immediati assensus, malè illud assumi, quòd ut credatur Deum esse, necessarium sit id concludi ex assertionem ejus de sua existentia, cum hoc in ipsa cognitione revelationis involvatur.

12. Respondeo secundò, neque in assensu mediato existentia Dei ex revelatiq-

ne quâ dicit se esse, reperiri petitionem principii. Quod ut pateat.

13. Adverte præter jam dicta, alium esse ordinem rerum objectivè se habentium ad nostros conceptus, alium rerum per se physicè sumptarum. Nam in ordine ad nostras illationes, potest supponi id quod est physicè posterius, modo sit objectivè prius, seu prius cognoscibile, cum illud sit cognoscibile consequenter ex ipso. Et huic præsuppositioni non obest quod dum cognoscitur id quod est prius objectivè, implicitè importetur illud quod est physicè prius. Satis enim est ad evitandam vitiosam præsuppositionem rei probandæ, quod istud objectivè prius, sit, formaliter saltem, distinctum ab illo probando, & secundum hoc formaliter quod est distinctum, sit prius cognoscibile, & ut sic, sit formale præsuppositum, seu positum in præmissis. Patet hoc in exemplis. Qui agit, vel loquitur, vel ambulat, est. Petrus agit, loquitur, ambulat: Ergo est. In quibus nota prædicatum accidentale importare & adsignificare existentiam subjecti. Unde differt à differentia rei, aut proprietate ejus, quod dum hæc prædicantur, non significetur existentia subjecti. Nam ista propositio, Homo est rationalis, & ista, Homo est risibilis, non denotant hominem existe-

QUÆST. IV. *De objecto & resol.* 211

re, sed conveniunt homini ut possibili, & perinde est ac si diceretur, si est homo, est rationalis ac risibilis. Istæ autem, Petrus est albus, Petrus currit, supponunt & important hominem existere, & ista prædicata non bene asseruntur de homine possibili, qui ut sic, est indiffetens ad impossibilia cum istis. Et si igitur in prædictis exemplis importetur existentia agentis, loquentis, ambulantis, quia tamen formale præsuppositum non est ipsa existentia, sed actio, locutio, ambulatio, quæ conceptu differunt ab existentia, non est vitiosa præsuppositio, quia non est ejusdem formaliter ad se ipsum, seu non est formaliter existentia ad existentiam. Atqui in isto virtuali discursu fidei, Deus dicit se esse : Ergo est : formale præsuppositum est, dictio externa, seu revelatio Dei, quæ pro interna intellectione, ejusque ad nos directione supponit. Et ipsa est planè distincta ab existentia dicentis, & prior objectivè, in quantum est de se sensibilis, facta nimirum per effectus de se perceptibiles. Ergo non est ibi vitiosa præsuppositio, quia non est ejusdem formaliter sumpti, ad se ipsum, neque existentia divinæ formaliter ad illam ipsam existentiam.

14. Dices in isto discursu, Deus dicit se esse : Ergo est. Existencia divina non

tantum adsignificatur, aut importatur implicite, ut in prædictis exemplis, sed est per se formale significatum, quia Deus hanc ipsam enuntiare supponitur. Ergo est ibi vitiosa præsuppositio ejusdem formaliter quod est probandum.

15. Respondeo existentiam esse quidem formale significatum istius propositionis, ego sum, vel, ego sum qui sum: non autem istius, Deus dicit, ego sum qui sum, quæ propositio est præmissa in illo discursu sive formali sive virtuali fidei, quo ex Dei testimonio creditur mediatè existentia ejus. Formale enim significatum istius præmissæ est locutio Dei de sua existentia, ex qua procedit argumentum, ut pote redigendo integrè in formam illum de quo agitur, discursum, hoc pacto. Qui dicit, ego sum qui sum, est. Deus dicit, ego sum qui sum. Ergo Deus est: In hoc syllogismo medius terminus est, dicens se esse, & ista propositio, ego sum qui sum, non est una ex componentibus illum discursum, sed est tantum connotatum medii termini, seu locutionis illius divinæ: ad quod connotatum illa locutio ordinem dicit ut imago ad rem repræsentatam. Itaque non existentia illa sic connotata, sed assertio ipsa existentiae est motivum iudicii conclusionis. Et sic non procedetur formaliter ab existentia ad existentiam,

QUÆST. IV. *De objecto & resol.* 213  
sed à locutione & assertionem Dei de sua  
existentia ad illam ipsam existentiam.

---

## SECTIO QUARTA.

*Solvuntur aliæ objectiones.*

1. **O**Bjicies primò, si fidei assensus resol-  
vitur in revelationem ut inimi-  
tabilem, & factam per miracula enti crea-  
to impossibilia. Itémque respectu eorum  
quibus non est Deus immediatè locutus,  
in revelationem ut confirmatam per mira-  
cula quæ sunt sigillum infalsificabile cer-  
tificationis divinæ: id quod erit formalis-  
simè ultimum omnino fidei motivum,  
erunt ipsa miracula, quæ sunt aliquid  
creatum, & sic fides vix erit virtus Theo-  
logica, quia habebit pro formalissimo &  
ultimato motivo aliquid aliud à Deo.

2. Respondeo, assensum fidei verè qui-  
dem ultimatè in illa miracula resolvi, non  
tamen in illa per se absolutè sumpta, sed  
ut pertinentia ad locutionem, & testifi-  
cationem Dei ad homines, quæ locutio  
& testificatio includunt quidem principa-  
liter & primariò locutionem internam  
Dei ad nos directam, & locutionis jam  
factæ testificationem item internam, sed  
& conjunctim involvunt ipsa signa mira-  
bilia, quæ in ordine ad cognoscibilitatem

prima & immediata sunt, quia aliter non potest esse perceptibile quod non est de se præcisè sumpto perceptibile: Neque ista participatio cognoscibilitatis ab illis signis, adimit fidei rationem virtutis Theologicæ, quia ad eam sufficit, si quod in objecto divinum & primum est, sit cognoscibile eo modo quo locutio interna hominis alteri perceptibilis est per aliquid ipsi superveniens, nempe per voces externas, aut per scripturam & sigillum, quæ, ut ostendi, non impediunt ne locutio & testificatio sint simpliciter & absolutè de se cognoscibiles, cum potius cognoscibilitatem illis propriam constituent.

3. Adverte id contingere ut alicujus objecti cognoscibilitas aliunde petatur, quàm excellentia ejus & dignitas, quo modo cognoscibilitas hominis petitur ex colore & figura, quæ sunt accidentia corporis ejus, dignitas autem ex anima, quæ non est per se immediatè respectu nostri perceptibilis. Quare non est mirum, si in objecto fidei cognoscibilitas non petitur ex eo quod est in ipso primum, & per se absolutè divinum, sed ex effectu creato, qui ad cognoscibilitatem ejus constituendam ipsi adjungitur ob rationem signi per quam habet ut respectivè ad nos pro eo supponat.



QUÆST. IV. *De objecto & resol.* 215

Confirmatur, quia ad objectum formale charitatis, præter bonitatem Dei, aliquid creatum pertinere potest ob respectum ad illam ipsam bonitatem, nempe beneficia prout ab ipsa procedunt, suntque ejus testimonia. Et ratio imaginis quæ inest homini respectu Dei, ad ejusdem charitatis objectum pertinet. Unde non tantum Deus, sed homo, & Angelus sunt amabiles amore amicitiae per charitatem. At inquires ratio illa beneficii & imaginis non sunt id in quo sistit, & in quod ultimè resolvitur dilectio charitatis: Ergo nec effectus creati poterunt esse objectum ultimè motivum fidei.

5. Respondeo quoad beneficiū, illud ut procedens à bonitate, esse ultimum motivum illius actūs quo diligitur Deus, & bonitas ejus ut taliter benefaciens. Nam verè per beneficium Deus nos excitat ad amorem suæ bonitatis. Unde non repugnat virtutis Theologicæ actum resolvi in aliquid creatum prout certo modo connotans aliquid divinum, & completivum ejus in ratione motivi. Sic in Christum ut datum nobis à Deo, resolvitur amor ille quo Deum ut datorem diligimus.

6. Quoad rationem imaginis, quæ non est motivum diligendi prototypum, sed contra amatur, quia amatur prototypus. Respondeo negando consequentiam,



quia posito quòd ratio imaginis possit esse objectum formale motivum, etsi non ultimum unius actûs alicujus virtutis Theologicæ, ac proinde non requiratur per se ad actum virtutis Theologicæ ut objectum ejus formale sit aliquid merè divinum per exclusionem omnis creati à compositione illius objecti, si contingat id quod in objecto alterius virtutis Theologicæ est divinum, non posse habere rationem objecti, etiam ultimati, nisi adjungatur ei aliquid creatum pertinens ad complementum ejus in tali ratione objecti, non repugnabit illam virtutem adæquatè quoad suum omnem actum resolvi in illud ipsum divinum cum tali addito sibi complemento sumptum. Et ad objectum formale ultimum non requiritur nisi objectum formale, aptum specificare actus virtutis Theologicæ, ultra quod non sit opus progredi ad aliud non in ipso contentum. Contingit autem in fide, ut quod est in objecto ejus divinum, nempe revelatio interna Dei, itémque attestatio ejus interna, non possit objici nostro intellectui nisi ex aliquo addito creato cognoscibilitatem respectu nostri accipiat. Unde non repugnat fidei adæquatè, seu quoad omnes suos actus sumptæ, objectum ultimum includere præter id quod in eo divinum est, etiam aliquid creatum nempe mirabiles effectus

QUÆST. IV. *De objecto & resol.* 217  
effectus per quos Deus nobis aut loquitur,  
aut se esse locutum attestatur. Non est au-  
tem idem de charitate. Nam ex quo pro-  
posita est intellectui nostro bonitas Dei per  
aliquid creatum, potest ab eodem intellectu  
præscindente proponi voluntati per seip-  
sam. Unde sumpta absolutè ab omni bene-  
ficio, & ab omni expressione Divinitatis  
in ente creato, ad amorem sui movebit.

7. Objicies secundò, fides debet resolvi  
in aliquid quod sit seipso immediatè cog-  
noscibile, alioquin ad illud cognoscendum  
opus erit progredi ad aliquid antè  
in ratione motivi, unde in illius cog-  
nitionem deveniatur. Atqui revelatio,  
etiam sumpta prout includit signa illa &  
mirabilia opera, itémque attestatio Dei  
prout talia opera & adimpletiones prophe-  
tiarum complectitur, non est aliquid seipso  
immediatè cognoscibile, nam est opus ra-  
tiocinatione & studio, ut cognoscamus  
ejusmodi effectus contigisse, & factas fuisse  
illas prædictiones, & jam esse adimpletas.  
Ergo fides non resolvitur in revelationem  
& attestationem Dei taliter cognoscibilem.

8. Respondeo, seipso cognoscibile hîc  
non esse idem ac per se notum ex immedia-  
ta cognitione terminorum, sed pro eo sumi  
ad quod cognoscendum non est opus pro-  
gredi ad aliud ulterius: & cum hoc stat  
quòd ad ipsum bene cognoscendum, opus

fit discursu aliquo, qui versetur circa ipsum. Nam circa id quod non est evidens, possumus argumentari ex iis quæ in ipso apparent. Et sic dico revelationem & attestationem Dei factam per opera & signa vires naturæ superantia, posse cognosci seipsâ, idest ex se ipsa bene inspecta, adhibendo circa id quod in ea sensibile est, aliquam faciocinationem, putà hanc, locutio & attestatio inimitabilis omni enti creato, utpote facta per vires quæ naturam superant, est primi ac supremi entis, cui summè credendum est: talis fuit locutio, & talis est attestatio ea quam spectat nostra fides. Ergo hîc per discursum qui non progreditur ultra inspectionem effectuum mirabilium per quæ Deus objecta fidei revelavit, & suam revelationem certificavit, cognoscitur ipsa revelatio & attestatio. Nihilque aliud requiritur ad ultimam resolutionem iudicii de re non evidenti, quod debet esse liberum & meritorium, ac proinde fieri ex imperio voluntatis, non verò necessariò, quo modo ea quæ in scientiis dicuntur per se nota, necessariò vera iudicantur. Nihil autem vetat post ejusmodi ratiocinationes & considerationes, revelationem talia complectentem seipsâ, uno actu simplici, nec jam discursivo, sed cujus illa sensibilia sint motivum, evidenter credibilem iudicari, ut si quis illis bene inspe-

Etis dicat. Hæc testificatio non est ab ente creato. Vel ut habetur Exodi 8. v. 19. *Digitus Dei est hic.* Vel ut Joan. 7. v. 48. *Nunquam sic locutus est homo.*

9. Objicies tertio, si quid est in objecto fidei quod sit prius revelatione, quodque sit causa in ratione motivi cur revelata omnia credamus, in illud ultimatè resolvitur fides: Atqui talis est veracitas Dei, quia ipsa omnem revelationem præcedit, & revelatio est tantum applicatio ejus ad objectum revelabile, & conditio, quâ positâ, jam sit credibile per veracitatem Dei, unde ipsa revelatio non est causa credendi, quia applicatio causæ ad subjectum non est id quod influit in effectum, sed virtus causæ applicatæ: sicut approximatio ignis non comburit, sed virtus ignis applicati.

10. Respondeo veracitatem Dei esse quidem priorem secundum se omni revelatione, sed in processu fidei, & in ordine cognoscendi qui est ei proprius, initium fieri à signis & mirabilibus operibus, per quæ Deus loquitur, & attestatur quod vult credi, etiam de se ipso & de sua existentia. Nempe ex illis & in illis cognoscimus hanc esse locutionem entis naturâ superioris, cui summè deferendum sit, & sic saltem implicite cognoscitur veracitas Dei, in quantum talis apparet illa locutio & attestatio.

220      *De Ente Supernaturali*,  
ut excludat omnem dubitationem de veracitate loquentis.

11. Ad illud quod dicitur revelationem esse tantum conditionem per quam proponitur veracitas, Respondeo e contra, illam esse formalissimè id quod in discursu sive formali, sive virtuali fidei, est medius terminus, ac proinde motivum, & causa assensûs mediati. Hic est enim ille discursus. Omne dictum ab ente per opera vires naturæ superantia loquente, & per talia locutionem notificante ac confirmante, est verum & summè credendum hoc mysterium, putà Trinitas personarum, est aliquid dictum à tali ente: Ergo mysterium illud est verum & summè credendum. In hoc discursu satis est implicitè veracitatem involvi, in quantum ejusmodi est illa locutio & attestatio, ut de veritate dicti dubitari non sinat, & ex mirabilibus operibus, per quæ fit locutio & attestatio, habetur illa omnis dubitationis exclusio. Quare ipsa formalissimè locutio & attestatio est nobis primum motivum actuum fidei, in quod proinde ipsa ultimatè resolvitur.

SECTIO QUINTA.

*Expenduntur ac refelluntur quadam sententia prædictis contraria.*

1. **P**rima est Aureoli in 3. dist. 23. q. 4. a. 4. asserentis Deum, ut Deus est, seu ipsam Deitatem esse objectum ultimum in quod nostra fides resolvitur. Quod probat, quia quærenti cur aliquid credamus, puta Deum esse Trinum, respondetur, quia Deus revelavit. Ulterius roganti cur credamus revelationi Dei, respondemus, quia Deus est verax. Et rursus progredienti ulterius, & quærenti cur Deus sit verax, respondetur, quia est infinitè sapiens & bonus, unde nec errare potest nec decipere. Ac demum interroganti cur sit sapiens & bonus, respondetur, quia est Deus. Unde in Deum sub ratione Deitatis fides nostra resolvitur.

2. Hæc sententia non probatur primò, quia non affert pro motivo ultimato fidei, aliquid ob quod credatur ipsa existentia Dei, quam supponit. Debet autem motivum ultimum fidei extendere se ad omnia credenda, ita ut ex ipsis nullum sit quod non per ipsum credatur. Quod de revelatione per se cognoscibili, & Deum ipsum manifestante, etiam ei qui antea

Deum non novisset, ostensum est.

3. Refellitur præterea hæc sententia, quia in allato discursu ac processu, malè veracitas assignatur pro ratione credendæ primò revelationis, seu credendæ revelationis, quæ non sit per aliam posteriorem revelationem asserta ac declarata. Nam veracitas est quidem ratio credendi id quod Deus dixit, ex hypothese quod constet ipsum dixisse, quia removet à dictione falsitatem, sed ipsa non est motivum credendi quòd Deus aliquid dixerit, quia potest esse veracitas Dei, & Deus nihil dixisse, vel hæc non dixisse quæ credimus. Quia igitur ex uno posito nihil potest inferri nisi id quod cum ipso necessariam connexionem aut dependentiam habet: ex posita ac recepta veracitate Dei non potest inferri existentia revelationis divinæ, nisi, ut dixi, revelatio ipsa per aliam posteriorem sit dicta. Cum autem hîc quæstio sit quomodo possit haberi revelationis adæquatè sumptæ, etiàmque per aliam non revelatæ assensus, non bene assignatur pro motivo ejus credendæ veracitas. Idque confirmatur quia quòd putem Petrum, cum loquitur, verum dicere, quod est ipsum credere veracem, hoc non me inducit ut credam ipsum aliquid dixisse, sed tantum ut cum mihi constabit ipsum dixisse, id judicem verum.

4. Secunda opinio est assensum fidei re-



QUÆST. IV. *De objecto & resol.* 223  
solvi in motiva credibilitatis, cuiusmodi  
sunt miracula & quæcunque per instructio-  
nem proponi solent iis qui ad fidem dispo-  
nuntur, quia hæc sunt quæ revelationem  
Dei credibilem reddunt: Assensus autem  
alicujus veritatis resolvitur in id quod eam  
credibilem reddit, & quo sublato non esset  
ratio ei assentiendi. Hæc sententia tribui-  
tur Scoto in 3. dist. 23. quæst. unica num. 4.  
sed revera Scotus tantum vult ante actum  
fidei infusæ, requiri actum fidei acquisitæ,  
qui hæc habeat pro motivo: quod aliud est  
quàm dicere ipsius fidei infusæ assensum in  
motiva illa anteriora resolvi, & ab iis suam  
certitudinem accipere. Sumendo ergo ip-  
sam per se sententiam, dico per eam non  
bene fidem resolvi, quia etsi in eo quod  
assignat pro motivo ultimato fidei, conti-  
neatur aliquid quod pertinet ab illud mo-  
tivum, nempe effectus superantes vim na-  
turæ, per quos Deus locutus est, & suam  
locutionem velut consignavit, non tamen  
hos sumunt illius sententiæ auctores, ut  
aliquid ingrediens revelationem & attesta-  
tionem Dei, sed ut aliquid ipsi revelationi  
ac testificationi extrinsecum, ex quo velut  
certo signo bene insertur factam esse reve-  
lationem.

Ad rectam autem resolutionem fidei, si  
possibile est sistere in ipsa revelati-  
one & attestatione Dei, & ostendere quomodo

alis revelatio & attestatio sit ipsa de se cognoscibilis, id præstandum est, sicut & factum est in tradita supra resolutione fidei. Non autem accipienda sunt ea quæ testificationi Dei ad nos factæ intrinseca sunt, quasi signa ipsi extrinseca. Nec simul intra idem motivum ultimum fidei comprehendenda sunt multa alia quæ Dei testimonium non ingrediuntur, neque intrinsecè componunt, ut quævis credibilitatis motiva, putà summorum ingenio & sanctitate virorum, nempe Augustini, Hieronymi, Ambrosii, & aliorum sanctorum Patrum auctoritas: testificatio etiam Gentilium & Judæorum, putà Plinii, Iosephi & Philonis de Christiana Religione: puritas, sanctitas & conformitas Christianæ doctrinæ cum aliarum sectarum impiis & absurdis & contradicentibus sibi erroribus comparatæ, & cætera, ex quibus quidem licet inferre nos veram habere fidem, sed non sunt ipsa Dei autoritas, in quam meliùs quàm in quidvis aliud, nostra fides, prout est virtus perfectè Theologica, resolvitur.

5. Tertia sententia est, auctoritatem Ecclesiæ ut directæ à Deo, esse id in quod resolvitur nostra fides. Quæ sententia ut intelligatur, notandum est Ecclesiam considerari posse, vel ut dirigitur à Spiritu sancto providente ne erret, vel prout secundum alia omnia ab hac directione disse-

QUÆST. IV. *De objecto & resol.* 225  
rentia, omni alii morali corpori, aut cæcui  
præstat, putà secundum sanctitatem, uni-  
tatem, antiquitatem, clarissimorum Do-  
ctorum consensum, & alia quæ ipsam ita  
illustrant, ut supra omne quod merè hu-  
manum est, extollant. Primo modo con-  
siderata Ecclesia auctoritatem habet abso-  
lutè infallibilem, quæ divina appellatur, de-  
nominatione petita à causa ejusmodi infal-  
libilitatis. Et de hac loquitur D. Paulus 1.  
ad Timoth. 16. cum Ecclesiam vocat,  
*columnam & firmamentum veritatis.* Item  
eam promittebat Christus cum dicebat  
Matth. 16. *Portæ inferi non prevalebunt  
adversus eam.* Secundo modo sumpta Ec-  
clesia auctoritatem habet cui secundum ip-  
sam auctoritatem Dei, & eam quæ ex ejus  
directione provenit, plurimum deferre  
debemus: & meritò censetur infallibilis,  
sed non ita ut implicet eam sic sumptam, seu  
seclusa Dei directione, falso favere. Quod  
quidem non contingit, quia semper adest  
illa directio, sed contingere aptum esset,  
si illa deesset. Docet igitur supradicta sen-  
tentia assensum fidei in divinam Ecclesiæ  
authoritatem resolvi. Ita Durandus in 3.  
dist. 24. q. 1. & dist. 25. q. 3. ubi sic ha-  
bet: Primum inter credibilia, quod est ra-  
tio credendi alia, & ad quod fir ultima re-  
solutio credibilium, est credere Ecclesiam  
regià Spiritu sancto. Et in idem inclinant

Scotus, Gabriël & Almaïnus in eundem 3. dist. 23. Eadémque est doctrina Medinæ lib. 5. de recta in Deum fide, cap. 11. Probatur autem, quia quòd Ecclesia aliquid definierit ut revelatum à Deo, & pro tali habendum, hoc est certa & ultima ratio quam asserre potest fidelis cur aliquid credat. Igitur in hoc fides ejus resolvitur. Antecedens quoad primam partem de certitudine hujus rationis, constat ex textibus scripturæ mox allatis. Quoad secundam, seu quòd hæc sit ultima ratio, probatur ex Augustino, qui cap. 5. libri contra Epistolam fundamenti Manichæorum, ita habet: *Evangelio non crederem, nisi me Ecclesiæ Catholicæ commoveret auctoritas.* Et ibidem, *Evangelium Nazaræorum non admitto, quia non admittitur ab Ecclesiâ.* Quibus verbis Ecclesiæ sensum, & approbationem accipit pro regula credendorum, in qua omnino sistit. Quoad utramque autem partem simul probatur antecedens, quia ex hypothese quòd Christus Ecclesiæ suæ infallibilitatem promiserit circa res fidei, nec dubitare possumus de illius auctoritate, & illi auctoritati injuriam faceremus, si cùm aliquid per eam est definitum, opus esse ulteriori probatione judicaremus. Igitur in Ecclesiæ ut directæ à Deo, auctoritatem fides nostra resolvitur.

6. Hæc sententia ita concepta non pro-

QUÆST. IV. *De objecto & resol.* 227  
batur, quia malè accipitur pro fundamen-  
to totius fidei, id quod est tantum regula  
ad judicandum de aliqua veritate particula-  
ri, supposita jam fide, & credita per ip-  
sam fidem revelatione, quæ illius regulæ  
infallibilitatem asserit. At Ecclesia ut di-  
recta à Spiritu sancto est tantum regula quæ  
non habet infallibilitatem omnimodam,  
qualis hîc quæritur, nisi ex promissâ à Deo  
directione circa fidei controversias dirimen-  
das: Et hæc promissio non constat nobis  
nisi ex revelatione Dei, quæ prius creden-  
da nobis est, quàm possimus Ecclesiam ac-  
cipere pro certa, & infallibili regula. Ergo  
Ecclesia, ut directâ à Deo, non potest ac-  
cipi pro regula infallibili totius fidei.

7. Confirmatur, quia si Ecclesia ut di-  
recta à Deo, accipiat pro motivo cre-  
dendi omnem omnino revelationem, fiet cir-  
culus; siquidem cum quæretur ulterius cur  
credis Ecclesiam à Spiritu sancto dirigi, affe-  
retur revelatio de infallibilitate & directio-  
ne illi promissâ: quæ revelatio jam erat pro-  
bata per Ecclesiæ ut directæ auctoritatem,  
in quantum per eam auctoritatem probata  
erât omnis revelatio, seu revelatio univer-  
saliter & distributivè sumpta.

8. Quodd si dicas te tantum intelligere  
quodd Ecclesiæ auctoritas sit id in quod re-  
solvitur judicium de credenda aliqua parti-  
culari revelatione. Respondeo id non esse

fidem nostram in Ecclesiæ auctoritatem resolveri, cum jam id fidem supponat, & valeat, tantum ad fundandam ejus extensionem circa aliquod particulare objectum.

9. Quarta sententia est, fidem resolveri in auctoritatem Ecclesiæ non divinam, quam vult superior sententia, sed humanam gravissimam, quæ petitur ex omnibus quibus Ecclesiæ, etiam divinitus insignitur, ut sunt miracula, & sancti, & virtutes, &c. Modo in iis non includatur assistentiæ divinæ non defuturæ unquam ad res fidei bene decidendas, revelatio: eo quod, si auctoritas Ecclesiæ, in tali revelatione fundata, esset ultimum motivum credendi omnem revelationem, aliquid inclusum in omni revelatione, esset fundamentum credendi omnem revelationem, in quo fieret circulus, seu reditus ad idem non probatum, nisi per præsuppositionem sui, sine causa talis præsuppositionis. Si autem Ecclesiæ auctoritas humana gravissima accipiatur pro motivo ultimo credendi omnem revelationem, non erit tale vitium: & talis auctoritas sufficit ad evidentem credibilitatem omnis revelationis, quia nullum est testimonium à divino, non fundatum in ipso divino, quod cum isto comparari possit. Unde hoc debet esse causa credendi omnem revelationem Dei.

10. Refellitur hæc sententia quia dero-



QUÆST. IV. *De objecto & resol.* 229  
gat excellentiæ fidei dum eam resolvit in  
aliquid non divinum, cùm ex dictis possit  
ultimatè sistere in aliquo divino per se cog-  
noscibili, quod est revelatio & attestatio  
Dei facta per opera omnes naturæ vires  
superantia, & soli Deo possibile. Et fides  
non esset perfectissimè virtus Theologica,  
si aliquid divinum attingens, non asseque-  
retur illud nisi per aliquid nec divinum,  
nec pro aliquo divino supponens.

II. Quinta sententia est id in quod re-  
solvitur fides, esse habitum fidei, qui est  
lumen per modum habitûs infusum, quo  
veritates fidei illustrantur. Ita Bannes 2. 2.  
q. 1. a. 1. conclusione 3. Et idem videtur  
sentire Aragonius in eandem 2. 2. q. 1. a. 1.  
Hujus sententiæ fundamentum est, quòd  
illud sit objectum formale fidei ultimum,  
quod objectum fidei ultimò complet in esse  
credibilis. Hoc autem præstat habitus fidei,  
qui est infusio luminis in homine fideli per-  
manentis : quod lumen & seipso manife-  
stum est, & manifestat illud quod ipsi sub-  
stat, juxta illud. Ephes. 5. *Omne quod ma-  
nifestatur, lumen est.* Ergo objectum for-  
male fidei ultimum est habitus fidei. Con-  
firmatur primò, quia si quæ in oppositum  
ratio est, maximè quia habitus ille se tenet  
ex parte potentiæ ad agendum. Hoc autem  
nihil obstat illi rationi objecti formalis,  
quia lumen visibile simul juvat effectivè



potentiam visivam ad videndum, & est objectum formale respectu coloris in esse visibilis. Ergo similiter lumen fidei simul & juvabit effectivè potentiam ad credendum, & complebit revelationem, propter quam creditur, in esse credibilis, sicque erit ratio ultimata credendi, in quam absolutè resolvitur fides. Confirmatur secundò, quia si habitus infusus non pertinet ad objectum formale fidei tanquam id quod ultimò illud complet, non poterit distingui assensus fidei acquisitæ, quo hæreticus assentitur, iis fidei dogmatibus, in quibus non errat, ab assensu fidei infusæ. Nam uterque tendet in eandem rem revelatam ex eodem motivo, nempe ex revelatione sumpta objectivè. Oportet igitur in motivo assensûs quem habet ille hereticus, deesse aliquid quod pertineat ad objectum formale fidei, & illud complere debeat: quod non est nisi illud habitûs lumen.

12. Hæc sententia refellitur primò, quia si id in quod resolvitur assensus fidei est habitus fidei, nullus poterit credere, qui non habeat ante actum suum, habitum fidei: quia id in quod resolvitur fides, tanquam in rationem formalem credendi, debet priùs esse in mente credituri quàm credat. Falsum autem est illud consequens: quia si id verum esset, posset aliquis non baptizatus habere habitum fidei, absque eo quòd

unquam credidisset; adultus nimirum, qui nunquam suscepto baptismo, fuisset in potentia proxima ad credendum, nullo deficiente nisi imperio voluntatis ejus, & actu ipso assensus, quem liberè omisisset. Non debet autem admitti in homine qui nec fuerit baptizatus, nec unquam crediderit, habitus fidei infusæ.

13. Refellitur secundò hac sententia, quia objectum motivum debet esse cognitum, ita-ut propter ipsum cognitum & judicatum, intellectus judicet aliud cum ipso necessariò saltem ex hypothese connexum, & per hoc assensus rei de se obscuræ careat vitio imprudentiæ. Et de tali objecto est præsens difficultas in resolutione fidei, nempe quidnam sit quod primò judicatum cum summa certitudine, non obstante defectu evidentiae, ad alia cum pari certitudine consequenter judicanda rationabiliter inclinet. Atqui habitus fidei à credente non cognoscitur, neque talis cognitio ad fidem necessaria est. Ergo habitus ille non est ratio motiva fidei, sed causa efficiens assensus fidei unà cum intellectu.

14. Refellitur tertio, quia omnis habitus speculativus supponit suum objectum formale & ultimum, neque illud constituit aut complet, sed circa illud præsuppositum agit. Atqui habitus fidei est essentialiter speculativus, & tantum virtualiter &

consequenter est practicus. Ergo ipse suum objectum formale & ultimum neque constituit, neque complet formaliter.

15. Refellitur quartò hæc sententia, quia ipsâ, ut explicatur ab adversariis, positâ, infans qui baptizatur, dum accipit habitum fidei sibi à Deo infusum, poterit actu credere: quia ille potest actu credere, cui communicatur illud lumen, quo objectum credibile illustratur, & completur in esse credibilis. At hoc continget in infante qui baptizatur. Ergo. Et similiter sequitur infantem in quo permanebit illud lumen, habiturum toto tempore infantiae suæ, potestatem actu credendi, quia illustratum erit in ejus mente objectum fidei, & per illud lumen ultimatè propositum. Et non erit opus instructione in pueritia, quia manifestatum illi erit interiùs testimonium Dei.

16. Ad fundamentalem rationem hujus sententiæ, respondeo ex jam dictis, negando quòd habitus fidei compleat objectum fidei in esse credibilis, cum se teneat tantum ex parte intellectûs ad produ-cendum assensum circa illud. Item nego quòd ille habitus sit infusio luminis, aut illustret objectivè revelationem, aut res revelatas. Nam ad summum illustrat effective, eo modo quo dum intellectus intelligit res sibi propositas, potest aliquo modo

QUÆST. IV. *De objecto & resol.* 233

do dici illustrare eas sua cognitione, aut sibi lucem facere circa eas: ad quod cum cooperetur fidei habitus, idque nobilissimo modo, ita ut ei correspondeat supernaturalitas cognitionis, potest in illo sensu dici supernaturaliter illustrare res quæ nobis alioquin essent occultæ & planè incognitæ. Quanquam talis loquendi modus valde improprius est.

17. Ad id quod assertur de lumine, respondeo primò, dato eo, at non concesso, non esse paritatem in habitu fidei, neque in ullo alio habitu: quia habitus se tenet ex parte potentia, lumen autem se tenet ex parte objecti: Et præterea lumen videtur ab oculo, habitus autem fidei non cognoscitur à credente. Unde, quia implicat id quod non percipitur à potentia cognoscitiva, esse objectum formale ejus, implicantia illa non cadit in lumen, cadit autem in habitum fidei.

18. Respondeo secundò, negando lumen pro-ut à colore distinguitur, sive lumen quod est in medio, esse objectum formale, quod colorem, idest lumen receptum ac terminatum in opaco, constituat aut formaliter aut effectivè in esse visibilis. Primò non constituit formaliter, quia satis per se est visibilis color, modò mittat speciem sui per medium diaphanum: quod constat experientiâ. Nam necesse est ca-

bo accensus, aut quod exsufflata cerei flammula manet ignitum ellychnium, potest clarè videri è spatio remoto, in quo nihil erit lucis, quia eorum quæ in illo loco erunt, nihil prorsus videbitur, aut ullo modo etiam imperfectè distinguetur, cum tamen ex eo clarè videatur carbo, aut ellychnium illud valde distans. Quod signum est visionem fieri per speciem vicariam objecti, constituentem illud suo modo præsens oculo: non autem per lumen quod hîc deest. Et licet aliquis contenderet lumen imperceptibile quidem hîc esse, sed non omnino deesse, tamen ex eo quod perfectè videatur carbo, dum lumen conceditur esse imperfectissimum, & multò etiam videatur melius, quàm posset videri de meridie, quando lumen esset in excellenti gradu, signum est lumen medii, obesse potius visioni quàm ad eam conferre. Sed nec dici potest lumen medii conferre effectivè ad videndum lumen objecti, seu colorem à lumine illo, juxta veriorē philosophiam, indistinctum: quia operatio vitalis, cujusmodi est visio, non potest esse effectivè à principio ignobiliore se, cujusmodi est accidens illud objecti inanimati. Nec dici etiam potest quidquid ab objecto in organum provenit, conferre instrumentaliter ad productionem illius operationis vitalis: quia si ita esset, cum ta-

QUÆST. IV. *De objecto & resol.* 235  
lis qualitas non sit nisi virtus objecti, si  
ipsa est virtus instrumentalis, objectum  
inanimatum, ut suppono, esset una causa  
principalis operationis vitalis, quod per  
se implicat. Unde dico speciem quæ ab  
objecto provenit, tantum constituere præ-  
sentiam objecti, & applicationem ejus ad  
potentiam, ut non sit actio in aliquid  
merè distans, & per nihil præsens; non au-  
tem effectivè se habere. Atque ita sentit  
Toletus in libros de anima, & alii multi  
philosophi. Quare hinc semper minùs ha-  
betur dari aliquid quod constituat cognos-  
cibilitatem objecti sibi extrinseci, & com-  
producat cum potentia cognitionem ejus.

19. Ad secundam confirmationem, res-  
pondeo, etsi tam hæreticus quàm Catho-  
licus credant Trinitatem propter revela-  
tionem, non tamen credere utrumque  
propter eandem eodem modo acceptam.  
Nam Catholicus credit propter revelatio-  
nem spectando eam ut motivum cui uni-  
versaliter deferendum sit in omnibus, ita ut  
eorum quæ ipsi substant, nihil negetur.  
Hæreticus autem credit propter revelatio-  
nem spectando eam ut medium terminum  
quem modificat, neque universaliter ac-  
cipit, sed ut regulam quam limitat, &  
suo proprio judicio subijcit, deferendo illi  
in quibusdam, non autem in aliis, & ob  
istum disparem spectandi modum, auxiliaris

gratia cum Catholico agit, & inde assensus ejus est supernaturalis: cum Hæretico autem nullum tale principium agit, sed solus ejus intellectus cum habitu naturali per talem credendi modum acquisito, unde actus ejus est merè naturalis.

20. Sexta sententia est motivum ultimum, fidei, in quod assensus ejus resolvitur, esse auxilium actuale quo testimonium Dei, & sub eo veritas credenda ita proponitur, ut accedente imperio voluntatis intellectus determinari possit ad certò, licet obscurò, judicandum ac credendum. Hanc sententiam docet Granadus tract. de fide disp. 5. sect. 5. & duabus sequentibus. Præcipuum fundamentum est quòd nullus assensus ultimò resolvatur in objectum, sed in modum quo objectum intellectui proponitur. Sic conclusio resolvitur in præmissas, quæ taliter proponunt objectum, ut determinent ad assensum conclusionis. Præmissæ verò seu principia resolvuntur in apprehensiones taliter proponentes objectum, ut determinent ad assendiendum. Idem ergo de assensu fidei dicendum erit, ipsum scilicet resolvi in apprehensiones præcedentes, taliter proponentes divinum testimonium, ut sub hac luce, ipsum, sine ulteriori motivo, sit credendum, & dependenter ab eo objectum ipsum revelatum. Hæ autem apprehensiones,



QUÆST. IV. *De objecto & resol.* 237

præcedentes, cùm supernaturales sint, sunt auxilium, & illustratio divina. Unde in auxilium, seu lumen actuale fidei, tota resolvitur fides. Hic est præcipuus ejus discursus, cui adjicit ad confirmationem duas alias rationes. Prima est, quòd fides acquisita resolvatur præcisè in auctoritatem Dei revelantis. Atqui fides Theologica supernaturalis non resolvitur in illud præcisè in quod resolvitur fides acquisita. Ergo in aliquid præterea aliud, ultimò resolvitur fides Theologica & supernaturalis. Hoc autem non erit nisi auxilium Dei, quod constituet objectum formale fidei proprium, ejusque distinctivum. Secunda est quia quando è duobus quibus idem dogma fidei proponitur, unus assentitur, alter perstat obstinatus; assentienti adest, obstinato verò deest interius credendi motivum, nempe objecti apprehensio talis ut ad fidei assensum non minùs determinet quàm terminorum apprehensiones ad judicium principiorum.

21. Refellitur hæc opinio, quia etsi aliquid verum includat, nempe necessarium esse ad actum fidei, auxilium Dei præveniens, quo revelatio Dei proponatur ut sine ulteriori inquisitione credibilis, non tamen assignat motivum ultimum cognitum, seu causam objectivam ultimam, cujus intuitus à fide nostra imprudentiam.

excludit : sed ejusmodi causam cum applicatione ejus incognita, de qua non est præsens difficultas, confundit. In quo est idem vitium ac si quærenti quidnam sit ob quod media eliguntur, non assignaretur bonitas finis per se amabilis, sed cognitio ejusmodi bonitatis, quæ cognitio non allicit ipsa, nec movet, sed tantum bonitatem per se amabilem, & moventem proponit. Certè quando intellectus discurrens judicat de conclusione, judicat de ea ob præmissas objectivè sumptas, seu ob identitatem extremorum in medio termino, quam identitatem cognoscit, non autem propter præmissas formaliter sumptas, seu propter cognitionem illius identitatis, quam cognitionem non cognoscit nisi actu reflexo ad concludendum non necessario. Sic motivum judicandi quòd homo sit risibilis, est rationale identificatum cum homine & risibili, non autem cognitio ipsa talis identitatis, quia causa risibilitatis quæ judicatur in conclusione, est ipsa rationalitas quæ cognoscitur in præmissis, & cum utroque extremo connectitur. Pari igitur modo motivum judicandi incarnationem esse veram, erit hoc quòd sit facta à Deo summè veraci, quia hoc est medius terminus in hoc fidei syllogismo. Dictum à Deo summè veraci, est verum. Incarnatio est aliquid dictum à Deo summè veraci. Ergo incarnatio est

vera. Ipsa autem cognitio locutionis divinæ hoc perhibentis, etsi sit supernaturalis, erit tantum proponens ipsum illud motivum.

22. Confirmatur, quia in fide humana motivum credendi est testimonium & auctoritas dicentis: non autem auditio testimonii ac perceptio, etiam intellectualis. Ergo in fide divina motivum credendi erit non quidem apprehensio testimonii divini, sed ipsum Dei testimonium, etsi non sine illa apprehensione ut conditione sine qua non.

23. Confirmatur secundò quia auxilium illud supernaturale seu illustratio, quâ homo crediturus prævenitur, non modò representat objectum formale fidei, seu revelationem quæ non potest esse nisi à Deo, sed multa quoque alia quæ non pertinent ad objectum formale fidei, etsi inducant ad credendum, putà quòd sit homini summè utile credere, quòd ex infidelitate oriatur æternæ damnationis malum, quòd fides, accedente baptismo ad quem disponit, hominem inserat in corpus Ecclesiæ, quæ est præstantissimum morale corpus, cui nullus alius cætus aut Respublica exæquari potest. Quare etsi illud lumen actuale accipiat non formaliter, prout est quædam cognitio & illustratio intellectûs, sed obiectivè pro eo quod per ipsum representa-

tur, malè exprimeretur objectum formale fidei ultimum, neque illud distingueretur ab omnibus illis aliis propositis, per idem forte numero lumen, quod omnino multa complecti potest, ut ex actu, qui simul est scientiæ & opinionis, satis certò constat.

24. Ad fundamentum hujus sententiæ, Respondeo falsum esse quòd assensus resolvatur in modum propositionis formaliter sumptum, sive in cognitionem rationis aut motivi, aut rei per se evidentis, quia sic resolveretur in incognitum: quod ad resolutionem objectivam, de qua hîc agitur, non pertinet. Quare resolvitur in ipsam rationem motivam objectivè sumptam, ita quidem ut ipsa subsit apprehensioni proponenti, sed ita ut sic subesse sit conditio sine qua ratio illa non moveret, non autem ita ut sic subesse sit ratio quæ movet, quia id non movet quod ne quidem apprehenditur. Atqui apprehensio illa ipsa non apprehenditur. Ergo apprehensio illa non movet, ac proinde non movet ultimatè.

25. Ad primam confirmationem, respondeo actum tam supernaturalem, quàm naturalem posse habere idem motivum: quia supernaturalitas consistit in gradu excellentiæ qui superet vires naturæ, & præstet homini sufficientiam, saltem remotam, ad unionem immediatam cum Deo ut in se est, obtinendam, ut quæst. 1. ostenditur.

QUÆST. IV. *De objecto & resol.* 239  
sum est. Et positò quod detur gratia ad diligendum Deum propter bonitatem quam exercet in creatione, & conservatione naturæ, erit actus supernaturalis, si autem non daretur, ut contingeret in statu puræ naturæ, in quo non esset impossibilis amor Dei, qualem ratio exigit, ac proinde super omnia, actus esset in entitate naturalis. Potest autem negari in præsentī statu dari fidem acquisitam, seu merè naturalem in entitate circa revelationem Dei, sumptam ut digna est quæ se ipsā, supposita evidenti credibilitate sui, firmissimè credatur, quia nunquam deest gratia actualis quæ supernaturaliter tale objectum proponit, sed ita ut gratia sit tantum proponens, non autem sit id quod supernaturaliter proponitur.

26. Ad secundam confirmationem, respondeo cum de Lugo disp. 1. sect. 2. si vera esset illa ratio, sequi non credentem carere potestate proxima ad credendum, quia non potest credere sine fidei motivo: unde non credendo non peccabit: credentem autem non liberum fore, utpote necessariò determinatum antecederet ad actum fidei: unde credendo nihil merebitur. Quare dicendum est utrique adesse motivum credendi, & propositionem ejus, etiam internam, sed unum quidem libèrè assentiri motivo illi, nempe auctoritati

Dei, ac proinde illustrationi, ut proponenti: alterum verò repugnare. Et sic nihil ex disparitate quæ sit inter credentem & repugnantem efficitur, cùmque in utroque sit illustratio, ipsa in utroque se habet ut repræsentatio motivi.

---

## SECTIO SEXTA.

*Alia sententia contraria refelluntur.*

1. **P**Ræter sententias jam refutatas, quæ hōc ipso fidei assensum malè resolvunt, quòd malè ejus objectum formale constituent: inter eos qui pro objecto fidei formali ac motivo assignant veracitatem Dei ac revelationem, est adhuc diversitas, maximè quoad modum secundum quem divina revelatio terminat assensum fidei. Suares disp. 3. sect. 12. num. 12. dicit revelationem credi ideo quia Deus aliquid revelando, non tantum rem illam quam dicit, sed suam quoque revelationem revelat in actu exercito; asseritque se loqui: unde revelatio ut sibi substans, & à se dicta, se ipsa creditur. Quod ut stabiliat, advertit Deum duobus modis revelare se aliquid dicere; uno modo quasi in actu signato, seu per actum expressè reflexum, ut quando scriptura dicit: *Hæc dicit Dominus*, seu: *Pater*



QUÆST. IV. *De objecto & resol.* 241  
*mens revelavit.* Alio verò modo in actu exercito, dum Deus aliquid asserens, quasi per intrinsecam reflexionem ejusdem actûs in se ipsum, dicit se dicere, sicut inter homines etiam, quamvis qui loquitur, non dicat per expressum actum reflexum, se loqui, satis id loquendo dicit in actu exercito. Et hac ratione, quando aliquid sufficienter proponitur ut dictum à Deo, eo ipso locutio illa sufficienter proponitur ut Verbum Dei: & ideo non tantum res dicta, sed etiam locutio ipsa accipienda est, & credenda ut Verbum Dei, juxta illud Pauli 1. ad Thessal. 2. *Cum accepissetis à nobis Verbum auditûs fidei, accepistis illud non ut verbum hominum, sed ut verè est, Verbum Dei.* Hoc ergo modo divinum Verbum & rem dictam, & se ipsum dicit, & hac ratione per fidem infusam creditur: Ita ille.

2. Circa quæ non inficior, eum qui aliquid asserit, cum se in testem rei quam dicit, afferat, dicere quoque se id asserere, sicque suam locutionem illa ipsa locutione quæ in hoc est practica, declarare. Et hinc se offert aliqua ratio cur assensus quo credimus Deum aliquid dixisse, appellari possit actus fidei.

3. Sed primò refelli potest ista ratio. Nam si cognoscere quòd aliquis quidpiam dicat, est actus fidei, is qui men-



tientem audit ; etsi sciat illum mentiri ,  
habebit actum fidei circa testimonium  
ejus , quia ille dicit se asserere rem quam  
enuntiat. Repugnat autem quoad fidem  
humanam dicere , eum qui audit men-  
tientem quem scit mentiri , habere per  
hoc actum fidei. Quare si in fide divina  
actus quo agnoscimus factam esse à Deo  
revelationem , appellatur nomine fidei ,  
id non provenit ex illa dictione dictionis  
implicite inclusa in ipsa dictione , cum  
hoc non valeat universaliter , ac proinde  
per se non valeat ; sed provenit ex alia  
causa fidei divinæ propria , nempe ex eo  
quòd actus quo judicamus factam esse re-  
velationem , producitur , aut saltem pro-  
ducibilis est ab eodem habitu à quo pro-  
ducitur , aut aptus est produci assensus  
mediatus circa rem revelatam : Nam ad  
utrumque impellit , & confert habitus  
fidei , qui quoad hoc habet rationem po-  
tentiae , cujus est ad actus etiam diversos  
se extendere : Et præterea actus ille quo  
ipsam revelationem agnoscimus , habet  
illam certitudinem quæ est propria fidei ,  
superatque omnem certitudinem scientia-  
rum , de qua agetur quæstione sequenti.

4. Sed quidquid sit de ratione cur assen-  
sus qui datur ipsi revelationi , vocetur actus  
fidei , qua de re non est proposita quæ-  
stio , dico per hoc quod allatum est ex

Suare, non solvi præsentem difficultatem quæ consistit in assignando modo quo dictio illa Dei, quâ dicit implicite se nobis loqui, innotescat; neque enim locutio ejus interna per se nobis patet. Et quod per se non patet, non potest nobis nisi per aliud ab ipso, aut per aliquid ipsi additum quod cum illo unum constituat, & pro ipso supponat, nobis innotescere, sicut nostra dictio interna non cognoscitur nisi per voces, quæ cum illa unam locutionem constituent, & pro ea supponunt, aut per scripturam, aut per aliquid aliud ejus notificativum.

5. Ad hanc difficultatem respondet Suares citata sect. 12. disp. 3. num. 13. & 14. revelationem nobis innotescere per motiva credibilitatis quæ non vult pertinere ad constituendam ullo modo revelationem, nec vult esse motiva assensûs quo revelationem agnoscimus, sed tantum conditionem necessariam, ut ipsa intellectui nostro sufficienter proponatur. Quo posito, si nihil aliud assignatur quod sit motivum ipsam agnoscendi, ipsa de se penitus obscura, per nihil in ratione motivi credetur; aut potius motiva credibilitatis quæ dicuntur esse tantum conditiones ipsam proponentes, non autem motiva assensûs circa illam, erunt reipsa motiva talis assensûs, quia illud quo solo

aliquid manifestatur, est motivum nostri assensus circa illud: Esse enim motivum est esse id quo cognito, & judicato, aliud judicamus. Idque si negetur, negabo præmissas objectivas unius syllogismi esse motivum assentiendi conclusioni, & dicam esse tantum conditiones proponentes, & applicantes objectum conclusionis: quod esset tergiversari in verbis, & sub quibusdam terminis id fateri, quod sub aliis negatur. Quare ut revelatio se ipsa credatur, necesse est in illa, præter actum locutionis Deo internum, aliquid addi de se cognoscibile, quo ipsa tota sit cognoscibilis, dicendumque aliquos effectus ex iis qui communiter inter motiva credibilitatis numerantur, quosque Suares disp. 4. sect. 3. inter illa recenset tanquam non pertinentia ad revelationem, ingredi illam re ipsa, nempe miracula naturæ vires superantia, & adimpletionem prophetiarum, quæ ita se habeant ad revelationem & attestationem Dei, sicut se habent voces nostræ externæ ad nostram locutionem, & syngrapha ac sigillum ad eorum quæ scripsimus notificationem ac certificationem.

6. De Lugo disp. 1. sect. 7. num. 25. docet revelationem per hoc esse sensibilem, quod complectatur non modò opera illa supernaturalia, quibus Deum locu-

QUÆST. IV. *De objecto & resol.* 245  
tum, & quæ locutus est, attestatum esse,  
supra dictum est, sed omnia omnino mo-  
tiva credibilitatis, ipsamque etiam pro-  
positionem fidei, quæ pueris sit per pa-  
rentes, aut quibuscumque per doctores aut  
Parochos, aut libros catechisticos, ita-ut  
hæc omnia ingrediantur locutionem Dei,  
sintque voces quibus ipse testetur se ea  
quæ traduntur, revelare. Quo posito,  
non erit difficile explicare quomodo reve-  
lationis existentia seipsa credatur, quia  
sensibilibus proprium est seipsis innotef-  
cere & credi.

7. Refellitur hæc opinio primò, quia  
sic nimium, & sine necessitate, aut con-  
gruitate extenditur revelatio Dei, & se-  
queretur omnes libros catechisticos, &  
multò magis sanctorum Patrum scripta  
eiusdem esse auctoritatis ac Biblia &  
Evangelia, & pari loco habenda, quia  
similiter essent Verbum Dei, qui per ista  
omnia locutus esset. Paritas autem illa non  
potest admitti. Ergo nec debet poni id  
unde illa bene infertur. Item sequeretur,  
si quis diceret, credo quidem id quod di-  
xit Parochus, quia id Evangelio conti-  
netur, non autem quia Parochus dixit,  
esse hæreticum, aut saltem contra fidem  
hòc ipso peccaturum, quia per illam ex-  
clusionem Dei testimonium contemneret,  
atque à motivo suæ fidei rejiceret, sicut

si quis diceret, credo quidem id quod sanctus Paulus scripsit: non tamen credo quia id in ejus Epistolis scriptum est, sed quia idem in Evangelio traditur. Consequens autem istud est absurdum, & planè rationi repugnat: Ergo falsum est instructionem, & propositionem fidei, & quævis motiva credibilitatis esse locutionem Dei.

8. Respondent aliqui recentiores, qui eandem sententiam defendunt, Deum non per illa omnia motiva per se præcisè sumpta, sed ut conjuncta cum scripturis, & traditione, ipsi que olim factis revelationibus adhuc loqui, seu complere locutionem suam, & eam integrare: Itaque non sequi prædicta absurda, quæ supponunt ipsum per hæc divisim sumpta loqui.

9. Respondeo, si per ista loquitur Deus, ipsum per hæc divisim sumpta completè loqui: quia qui verba de se completè expressiva alicujus rei assumit, & ordinat ut rem expressam nomine suo significet alicui, aut audienti aut legenti, ipse completè loquitur. Atqui instructio Parochi, aut liber catechisticus completè significat aliquod mysterium credendum, putà Deum esse in personis trinum. Patrem scilicet qui generat intelligendo se, Filium qui generatur per illam intellectionem, Spi-



QUÆST. IV. *De objecto & resol.* 247

ritu n sanctum qui procedit per amorem Patris & Filii, estque substantialis terminus illius amoris : Et Deus, juxta illam sententiam, tali instructione utitur ad significandum suo nomine audienti aut legenti, istud mysterium, ita-ut in ejus assertionem suam ipse auctoritatem interponat, & perinde sit ac si diceret; Ego Deus tuus id de me testor. Ergo per hæc completè loquetur, idque tam bene quàm cùm S. Paulus idem affirmat quod jam est scriptum ab Evangelistis : aut cùm S. Joannes scribit id quod jam est traditum à sanctis Mattheo, Marco, aut Luca. Id enim quod facit locutionem, est significatio ab aliquo assumpta, & ordinata ut nomine suo res declaretur, ipsèque illam suo testimonio astruat aut confirmet, quorum hinc nihil deerit. Itaque per hæc non primò quidem rem enuntiatam loquetur Deus, sed completè de novo loquetur. Unde sequerentur prædicta absurda, nempe quòd omnes libri catechistici sint sacri, & canonici, similes Bibliis quoad continendum Verbum Dei : & quod respuens aliquem ex illis contemnat auctoritatem Dei, & eodem modo peccet, ac si diceret, credo quod scripsit S. Paulus, non quia est in ejus scriptis, sed quia est in Evangelio.

10. Alius modus resolvendi assensum

fidei in revelationem, quem multi recentiores tenent, est revelationem ut insignitam suis notis caracteristicis, quæ sunt motiva credibilitatis, unico assensu non discursivo credi. Et in hac sententia notæ illæ Dei locutionem non ingrediuntur, ut in præcedenti, sed tantum sunt velut accidentia, quæ illam ita manifestant, ut simul cum his illa apprehendatur, ac judicetur. Et hoc totum declarari & astrui potest supponendo duo. Primum est non esse necesse ut quotiescunque unum non potest cognosci quin cognoscatur aliud, in eo cognoscendo reperiatur discursus, quo ab isto ad illud procedatur. Nam quando quis videt Petrum sibi notissimum, judicat immediatè & sine discursu ipsum esse, & tamen id non cognosceret, si color & conformatio vultus, statura, lineamenta, & alia hujusmodi, quæ non sunt ipse Petrus, sed notæ & characteres ejus præternaturaliter essent mutata, vel ablata, ut fieri à Deo potest, ita ut nihil illorum restet. Hinc patet ex eò quòd revelatio non possit à nobis cognosci nisi representetur ut insignita, & quodammodo vestita suis characteribus, qui sunt motiva credibilitatis, vel auctoritas Ecclesiæ, aliarumque fidei regularum, non sequi assensum qui illi datur sic representatæ, non esse immediatum. Alterum est in iis



quæ non possunt primò cognosci nisi per discursum, illa ipsa indicia, quæ prius erant motiva formalia ad illas res discurrendo cognoscendas, posse postea esse notas & characteres, quibus propositis res illæ immediatè cognoscantur. Hinc postquam Petrum quis novit prima vice, discurrendo ex statura, lineamentis, & conformatione tota corporis, quæ illi descripta fuerat, postea dum cum istis Petrum conspicit, sine ullo discursu judicat esse Petrum. Unde constat nihil implicare quominus motiva credibilitatis, & auctoritas Ecclesiæ, quæ in actibus ad fidem præviis fuerunt formaliter motiva inferendi Dei revelationem, sint postea, re meliùs perspectâ & exploratâ, characteres quibus propositis revelatio immediatè credatur. Quo posito, non habebunt hîc locum neque circulus, neque progressus in infinitum, neque petitio principii, cum hæc sint vitia discursûs, qui hîc non reperietur.

15. Refellitur hæc sententia, quia quando revelatio creditur actu simplicissimo visis illis characteribus ipsi characteres erunt motivum formale illius assensûs, etsi id fiat sine multiplicitate actuum. Et cum dicitur esse notas & characteres & proponentia, non autem motivum, hoc est ludere in verbis, quia quod priùs naturâ

cognitum, ducit nos in cognitionem alterius, est motivum formale illius alterius cognoscendi. Hinc ut utar allato exemplo, cum Petrum cognosco intuitivè ex ejus colore, verum est colorem esse motivum cognitionis illius, & ad hoc ut color sit motivum cognoscendi Petrum, accidentale est quod id fiat per unum aut plures actus. Itaque & idem erit de notis illis cognoscendæ revelationis, quæ non desinent esse motivum assentiendi revelationi, etsi uno actu tum ipsæ, tum revelatio attingatur.

12. Confirmatur id totum aliis manifestis instantiis, in quibus patet simplicitatem actûs non impedire ne ex iis quæ per eum attinguntur, una ratio sit objectum formale motivum primariò cognitum: altera objectum tantum terminativum, dependenter ab illa priore cognitum. Nam in visione quam habent Beati de creaturis in Deo, creaturæ sunt objectum tantum terminativum, & consequenter cognitum: Dei autem essentia, sive omnipotentia, ut continens illas eminenter, & determinata ad illas producendas, itémque scientia Dei & decreta de illis sunt objectum formale primariò cognitum, ex quo illarum cognitio, formaliter loquendo, petitur, sine discursu quidem, sed non sine præsuppositione

QUÆST. IV. *De objecto & resol.* 251  
unius ad aliud, & ordine causalitatis ob-  
jectivæ inter utrumque. Et idem est de  
visione qua Deus ipse prius se ipsum vi-  
det, & creaturas in se ipso ut principio  
earum, ut fine, ut causa exemplari, ut  
volente illas producere, &c. Talis enim  
visio fertur primariò in ipsum Deum, &  
consequenter tantùm in illas, sine depen-  
dentia quidem actûs divini, sed non sine  
jam dicta præsuppositione, & ordine in-  
ter objecta ut sic, ita-ut verum sit dicere,  
Deum cognoscere creaturas, quia cog-  
noscit se ipsum continentem illas eminen-  
ter, potentem ac volentem producere.  
Idem quoque est de cognitione quâ An-  
gelus Deum cognoscit ex se ipso, quæ  
cognitio est sine discursu, in quantum  
Angelus cognoscens directè se esse ens  
potentiale, & dependens à prima causa  
creante, in eo actu causam illam velut in  
obliquo, & dependenter à directâ sui vi-  
sione cognoscit. In tali igitur actu An-  
gelus est sibi ratio cognoscendi Deum, &  
in ipsum ut objectum resolvitur cognitio  
quam habet de Deo, non obstante sim-  
plicitate actûs. Sicut ergo non bene di-  
ceretur in istis omnibus cognitionibus ob-  
jecta consequenter cognita cognosci se  
ipsis, etsi eodem actu cognoscantur quo  
ipsa objecta motiva: Ita si notæ & cha-  
racteres revelationis sint id quod per se

patet, & revelationem manifestat, etsi tam notæ quàm revelatio uno actû attingantur, notæ & characteres non desinent esse ratio formalis & motiva ex qua revelatio cognoscetur, & in quam ejus cognitio resolvetur, sicut cognitio quam habent Beati de creaturis in Deo visis, resolvitur in Deum ut primam rationem videndi eas jam dicto modo, & cognitio quam habet Angelus de Deo, in ipsum Angelum. Quòd si id negetur, dabitur judicium sine objecto formali illius judicii, quod implicat, cùm nullus actus potentia cognoscitivæ aut volitivæ, possit esse absque eo quòd detur illius motivum & objectum formale. Sequela probatur, quia aliquid se ipso incognoscibile seu penitus obscurum, & carens omni luce, ita cognoscetur, ut id quod ducit in cognitionem ejus & præter quod nihil ducit in illam cognitionem, non sit motivum. Unde sequetur nullum omnino fore motivum illius actûs.

13. Quod si dicas illud penitus obscurum, non ut carens omni luce objectiva, sed ut manifestatum illis notis, & insignitum characteribus, esse objectum formale & motivum cognoscendi sui: dicam similiter, ut supra contra sententiam eorum qui volunt motiva credibilitatis esse proponentia, non motiva, conclusionem

quæ elicitur ex præmissis, non habere medium terminum & præmissas illas ob-  
 jectivas pro motivo, sed ipsam illis ma-  
 nifestatam, esse objectum formale & moti-  
 vum assentiendi sibi: quod notioni discursus  
 repugnat, cum in discursu intelligatur  
 esse dependentia conclusionis à præmissis  
 eo quòd per illas notificetur. Item dicam  
 dum creaturæ videntur in Deo, non Dei  
 essentiam aut potentiam aut ideas aut de-  
 creta esse motivum videndi illas, sed ip-  
 sas posita manifestatione sui per essentiam,  
 potentiam, ideas, aut decreta Dei, esse  
 motivum formale cognitionis illius. Et si-  
 militer in cognitione naturali quam habet  
 Angelus de Deo ex se ipso per unum  
 actum, dicam non Angelum quatenus est  
 ens potentiale, sed Deum, præcognita  
 potentialitate Angeli, esse se ipso ob-  
 jectum formale talis cognitionis. Unde An-  
 gelus habebit naturaliter actum quo fere-  
 tur immediatè in Deum. Quæ cum ratio-  
 ni repugnent, & tollant omnem distin-  
 ctionem objecti motivi ac primarii, ab  
 objecto terminante ac secundario, dicen-  
 dum est notas & characteres revelationis,  
 & omnia quæ illam proponunt, cum per  
 ea tantum ipsa revelatio cognoscatur, etsi  
 eodem actu quo illa omnia, esse objectum  
 formale & motivum cognoscendi eam:  
 quod illa sententia non vult. Et hoc po-

254 *De Ente Supernaturali,*  
fito, restat quærendum & explicandum  
quomodo revelatio per illas notas cognita  
possit se ipsa cognosci ad hoc ut fides in  
ipsam Dei revelationem resolvatur. Et ad  
hoc dicendum aliqua sensibilia quæ præ-  
dicti auctores numerant inter notas illas  
characteristicas, non ingredientes, se-  
cundum illos, ipsam constitutionem re-  
velationis, ipsam re vera ingredi, & alia  
similiter ingredi attestationem ejus, nem-  
pe mirabilia opera per quæ Deus locutus  
est, aut per quæ quod dixerat, confir-  
mavit: & sic locutionem & attestationem  
Dei esse sensibilem, in iisque apparere  
Dei auctoritatem, & testimonium ejus,  
& sic fidem resolvi in aliquid per se cog-  
noscibile, nempe in revelationem per  
aliquid sui cognoscibilem, quia, ut di-  
ctum est antea, quod est cognoscibile  
per aliquid sui, seipso cognoscibile est,  
sicut homo est de se visibilis, quia est  
visibilis per aliquid sui, quod est cor-  
pus.

---

## SECTIO SEPTIMA.

*An & per quid revelatio sit evidenter  
credibilis.*

**D**ictum est hætenus in allata resolu-  
tione fidei revelationem Dei esse  
cognoscibilem

cognoscibilem, tum per opera supernaturalia ad illam se habentia, sicut se habent nostræ voces externæ ad nostram locutionem internam, & per opera item supernaturalia, quibus Deus factam antea-revelationem attestatus est, sicut nos syngraphâ nostrâ aut sigillo aliquid à nobis, aut nomine nostro scriptum approbamus, & ratum habemus.

2. Dictum item est opera illa esse tum ea quæ propriè vocantur miracula, tum adimpletiones prophetiarum, in quibus effectus à multis retro sæculis prædicti, sunt veluti sigillum factæ prius à Deo prædictionis.

3. Nunc videndum est an certissimè constet talia esse facta miracula, talésque contigisse prophetiarum adimpletiones. Id autem manifestè ostenditur.

4. Ac primò quidem quoad miracula, illa debent haberi pro certis, quæ cum esset impossibile credi, nisi manifesta fuissent, constat tamen esse certissimè credita, eo maximè loco, & tempore quibus impossibile fuisset illa credi. Atqui talia sunt miracula quæ in Evangelio, & in actis Apostolorum scripta sunt. Ergo debent illa pro certis atque indubitatis haberi. Major probatur, quia ab eo quod non potuit esse sine prævia tali causa, valet consequentia ad illius causæ præteritam



256 *De Ente Supernaturali,*  
saltem existentiam. Et quantò certius est  
illud fuisse, quod non potuit esse sine tali  
præcedente causa, tantò certius est illam  
causam extitisse. Unde quantò certius est  
aliqua miracula fuisse credita quæ non po-  
tuissent credi nisi fuissent palam notoria,  
tantò certius constat præviam fuisse tali  
tempore ad illorum fidem, ipsorum noto-  
rietatem.

§. Minor probatur, nempe quod talia  
sint quæ in Evangelio & in actis Aposto-  
lorum narrantur, quia ibi apud ipsos qui  
tunc vivebant, Judæos refertur illa fuisse  
facta palam coram populo, & in urbe ip-  
sorum celeberrima, & in tota Palæstina  
ac Galilæa, & fuisse cunctis spectabilia,  
ut deliquium solis in plenilunio, & velum  
templi scissum à summo usque deorsum,  
& aperta mortuorum monumenta, qui-  
bus nihil magis stupendum esse poterat.  
Quantò autem aliqua per se magna, &  
incolita, magis fuisse publica, & notoria,  
dicuntur, tantò magis impossibile esset  
illa credi, si non taliter contigissent,  
quia sic foret evidens illorum falsitas.  
Nunc autem ista fuisse certissimè credita  
ab ipso nascentis Ecclesiæ tempore patet,  
quia nisi ita certò credita fuissent, & nisi  
post Christi resurrectionem ipsa fuissent  
novis miraculis, & supernaturalibus ope-  
ribus, confirmata cujusmodi fuit donum

linguarum Apostolis concessum, & palam populo manifestatum, nunquam ex Judæis tam multi, hominem in cruce mortuum adorassent, & Deum agnovissent. Nec parati fuissent pro confitenda ejus divinitate mori, nec de facto tot supplicia & mortem tam fortiter pertulissent. Et sic fundata est in Christum fides, nec potuit aliter obnitentibus contrà, tota auctoritate, ac potestate synagogæ principibus stabiliri. Sic ab ipso suo ortu firmitatem inconcussam habuit adoratrix Crucifixi Ecclesia. Quare non possunt illa miracula nisi à veritatis hostibus in dubium revocari.

6. Sed & paria necessariò facta sunt in omnibus regionibus, in quibus Apostoli Evangelium prædicarunt. Nisi enim Deus insignibus miraculis cooperatus fuisset, & sermonem eorum sequentibus signis confirmasset, æquè impossibile fuisset illis Crucifixi hominis Judæi divinitatem, & legem corruptæ naturæ contrariam suadere. Quare effectus qui sine supernaturalibus operibus esse non potuit, hoc planè certum reddit, talia opera præcessisse, & per ea mundum ad Christi fidem esse conversum. Sed & multa alia diversis temporibus etiam post fundatam fidem, ad eam magis astruendam facta esse constat ex testimoniis quibus nihil potest esse attentâ humanâ

auctoritate certius. Nam qui testes sanctis Patribus, sapientia ac virtute inter homines præcellentissimis, fide digniores, quoad ea potissimum de quibus ipsi dubitare non poterant. Narrant autem illi, nempe Ambrosius, Augustinus, Hieronymus, & alii, multa miracula quæ ipsi sibi certò constare asserunt, aut etiam à se visa & se intervenientibus facta.

7. Divus Ambrosius lib. 10. Epistolarum epistola 85. ad sororem, & sermone 91. testatur se divino admonitu cognovisse quonam in loco laterent sanctorum Gervasii & Protasii corpora, ante ducentos annos sepulta: ibi jussisse eroderari terram, formidantibus qui aderant Clericis, ne quod quærebatur non inveniretur: effossa terrâ, apparuisse incorrupta, & velut recentia corpora, & plurimum adhuc sanguinis: cum inde transferrentur magna celebritate, cæcum urbi notissimum, repente visum recepisse & alia facta miracula. De qua re duo exstant D. Ambrosii sermones ad populum. Primum habuit ipsa translationis die: & hîc annexus est Epistolæ ad sororem. Secundum postridie: Et hic est in ordine sermonum nonagesimus primus. Posita igitur tali testificatione D. Ambrosii, si non esset verum quod asserit, necesse esset ipsum esse impostorem: quod quis audeat vel cogitare?

QUÆST. IV. De objecto & resol. 259

8. Divus Augustinus, qui tunc Mediolani erat, eandem miraculosam inventionem, sanctorum Martyrum, & cæci sanitatem diversis locis refert. Nam lib. 9. Confessionum cap. 7. sic habet. *Tunc memorato Antistiti ( Ambrosio ) per visum aperuisti quo loco laterent Martyrum corpora Protasii & Gervasii, quæ per tot annos incorrupta in thesauro secreti tui recondideras, unde opportunè promeres, &c. Cum enim propalata & effossa, digno cum honore transferrentur ad Ambrosianam Basilicam, non solum quos immundi vexabant spiritus, confusis eisdem Demonibus, sanabantur: verum etiam quidam plures annos cæcus civis civitatique notissimus, cum populi tumultuantis lætitiæ causam quæsisset, atque audisset; exilivit, eoque ut se duceret, ductorem suum rogavit. Quo perductus, impetravit admitti ut sudario tangeret pheretrum pretiosæ in conspectu tuo mortis sanctorum tuorum. Quod ubi fecit, atque admovit oculis, confestim aperti sunt. Inde fama discurrens, inde laudes tuæ ferventes: inde illius inimicæ Imperatricis Iustinæ animus, etsi ad credendi sanitatem non applicitus, à persequendi tamen furore compressus est. Hactenus ibi Augustinus, & lib. 22. de civitate Dei c. 8. sic scribit. *Miraculum quod Mediolani factum est, cum illic essemus, quando illuminatus est cæcus, ad multorum notitiam**

260 *De Ente Supernaturali,*  
*potuit pervenire quia & grandis est civitas,*  
*& ubi erat tunc imperator, & immenso po-*  
*pulo teste res gesta est. Hæc Augustino sic*  
*asserente tanquam sibi certissima, nullus*  
*est dubitandi locus.*

9. Idem Augustinus jam dicto libro & capite, ubi expressè de miraculis agit, plurima alia refert sibi notissima, & inter illa, undeviginti facta virtute Reliquiarum sancti Stephani, circa illud tempus mirabiliter inventarum. In illis quinque mortuos suscitatos, & ultimo loco duas sanationes publicas, insignes, instantaneas, se vidente, & interveniente, & Deum laudante factas. Quis talia legens ab Augustino conficta credat?

10. Divus Hieronymus in vita sancti Hilarionis narrat magnam numerum miraculorum, ac prodigiorum ab ipso factorum, quorum recens erat per totum orbem memoria, quæque specialiter didicerat tum à Discipulis ejus, tum à sancto Epiphanio qui eum amicissimè noverat, & jam in quadam Epistola partem illorum miraculorum scripserat: unde Hieronymus occasionem accepit totius conscribendæ vitæ. Refert in primis cum sanctus in Dalmatiam latitandi, ac devitandi honoris causâ secessisset, maria egressa esse terminos suos, & quasi Deus rursus diluvium minaretur, vel in antiquum chaos redirent omnia,



naves ad prærupta de latere montium pependisse. Quod cum, inquit, viderent Epidauritani, frementes fluctus, & undarum moles, & montes gurgitum littoribus inferri, verentes quod jam evenisse cernebant, ne oppidum funditus everteretur, ingressi sunt ad senem, & quasi ad prælium proficiscentes, posuerunt eum in litore. Qui cum tria crucis signa pinxisset in stabulo, manusque contra tenderet, incredibile dictum est in quantam altitudinem intumescens mare ante eum steterit, ac diu fremens, & quasi ad obicem indignans, paulatim in semetipsum, relapsum est. Hoc Epidaurus, & omnis illa regio usque hodie prædicat. Quis non videt hoc esse tantum, ut à tanto viro, nec scribi nec taliter asseri potuerit, nisi fuisset indubitatum.

— 11. Sanctus Gregorius Nazianzenus orat. 11. duas miraculosas sanationes refert, quæ in sorore sua Gorgonia contigerunt. Primò cum illa veheretur curru quem mulæ trahebant, illæ umbratico pavore repente percussæ, currum subverterunt, & sanctam Virginem curru implicitam, per devia raptarunt, ita-ut toto confRACTO & lacerato corpore, vix superstes, restiterit. Non potuit autem præ pudore apud se statuere, ut ad curanda vulnere medicorum & Chyrurgorum oculis nuda appareret. Itaque unicum Christum medicum habere

voluit : cùmque illum enixè rogasset, miraculosè sanata est, fuitque celebris tanti prodigii fama, ut ibidem asserit Nazianzenus. Secunda curatio sic accidit. Cùm illa gravissimo morbo premeretur, cui depellendo Medicorum artem imparem experta erat, noctu in sacellum cubiculo suo vicinum, in quo Sancta Eucharistia asservabatur, quanto potuit nisu sese protraxit. Deinde ante Christum prostrata, & cum lachrymis orans, protestata est se non inde, nisi sanitate recepta, redituram, subitoque exauditam se sentiens, surrexit, & omnipotenti miraculorum auctori gratias egit.

12. Sanctus Bernardus in vita sancti Malachiae, post descriptam ejus mortem, quæ contigit in Monasterio Claræ Vallis, ubi ipse Abbas aderat, miraculum narrat, quod in ejus exequiis, ante oculos & inter manus ipsius, factum est (*Stabat, inquit, eminus puer cui emortuum pendebat è latere brachium magis impedimento quàm usui. Quo comperto innuit (ipse Abbas) ut accederet. Et apprehensam aridam manum applicavit ad manum Episcopi, & vivificavit eam. Nempe vivebat in mortuo gratia sanitatum, & manus ejus fuit mortuae manui quod mortuo homini Elias.* Quis tanta à sanctissimis viris falsò conficta existimet : Certè si illis inter mortales, ob eximiam sapientiam ac virtutem, fide dignissimis non credatur:



QUÆST. IV. *De objecto & resol.* 263  
credatur corruet omnino humana fides, &  
negare quis poterit unquam fuisse reges &  
illustres viros, de quibus prophani auctores  
tam præclara referunt.

13. Dices humana esse quæ narrant illi  
auctores, ac proinde nihil in illis esse in-  
credibile: supernaturalia autem non eodem  
modo esse possibile, & proinde nec cre-  
dibilia. Respondeo mundo per crucis præ-  
dicationem converso, supernaturalia novo  
rerum statui, quem natura efficere non po-  
tuit, esse quodam modo connaturalia, ac  
proinde nihil in illis esse, quo debeant non  
credi quando à testibus idoneis, ac præser-  
tim piis, prudentibus & oculatis asserun-  
tur. Hinc D. Augustinus loco supra citato  
de Civitate Dei, de homine qui vigente  
per orbem fide, nulla admittat miracula ita  
loquitur. *Quisquis adhuc prodigia ut cre-  
dat, inquit, magnum est ipse prodigium  
qui mundo credente non credit.*

14. Dices secundò in miraculis quæ nar-  
rantur multa esse falsa. Respondeo id non  
obstare huic veritati; quod innumera verè  
fuerint miracula sed potius id eam suppo-  
nere, & ex ea occasionaliter oriri. Nam  
quia verissimè ac certissimè multa fuerunt,  
ac subinde aliqua fiunt, ut constat ex pro-  
cessibus, qui recentiorum Sanctorum ca-  
nonizationem semper antecedunt, proum  
est ut in quibusdam miris eventibus, ali-

quid esse supernaturale existiment, qui piè quidem sunt affecti, at non maturè res expendunt. Cæterùm vel unum miraculum sufficit, ut certissimè constet hanc esse veram fidem quæ per illud fuerit à Deo confirmata. Et satis ostensum est impossibile esse nullum omnino fuisse miraculum.

15. Quod spectat ad prophetias, nihil illis admirabilius, neque magis convincens esse potest. Nam & constat esse factas & manifestum est esse adimpletas. Quia autem illæ potissimum sunt de Christo in veteri Testamento, & à Christo in novo Testamento, multas ex illis singillatim exponam, & adimpletas ostendam agendo de existentia incarnationis, ad quem locum nunc lectorem remitto. Satis sit nunc dicere nihil potuisse incredibiliùs prædici quàm adorandam & toto orbe colendam hominis crucifixi divinitatem, & nihil manifestiùs esse adimpletum: Quod non nisi à Deo prædici, & per ejus gratiam effici potuit.

16. Alia multa sunt motiva credibilitatis, quæ non ingrediuntur locutionem, & attestationem Dei, & quibus tamen bene probatur doctrinam fidei à Deo ortam, & acceptam esse.

17. Ejusmodi sunt sanctorum Patrum, & Ecclesiæ Doctorum, ob eximiam sapientiam & virtutem, humano etiam modo

QUÆST. IV. *De objecto & resol.* 265  
spectatam, maxima quoad res Religionis  
auctoritas: quorum tamen omnium, tan-  
torum licet virorum, nempe Augustini,  
Ambrosii, Hieronymi, Gregorii, Bernar-  
di, & aliorum orbis luminum doctrinâ &  
scriptis, nihil esset pejus, si nostra non  
esset vera fides, si Christus non esset Deus,  
si ejus Ecclesia non esset Dei Ecclesia: Præ-  
terea innumerabilium Martyrum constan-  
tia, per quam effectum est ut inter homi-  
nes nihil fuerit unquam melius ac nobilius  
nostræ fidei veritate testatum. Item innu-  
merabilium hominum, qui ut se totos Deo  
consecrarent, sæculo renuntiarent, vita  
integerrima, ac piissima, voluntaria pau-  
pertas, Angelica castitas, mortificatio om-  
ni pravæ, & minùs ordinatæ inclinationi  
contraria. Denique totius Ecclesiæ sancti-  
tas in eo sita quòd omne malum damnet,  
omne bonum, aut præcipiat, aut consulat  
atque approbet, nihil profiteatur, aut ip-  
sius nomine fiat; quod sanctum non sit,  
& nunquam in ea desit ingenis proborum,  
qui Deo fideliter serviant, numerus: unde  
ipsa sic sancta præ omnibus aliis sectis,  
evidentem habet suæ præcellentiae credibi-  
litate: sed de his, aliisque credibilitatis  
motivis, vide Auctores, qui plenos ac  
præclaros de iis tractatus ediderunt.

## SECTIO OCTAVA.

*An ad fidem absolutè necessarium sit ut ob-  
jectum fidei proponatur cum motivis  
evidentem credibilitatem constituentibus.*

1. **A**liqui graves auctores putant credi-  
dibilitatis evidentiam, de qua  
dictum est, necessariam quidem esse res-  
pectu totius Corporis Ecclesiæ, ita ut in  
rebus, & in propositione objectiva fidei,  
sint motiva judicandi evidens esse, id quod  
proponitur, sapientissimè credi, nec posse  
nisi insipientissimè discredere. Negant autem  
cuiusvis homini, maximèque personis sim-  
plicibus, necessariam esse illam credibilita-  
tis evidentiam: quia, inquiunt, pueri Chri-  
stiani verè credunt, cum perveniunt ad  
usum rationis, nec tamen illam percipiunt  
evidentiam, imò nec possunt. Et similiter  
multi infideles convertuntur ad prædicatio-  
nem Evangelii absque miraculis quæ ipsi  
viderint, aut à suis majoribus acceperint,  
ac proinde absque credibilitatis evidentia.  
Unde inferitur sufficere probabile iudicium  
de veritate fidei, excludens omnem actua-  
lem formidinem ac dubitationem. Ita Ga-  
briël in 3. dist. 24. Capreolus ibidem dist.  
32. & multi alii.

2. Contrà autem, evidentiam credibi-

QUÆST. IV. *De objecto & resol.* 267  
litas absolutè requirit Divus Thomas hîc  
quæstione 1. articulo 4. ad 2. ubi ita ha-  
bet, *non enim quis crederet nisi videret*  
*ea esse credenda vel propter evidentiam*  
*signorum, vel propter aliquid hujusmodi,*  
& paulo supra dicit, ea quæ subsunt fidei,  
esse visa ab eo qui credit sub communi ra-  
tione credibilitatis, non potest autem ali-  
quid esse visum cognitione inevidenti.  
Idem sentiunt Caietanus ad dictum locum  
sancti Thomæ; Suares disputatione 4.  
sect. 2. de Lugo disputatione 5. sectione 1.  
& communiter Theologi, cum quibus.

3. Dico ad credendum, requiritur ut ob-  
jectum fidei proponatur per motiva eviden-  
tem credibilitatem constituentia. Probatur,  
quia ad credendum requiritur prudens vo-  
luntas non præcisè assentiendi, sed assen-  
tiendi firmissimè, & excludendi omnem  
formidinem circa objectum fidei, etiam  
contra quamlibet apparentem in opposito  
rationem. Talis autem voluntas non potest  
esse prudens sine evidenti iudicio credibi-  
litas, quia si non esset evidens credibilitas  
sed tantum probabilis, homo posset ju-  
dicare circa oppositum fidei posse esse pru-  
dentem assensum. Quod si id posset pruden-  
ter judicare, non posset prudenter objecto  
fidei firmissimè, & super omnia velle ad-  
hærere, & excludere omnem dubitationem  
de opposito, contra quamvis apparentem

in eo rationem. Imò ei liceret, intentata morte, formare judicium probabile practicum de veritate oppositi. Nam quod quis potest prudenter judicare credibile, potest prudenter judicare esse verum: & sic liceret fidem inculpatè negare: quod est absurdum. Debet ergo evidens esse credibilitatis judicium, ut prudenter possit homo velle credere firmissimè sine spe dissentendi etiam si mori deberet. Et hinc patet oppositum fidei etiam debere proponi ut incredibile, saltem negativè, ita-ut si id proponatur, & de eo cogitet qui vult credere, judicet illud non posse credi prudenter, nam absolute non est opus ut de eo cogitet.

4. *Obijciens* primò, videtur constare experiencià non dari semper prædictum judicium ante omnem actum fidei præsertim in rudioribus & pueris, in quibus etiam quomodo talis evidentia reperiri possit, non apparet, cum ejus rationes, & principia capere non possint.

5. Respondeo in omni credente ante omnem actum fidei, reperiri tale judicium, non semper in actu signato, seu cum reflexione ad illud, & ad principia in quibus fundatur, ita ut judicans, ea possit distinguere & assignare, sed in actu exercito, ita-ut verè ab aliquibus motivis generaliter saltem & implicite cognitis aut præsuppositis, quæ prædictam credibilita-

QUÆST. IV. *De objecto & resol.* 269  
tis evidentiam faciant, moveatur. Ad id  
quod additur de incapacitate personarum  
simplicium, dico in illis ad evidentiam ta-  
lis iudicii sufficere quod videant sapientis-  
mos viros, ac multitudinem Christianorum  
hanc fidem amplecti, ut infallibilem ac  
certissimam, cognoscantque eam esse con-  
firmatam miraculis, &c. Neque ulla ha-  
beant argumenta in contrarium. Tunc  
enim certò judicant honestum esse credere,  
& se ad id obligari.

6. Objicies secundò, Ad exercendos  
actus aliarum virtutum sufficit habere ju-  
dicium probabile de honestate objecti,  
Verbi gratiâ ac exercendum actum tempe-  
rantia, satis est probabiliter existimare hîc  
& nunc tali modo obstinendum à cibo, &  
potu: ad exercendum actum justitiæ, sa-  
tis est sequi opinionem probabilem de obli-  
gatione restituendi. Ergo similiter ad exer-  
cendum actum fidei sufficiet probabiliter  
judicare rem esse credibilem, & creden-  
dam.

7, Respondeo negando consequentiam.  
Disparitas est quia voluntas exercendi hoc  
modo temperantiam, vel tale quid resti-  
tuendi, non debet excludere omnem dubi-  
tationem de honestate, aut indifferentia  
oppositi, sed ad eam satis est quòd obje-  
ctum honestum, aut debitum putetur:  
quod rectè fit per probabile iudicium. At



verò voluntas credendi debet excludere omnem formidinem de falsitate objecti credendi, & veritate oppositi: ad hoc autem requiritur ut in tali objecto nulla appareat prudenter dubitandi ratio, & nulla rationalis credibilitas in opposito, quia non potest voluntas prudenter cohibere formidinem, quando prudentia dicat rationabiliter formidari posse.

8. Instabis. Potest aliquis prudenter adorare hostiam, & colere super omnia, etsi tantum probabiliter credibile sit esse consecraram, quia posita tali credibilitate in objecto ipso, probabiliter judicabit ita esse: & in sensu composito talis judicii, tenebitur illam adorare. Item si aliquid sit probabiliter præceptum à Deo alicui, idque ipse probabiliter judicet, in sensu composito talis judicii, tenebitur illud super omnia opposita & impossibilia velle. Ergo similiter, si sit probabile aliquid esse credibile super omnia, & aliquis id probabiliter judicet, tenebitur in sensu composito talis judicii, credere super omnia.

9. Respondeo eodem modo ac supra voluntatem colendi super omnia, & volendi aliquid super omnia ipsi opposita, non debere excludere omne judicium quo putetur contrarium esse probabiliter licitum: at voluntatem credendi eo modo quo credit fides supernaturalis, excludere debere omne

QUÆST. IV. *De objecto & resol.* 271

judicium, non modò quo contrarium probabiliter judicetur verum, sed quo judicetur illud esse probabiliter credibile. Itaque ut sit prudens voluntas adorandi, & volendi super omnia, satis est si objectum tali cultu, aut amore dignum probabiliter judicetur. At verò ut sit prudens voluntas credendi super omnia, cum obligatione non dissentendi, & exclusionem omnis formidinis, requiritur ut judicetur nullam esse causam rationabilem dubitandi, ad quod necesse est ut sit evidens, si non veritas, at saltem credibilitas.

10. Objicies tertio, Potest quis absque certitudine & evidentia rationabiliter judicare objectum esse credibile cum obligatione non dissentendi, quia omne quod potest certò & evidenter judicari, potest etiam probabiliter credi, cum deest evidentia. Itaque de hac ipsa credibilitate & obligatione inevidentibus potest haberi judicium probabile. Omne autem judicium probabile est rationabile, etsi non sit certum, imò nec verum. Posito igitur tali judicio rationabili non evidenti, tenebitur credere firmissimè, & cohibere omnem formidinem, Ergo non requiritur ad credendum firmissimè, & sine formidine, evidentia aut certitudo credibilitatis.

11. Respondeo negando majorem. Ad probationem concedo quidem de omni re

quæ potest evidenter cognosci, posse haberi judicium probabile, prout probabile idem est ac opinativum: sed nego de omni tali re. posse haberi judicium probabile prout probabile idem est ac rectæ rationi conforme. Ratio est quia aliqua certò, & evidenter cognoscibilia, sunt opposita cum ipsa rei probabilitate & dubietate objectiva, ut est ipsa evidentia rei, quæ non potest assensu tantùm probabili judicari. Et similiter tali dubietati, & obscuritati opposita sunt quæ talem evidentiam supponunt, eamque necessariò consequuntur. Et hujus generis est respectu firmi assensûs, quòd objectum tantùm probabile dignum sit assensu exclusivo omnis formidinis. Nam hoc ipso quòd illud objectum cum rationibus hinc inde oppositis, & probabilitatem constituentibus proponitur, implicat illud esse summè credibile contra quamvis quæ pro opposito posset afferri rationem, & oppositum illud esse planè incredibile. Quare, ut aliquid judicetur dignum summo assensu, debet esse evidenter credibile. Alioqui judicium illud erit erroneum & imprudens, & contradictionem involvet in objecto, quod deberet esse & non esse evidenter credibile.

12. Instabis, probabilitas credibilitatis sufficit ad prudenter credendum fide humana. Ergo & ad credendum fide divina.

QUÆST. IV. *De objecto & resol.* 273

13, Respondeo negando consequentiam quia fides humana non excludit, & licet excluderet, non excluderet prædicto modo omnem formidinem de veritate oppositi, & falsitate rei creditæ. Fides autem divina, de qua hîc agitur, sic excludit.

14. Dixi fides divina de qua hîc agitur idest strictè sumpta fides per quam expleatur præceptum fidei & quæ apta sit elici ab habitu fidei quia non implicat in eo qui tantum haberet probabilitatem de credibilitate objecti fidei, fides honesta assentiens rei creditæ propter testimonium Dei cum probabilitate propositum ex defectu motivorum quæ alicui non satis apparebunt, sed quia non poterit prudenter excludere formidinem de probabilitate saltem oppositi, non erit propriè sumpta fides, sed dispositio aliqua ad eam. Et multò minus erit ejusdem speciei, etiam subalternæ, cum ea ad quam concurrit habitus fidei: sed conveniet tantum sub ratione valde generica, quia non erit assensus summè certum hominem reddens, quod est commune omnibus actibus fidei de qua agimus.

15. Objicies quartò, Si objectum fidei debet esse evidenter credibile, sequetur illud esse evidenter verum; consequens non est admittendum; itaque objectum illud non est evidenter credibile. Major probatur, quia quod est evidenter credi-

bile, est evidenter possibile. Atqui in multis fidei objectis, nempe in divinis, idem est esse ac possibile. Itaque si sunt illa evidenter credibilia, evidenter quoque existunt. Minor probatur quia ex credibilitate ad fidem prævia, non debet sequi evidèntia rerum credendarum, etsi enim res credita possit esse evidens, non tamen id debet habere per ipsum fidei processum, ita ut nihil possit credi quod non sit evidenter verum.

18. Respondeo negando sequelam, & utrámque probationem ejus, quia credibile etiam ad falsum & ad non entia sive impossibilia extenditur, sicut & opinabile & conceptibile. Et ratio est quia ut aliquid sit credibile, satis est ita proponi ut dignum sit cui prudenter assentiamur. Potest autem falsum & impossibile sic proponi, & apparere ob aliquam verisimilitudinem, sive auctoritatem nulla contra stante evidenti ratione. Itaque sic erit credibile.

17. Instabis primò, Quod est evidenter impossibile, est evidenter incredibile. Ergo quod est evidenter credibile, est evidenter possibile. Consequentia probatur ex regula Dialecticæ, Valet argumentatio ab opposito consequentis ad oppositum antecedentis.

18. Respondeo negando consequentiam. Ad probationem dico regulam valere de opposito contradictorio, non de opposito

contrario, aut quomodocunque aliter opposito, unde melius sic exprimitur illa regula, Valet consequentia à negatione consequentis, ad negationem antecedentis. Sic si vera est ista argumentatio, est homo, ergo est animal, valet quoque ista, non est animal, ergo non est homo; non valet autem illa, non est animal, ergo est brutum. Porro in supradicta consequentia, cum dicitur, ergo quod est evidenter credibile, est evidenter possibile, nec accipiuntur iidem termini qui erant in antecedente, nec negatur quod erat antecedens: ad quod necessarium esset præcisè præfigere negationem copulæ antea affirmatæ & dicere. Ergo quod non est evidenter incredibile, non est evidenter impossibile. Quod verum esset. Assumpti sunt autem termini tantum contrarii, nempe evidenter credibile, & evidenter incredibile quæ sic tantum opponuntur ut possit alicui subjecto neuter eorum convenire, quod est proprium contrariorum. Nam si aliquid sit planè incognitum, nec propositum intellectui cum aliqua veri aut falsi apparentia, illud, nec credibile erit, nec incredibile. Et idem dic de evidenter possibili comparato cum evidenter impossibili, ob paritatem rationis cum scilicet neutrum eorum conveniat objecto non cognito.

19. Instabis secundò, Si evidenter cre-

dibile non est evidenter verum, implicat dari aliquid ita credibile ut oppositum ejus sit evidenter incredibile: quod est contra prædicta. Ergo male negatur id esse evidenter verum, quod est evidenter credibile. Sequela probatur, quia ex duobus oppositis id quod negat, non est evidenter incredibile, cum id quod affirmat non est evidenter verum. Nam ipsa negatio evidenter veritatis dat aliquam occasionem formidandi de ipsa veritate & dubitandi de opposito. Id autem de quo possumus dubitare, non est evidenter inopinabile & incredibile.

20. Respondeo negando sequelam. Ad probationem distinguo, id quod negat non est evidenter incredibile hoc sensu quod manifestum sit non posse illud prudenter credi, nego: hoc sensu quod non possit omnino sive prudenter sive imprudenter credi, concedo.

21. Objicies quintò, Si objectum fidei debet ita proponi, ut sit evidenter credibile, vel id intelligitur de credibilitate per fidem naturalem, vel credibilitate per fidem supernaturalem. Neutrum dici potest. Ergo non debet reddi evidenter credibile. Probatur minor, ac primò quidem quod non sit evidenter credibile fide supernaturali, quia si ita esset, evidens esset per ipsum processum fidei dari aliquid super-



QUÆST. IV. *De objecto & resol.* 277  
naturale, quia scilicet evidens esset deberi  
fidem supernaturalem, hominemque ad  
eam obligari, non datur autem obligatio  
ad impossibile. Jam quod non sit eviden-  
ter credibile fide naturali, probatur quia  
id omnino est ipsi fidei contrarium. Ergo  
cum non possit decerni, qua fide objectum  
fidei debeat esse evidenter credibile non  
debet esse evidenter credibile.

22. Respondeo negando majorem, quia  
objectum fidei debet tantum ita proponi  
ut sit evidenter credibile firmissimo assensu  
& summa adhesionem intellectus, in quo  
nihil est necesse cogitare an assensus ille sit  
naturalis, an supernaturalis, sicut nec co-  
gitatur an fiat per species, an sine specie-  
bus. Confirmatur, quia multi nesciunt quid  
sit actus supernaturalis, & tamen credunt,  
sciunt autem se debere credere toto corde  
quia Deus dixit, idque sufficit, & quid-  
quid ulterius est, ad fidem seu fidei propo-  
sitionem non necessario pertinet.

23. Objicies septimò, Fide credi potest  
mysteria nostræ fidei esse evidenter credi-  
bilia, siquidem id est revelatum à Deo  
Psalmo 92. *Testimonia tua credibilia facta  
sunt nimis.* Atqui ad illum actum non præ-  
requiritur evidentia credibilitatis. Ergo.  
Quòd si non requiritur ad omnem, non est  
ratio cur prærequiratur ad aliquem. Minor  
probatur quia ad credendum aliquid non

278      *De Ente Supernaturali,*  
est opus ipsum sciri evidenter, antequam  
credatur.

24. Respondeo negando minorem, & dico ad hoc ut credatur evidentiā credibilitatis, prærequiri ut evidenter credibile sit ipsam esse revelatam, ac proinde ipsam ob testimonium Dei credendam. Neque absurdum est alicujus rei cognitionem prærequiri ad aliquam perfectiorem cognitionem ejusdem rei, quomodo in scientiis id quod est scitum, aliqua imperfectiori notitia præcognoscitur. Ratio est quia per se non implicat aliquam cognitionem evidentem ante omnem fidei actum prærequiri, ut dispositionem ad illam, & præterea non implicat illius cognitionis objectum à Deo revelari, & sic posse per fidem credi, quia nihil implicat id quod scitur credi, & de eodem simul esse scientiam & fidem, quod cum fieri possit per unum actum, multo minùs divisum & pro diversis saltem naturæ instantibus, fieri implicabit. Potest ergo de ipsa evidenti credibilitate, quæ credenda est ob testimonium Dei, haberi cognitio evidens prævia ad illam fidem.

25. Quod si quæras ex quibus motivis talis habeatur cognitio, respondeo haberi ex communibus credibilitatis motivis, quæ si non faciunt evidentem veritatem rerum credendarum, faciunt saltem evidentem illarum omnium ac proinde ipsius credibilitatis, quæ etiam revelata est, credibilitatem.



## QUÆSTIO QUINTA.

### *De actu fidei.*

1. **C**Irca actum fidei duo tantum omis-  
sis aliis tractabo. Primum an sit  
omni assensu scientifico certior.  
Secundum an assensus qui datur rebus re-  
velatis propter revelationem Dei, fiat per  
discursum.

---

### SECTIO PRIMA.

*An assensus fidei sit absolute certus, &  
omni scientifico firmior.*

1. **R**atio dubitandi est, quia cum evi-  
dencia objecti videatur ad certitudi-  
nem requiri, non datur in objecto fidei  
talis evidentia, sed tantum evidens credi-  
bilitas, quæ non facit necessitatem cre-  
dendi, sed tantum ita reddit assensum pru-  
dentem, ut tollat ab opposito omnem pro-  
babilitatem, ita ut illud non possit nisi im-  
prudenter, & in rebus fidei insipientissime  
credi. Ubi autem est evidentia objecti, in-  
tellectus necessitatur ad assensum, & nisi  
talis adsit necessitas, potestas credendi,  
etiam imprudenter, oppositam videtur tol-

280      *De Ente Supernaturali,*  
lere certitudinem assensûs. Hac autem non  
obstante difficultate.

2. Dico primò , assensus fidei est simpliciter certus. Ita post sanctum Thomam q. 5. a. 1. Theologi omnes , præter Durandum , qui minus congruè de fidei certitudine est locutus. Nam distincta duplici certitudine , quarum unam vocat adhæisionis , & alteram evidentix , quam solam dicit esse veram certitudinem , fidei solam tribuit certitudinem adhæisionis.

Probatur autem assertio primò ex scriptura , Job. 3. *Pro certo habeat omnis qui credit in te.* Actor. 2. *Certissimè sciat domus Israël , quia & Dominum eum , & Christum fecit hunc Deus Jesum , quem vos crucifixistis.*

4. Probatur secundò , ex Concilio Tridentino , quod supponit certò constare quod fide creditur , dum sess. 6. cap. 9. & can. 16. definit , *neminem posse certitudine fidei scire sine speciali revelatione se esse in gratia , aut prædestinatum.*

5. Probatur tertiò ratione , quia assensus fidei vel est circa res revelatas dependenter à revelatione Dei , vel circa ipsam revelationem. Si primum , nihil potest esse certius , quàm quod Deus assertit. Si secundum , ille assensus est certissimus qui nititur evidentissimo principio & subjecta illi principio hypothesei planè ineluctabili.

Atqui assensus qui datur ipsi revelationi est talis. Ergo.

6. Major per se est certa & manifesta. Minor probatur, quia assensus fidei circa ipsam revelationem, si per discursum exponatur ac resolvatur, nititur hoc syllogismo. Locutio facta per opera viris naturæ superantia non potest esse nisi ab ente quod sit naturâ superius. Atqui revelatio quâ Deus asseruit nostræ fidei dogmata, est facta per talia opera. Ergo ipsa facta est ab ente quod sit naturâ superius.

7. Circa quod adverte quod antea ostensum est, dum dicitur revelationem credi se ipsâ, non hoc sensu id esse intelligendum quod sine discursu ex se ipsa petito credatur, sed quod credatur absque progressu ad aliqua quæ sint ipsi extrinsecæ, nec pertineant ad constitutionem ejus, quam verè ingrediuntur opera illa supernaturalia & miracula, per quæ Deus suam locutionem & attestationem internam cognoscibilem reddidit. Hujus ergo syllogismi major est ex terminis evidens.

8. Minoris propositionis seu hypotheseis illi principio subjunctæ ineluctabilitas probatur, quia ad destruendam aut infirmandam illam minorem, oporteret ostendere positivè nulla unquam esse facta in confirmationem fidei miracula, nullasque factas circa objecta fidei prophetias, aut

282     *De Ente Supernaturali,*  
cas non esse adimpletas. Quod ostendere  
impossibile est, cum è contra evidentibus  
ista consent indiciis. Quare ineluctabilis  
& indestructibilis est fidei certitudo.

9. Dico secundò, assensus fidei est  
certior omni assensu scientiarum natura-  
lium. Ita sanctus Thomas q. & a. citatis.  
Nam ibi ad 2. sic habet. *Homo longè cer-  
tior est de eo quod audit à Deo qui falli non  
potest, quàm de eo quod videt propria ratione  
quæ falli potest.* Ubi adverte visionem ra-  
tionis, secundum sanctum Thomam, ver-  
sari circa principia evidentissima, quæ  
ipse vocat primò visa, & indemonstra-  
bilia. Sanctum Thomam sequuntur Theo-  
logi ferè omnes.

10. Probatur assertio, primò ex modo  
loquendi sacrae scripturae, summam fidei  
certitudinem importante. Nam 2. Petri 7.  
dicitur *Habemus firmiorem propheticum ser-  
monem.* Quibus verbis comparatur, &  
præfertur visioni oculorum, certitudo  
eorum quæ scripta sunt per Prophetas.  
Ioan. 5. *si testimonium hominum accipimus,  
testimonium Dei majus est.* Ubi per testimo-  
nium hominum, intelligitur omnis ho-  
minum scientia & experientia, & quid-  
quid illis ratione sua sola utentibus con-  
stare potest. Lucæ 21. *Cælum & terra  
transibunt, Verba autem mea non transibunt.*  
Quasi dicatur, etsi ea quæ ab hominibus



firmissima & indefectibilia judicantur, transeant ac deficient, tamen meorum verborum veritas stabit inconcussa.

11. Probatur secundò ex Patribus, qui id apertè docent. Augustinus lib. 7. conf. c. 10. *Facilius, inquit, dubitare vivere me quàm non esse veritatem, quæ, per ea quæ facta sunt, intellecta, conspicitur.* Ubi adverte, Augustinum dum dicit veritatem illam conspici per ea quæ facta sunt, non id asserere ut rationem pure naturalem, sed ut rationem à Deo ipso revelatam per Apostolum, cujus verbis utitur, ac proinde creditam ut talem. Chrysostomus homilia 21. in Epist. ad Hebræos. *Fides, inquit, est argumentum non apparentium, idest faciens majorem certitudinem de illis, quàm de his quæ videmus.* Et homil. 12. in eandem Epistolam. *Fides, inquit, dici non potest (nempe perfecta fides) nisi cum circa ea quæ non videntur, ampliùs quàm circa ea quæ videntur, certitudinem quis habuerit.* Basilii concione in Psal. 115. dicit: *Fidem supra rationales methodos persuadere & animam ad assensum trahere.* Richardus de sancto Victore lib. 1. de Trinit. cap. 2. *Quotquot, inquit, veraciter fideles sumus, nihil certiùs tenemus quàm quod fide credimus.*

12. Probatur tertio ratione, quia ille assensus est firmior omni scientifico, con-



tra quem si quid pugnet habens apparentiam veri, parem in speciem evidentiae scientiarum, hoc ipso quod fidei, ejusque motivo, seu testificationi Dei opponi deprehenditur, amittit vim motivam nostri intellectus ad prudentem assensum, & excidit a sua illa apparente evidentia. Atqui talis est assensus tum revelationis evidenter credibilis, tum rerum revelationi substantium, Ergo assensus fidei est certior omni assensu scientiarum naturalium.

13. Confirmatur hoc, & explicatur, quia omnes quæ afferri aut occurrere possunt contra revelationem, aut contra res revelatas in speciem manifestæ contradictiones, quandiu non destruitur id quod evidentem revelationis credibilitatem constituit, non hoc efficere debebunt, ut contradictiones illas putemus veras, quomodo judicaremus Deum contradictoria revelasse, sed hunc tantum habere debebunt effectum, ut judicemus ea quæ sunt Entis infiniti maximè propria, quæque ab illo supernaturaliter fieri possunt, esse supra mentis nostræ intelligentiam. Et inde jam solvuntur extrinsecè ab ipsis indoctis illæ contradictiones, quia sapientissimè judicatur nihil eorum quæ Deus asseruit, esse impossibile, & chymericum debemus æstimare, quidquid in oppositum se se offert cogitationi nostræ sub specie veri. Sic nihil contra fidem valere potest, & ipsa

contra omnia quæ ipsi opponi possunt, stat per seipsam inconcussa.

14. Declaratur hoc, exemplo petito ex contradictione quæ contra Trinitatem intellectui nostro facile occurrit. Ita enim nostra ratio, revelatione aut seclusa aut non credita, argumentari potest. Quæ sunt eadem uni tertio, sunt idem inter se. Omnia quæ sunt in Deo, sunt idem in uno tertio, nempe in essentia. Ergo sunt idem inter se: ac proinde non sunt plures realiter personæ. Hoc syllogismo, semota revelatione, nihil judicaretur certius, & nihil in scientiis evidentius censeretur. Et tamen postquam Christus miracula operans, & suam divinitatem illis suo nomine factis confirmans, docuit tres esse personas divinas, Patrem, Seipsum, & Spiritum sanctum: Et postquam Apostoli in nomine Patris, & Filii, & Spiritus sancti, innumera ediderunt miracula, & per eam doctrinam orbem converterunt, non possumus amplius prudenter judicare non esse in Deo Trinitatem personarum. Itaque contradictio illa apparens (ad quam respondent Theologi, & responsum est quæstione 1. de Trinitate) non habet vim in sensu composito istorum omnium, ad causandum prudens iudicium de falsitate Trinitatis. Et sic manet immota fides, concidentibus omnibus frustra illam impugnantibus.

15. Nec refert quòd fides non præva-  
 leat veræ scientiæ, quia vera scientia ipsi  
 opponi non potest, cùm verum vero non  
 possit esse contrarium : sed satis per hoc  
 prævalet scientiis quoad certitudinem,  
 quòd aliquid in quo, seclusa revelatione  
 Dei, videretur esse paritas, aut etiam præ-  
 cellentia præ omni scientiarum certitudi-  
 ne, non sit jam prudenter judicabile hoc  
 ipso quòd contra illud stat Dei revelatio  
 evidenter credibilis ; & impossibile est  
 ostendere omnia quæ illam credibilem red-  
 dunt, esse falsa, & nullum unquam fa-  
 ctum fuisse miraculum in confirmationem  
 fidei, cùm vel unum ad hoc sufficiat : nec  
 ullam adimpletam prophetiam, cùm om-  
 nes quæ non sunt de futuro judicio, &  
 consummatione sæculi, fuerint adim-  
 pletæ.

---

## SECTIO SECUNDA.

### *Solvuntur objectiones.*

1. **O**bjicies primò, firmiùs adhæremus  
 objecto cui non possumus dissen-  
 tire, quàm ei cui possumus dissentire : at  
 non possumus dissentire objecto scientiæ  
 naturalis : possumus autem revelationi, &  
 rebus ei substantibus. Ergo firmiùs adhæ-  
 remus objecto scientiæ naturalis.

2. Respondeo

2. Respondeo negando majorem. Nam tantum verum est, nos magis necessario adhærere objecto cui non possumus dissentire: non autem firmitus ei adhærere: quod omnino aliud est. Idque constat à pari. Nam etsi necessario nos amemus, & Deum tantum liberè, tamen per charitatem, quæ in nobis principatum tenere debet, magis amamus Deum quàm nos. Quare necessitas assensûs qui objecto scientiæ datur, non probat adhæsiionem, quæ non superetur per liberam assensûs fidei firmitatem. Idque magis declaratur, & confirmatur, quia potest voluntas imperare summam appretiationem amoris circa objectum non necessario amabile, idque prudenter, cum Deum non intuitivè cognitum omni alteri bono præferimus, imprudenter autem id potest circa finitum, & creatum bonum, ut si quis felicitatem suam positivè constitueret in creatis bonis. Ergo potest eadem voluntas imperare summam intellectûs adhæsiionem circa aliquid non evidens, idque prudenter, si sit summè credibile. Neque enim minus potest voluntas imperare actus intellectûs, ubi deest evidentia, quàm suos, siquidem utrobique id facit constituendo hominem volentem efficaciter id quod est in potestate ejus: unde illud ipsum facit, quia ut, inquit Aristoteles, *Quod in potestate, &*

*voluntate est, erit.* Est autem summa firmitas in intellectu, quod summa appreciatio in voluntate, maximè ut hîc sumitur, nempe pro vi quæ prævalet omni contrario. Ergo potest voluntas hîc imperare summam firmitatem assensûs.

3. Instabis primò, sicut nulla potentia potest transgredi objectum suum, ita nec ullus actus. Unde quia assensus probabilis habet pro objecto rationabile motivum, seu probabilitatem objecti, non potest se extendere ad id quod est prorsus improbabile. Et quia assensus moraliter certus habet pro objecto evidentiam moralem, non potest esse talis certitudo, ubi deest moralis evidentia. Atqui objectum firmissimi assensûs, est veritatis evidentia simpliciter dicta, Ergo ubi deest talis evidentia, sicut deest circa revelationem, non poterit esse firmissimus assensus: & talis firmitas transcenderet objectum suum, si extenderetur ad id quod est tantùm evidenter credibile.

4. Respondeo evidentiam rei non esse objectum adæquatum firmitatis, sive esse tantùm objectum firmitatis illius quæ consistit in necessitate assensûs, & impossibilitate dissensûs, non autem firmitatis in genere, quia tale objectum est evidentia rei, aut aliquid æquivalens evidentiae quoad imperabilem determinationem

assensus. Et hujusmodi est evidens principium applicatum per propositionem particularem ita evidenter credibilem, ut constet indestructibilem, & ineluctabilem esse illam credibilitatem, & in opposito nihil esse neque esse posse credibilitatis. Tunc enim prudenter poterit imperari summus assensus, & nullum erit temeritatis periculum in illa tanta adhæsione. Hoc autem totum adest & præluceat intellectui ante imperandum fidei assensum. Nam, ut dictum est in probatione assertæ sententiæ, ad imperandum ipsius revelationis assensum hoc proponitur. Locutio facta per opera quæ vires naturæ superant, est ab ente quod sit naturâ superius. Et ad imperandum assensum rerum revelatarum, istud præluceat. Omne quod est à Deo revelatum, est verum. Et hoc utrumque principium ad revelationes quas credit Ecclesia, & ad res revelatas irrefragabiliter applicatur per evidentem credibilitatem miraculorum, in quibus incredibile est nullum fuisse verum. Itémque per prophetiarum adimpletionem, quæ in dubium revocari non potest. Ergo est in objecto fidei aliquid quod evidentiæ scientiarum æquivalet, Imò, ut dixi, prævalet tali evidentiæ, cum quidquid revelationi, aut rebus revelatis opponitur, etiam in speciem tam evidens quam

objecta scientiarum, hoc ipso à sua illa apparente evidèntia excidat, & nequidem exinde credibile sit.

5. Instabis secundò, Minùs potest intellectus circa id quod est tantùm credibile, etsi evidenter, quàm circa id quod est evidens. At circa id quod est evidens, non potest intellectus ponere nisi firmissimum assensum. Ergo non potest talem assensum ponere circa id quod est tantùm evidenter credibile.

6. Respondeo distinguendo majorem, minùs, si non accedat voluntatis actus, quo non modò assensus, sed etiam summa assensus firmitas imperetur, concedo: si accedat talis actus, idque ex honestissimo, & summè rationabili imperandi motivo, nego. Motivum talis imperii est istud. Ens tantum quantum est illud quod per miracula vires naturæ superantia & omni enti creato inimitabilia, loquitur, & per signa infalsificabilia locutionem suam confirmat, exigit ut posita evidenti credibilitate testimonii ejus, eaque ineluctabili, & indestructibili, & cognitali, tam ejus testimonium, quàm rerum ab ipso assertarum veritatem, cum summa imperabili assensus firmitate credamus. Isto principio voluntatem movente, supposita illa ex parte intellectus inexpugnabili credibilitatis evidèntia, nihil æquius



est. Et illud dirigit eam virtutem voluntatis quæ piæ credulitatis affectus appellatur, cujus actus unà cum assensu intellectus, unum moraliter fidei actum, ratione ipsius liberum, & meritorium, constituit.

7. Instabis tertio, voluntatis imperium in intellectum eò tantum se extendit ut determinet ad assensum, aut dissensum, aut dubitationem, aut suspensionem judicii, non autem ut determinet ad qualitatem, seu talitatem assensus. Quod probatur, quia ipsa quoad actus suos libera est tantum quoad contrarietatem, aut contradictionem eorum, non autem quoad alios modos qui ipsis insunt, puta ad intensiorem, aut appretiatiorem majorem, aut minorem, ad quam si esset libera, sequitur dari posse omissionem liberam sine actu, quia quando voluntas remissè ageret, aut cum minori appretiatione, omitteret liberè aliquos gradus intensiorem, aut talem appretiatiorem sine actu. Repugnat autem ex veriore Philosophia, dari omissionem liberam sine omni actu positivo. Itaque voluntas non determinat nisi ad contrarietatem, aut contradictionem suorum actuum, non autem ad talitatem actus: ac proinde ad ejus firmitatem non determinabit.

8. Respondeo negando majorem. Ad

probationem distinguo, libera est tantum ad illam contrarietatem, aut contradictionem, non autem quoad alios modos, & magis specialem eorum qualitatem, si nullum proponatur motivum impellens ad imperandam illam talitatem, appretiationem, aut ardorem, concedo: si tale proponatur motivum, etsi illud motivum non sit motivum ipsius actus, aut talis actus eliciendi, sed tantum motivum imperandi talitatem actus, nego. Sic si alicui proponatur cum indifferentia objectiva motivum divini amoris, nempe bonitas Dei per se amabilis, & nihil aliud menti ejus obversetur impellens ad imperandam generositatem, aut intensiorem amoris, exercebit liberè actum charitatis qui erit certæ intensiōis, proportionatæ ad vim quam habebit sola cognita bonitas, nullâ aliâ ipsi adjunctâ causâ voluntatem magis determinantè. Et actus quidem erit liber, quia posset voluntas non amare, sed intensio non erit libera, quia posito quod voluntas amet, nihil eam movet aliter ad talem intensiōem, quàm movendo ad amorem, unde intensio non erit libera nisi libertate amoris. Si autem manente eadem propositione bonitatis divinæ, veniat ipsi in mentem motivum impellens ad generositatem amoris imperandam, nempe vis meritoria quæ est in tali gene-

rositate amoris, etsi illa non sit motivum amoris divini, sed proprii, poterit imperari amor ardentior, ac generosior, quàm si non adfuisset tale motivum ejusmodi imperii: idque verum erit etsi bonitas non aliter proponatur quàm priùs, nempe ut per se amabilis, non verò ut digna propter quam ulterior, ac generosior amor imperetur. Pari igitur modo quando intellectui proponetur ratio reddens objectum evidenter credibile, si cum ea nullum proponatur motivum imperandi talitatem assensûs, quia de tali motivo nulla erit cogitatio, intellectus, certo modo assentietur merè naturaliter quoad hoc, seu non ex determinatione voluntatis, quia assentietur prout major erit in hac parte apparentia veri: quod etiam contingit suo modo in æstiativa brutorum, putà cùm canis æstimat longiorem semitam in qua non sunt spinæ, esse meliorem breviori, quia spinæ in breviori majorem habent speciem mali, quàm longitudo alterius semitæ. At verò si stante eadem propositione objecti quoad rationem se tenentem ex parte intellectûs, seu manente eadem præcisè credibilitate illius, repræsentetur præterea voluntati esse bonum, ut non modò determinet intellectum ad assensum, sed ut ad talem assensum determinet, tam poterit ad illam

talitatem determinare, quàm ad talitatem suorum actuum, quia, ut dictum est suprâ, eodem modo se habet ad imperandos actus intellectûs, sicut ad suos, in quantum utrobique non imperat aliter quàm constituendo hominem volentem efficaciter id quod est in sua potestate. Quo posito, sequitur, ut suprâ ostensum est, illud fore. Et hoc tantummodò contendo hîc voluntatem posse imperare circa objectum inevidens summam assensûs firmitatem, quia ad hoc assignatur motivum ad talem imperandam judicii adhæSIONem omnium supremum, nempe prædicta Dei dignitas ad summum nostri intellectûs submissionem, atque adhæSIONem suppositâ prædictâ credibilitatis evidentiâ, quâ fit ut cum adsit mera, eâque invincibilis ratio assentiendi, nulla sit dissentendi: siquidem circa evidenter credibile cum non sit ratio prudenter dissentendi (alioquin esset probabile) homini prudenti ad dissensum nulla prorsus esse censetur.

9. Instabis quartò, nihil potest impellere ad firmissimum assensum, nisi ratio ex parte intellectûs tali firmitati proportionata. Ergo frustra assertur pro causa firmitatis quæ inest intellectui, imperium voluntatis.

10. Respondeo distinguendo majorem, nihil nisi ratio ex parte intellectûs tali fir-

mitati proportionata potest impellere ad firmissimum assensum eliciendum, concedo: imperandum, nego: quin potius verum est rationem imperandi assensûs nunquam se tenere ex parte intellectûs ut assentientis, sed ab intellectu ut dirigente proponi voluntati, & esse semper aliquam rationem boni, vel convenientiam, vel honestatem imperii, vel dignitatem, & meritum objecti, quia voluntas non movetur nisi motivo sibi proprio: & non per idem moventur ipsa, & intellectus. Intellectus quidem movetur apparentiâ veritatis: voluntas autem proposita aliqua bonitate, cujusmodi est ipsa bonitas tantæ veritatis, & talis in assensu firmitatis.

11. Respondeo præterea negando minorem, & probationem ejus, quia verè est in evidenti credibilitate suprâ explicata, & applicante ad objectum fidei principia, non modò certissima, sed etiam evidentissima, qualia sunt ista, solum ens naturâ superius potest loqui per opera vires naturæ superantia, & omne à Deo revelatum, est verum, est inquam in tali credibilitate vis motiva intellectûs proportionata causandæ, etsi non sine imperio voluntatis, summæ assensûs firmitati.

12. Obicies secundò, Assensus fidei non est certior judicio credibilitatis. Ergo non est certior omni conclusione naturali.

Antecedens probatur, quia nullus assensus est certior alio à quo pendet. Atqui assensus fidei pendet ab illo iudicio. Ergo non est illo certior, sed ad summum æquè certus.

13. Respondeo primò, iudicium credibilitatis quo proximè dictatur esse credendum, esse supernaturale quia omne iudicium constituens hominem in actu primo paratum ad volitionem honestam, ac meritariam, cuiusmodi est actus voluntatis quo imperatur actus fidei, est ex gratia Christi, ac proinde supernaturale. Unde non sequitur ex paritate certitudinis in isto iudicio cum assensu fidei, ipsum assensum fidei non esse certiozem omni iudicio naturali. Sed quia verè & reipsa istud iudicium cum non sit actus fidei, non habet adhuc certitudinem fidei propriam.

14. Respondeo secundò, assensum fidei non pendere ab illo iudicio ut ab antecedente aut præmissa, sed tanquam à causa & regula impellente & dirigente voluntatem ut imperet firmissimum assensum fidei, ad quod non est necessaria paritas firmitatis sed tantum ut sit iudicium de rationabilitate, convenientia, & obligatione talis firmitatis.

15. Instabis, Revelatio creditur propter motiva credibilitatis ipsam manifestantia, & iudicium de veritate illorum motivorum

est antecedens ad assensum revelationis, & illud nondum est actus fidei. Ergo aliquis actus qui non est fidei, est æquè certus ac assensus fidei.

16. Respondeo iudicium de veritate motivorum quæ non ingreditur revelationem Dei, vel, si sunt aliquid pertinens ad ipsam, nondum tali modo spectantur, illud inquam iudicium esse tantum causam dispositivam ad assensum revelationis, quo ipsa per seipsam ex sua propria ratione differentiali seu ex sua inimitabilitate, & infalsificabilitate cognoscitur modo hætenus explicato. Non requiritur autem in causa dispositiva ad cognitionem ulteriorem, seu in causa quæ intellectui occasionem, & potestatem dat formandæ perfectioris cognitionis ex hypothesi prioris, tanta certitudo ac perfectio, quanta est in ista posteriori cognitione. Sic in conclusione demonstrationis à posteriori non est tanta perfectio, nec etiam tanta certitudo, saltem cum primò cognoscitur ante penitiorē advertentiam, quanta est in præmissis demonstrationis à priori, quarum tamen una est illa ipsa propositio quæ fuerat conclusio, prius quidem ab effectu deducta, postea autem per seipsam ex bene inspecta & penetrata immediatione terminorum cognita, & assumpta ad effectum per causam cognoscendum. Quod si, r. à nobis



non potuisset nisi prior illa minùs perfectà  
notitia intellectum disposuisset ad hanc  
excellentiorem. Dico autem cum aliqua  
quoad modum procedendi paritate, assen-  
sum qui datur motivis vel non pertinen-  
tibus ad constitutionem revelationis in  
ratione signi externi pro interna Dei lo-  
cutione supponentis, vel nondum sub ta-  
li ratione cognitis, esse tantùm causam  
dispositivam ad nobiliorem cognitionem  
quæ habetur de revelatione per seipsam  
cognita. Nam præmissà sufficienti consi-  
deratione circa illa motiva, & expensâ  
talium operum ac signorum supernatura-  
litate, intellectus noster ex imperio vo-  
luntatis ista firmissimè judicat: solum ens  
naturâ superius sic loqui potest. Solum ens  
supremum & infinitum id potest quod om-  
nes entium creatorum vires superat. Ista  
locutio & attestatio superat omnes entium  
creatorum vires. Hoc esse Verbum Dei  
certissimum est. Ante ista nihil tam fir-  
miter quam ista creditur. Et antequam  
sunt isti actus, ad assensum revelationis  
pertinentes, vel antequam fiat unicus actus  
ista complectens, opus fuit attenta con-  
sideratione, & aliquibus minùs firmis  
assensibus ut iis præsuppositis summa ista  
firmitas circa ipsam talem revelationem,  
ut per se alteri à supremo ente impossibi-  
lem imperaretur.

17. Obicies tertio, Actus quo assentior huic propositioni, Christus est homo vel non est homo, est certior assensu quem præbeo huic parti, Christus est homo. Sed primus est naturalis, secundus autem fidei. Ergo datur assensus naturalis certior assensu fidei. Major probatur, quia video absolutè impossibile, esse quin ea disjunctiva sit vera: idque est evidentissimum. Scio autem possibile fuisse ut Christus, seu Messias non esset homo, sed Angelus, cui Deus hypostaticè fuisset unitus; vel etiam ut nullus esset Christus: in quo casu non esset verum Christum esse hominem, cum hoc includat existentiam Christi. Ergo sum certior de illa disjunctiva quàm de hac parte ejus.

18. Respondeo disjunctivam quidem esse certiozem qualibet ejus parte naturaliter spectata sed non altera parte prout est assensus qui Dei revelationem supponit, eique innititur. Nam necessitas veritatis, & impossibilitas falsitatis in eo quod Deus asseruit, petitur ex altiori principio quàm necessitas veritatis in alterutro ex disjunctis, & impossibilitas falsitatis in utroque, petita ex natura oppositionis quæ est inter illa. Et si contra id quod Deus dixit, appareret species evidentiae similis ei quæ reperitur in objectis scientiarum, prævalere deberet illi apparentiæ

Et id sufficit ad præminentiam certitudinis objectivæ supra id quod est de se necessarium. Et tali certitudini objectivæ supervenit in ipso assensu fidei, summa ex rationabilissimo voluntatis imperio, judicii adhæsiō.

19. Objicies quartò, actus fidei non potest esse certior hoc principio naturali. Quidlibet est, vel non est, quia non potest esse actus fidei certior principiis ex quibus pendet. Atqui & veritates fidei omnes, & ipsa ejus principia, nempe quòd solum ens naturâ superius possit loqui per miraculosa opera, quòdque hæc locutio taliter facta sit, pendent ex illo principio, quod est omnium fundamentum. Ergo ejusmodi veritates & principia non certius tenentur à fidei, quàm illud naturale principium.

28 Respondeo distinguendo antecedens, non est certior illo principio sumpto prout est assensus de objecto implicitè saltem revelato, & incluso in aliis veritatibus explicitè revelatis, concedo, quia sic habet totam certitudinem fidei, quæ convenit omni actui ejus, quomocunque objectum talis actûs, sive implicitè, sive explicitè sit revelatum. Non est certior illo principio sumpto prout est cognitio naturalis, nego ob rationem jam allatam: & dico illud principium implicitè esse re-

velatum in quantum Deus, dum unum asserit, dicit implicitè non esse verum contradictorium ejus. Sic dum dicit tres esse personas in Trinitate, dicit implicitè non esse quatuor, neque duas tantum, quia si essent quatuor, aut tantum duæ, non essent tres, aut non essent tres in sensu quem intendit accipiendo ternarium numerum prout excludit & minoritatem infra illum, & majoritatem supra ipsum. Hinc patet multa esse implicitè revelata, quæ non sunt expressè à Deo dicta: & talia non sunt accipienda ut contradistincta à veritatibus fidei, cum sint transcendentia, tum ad ipsas, tum ad luminis naturalis veritates.

---

### SECTIO TERTIA.

*An assensus fidei à revelatione ad rem revelationem sit discursivus.*

1. **N**ON est hîc controversia an omnis actus fidei sit discursivus: Nam non est necesse ut actus quo agnoscitur ipsa revelatio, sit mediatum, & ex anteriore motivo deductus, cum possit ipsa revelatio facta per opera vires naturæ superantia, per se innotescere ut locutio entis quod sit naturâ superius, & ille actus jam erit fidei in quantum aptus est

produci ab habitu fidei, & habebit certitudinem fidei in mediatos assensus refundendam. Quæri ergo tantum potest primò, an dum res revelatæ creduntur propter testimonium Dei, talis assensus habeat rationem discursûs. Secundò an conclusionem ex duabus propositionibus, aut ex una revelata, & altera evidenti sequentem, ipsa fides eliciat. talisque conclusio sit actus fidei. De prima controversia hîc agetur, postea de secunda.

2. Quoad prioris controversiæ resolutionem, notandum est intellectum genericè sumptum, multis modis posse se habere circa objecta. Primò ita ut clarè & uno actu, etiam sine compositione subjecti & prædicati, videat omnia quæ rei insunt, cum omni relatione unionis, causalitatis, ac dependentiæ quam habent inter se. Et sic Deus videt omnia objecta nostrorum discursuum, & Angeli objecta discursuum quos formamus circa naturalia, contenta in sphæra intuitionis eorum: unde circa hæc non discurrunt, cum ad discursum non sufficiat cognoscere unum pendens ab alio, neque etiam unum in alio, cum Deus in suis decretis videat futuritionem rerum decretarum, quæ hoc ipso jam sunt objectivè in mente ejus: sed requiratur compositio multiplex prædicatorum cum subjectis, per quam extrema

trema primò uniantur in tertio , ac deinde inter se : simplex autem intuitus qui est in Angelis circa naturalia talem compositionem excludit. Et nos quoque circa res sensibiles , quæ percipiuntur à sensibus , multa cognoscimus sine discursu , & sine attributione prædicati ad subjectum , per simplicem intuitum. Neque enim , cum quis cubiculum ingreditur , ut intelligat esse in eo parietes , fenestras , mensam , &c. necesse est ut habeat iudicia composita ex subjectis & prædicatis. Nam visionem tum externi tum interni sensûs nobis communem cum brutis , comitatur etiam simplex intuitus intellectûs , neque deest tam nobili potentiæ quod illis inferioribus convenit , sed habet idem suò modo circa illa multò præstantius. Quare compositio mentalis , & discursus est circa ea quæ non ita patent , & circa connexa , & inferibilia ex illis , ut nostra cognitio progrediatur ultra illa de se obvia. Et contingit etiam aliqua intelligi per simplicem actum , in quibus est aliqua causalitas ac dependentiæ unius ab alio , ut cum occurrente in via amne , & ponte , iudicamus transeundam esse supra pontem , non per mediam aquam , & similia , in quibus non est necessaria prædicta attributio aut compositio ulla , & discursus , cum hoc etiam bruta , etsi sine distinctione causæ ,



æstiment simplici actu, utpote incapacia compositionis judicativæ, quæ fit per unionem prædicati cum subiecto, ex qua multiplicata, & ordinata, exurgit discursus. Ad discursum igitur requiritur talis compositio quæ locum habet in iis quæ non sunt ita sensibilia, nec ita de se perceptibilia: unde ad ea penitiùs cognoscenda, & plura de illis attingenda, opus est transitu & progressu ab obviis primò cognitis, ad ea quæ sunt connexa, & per compositionem in tertio consequenter unibilia inter se, atque identificabilia: in quo consistit ratio discursus.

3. Porro hic discursus, & compositio etiam mediata fieri potest duobus modis, primò per plures actus inter se connexos, & ordinatos, ut si dicatur, Omne rationale est risibile. Omnis homo est rationalis. Ergo omnis homo est risibilis: Secundò per unum actum pluribus æquivalentem, ut si dicatur, quia omne rationale est risibile, & omnis homo est rationalis, omnis homo est risibilis: Ibi cum sit unica totalis propositio causalis, est tantum unus actus, sed idem præstans quod tres priores. Prior igitur ille procedendi modus vocatur ab omnibus sine controversia discursus formalis, tum quia per eum fit transitus à compositione extremorum in tertio, ad compositionem eo-



rum inter se : tum quia præterea fit transitus à præviis cognitionibus ad subsequenter distinctam cognitionem. Secundus procedendi modus vocatur communiter discursus virtualis : discursus quidem propter compositionem , & illationem objectivam : virtualis autem , quia cognitiones non sunt in eo multæ nisi virtualiter. Sed verè est discursus formalis , licet ex cognitionibus virtualiter pluribus , quia essentia discursus consistit in hoc quòd , quia duo extrema identificata sunt in tertio , identificentur inter se : & ad hoc accidentale est quòd id fiat per plures actus , aut per unum , cùm utrobique æquè fervetur dictum de omni , in affirmativis , sicut & dictum de nullo , in negativis. Et illud , quæ sunt eadem uni tertio , sunt idem inter se ; sicut & istud. Quæ non sunt idem uni tertio , uno scilicet habente identitatem cum illo , alio non habente , non sunt idem inter se. Ubi autem est formalis illatio , identitatis , aut non identitatis inter extrema secundum illa principia formalia discursus , est formalis discursus. Quare cùm talis illatio facta per unum actum virtualiter multiplicem , vocatur discursus virtualis , hoc ita intelligendum est , ut virtualitas non cadat supra rationem discursus , sed supra distinctionem actuum. Idque confirmatur , quia

si quis alteri dicat, Omne bonum est amandum, Deus est bonus. Ergo est amandus, & alter ille respondeat, ita est, habebit hic tantum unum actum, & tamen cognitio ejus non erit diversa quoad rationem discursus, à cognitione alterius. Quare distinctio actuum ad rationem discursus accidentaria est, & non pertinet ad alium habitum. His positis.

4. Dico, non repugnat fidei discursus formalis quo suum objectum materiale dependenter à suo motivo formali attingat. Hæc assertio videtur esse omnino S. Thomæ 22. q. 1. a. 1. ubi inter Geometriam, & fidem, similitudinem in eo ponit, quod sicut Geometriæ objectum formale est medium quo utitur ad demonstrationem, ita fidei objectum formale sit Dei auctoritas ex qua infert rem revelatam. Est autem hæc sententia plurimorum illustrium Theologorum, contra multos alios item insignes.

5. Probatur, quia in cognoscendis iis quæ per se non patent, nec sensibilia sunt, noster intellectus procedit judicando per attributionem prædicati ad subjectum, & sic uniendo in tertio extrema quæ non sunt primò visa, unde consequenter illa unit inter se. Idque maximè contingit, & necessarium est, si res de se penitus obscura, non potest nobis innotescere, nisi

per locum extrinsecum, seu testimonium alicujus, cujus judico nostrum conformemur. Atqui res fidei non sunt sensibiles, sed abstractæ à sensibus: & cum sint de se penitus obscuræ, putà Trinitatis mysterium, unio hypostatica, &c. non innotescunt nobis nisi per testimonium Dei ipsis rebus extrinsecum. Ergo circa eas necessaria est compositio judiciorum & discursus. Et licet hæc fiant per unum actum, maximè quando sæpè fiunt actus fidei, non desinet in eo reperiri ratio formalis compositionis etiam mediata, in qua sita est formalitas discursûs.

6. Dices, fidei assensus est excellentissima nostri intellectûs operatio, ejûsque supernaturalis perfectio: Ergo non est in ea compositio terminorum, & multò minus discursus, sed simplex intuitus. Quod confirmatur, quia homo est de se capax judiciorum compositionis expertum, ut ostensum est suprâ. Ergo accedente quoad res fidei, supernaturali elevatione sic judicabit.

7. Respondeo negando consequentiam, quia supernaturalitas & excellentia actûs non tollit imperfectiones quæ proveniunt ex conditione objecti à sensibus abstractissimæ, nec per se patentis. Et hinc est obscuritas quam Deus voluit fidei nostræ inesse, ut sic libera esset, ejûsque ho-

norativa & meritoria nostri intellectûs ad ejus auctoritatem adhæſio. Quod ſi ſupernaturalitas, & maxima excellentia obſcuritatem non excludit, multò minùs excludet compositionem, quæ eſt minor imperfectio quàm obſcuritas, ſiquidem compositio in ſcientia quæ præſtat omni naturali obſcuræ cognitioni, reperitur.

8. Dices ſecundò, poteſt intellectus ſpectare veritatem revelatam, ut ſubſtantem revelationi & ab ea affectam. Sic autem eam ſpectans poterit ei uno ſimplici actu ſine tranſitu ab uno objecto ad aliud aſſentiri. Ergo ſic fidei actus circa rem revelatam erit ſine diſcurſu.

9. Reſpondeo ibi eſſe tres, ſive formaliter, ſive virtualiter diſtinctos actus. Primus eſt, Quod Deus dixit, eſt verum. Secundus, Deus hoc dixit. Tertius, Ergo eſt verum. Et iſti omnes fiunt à nobis per compositionem mentalem, attribuendo prædicatum ſubjecto. Eſtque in tertio compositio mediata, ſive unio extremorum, propter præcedentem unionem ipſorum in tertio, quod eſt, eſſe à Deo revelatum. Quod autem id totum fiat per unum realiter actum, vel per plures, hoc eſt extra eſſentiam diſcurſûs, qui non deſinit eſſe formalis, ubi compositio eſt formalis, eſſi actus ſint tantùm virtualiter plures. Eſt autem ibi neceſſaria compoſi-

tio propter abstractionem, & inevidentiam extremorum, & debet illa esse mediata quoad unionem extremorum inter se, quia extrema illa non sunt immediatè à nobis unibilia, putà, Deus est Trinus, & similia quæ per solam revelationem nobis innotescunt. Et licet aliunde innotescerent, essentque evidenter connexa, ut ista, Deus est, non est nobis evidens illorum unio in hoc quòd ipsa sit revelata. Sic autem debent repræsentari intellectui nostro ad actum fidei. Itaque progressus circa inevidens objectum fidei, prout est objectum fidei, facit necessitatem compositionis formalis, quæ sufficit ad formalem discursum.

---

## SECTIO QUARTA.

*Solvuntur alia objectiones.*

1. **P**Ræter jam solutas instantias, obijciens primò, omnis discursus nititur identitate objecti præmissarum cum objecto conclusionis. Fides autem non nititur tali identitate, sed solo testimonio Dei summè veracis. Ergo nullus actus fidei est discursivus.

2. Respondeo negando minorem quæ malè probatur, involvendo implicitè, ac supponendo falsum, nempe quòd non



possit idem discursus niti identitate objecti præmissarum, & revelatione Dei. Contrarium enim patet in hoc syllogismo. Omne dictum à Deo summè veraci, est verum. Mysterium Trinitatis est dictum à Deo summè veraci. Ergo illud est verum, ibi enim conclusionis assensus nititur identitate objecti præmissarum cum objecto conclusionis, quia duo extrema uniuntur huic termino, dictum à Deo summè veraci, quæ unio est objectum præmissarum & simul nititur auctoritate Dei, quia ipsa est formale significatum quod importatur per hoc concretum, dictum à Deo summè veraci. Ergo falsa est, & malè probata minor illius syllogismi.

3. Respondeo præterea, si quid valeret objectionis argumentum, illud vim habiturum contra fidei actum virtualiter tantum, ut volunt adversarii, discursivum. Nam discursus ille quem virtualem vocant, habet idem motivum ac discursus factus per actus distinctos. Et pari modo solvi possunt multæ aliæ objectiones, retorquendo illas in discursum uno actu factum. Æquè enim illum impugnant, ac compositum ex distinctis actibus.

4. Obicies secundo, Omnis discursus nititur bonitate consequentiæ. Sed fidei assensus non nititur bonitate consequentiæ, quia nititur sola Dei auctoritate: Et,

si illa bonitate niteretur; non esset actus virtutis Theologicæ. Ergo nullus actus fidei habet rationem discursûs.

5. Respondeo negando maiorem, quæ vera est tantum de syllogismo qui sit artificialis, etiam in actu signato. Fundatur enim absolutè discursus, si syllogismo simplici continetur, in identitate objecti præmissarum cum objecto conclusionis, & connexionione existente inter res aut rationes significatas per illa extrema, & rem aut rationem significatam per medium terminum. Sic in isto syllogismo. Omne rationale est risibile, Omnis homo est rationalis. Ergo omnis homo est risibilis; discursus fundatur in identitate hominis & risibilis cum rationali: quæ identitas asserta est in præmissis. Item fundatur in connexionione formali quam necessario & indissolubiliter habent humanitas & risibilitas cum rationalitate. Si syllogismi sunt compositi, discursus fundatur in prædictis, aut æquivalentibus principiis. Neque ullo modo ad concludendum aliquid ex præcognitis præmissis, necesse est cogitare de bonitate formæ, seu de dispositione syllogistica terminorum: quod sit vel post ipsum factum discursum, per actum reflexum, vel post syllogismum apprehensivum, ut illa cognita bonitas sit accidentarium motivum ad assentiendum conclusioni sic sequenti,



312 *De Ente Supernaturali*,  
ipsique totaliter sumpto syllogismo.

6. Confirmatur, quia ad judicandum scientificè de aliquo effectù, satis est cognoscere causam illius per compositionem & attributionem terminorum, & ipsum inde inferre, seclusa omniarte Logica, omniq[ue] cogitatione de ipsis actibus intellectûs, eorûmq[ue] rectitudine.

7. Objicies tertio, Assensus revelationis non potest non esse assensus rei revelatæ, quia assensus revelationis repræsentat rem revelatam, ut cum ipsa infallibili revelatione connexam. Ergo sine discursu erit ille assensus qui est actus fidei.

8. Respondeo negando antecedens, quia assensus revelationis est tantum causaliter assensus rei revelatæ. Unde ad probationem dico, repræsentare connexionem revelationis cum ipsa re revelata ( quod solum fit per utrumque simul sumptum principium fidei ) nihil aliud esse nisi repræsentare id unde bene sequitur veritas rei revelatæ.

9. Talis autem assensus non est formaliter assensus rei revelatæ, sed radicaliter, eo modo quo omnis præmissarum assensus est radicaliter & virtualiter assensus conclusionis. Quod si valeret objectio, tolleretur omnis discursus à scientiis, quia tolleretur transitus à præmissis ad conclusionem, siquidem jam in præmissis esset formaliter

assensus conclusionis, & fides humana procedens à testimonio hominis fide digni, non esset discursiva ob paritatem rationis.

10. Objicies quartò, Eiusdem est rationis fides nostra cum fide quam habuerunt Angeli viatores. Sed fides Angelorum non fuit discursiva, quia ipsi non discurrunt. Ergo nec nostra est discursiva.

11. Respondeo primò, Angelos discurrere circa res ipsis obscuras, futuras, supernaturales, ac denique circa ea omnia quæ non vident intuitivè. Non vident autem intuitivè nisi res naturales creatas, ipsis ad certum spatium præsentibus. Et hinc patet eos posse discurrere, & egere discursu circa objecta fidei.

12. Respondeo secundò, distinguendo maiorem, eiusdem rationis quoad obscuritatem ipsi propriam, id est quoad inevitabilitatem revelationis, & rei revelatæ ut sic, item quoad certitudinem maiorem omni certitudine naturali, quoad supernaturalitatem, & libertatem petitam ab imperio voluntatis, concedo: quoad ea quæ in actum fidei proveniunt ex subiecto, seu principio naturali, in quo est habitus fidei, nego. Nam actus fidei nostræ non est actus Angelicus, neque habet differentiam actûs Angelici propriam. Unde si Angelus non esset capax discursûs, omnis fidei actus

in illo esset immediatus assensus, non tamen in nobis, quia in illo immediationis necessitas non proveniret ex fide ut sic, sed ex subiecto fidei. Unde in nobis qui circa inevidentia inferimus per discursum, id quod cum motivo nostri assensus connexionem habet, fides non desineret esse discursiva.

13. Objicies quinto, Si fides esset formaliter discursiva, ipsa non distingueretur à Theologia, quia ab eodem objecto formali & motivo, eodem modo procederet ad illationem eorum quæ cum illo connexionem habent, ac dependentiam in ratione cognoscibilium.

14. Respondeo negando sequelam. Ad probationem dico, Theologiam, etsi discurrat ex revelatione, non discurrere ex ea credendo eam tanto assensu, ex pia determinatione voluntatis, sed discurrere ex ea vel iudicata ob motiva se tenentia tantum ex parte intellectus, vel supposita ex fide, per quam ostendit illam rationaliter cum summa assensus firmitate, ac certitudine credi. Et sic est fidei rectè subordinata. Adde quòd Theologia discurret etiam ex veritatibus, revelatis ad quævis alia inde inferibilia, cum fides ex sola revelatione Dei summè veracis, ad solas veritates revelatas procedat.

13. Objicies sextò, si fides est forma-

liter discursiva, non omnes fidei actus erunt æqualis certitudinis, quia in discursu certiores sunt præmissæ, quàm conclusio. Itaque firmiùs credetur revelatio quàm res revelata.

16. Respondeo primò, si decrementum illud certitudinis admittatur necessarium in discursu formali, idem quoque eventurum necessariò in virtuali, quia in eo assensus objecti materialis tam dependet ab assensu motivi, sen à motivo ut iudicato, quàm in discursu formali composito ex distinctis actibus.

17. Respondeo secundò, negando consequentiam. Ad probationem, dico posse tam certam esse conclusionem quàm præmissas duobus modis. Primus, qui ad rem præsentem non spectat, est quando certitudo præmissarum necessaria est ob evidentiam ut in scientiis, & nihil impedit ne tota communicetur conclusioni, quia nimirum nulla est obscuritas circa consequentiam, & modum inferendi. Sic in ista demonstratione, Omne rationale est risibile. Omnis homo est rationalis. Ergo omnis homo est risibilis, tam certa est conclusio, quàm præmissæ: & tantùm verum est præmissas esse priùs naturâ certas, quia nihil est modificans vim præmissarum, aut impediens ne parem sibi effectum causent. Secundus modus, qui ad rem facit, est



quando libera existente certitudine unius saltem ex præmissis, & libero pro utraque gradu adhesionis, seu firmitatis imperatæ, quæ hîc potissimum attenditur, & omnem naturalem transcendit, non minor est causa imperandi tam firmum conclusionis assensum, quàm fuit pro præmissis, & nulla aliunde occurrit obscuritas circa necessitatem consequentiæ. Quod totum hîc contingit. Nam primò dignitas quam Deus habet ut ipsi credatur, tam se extendit ad hoc ut credamus verum esse quod dicit, quàm ut credamus ipsum dicere, cùm præfertim ideo exigat ut credamus ipsum dicere, quia vult ut credamus verum esse quod dicit. Deinde in discursu qui fit à motivo fidei, seu à revelatione Dei ad rem revelatam, nulla est obscuritas quoad consequentiam. Nam iste syllogismus, Omne quod Deus summè verax dixit, est verum. Sed Deus summè verax dixit, omne quod Ecclesia credendum proponit: Ergo omne quod Ecclesia credendum proponit, est verum: Iste, inquam, syllogismus tam clarus est quoad formam, quàm supradicta, aut quævis alia demonstratio. Igitur par erit certitudo in conclusione discursûs fidei, ac in præmissis illius discursûs.

18. Aliter ad objectionem respondet de Lugo disp. 7. de fide sect. 2. æqualitatem certitudinis in fide non intelligendam

esse de objectis materialibus comparatis cum objecto formali, quia juxta ejus doctrinam intellectus firmitus assentitur præmissis, quàm conclusioni, sed de objectis materialibus inter se comparatis. Illam autem majorem certitudinem ponit in hoc quòd si denegandum esset alteri objecto, aut formali aut materiali, assensus, denegaretur potiùs materiali, quàm formali, seu negaretur potiùs veritas revelata, quàm Dei auctoritas.

19 Refellitur hæc responsio, quia frustra conceditur major illa certitudo præmissarum, quàm conclusionis, etiam ut substantis præmissis. Etsi enim non ita implicet aliquid quod est à Deo revelatum, esse falsum, sicut Deum non esse veracem; tamen ex hypothese quòd Deus illud revelaverit, quo modo consideratur, dum illud ex Dei revelatione infertur, tam implicat illud esse falsum, quàm Deum non esse veracem, quia si in hac hypothese esset falsum, Deus non esset verax. Quare in re conclusa, ut substante tali illationi, tanta est implicantia falsitatis, quanta in præmissis. Præterea nulla est causa cur præmissæ formales non transfundant totam suam certitudinem in conclusionem, quando nulla est causa modificans vim earum, neque ulla obscuritas quoad consequentiam, & modum inferendi: quod hîc con-

tingere ostensum est. Et licet id non esset absolutè verum de certitudine quæ petitur præcisè ex propositione objecti, quam spectat intellectus, verum esset de imperata, quæ petitur ex determinatione voluntatis, præsupposita evidenti credibilitate ex parte intellectûs. Nam tam potest voluntas imperare firmissimum conclusionis clarè sequentis ex præmissis assensum, quàm imperare firmitatem judicii circa præmissas non evidentes: tam, inquam, id potest, tamquæ prudenter, si semper par est causa imperandi ejusmodi firmitatem. Atqui in proposita fidei materia voluntas imperat firmissimum assensum circa principia fidei, & circa ipsam revelationem, cùm illi assensui non præsupponatur ex parte intellectûs nisi evidens credibilitas ipsius revelationis absolutè inevidentis, & causa imperandi est quia revelationis dignitas id postulat ut, supposita evidenti credibilitate sui, firmissimus ei detur assensus. Jam autem evidens illa credibilitas se quoque extendit ad veritatem rerum revelatarum ut sic, imò naturaliter evidens est esse veras ex hypothese quod sint revelatæ: & tam Dei, & revelationis dignitas postulat ut res quæ revelationi subest, credatur existere, quàm ipsa facta revelatio. Igitur tam potest, & debet imperari summa firmitas in assensu conclusionis, quàm in assensu præmissa-



rum, seu principiorum fidei.

20. Objicies septimò, si fides est discursiva, non firmitus assentietur conclusioni quàm connexioni ejus cum præmissis: quæ connexio indicatur per particulam, Ergo. Atqui certitudo quæ habetur de hac connexionione est tantum naturalis. Unde certitudo conclusionis non erit major.

21. Ad hoc solvendum, Adverte primò, duplicem posse spectari certitudinem circa conclusionem alicujus discursus. Una est quæ petitur ex habitudine necessaria quæ cognoscitur inter objectum præmissarum, & objectum conclusionis, ita ut intellectus judicet fieri non posse ut illo existente, hoc non sit. Altera est quæ petitur ex cognita dispositione terminorum secundum leges formæ syllogisticæ putà leges primæ figuræ, in modo, Barbara, & sic de aliis. Et hæc certitudo est tantum signum prioris.

22. Adverte secundò, non esse opus ad illationem conclusionis, ut habeatur hæc secunda certitudo, quia sufficit prima, & hæc secunda non habetur nisi cum quis per actum reflexum supra modum discurrendi, judicat illum esse bonum, & conformem præceptis logicis. Quod ita verum est, ut etiam scientia non indigeat hac secunda certitudine. Satis enim ad illam est, si quis cognoscat effectum necessarium qui est objectum conclusionis, per causam necessa-

riam, quæ est objectum præmissarum: & scientia nihil ultra includit in sua definitione atque essentia. Itaque ille erit sciens, qui audito hoc syllogismo, Omne rationale est risibile. Omnis homo est rationalis. Ergo omnis homo est risibilis, hoc inquam audito bene percipiet objectum præmissarum, & objectum conclusionis, & causalitatem quæ est inter rationalitatem & risibilitatem: cum quo stat quòd nihil cogitet, neque etiam unquam audierit de prima figura, & primo modo syllogismorum ejus. His positis.

23. Respondeo ad objectionem distinguendo majorem, non firmitus assentietur conclusioni quàm connexioni quæ petitur ex habitudine objecti ejus, seu rei revelatæ ad objectum præmissarum, seu ad revelationem, concedo: quia idem est judicium quo credens assentitur conclusioni sui discursus, & illi connexioni, siquidem non assentitur conclusioni illi præcisè ut propositio est, sed ut conclusio, cujus veritas pendet ex præmissis objectivè sumptis. Non firmitus assentietur quàm connexioni quæ petitur ex considerata per actum reflexum bonitate formæ, & recta dispositione terminorum, nego. Quia ista certitudo est tantum naturalis: conclusionis autem certitudo est major omni naturali, cum assensus illius conclusionis sit actus

fidei ex supradictis. Porro hoc non minuit certitudinem fidei, quòd certitudo quæ habetur de bonitate formæ, non sit nisi naturalis, quia hæc ad assensum fidei nullo modo necessaria est, & se habet ad illam contingenter, sicut & ipsa cognitio reflexa supra discursum credentis: & non repugnat aliquid quod fidem contingenter comitatur, & à quo ipsa nullo modo pendet, non habere perfectionem neque certitudinem ejus.

24. Objicies octavò, si aliquis assensus fidei per discursum elicitur, non habebit revelationem pro objecto intrinseco, sed tantum pro objecto extrinseco: quia ille assensus non attinget revelationem sed tantum supponet eam in præmissis cognitam. Consequens non potest admitti, quia hoc non est actus fidei. Ergo.

25. Respondeo assensum fidei habere præmissas pro objecto quod sit rei conclusæ extrinsecum, sed quod attingere proprium, & intrinsecum sit tali assensui: quia assensus conclusionis, prout conclusio est, fertur indirectè in præmissas, inquantum judicat conclusionem non absolute & sine respectu ad præmissarum objectum, sed propter illud, quod indicatur per particulam, Ergo. Unde cum post istas præmissas, quæ sunt principia fidei, Omne quod Deus summe verax dixit, est

verum, sed Deus summè verax dixit Verbum esse incarnatum, infertur, Ergo Verbum esse incarnatum est verum, idem est ac si diceretur, propter igitur illud infallibile Dei summè veracis testimonium judico Verbum esse incarnatum.

26. Objicies nonò, si quis fidei assensus per discursum elicitur, non erit liber, ac proinde nec meritorius. Falsum consequens. Ergo & antecedens. Sequela probatur, quia positis præmissis, assensus ille necessariò sequetur, nec poterit impediri à voluntate.

27. Respondeo distinguendo majorem. Non erit liber per se præcisè, ac solitariè sumptus; concedo: consequenter ad libertatem assensus qui dabitur præmissis, seu principiis fidei à quibus pendebit, nego. Et dico satis esse ad meritum si actus quomodocunque, sive proximè, sive remotè sit liber, quia id quod ex parte libertatis requiritur ad meritum, est ut actus sit imputabilis agenti. Est autem imputabilis hoc ipso quòd quomodocunque, sive proximè, sive remotè est liber. Ergo per hoc ipsum, si de se est bonus, habet suæ bonitatis imputabilitatem in qua consistit ratio meriti. Confirmatur quia actus charitatis imperatus non est proximè liber quia supposito illo imperio, non potest non poni, & tamen est meritorius, etiàmque justificati-

vus , etiam in illa hypothefi , ut contingit in eo qui ex defiderio salutis imperat fibi actum charitatis , aut contritionis.

28. Refpondeo præterea fidei libertatem , & meritum maximè verfari circa affenfum revelationis , quo pofito , non eft difficultas nova in affenfu rei revelatæ , fed eadem magis extenditur. Quare abfolutè libertas , & meritum fidei debet fpectari circa totum ejus difcurfum ut imperatum à voluntate , quæ determinat intellectum ad duo objectivè honefta , primum eft affentiri revelationi Dei , fuppoſita evidenti credibilitate ejus : ſecundum eft affentiri conſequenter rei revelatæ , quia ſubeft revelationi : Et licet non poſſit determinare ad unum quin determinet ad aliud , libera tamen eft totalis determinatio , à qua tota poſſet abſtinere : Et ſic in ea tota volenda eft meritum : ſicut etſi non poſſit aliquis diligere Deum ſuper omnia abſque eo quod velit ſervare aliquod præceptum , quod hîc & nunc urget , id non impedit ne illa quoque voluntas ſervandi tale præceptum , ſit meritoria , quia ab ea poſſet abſtinere , abſtinendo etiam ab actu quo Deum ſuper omnia diligit.



## SECTIO QUINTA.

*An ratio formalis fidei se extendat ad conclusionem quæ sequitur ex duabus revelatis, aut ex una revelata, & altera evidenti.*

I. **N**Otandum primò, nihil fide credi posse, nisi sit saltem implicitè, aut virtualiter revelatum, quia nihil potest terminare assensum proprium alicujus habitûs, nisi subsit rationi motivæ ac formali, quæ est illius habitûs propria, & distinctiva. Auctoritas autem Dei, quæ revelationem complectitur, est ratio motiva propria, & specificativa fidei. Ergo cui non convenit esse revelatum à Deo, non convenit esse credibile fide divina. Sic quod non habet causam sui necessariam, non est judicabile per actum scientiæ. Et hinc implicat dari scientiam de futuris contingentibus, sumptis prout in causis contingentibus continentur. Pari igitur modo de fide sentiendum est, nempe, quod neque confusè & implicitè, neque virtualiter est revelatum, fide divina credi non posse. Illud est confusè & implicitè revelatum, quod formaliter continetur in revelatis explicitè, ut contingit primò quando revelatio est propositio universalis,

cujus subjectum sumitur distributivè, & resolutibile est in omnia singularia quæ formaliter, licet implicite continet. Sic in ista universali revelatione, Omnes Apostoli receperunt Spiritum sanctum; continetur hæc, Petrus recepit Spiritum sanctum. Secundò, quando fit revelatio definiti, in quo continetur formaliter definitio, illiusque partes, sed confusè, & minus clarè. Sic dum revelatum est formaliter & explicitè, Christum esse hominem, revelatum est etiam formaliter, sed implicitè, Christum esse animal, vivens, substantiam, item constare corpore & animâ, & similia. Illud est virtualiter revelatum, quod in revelatis explicitè, non continetur formaliter, sed virtute tantum, ut risibilitas in homine, & omnes proprietates necessariae & convertibiles, in naturâ cujus sunt proprietates. Sic dum revelatum est, Christum esse hominem, revelatum est virtualiter ipsum habere voluntatem creatam, quæ est idem realiter cum anima hominis, aut saltem ei necessariò connexa est, ita-ut qui dicit esse hominem, moraliter & æquivalenter dicat, habere voluntatem humanam.

2. Notandum est secundò, revelationem, sive confusam, sive virtualement, ut saltem necessaria est ad hoc ut aliquid sit de fide, ita & ad istud sufficere. Ac primò



quidem, quòd revelatio confusè, & implicitè aliquid continens sufficiat, clarum est, quia quod Deus formaliter dicit, id fide credi potest. Quod autem in revelatione universalì implicitè continetur, id Deus formaliter dicit. Nam qui affirmat aliquid de omnibus, id dicit de singulis, & qui de aliquo affirmat totum quodpiam, affirmat quoque de eodem partes illius totius. Quare quod sic est revelatum, hoc fide credi potest. Quod autem etiam virtualis revelatio sufficiat, probatur, quia quando duo ita se habent ut realiter non distinguantur, & unum virtute contineatur in alio, idque indivisibiliter & inseparabiliter, ut risibile in rationali, qui dicit unum, dicit æquivalenter, & moraliter aliud. Addo, etsi illa non sint idem realiter, sed tantùm ita connexa ut uno intellecto, aliud quoque ut connexum moraliter intelligatur, etiam qui dicit unum, dicere moraliter aliud. Sic qui dicit aliquem esse dominum alterius, dicit moraliter & æquivalenter, illum esse servum, etsi dominium identificetur domino, & terminetur non ad servitutem, sed ad fundamentum ejus, cujusmodi est esse emptum, vel in justo bello captum, vel ex servis parentibus natum, aut quid simile. Hoc autem posito, poterit fide credi quod sic virtualiter & moraliter est assertum, quia ad fi-

dei

dei assensum sufficit si aliquid credatur eo quòd quomocunque sit dictum ab aliquo, & dicentis auctoritas sit immediatum, & formale motivum assensûs : quod hîc continget, dum revelatio virtualis in morali acceptione sumetur pro formali.

3. Confirmatur primò, quia aliqui Deo dicente se esse omnium creatorem ac dominum, ille non peccaret directè contra fidem, qui negaret se esse Dei creaturam & subditum, quod consequens est absurdum.

4. Confirmatur secundò, quia qui negat rem virtualiter revelatam, lædit formaliter auctoritatem dicentis, si constet evidenter rem revelatam virtute contineri in re quæ expressè revelata est, aut necessariò ipsâ intellectâ intelligatur, ita ut moraliter idem sit dicere unum, & dicere aliud. Quod si dissensus rei sic assertæ lædit formaliter, & immediatè auctoritatem dicentis, ergo assensus illam auctoritatem per se formaliter honorat, illâque ut proprio motivo nititur : unde est fidei actus.

5. Confirmatur tertiò, quia multa ab Ecclesia sunt definita, ut fidei dogmata, quæ tantum sunt virtualiter revelata, ut Patrem realiter distingui à Filio, Filium non esse creaturam, in Christo esse duas voluntates, Christi sanguinem, & animam esse sub speciebus panis per concomitantiam & similia.

6. Neque dicas formalem horum revelationem à Deo factam Ecclesiæ, per traditionem constituisse. Nam Patres in Conciliis ista definierunt attendendo scripturas, & agnoverunt id in illis contineri. Sic in Concilio Tridentino totius Christi præsentia in Eucharistia, probata est per illa verba: Hoc est corpus meum.

7. Notandum tertio est, ad hoc ut assensus alicujus conclusionis sit fidei actus, non esse satis si illa conclusio aliunde sit de fide, aut fide credi possit, sed necessarium esse ut illa conclusio pendeat, & sit deducta ex ipso fidei motivo, ipsaque Dei auctoritas, seu revelatio Dei summè veracis, constituat medium terminum in discursu per quem infertur. Quod probatur à pari. Nam ut conclusio aliqua quæ sciri potest, & habet causam sui necessariam in natura, & essentia subjecti, sit actus scientiæ, non est satis quod illa sciri possit, & habeat talem causam, sed requiritur ut syllogismi per quem infertur, medius terminus sit illa causa, à qua in subjecto oritur proprietas quæ de eo in tali conclusione prædicatur. His positis.

8. Dico primò conclusio ex duabus revelatis non est hoc ipso, seu vi illius discursus, assensus fidei, ipsa tamen aliter credi potest, quatenus revelata est. Prima pars est communis doctrina Theologorum; & qui

citantur in oppositum, Canus lib. 6. de locis. Vega lib. 9. in Tridentinum c. 39. Catharinus opusc. de certitudine gratiæ, & alii reipsa non sunt contrarii. Nam solum docent propositiones deductas ex duabus revelatis, pertinere ad fidem eo quod credi possint, cum quo stat quod non credantur illo actu, nec vi illius discursus, sed aliter, ut ex ipsa sui revelatione illata.

9. Probatur illa prima pars assertionis, quia omnis mediatu fidei actus debet habere pro objecto formali immediato Dei auctoritatem, ita-ut eâ formaliter nitatur, non autem tantum eam præsupponat. Atqui conclusio illa, ut deducta ex revelatis, non habet pro motivo immediato Dei auctoritatem, sed præmissas ipsas revelatas, quæ aptæ quidem sunt inferri ex Dei auctoritate; sed non sunt ipsa Dei auctoritas. Ergo. Major constat ex notabili tertio, & confirmatur, quia universim loquendo, actus qui supponunt, non autem per se attingunt, id quod est objectum formale motivum alicujus habitus, non eliciuntur ab illo habitu: alioquin opinio quæ supposito aliquo principio scientifico discurrit ex aliquo medio probabili, quod proximè intuetur, esset actus scientiæ: & omnes ratiocinationes etiam in immensum excurrentes, quæ fundarentur remotè in prin-

cipio aliquo fide credito, essent actus fidei, idque tam in humana fide, quàm in divina, quod est absurdum.

10. Secundam assertionis partem tradunt Canus & Vega locis citatis. Vasquez 1. parte disp. 5. c. 3. Becanus de fide cap. 11. q. 5. de Lugo disp. 1. sect. 13. §. 2. Hurtadus disp. 10. sect. 1. §. 2. Ubi affert Scotum, Ochamum, Aureolum, & alios. Probatum autem, quia illud fidei credi potest, quod est sive formaliter, sive virtualiter revelatum. Atqui omnis conclusio deducta ex duabus revelatis est sive formaliter, sive virtualiter revelata. Ergo. Major constat ex secundo notabili. Minor probatur, quia universim loquendo, omnis conclusio virtualiter saltem continetur in præmissis, & qui dicit præmissas, virtualiter illam dicit. Ac primò quidem, si syllogismus ex quo illa conclusio sequitur, est simplex, sive in una ex tribus figuris, constans solis tribus terminis, & fundatas in illo principio, Quæ sunt eadem uni tertio, sunt idem inter se, objectum conclusionis, & objectum præmissarum est idem. Unde qui dicit unum, dicit aliud, saltem in sensu reali, si verò syllogismus est compositus, idest constans ex propositionibus compositis, ut sunt hypothetici, disjunctivi, copulativi, etsi non sit expressa identitas inter conclusio-

nem, quæ forte erit affirmativa, & præmissas, quarum aliqua erit negativa, tamen objectum præmissarum adæquatè sumptum, & objectum conclusionis erunt ejusmodi, ut qui unum dicit, moraliter dicat aliud, eo quod unum æquivaleat alteri. Sic in hoc syllogismo copulativo. *Nemo est qui reliquerit domum, aut parentes, aut fratres propter regnum Dei & non recipiat multò plura in hoc tempore, & in seculo futuro vitam æternam* : quæ sunt Verba Christi Luc 18. 19. Sed Petrus reliquit domum, &c. Ergo recipiet, &c. qui dicit præmissas, moraliter dicit conclusionem, etsi conclusio non sit expressè idem cum præmissis, quæ non sunt ambæ propositiones simplices. Nam major æquivalet huic. Non simul homo & relinquit omnia propter regnum Dei, & non accipit plura in hac vita, & felicitatem in alia. Verùm absolutè totus sensus illius syllogismi, non est alius à sensu istius, *Omnis qui reliquerit domum, &c. centuplum accipiet, & vitam æternam possidebit* : quæ sunt verba ejusdem Christi. Matth. 19. sed Petrus reliquit, &c. Ergo.

II. Dico secundò, non modò illatio conclusionis ex una revelata & altera evidenti, non est actus fidei, sed nec omnis talis conclusio, etiam aliter fide credi potest. Ita Gregorius, Major, Caietanus, Suarez contra Scotum, Vasquem & alios.

Prima pars sequitur à fortiori ex prima parte præcedentis assertionis. Nam si nequidem conclusio deducta ex duabus revelatis est hoc ipso, & vi talis discursus assensus fidei, multò potiori jure negatur deductam ex una revelata, & altera tantùm naturaliter cognita, esse hoc ipso actum fidei: siquidem hic discursus quoad unam ex præmissis, quæ est inferioris ordinis, deficit à qualitate, & nobilitate alterius. Et huc recurrit ratio illa à priori quod omnis assensus fidei circa objecta revelata debeat habere revelationem ipsam pro motivo immediato & medio termino proximo: quod hîc non contingit.

12. Secunda pars probatur, quia ut aliqua propositio fidè credi possit, oportet eam esse sive implicitè, sive virtualiter revelatam, ut constat ex primo Notabili. Atqui non omnis propositio quæ sequitur ex una revelata & altera evidenti, est sive implicitè, sive virtualiter revelata, quia non omnis qui unam dicit ex præmissis, dicit semper aut implicitè, aut virtualiter, & moraliter conclusionem. Ergo non omnis propositio sequens ex una revelata, & altera evidenti fide credi potest.

13. Dico tertio, Conclusio sequens ex una revelata & altera evidenti, etsi non possit credi per actum fidei, reductivè tamen ad fidem pertinet, hoc sensu quòd ita



connexa sit cum objectis fidei, ut ejus negatio repugnet illis consequenter, sitque peccatum contra fidem.

14. Probatur, quia hæc saltem evincunt adversariorum argumenta sectione sequenti referenda, in quibus solvendis hoc tantum defenditur quod conclusio ejusmodi, cum non subsit objecto formali fidei, seu revelationi Dei, non possit judicari per actum fidei: cum quo stat quod habeat prædictam connexionem, & credens non possit in sensu composito fidei suæ circa præmissam ex qua sequitur talis conclusio, ipsam negare. Nam si quis, Verbi gratiâ, credat fide divina istam propositionem quæ verè est revelata, Ecclesia in decidendis iis quæ spectant ad Religionem & mores, errare non potest, is cum audiet istum syllogismum; si Ecclesia est infallibilis quoad decisionem eorum quæ spectant ad Religionem & mores, iste homo, putà sanctus Ludovicus, quem beatum & colendum definivit, reipsa est talis. Atqui Ecclesia est infallibilis quoad illorum decisionem. Ergo iste homo est beatus & colendus. Cum, inquam, audiet talem syllogismum, si velit negare conclusionem, debet negare ex præmissis eam quam negare potest, siquidem clara est bonitas formæ, & quoad eam nullum potest occurrere dubium. Non potest autem negare

ita ut si talis sese offerat apparentia, ei resistatur, & sic debemus firmitus credere eum qui ab Ecclesia declaratus est sanctus, esse colendum, quàm omnem hominem esse risibilem, firmitus, inquam, firmitate proveniente ex determinatione voluntatis, sicut ostensum est de firmitate fidei, quod hîc proportionatè ad connexionem cum ipsis rebus fidei, intelligendum est, ita ut quò objecta sunt propiora iis quæ revelata sunt, eò firmitior impèretur eorum assensus.

## SECTIO SEXTA.

### *Solvuntur objectiones.*

1. **O**bjicies primò, Omnis assensus qui in Dei auctoritatem resolvitur, est actus fidei. At talis est qui nititur præmissis revelatis, cùm illæ credantur propter Dei auctoritatem. Ergo ille est actus fidei. Confirmatur quia fides humana est discursiva à re dicta ad aliam, & sufficit ad rationem fidei in secunda illatione, quòd remotè pendeat à testimonio dicentis.

2. Respondeo negando majorem, quia ad assensum fidei requiritur ut Dei auctoritas sit proximum motivum assentiendi. Quòd si ulterius à re propter Dei auctori-

in Deum prout omni discursu, qui supposita propositione fidei, ipsâque fide, humanæ rationi possibilis est, cognoscibilem. Unde & per revelationem in eum tendit, sed ut probatam & judicatam humano modo, & habentem certitudinem suam ex fide, quam ipsa Theologia supponit. Neque enim Theologiæ est voluntatem inclinare efficienter ut determinet intellectum ad summam, quæ circa revelationem imperari possit, assensûs firmitatem, sed hac supposita certitudine, ipsa humanum de illa iudicium formans, ulteriùs progreditur, & simul principiis naturalibus utitur, ut fidei adjungat quidquid de Deo & divinis assequi potest.

3. Objicies tertio, *Habitus charitatis* extendit se ad omne objectum materiale quod dependenter à suo objecto formali cognoscitur amabile, sive mediâtè sive immediâtè. Hinc si propter Deum vult aliquis proximo sanitatem, ad quam eligit medicinam, quam illi dat, hæc omnia charitas amat. Ergo & habitus fidei inclinabit ad omnia quæ consequenter ad motivum ejus credibilia erunt, sive proximè & immediâtè illi subsint, sive mediantibus aliis motivis inferioribus.

6. Respondeo negando consequentiam. Disparitas est quia intentio per se inclinatur ad ea quæ sunt ad ejus objectum formale

6. Neque dicas formalem horum revelationem à Deo factam Ecclesiæ , per traditionem constituisse. Nam Patres in Conciliis ista definierunt attendendo scripturas, & agnoverunt id in illis contineri. Sic in Concilio Tridentino totius Christi præsentia in Eucharistia , probata est per illa verba : Hoc est corpus meum.

7. Notandum tertio est , ad hoc ut assensus alicujus conclusionis sit fidei actus, non esse satis si illa conclusio aliunde sit de fide , aut fide credi possit, sed necessarium esse ut illa conclusio pendeat, & sit deducta ex ipso fidei motivo , ipsaque Dei auctoritas, seu revelatio Dei summè veracis, constituat medium terminum in discursu per quem infertur. Quod probatur à pari. Nam ut conclusio aliqua quæ sciri potest, & habet causam sui necessariam in natura, & essentia subjecti, sit actus scientiæ, non est satis quod illa sciri possit, & habeat talem causam, sed requiritur ut syllogismi per quem infertur, medius terminus sit illa causa, à qua in subjecto oritur proprietas quæ de eo in tali conclusione prædicatur. His positis.

8. Dico primò conclusio ex duabus revelatis non est hoc ipso, seu vi illius discursus, assensus fidei, ipsa tamen aliter credi potest, quatenus revelata est. Prima pars est communis doctrina Theologorum; & qui



citantur in oppositum, Canus lib. 6. de locis. Vega lib. 9. in Tridentinum c. 39. Catharinus opusc. de certitudine gratiæ, & alii reipsa non sunt contrarii. Nam solum docent propositiones deductas ex duabus revelatis, pertinere ad fidem eo quod credi possint, cum quo stat quod non credantur illo actu, nec vi illius discursus, sed aliter, ut ex ipsa sui revelatione illatæ.

9. Probatur illa prima pars assertionis, quia omnis mediatuſ fidei actus debet habere pro objecto formali immediato Dei auctoritatem, ita-ut eâ formaliter nitatur, non autem tantum eam præsupponat. Atqui conclusio illa, ut deducta ex revelatis, non habet pro motivo immediato Dei auctoritatem, sed præmissas ipsas revelatas, quæ aptæ quidem sunt inferri ex Dei auctoritate, sed non sunt ipsa Dei auctoritas. Ergo. Major constat ex notabili tertio, & confirmatur, quia universim loquendo, actus qui supponunt, non autem per se attingunt, id quod est objectum formale motivum alicujus habitus, non eliciuntur ab illo habitu: alioquin opinio quæ supposito aliquo principio scientifico discurret ex aliquo medio probabili, quod proximè intueretur, esset actus scientiæ: & omnes ratiocinationes etiam in immensum excurrentes, quæ fundarentur remotè in prin-

bonitas formæ postulat, connectuntur. Hinc concedo quidem eum qui ex duabus veritatibus revelatis, ac fide creditis, aliquam conclusionem elicit, nobiliorem ac firmiorem habere de illa conclusione notitiam, quàm si non assumeret veritates illas ut de fide certas, sed tantùm humano ac naturali modo cognitâs, sed nego ipsa fidei principia, ex quibus veritates illæ sunt illatæ, per se causare illam conclusionem, ad quod requireretur ut ipsa essent illius præmissæ, sicut in alio discursu esse possunt, in quo illa conclusio ut revelata, non ut ex revelatis deducta judicabitur.

8 Hinc adverte circa illud quod suprâ dictum est de primo quod ab intentione procedit imperio, intentionem finis causare duos effectuum ordines. Nam cùm causet electiones mediorum viciniorum & remotiorum, seu decreta de illis assumendis, & ipsam positionem eorum, quoad electiones causat primò eas quæ habent pro objecto media proximiora fini, deinde eas quæ remotiora, ac postremò eam quæ remotissimum. Quoad ipsam autem positionem mediorum, in qua consistit executio rei, causat primò positionem remotissimi, & fit inde progressus ad alia minùs distantia, deinde ad ea quæ sunt pro-

ximiora , qui ordo est alteri planè contrarius : Et licet hunc secundum ordinem non causet nisi præsupposito primo, quia tamen in primo ordine nulla est volitio quæ per se executionem imperet, nondum determinatis iis quæ in intentione ultima sunt , & in ipsa executione prima , ideo intentio prout effectiva, & causativa executionis , fertur primò in remotissima media , & nisi inde inciperet, nunquam daretur actionis initium. Nihil autem tale est in causalitate primorum intellectûs principiorum, cùm illa non causent per se nisi conclusiones vi formæ & aptæ dispositionis terminorum ex ipsis sequentes, quæ sunt solæ primæ & immediatæ : remotiores autem non causant nisi per alia à se deducta principia, quod , ut dixi, est minùs strictum causalitatis genus : siquidem non importat influxum actuale in effectum , sed arguit tantùm fuisse influxum in causam ejus.

9. Objicies quartò contra id quod dixi, sufficere revelationem virtualem ad hoc ut aliquid fide credi possit. Datur aliquis assensus Theologicus distinctus ab assensu fidei , certior omnibus scientiis naturalibus. Non nisi is qui niti-  
tur revelatione virtuali. Ergo assensus qui habebit pro motivo revelationem virtualem , erit tantùm Theo-



352 *De Ente Supernaturali,*  
logiæ , non fidei.

10. Respondeo assensum Theologicum certiore[m] omni scientia naturali esse primò eum qui nititur revelatione ipsa non credita modo fidei proprio , sed inspectata prout à præsupposita fide summam in nobis certitudinem obtinet. Ut enim scientiæ inferiores ac subalternæ aliqua principia supponunt ut constantia ex superiorum demonstrationibus , ita Theologia revelationem Dei , ut à fide cum summa & supernaturali sapientia creditam , rectè accipit pro ineluctabili principio , cujus certitudo præstet omni evidentix scientiarum. Secundò assensum Theologicum prædicto modo certum dico esse eum qui nititur veritatibus revelatis spectatis item prout præsupposito circa eas firmissimo fidei assensu pro ineluctabilibus item , sicut & ipsa revelatio , principiis accipiuntur. Jam quod revelatio sit virtualis de aliquo objecto vel formalis , & veritates revelatæ subsistent sive implicitè sive explicitè Dei locutioni , hoc accidentale est, ut ad fidem , ita & ad Theologicam præsuppositionem de summa illarum certitudine , cum tam Deus sit infallibilis in iis quæ virtualiter , & implicitè dicit , modò illa dicat , quàm in iis quæ formaliter , & explicitè asserit.

11. Objicies quintò contra idem , tota

veritas propositionum virtualiter revelatarum pendet ex veritate propositionum naturaliter evidentium, Verbi gratiâ, ut ex revelatione ista, quòd Christus sit homo, quæ est virtualis revelatio risibilitatis in Christo, constet hoc ipsum, Christum esse risibilem, supponenda est hæc veritas, quòd homo sit risibilis, & ab ea pendet assensus tum qui datur huic propositioni, Deus dixit Christum esse risibilem, tum qui isti conclusioni, Ergo Christus est risibilis. Quare cum nullus assensus fidei pendeat à veritate naturali, nullus est assensus fidei neque circa revelationem virtualem, nèque circa veritatem virtualiter revelatam.

12. Respondeo assensum qui datur tum revelationi virtuali quatenus virtualis est, & se extendit ad rem virtualiter revelatam, non pendere à dicta propositione nisi ut ab aliquo præsupposito, quod si non fuisset præcognitum, non fuisset intellecta, secundum extensionem quam habet ad illud, revelatio, à qua sola pendet proprius fidei assensus.

13. Objicies sextò, si virtualiter dicitur id quod virtute continetur in eo quod expressè & formaliter asseritur, sæpe homo dum loquitur, dicet id quod non cognoscit.

14. Respondeo negando consequen-

tiam, quia quando dicitur eum qui aliquid formaliter & expressè asserit, asserere virtualiter id quod virtute in eo continetur, ita hoc intelligitur, ut sensus sit, eum dicere virtualiter ea quæ & continentur virtute in eo quod dicit, & ipse in eo contineri intelligit. Hinc homo quidem qui non semper cognoscit id quod virtute continetur, in eo quod formaliter, & expressè asserit, non semper illud dicit. At verò ista restrictio non habet locum in Deo qui distinctissimam habet omnium notitiam. Quare dum loquitur, significat totum quod sive formaliter, sive virtualiter & moraliter verbis ipsius subest. Unde id totum fide credi potest.



## QUÆSTIO SEXTA.

### *De spe Theologica.*

**C**UM Deus non minùs bonus sit & expetibilis, quàm verus, & cognoscibilis, par est ut cognitionem quæ de ipso habetur per fidem, sequatur appetitus, & amor qui sit tali cognitioni proportionatus, & pari modo in entitate supernaturalis. Cúmque hic sit duplex, unus quo Deum diligimus ut bonum nobis, alter quo eum amamus ut bonum in

se ; ille , etsi non dignitate , tamen generationis ordine est prior : siquidem ex Philosopho , *amicabilia ad se priora sunt amicabilibus ad alterum*. Et præterea cùm amor Dei secundùm se sit maximè arduus , & ex natura rei difficillimus , in quantum Deus , ut summè bonus in se debet amari à nobis supra nos ipsos ; hic ad illum disponit , étique veluti gradus ad id quod superius est , cùm supra naturæ ordinem sit incipere à summo. De hoc igitur amore , qui est ipsa Theologica spes , post fidei considerationem hîc agemus , tum sequenti quæstione de alio dicemus.

---

## SECTIO PRIMA.

*Quodnam sit objectum materiale spei.*

1. **N**Otandum primò ad objectum spei in genere , sumendo illud objectum completè , & ut conflatum , tum ex materiali , tum ex formali , quatuor requiri conditiones. Prima est ut sit bonum , quia etsi spes nonnunquam sumatur pro expectatione futuri eventûs , sive boni , sive mali , quo modo Cicero lib. 1. ad Atticum , *spem malorum dicit* , & apud Virgilium Dido , *Hunc ergo si tantum potui sperare dolorem*. Tamen ut rectè docet Augustinus in Ench. c. 8. spes non est

nisi bonarum rerum ; quam idcirco Cicerone 4. Tuscul , definit *expectationem futuri boni*. Secunda est ut sit arduum illud bonum , quia quod quis habet in sua potestate , aut facillimè obtinere potest cùm voluerit , illud non dicitur sperare , sed quasi jam pro habito tenere. Et præterea spes à desiderio per hoc differt , quòd desiderium sit de bono quod non sit præsens , abstrahendo à difficultate illud obtinendi. Spes autem desiderio superaddat voluntatem illud consequendi non obstante illa difficultate. Tertia ut sit per se possibile ei qui sperare debet , quia nisi sit antecederet possibile ; non poterit voluntas moveri ad prosecutionem ejus , sed potius bonum propositum , ut absolutè impossibile , desperationem excitabit. Quarta , est ut non sit præsens , sed futurum si media adhibeantur , quia in hoc spes à gaudio distinguitur , quòd gaudium versetur circa bonum ut præsens , spes autem , sicut & desiderium , circa non habitum , sed acquisibile. Et hæc de spe sub ratione spei , quod non impedit ne idem habitus inclinet voluntatem ad amandum idem bonum si sit præsens , & jam ut possessum careat ratione ardui , seu cum difficultate acquirendi , qua de re postea suo loco.

2. Notandum secundò circa objectum

spei Theologicæ, prout ipsa ab omni alia spe distinguitur, controversiam esse primò quodnam sit objectum ejus materiale primarium, seu objectum attributionis. Secundò quænam in eo sit ratio formalis, quæ per se spectata moveat ad prosecutionem illius boni. Quoad primum, de quo hac sectione agitur, cùm ex sancto Thoma 1. 2. q. 1. a. 8. sit duplex finis hominis, nempe finis-qui, id est bonum cuius adeptio expetitur, estque beatitudo objectiva, nempe Deus: & finis-quo, sive operatio quâ illud bonum possidetur, nempe visio: tota quæstio est, an Deus solus, an sola visio, seu quæcunque sit operatio quâ Deus formaliter possideatur: an vero Deus simul & visio illa, seu possessio, sint spei objectum primarium & immediatum, id est quod actum fidei terminet nullo interveniente medio quod prius per actum spei in ratione objecti materialis attingatur. Et circa hoc Durandus in 3. dist. 27. q. 2. docet solam visionem esse objectum immediatum spei, Deum verò esse objectum tantum mediatum, licet magis principale. Alii verò objectum immediatum spei esse Deum simul & visionem, sive complexum duo illa includens. Ita Suarez, Vasquez, & plurimi alii. Alii denique volunt objectum spei esse solum Deum, visionem

verò esse actionem quâ possidendum est illud summum bonum, quæ actio non est ipsius desiderii de illa re objectum. Hæc est mens sancti Thomæ 2. 2. q. 17. a. 2. ubi ait objectum spei esse bonum infinitum, & ipsum Deum, & ab eo sperandum non minus aliquid quàm sit ipse. Quod si dicit quoque beatitudinem & vitam æternam esse illud objectum, beatitudinem illam & vitam sumit objectivè, quo modo sunt ipse Deus: nec verbum ullum facit de visione, sed potius de fruitione Dei, quæ est actus voluntatis, quem cum ipse nolit pertinere ad essentiam beatitudinis formalis, patet nolle esse objectum primum spei. Unde fruitionem, ut dixi, sumit objectivè pro ipsius objecto. Idem docet Caietanus ibidem, & alii cum quibus.

3. Dico solus Deus est objectum materiale primum spei, non autem visio, aut ipsa fruitio. Probatur, quia spes est amor concupiscentiæ quo nos perfectissimè diligimus, & supremum bonum nobis optamus. Atqui objectum in quod tendit primariò & per se amor concupiscentiæ, est ipsum bonum possidendum aut possessum, non autem actiones quibus illud quomodocunque possidetur, aut attingitur: unde tales operationes sunt voluntariæ tantum, id est factæ ex præcognitione



objecti sui, non autem volitæ, id est factæ ex præcognitione sui ipsarum, cum id nullo modo sit necesse ad amorem concupiscentiæ circa objectum ipsarum. Et id clarè patet in belluis propter impossibilitatem quæ est in illis ad præcognoscendas actiones quibus bonum suum attingunt. Nam proposito pabulo feruntur in illud, ipso solo præcognito, non autem cursu suo, aut comestione, cum tamen bonum illud non attingant sine tali actione. Item gaudent de bono per sensum intetnum repræsentato ut præsentè, nec tamen illam cognitionem actui appetitûs præviam norunt, licet per eam noscant objectum. Et si quis contenderet eas nosse talem cognitionem experimentaliter, certum est non cognosci per modum objecti, ad quod necessaria esset cognitio reflexa. Quare objectum concupiscentiæ universim loquendo est solum bonum quod est objectum actionum quibus ipsum attingitur, non autem ipsæ operationes, quibus non præcognitis illud appetitur, utique attingendum per eas, sed habentes rationem operationum voluntariarum, non autem volitarum. Quod si accadat ut illæ sint volitæ, ut contingit in homine, id non erit necesse ad amorem concupiscentiæ circa bonum illud, & erit extra pertinentia ad amorem illum. Quare cum spes

fit amor concupiscentiæ circa Deum summum nostrum bonum, objectum spei erit Deus solus, non autem actio quo possidendus est Deus, aut actio quâ ipso frui debemus.

4. Probatur secundò assertio, quia spes id spectat in hac vita, de quo est delectatio beatorum in alia. Sed illa est de Deo ipso per se sumpto, quia est de objecto cognito per visionem beatificam, quæ non habet seipsam pro objecto.

Dices primò, visionem beatificam esse experimentalem sui notitiam. Respondeo non per hoc esse sui ipsius objectum, & non magis illam per hoc cognosci quàm cognoscatur amor seclusa omni reflexione circa ipsum, quia experimentalis illa notitia in hoc consistit quod homo possit advertere se cognoscere, & recordari quòd cognoverit, quod verum quoque est de amore qui non est sui formalis cognitio.

5. Dices secundò cum Vasque, Becano, & aliis, visionem beatificam esse supra seipsam reflexam, & in hoc imitari Dei cognitionem, quæ id habet eminentissimo modo.

Respondeo, omni seclusa tali reflexione, Beatum qui videt Deum, hoc ipso posse delectari de illo ut summo suo bono, & sine. Neque enim ad gaudendum de aliquo

aliquo bono requiritur alia cognitio quam illius boni. Quòd si accedat qualiscunque reflexio supra illam cognitionem, & ex ea sequatur gaudium, illud gaudium non jam erit de illo bono, sed de cognitione cognitionis, & sic erit formaliter aliud. Et hoc loco non erit de objecto primario spei, quod est Deus, sed de visione Dei, quæ, ex dictis, non est illud objectum.

6. Quæres, num præter objectum primarium spei, alia etiam secundaria sint objecta quæ ab ea consequenter ad primarium spectentur. Respondeo affirmativè & dico ad objectum spei nostræ secundarium pertinere primò media omnia nobis necessaria ad consequendum Deum, ut sunt gratia justificans, auxilia divina, &c. Secundò beatitudinem corporis, & dotes animæ gloriosæ, ipsamque visionem quâ possidetur Deus. Tertiò bona naturalia quæ à Deo petimus in ordine ad nostram beatitudinem. Probatum quia spes actualis est quædam intentio: omnis autem intentio fertur in finem ut per media consequendum. Et jam hinc duplex habet objectum, unum primarium, nempe finem, & alterum secundarium, nempe media. Præterea qui per se intendit finem, vult quoque consequentia, & concomitantia illum finem, veluti accidentia ejus.

## SECTIO SECUNDA.

*Solvuntur àlia objectiones afferentium Deum  
simul & visionem ejus esse objectum  
materiale spei.*

1. **O** Bjiciunt primò, Illud totum sive simplex, sive complexum, est objectum primum, & immediatum spei, quod est noster ultimus finis. Atqui noster ultimus finis est Deus videndus, sive Deus simul & visio ejus. Ergo. Major patet, quia ultimum finem super omnia nobis bona intendimus, ac proinde volumus immediatè, cùm nostrum bonum ex amore nostri expetimus. Jam autem spes est virtus quâ nostrum summum bonum ex amore nostri expetimus, quâque nos perfectissimè amamus. In quo differt à charitate quæ in Dei bono, quatenus est Dei bonum, acquiescit. Ergo summum, immediatum, & primum objectum spei est noster ultimus finis. Minor probatur, quia finis-qui, & finis-quo, sive bonum possidendum, & possessio ejus non sunt propriè duo fines, sed unus duntaxat integratus, & in ratione boni beatitudinem constituentis essentialiter conflatus ex duobus. Neque enim ut homo sit beatus, atis est quòd existat beatitudo ejus ob-

jectiva , quòdque Deus sit bonum in se continens id totum quo satiari potest hominis animus : neque cùm beati esse volumus, operationem quâ possidetur Deus cupimus quasi à Deo sejunctam , & seorsim ab illo spectatam secundùm suæ propriæ entitatis bonitatem , sed ut est consecutio Dei. Igitur Deus simul & visio sunt noster ultimus finis adæquatè sumptus & hoc utrumque bonum volumus indivisim, nec unum mediat inter aliud in ratione objecti , cùm non terminet spem sine alio.

2. Respondeo finem-quo , non esse propriæ finem , quia non habet conditiones finis , cujusmodi sunt esse ens necessarium , infinitum , summè amabile , &c. Item nego talem finem integrare unum objectum cum ipso fine qui intenditur , quia talis actio nullo modo debet esse objectum actûs quo tenditur in illud bonum, alioquin in visione quæ est possessio summi boni , ipsa visio esset sibi parziale objectum , & possessio sui. Et in fruitione , quæ ad beatitudinem etiam formalem pertinet, ipsa deberet etiam esse sibi objectum parziale , ac præcognosci , & seipsâ frui, quod est extra essentiam beatitudinis. Addo ut optemus nobis objectum aliquod & tendamus in consecutionem ejus, non esse opus ut unio , & possessio ejus sit obje-

etum, sed tantum ut ipsum sit nobis bonum, seu conveniens, idque præcognoscatur, quo posito sequetur tendentia, & possessio, absque eo quod ipsæ præcognoscantur.

5. Objiciunt secundò objectum primum & immediatum spei complectitur necessario Deum, & cum ipso aliquid aliud; non nisi visionem: ergo complectitur Deum simul & visionem. Major probatur quia quod supposito à nobis distinguitur non potest formaliter exercere munus boni respectivè ad nos, nisi adveniat aliquid quo nobis jungatur. Et hinc cum tale bonum nobis optamus, simul illam conjunctionem expetimus, ut patet in avaro respectu pecuniæ, in famelico respectu cibi, & similibus. Atqui Deus est bonum quod supposito à nobis distinguitur. Ergo non potest exercere actu munus summi nostri boni, neque nos beare, nisi accedat aliquid quo ipse nostræ menti uniatur, & præsens fiat. Quia igitur spes hoc intendit, ut summum nostrum bonum exerceat actu munus summi boni respectu nostri, & sic beati simus, siquidem ipsa est supernaturalis, & perfectissimus nostri amor, ideo primum & immediatum ejus objectum est Deus, ejusque visio seu possessio.

4. Respondeo, etsi quod supposito à



QUÆST. VI. *De spe Theologica.* 365

nobis distinguitur, non exerceat munus boni, nisi adveniat aliquid quo nobis conjungatur, non tamen illud aliquid esse objectum, saltem necessarium, tendentiæ nostræ in illud, quia satis est quod illud nobis placeat, & videatur bonum, ut habentes potentiam tendendi in illud, tendamus de facto. Unde conjunctio non erit præcognita, ac proinde nec volita, etsi voluntaria, in quantum posita ex cognitione objecti. Quod totum, ut dixi, patet in belluis non præcognoscentibus actum per quem bonum ipsarum exercet erga illas munus boni. Quare etsi in homine detur præcognitio illius actionis, ea tamen non pertinet necessariò, neque essentialiter ad objectum talis amoris ac tendentiæ.

5. Ad id quod dicitur de avaro, adverte id quod in divitiis habet rationem finis respectu avari, esse pretium ipsum divitiarum, & potestatem quam conferunt homini ad habenda quæ volet temporalia & extrinseca bona. Hoc enim est quod per se in divitiis placet, & si valor ille non inesset pecuniæ, non ita expeteretur. Unde sequitur detentionem ipsam pecuniæ, & instrumenta quibus divitiæ possidentur, esse tantum media ad illum finem, sive ad habendam illam potestatem & æquivalentiam ad talia bona. Hinc



respondeo primò , ut quis amet , & expetat id quod in divitiis habet rationem finis , non esse opus ut cogitet de actione quâ illas possidebit , sed satis esse si pretium earum , & prædicta potestas per se illi placeat , abstrahendo à modo quo tale bonum consequetur. Quare non bene ex amore divitiarum quem habet avarus , probatur bonum nobis extrinsecum non posse à nobis expeti & amari , absque eo quòd actio quâ illud possideri potest , sit à nobis volita.

6. Respondeo secundò , si is qui optat divitiarum bonum , cogitat etiam de detentione illarum , & eam expetit , non bene inde probari eum qui optat finem , optare simul actionem quâ illi uniatur , quia detentio pecuniarum non est ipsa formaliter habitio finis quæ ibi placet , seu prædictæ potestatis , sed medium quo posito ipsa resultat , sicut multa alia moralia , positæ quibusdam partim physicis partim moralibus , exurgunt tanquam ex causis , seu mediis ad illa. Ad valorem autem objectionis oporteret detentionem pecuniæ esse ipsam potestatem , & habitationem pretii , & æquivalentiam ad ea omnia quæ per pecuniarum pretium obtinentur , quod est falsum formaliter loquendo , quia immutata detentione pecuniæ potest variari illa potestas , immi-

QUÆST. VI. *De spe Theologica.* 367  
nuto scilicet pretio ipsius pecuniæ.

7. Ad instantiam de famelico, dico, ut cibus ametur amore concupiscentiæ, non esse opus absolutè ut cogitetur ipsa actio ulûs, & manducationis, siquidem belluæ, ut dictum est, cibum appetunt non præcognita tali actione quæ idcirco non est volita, sed voluntaria, seu facta ex præcognitione objecti. Quod si in homine non fiat talis actio sine præcognitione ejus, id non evenit ex eo quod talis præcognitio sit necessaria de se ad amorem concupiscentiæ circa illud objectum, sed ex eo quod homo non possit rem sibi manifestam non cognoscere. Et concedo ipsam manducationem esse ab eo volitam, sed dico hunc amorem esse alium ab eo qui est circa ipsum cibum ut per se convenientem, qui amor est in belluis. Unde similiter etsi homo expetat visionem Dei, iste amor erit alius ab eo qui est circa ipsum Deum ut nobis bonum, qui amor est virtutis Theologicæ, cum amor ipsius visionis non sit talis, sicut neque amor Theologicus.

## SECTIO TERTIA.

*Solvuntur objectiones sententiae asserentis  
solam visionem Dei esse objectum  
materiale spei.*

1. **O**bjicit Durandus primò, objectum immediatum spei est objectum immediatum amoris concupiscentiæ. Sed Deus non est objectum immediatum amoris concupiscentiæ, quia sic amaremus illum propter nos, & illum ad nos tanquam ad finem referremus: quod est inordinatum, siquidem Deus debet amari propter se amore amicitiae.

2. Respondeo Deum posse honestè amari amore concupiscentiæ non excludente amorem amicitiae, siquidem Deus non tantum est in se bonus, sed etiam est bonum nostrum, & finis noster. In hoc autem non amamus eum propter nos eo modo quo amamus media ad finem aliquem cui ea subordinamus, non volituri ea nisi ad illum finem conducerent, sed illum amamus nobis potius quam propter nos, & expetimus ut finem qui, fini cui seu ut bonum per se amabile subiecto ejus capaci: quod totum est de se honestum, & conducens ad perfectiorem Dei amorem quo nos & omnia nostra bona, ipsamque ejus possessionem, ac nostram felicitatem ipsi subordinamus, qui cum sit

fit tantus, vult se à nobis perfectissime possideri. Addi etiam potest, ne quidem vitium esse in amore quo Deus amatur propter ipsa quæ nobis confert bona, inspectando ipsum ut auctorem mediorum salutis, quæ media sint motiva diligendi ipsum taliter nobis bonum: sed tantum vitium esse in illo amore, si ulterior amandi ratio excludatur, ita-ut quis dicat se utilitate seclusa non amaturum.

3. Opponit secundò. Idem est objectum spei, & gaudii, seu delectationis, nec differunt nisi secundum præsens, & futurum. Sed objectum proximum delectationis in patria non est Deus secundum se, sed beatitudo creata, siquidem delectatio ad amorem concupiscentiæ spectat: objectum autem amoris concupiscentiæ non est nisi bonum nostrum, & quod est subiecto distinctum, non est bonum nostrum nisi mediante aliquo actu quo nobis jungatur, ut patet in eo qui concupiscens vinum, non ipsum sed usum ejus concupiscit.

4. Respondeo negando minorem, & ad probationem dico aliud esse quòd ali- quid sit bonum nostrum, aliud quòd exer- ceat actu munus boni: & Deum quidem esse per se bonum nostrum, licet non exer- ceat actu munus boni respectu nostri, hoc est nos beatificet nisi per visionem quæ

ipsum possidemus. Ex eo autem quòd per se est bonum nostrum, est per se expetibilis, etiam præcisa & non cogitata visione, quæ quidem est media inter Deum & nos ad nostram beatitudinem, sed non in ratione objecti, ita-ut qui delectatur de summo nostro bono, aut sperat illud, prius gaudeat de visione, & consequenter de Deo, aut prius speret visionem, & consequenter Deum. Id enim est falsum, sicut falsum est universaliter, actionem quâ possidendum est bonum, debere necessariò esse objectum amoris quo tendimus in illud bonum.

5. Instabis secundò. Ignis non est nobis bonus secundùm se immediatè sed tantùm ratione caloris quem in nobis producit. Ergo similiter Deus non est nobis immediatè bonus, sed tantùm ratione beatitudinis formalis quam efficit in nobis. Respondeo negando consequentiam. Disparitas est quia ignis non est nobis bonus nisi in ratione causæ efficientis, non verò in ratione objecti & finis. Deus autem est nobis bonus in ratione objecti nullo alio objecto mediante expetibilis.

6. Objicitur secundò. Deus eo modo est objectum spei quo est objectum timoris, cum timor sit aliquis actus spei. Sed Deus non est immediatum objectum timoris sed tantùm mediante malo quod in-



ferre potest. Ergo similiter non erit ob-  
jectum immediatum spei, sed tantum me-  
diante illo bono quod nos formaliter cum  
illo unit.

7. Respondeo negando majorem. Ra-  
tio est quia cum objectum immediatum  
timoris debeat esse malum, Deus in se  
nullam habet rationem mali, sed tantum  
potest esse causa alicujus mali physici in  
odium mali moralis, sive in pœnam pec-  
cati. Itaque non potest timeri ipse nisi  
mediante timore illius mali. At verò cum  
objectum spei sit bonum, & ipse per se  
sit bonus, & bonum nostrum, quod sum-  
mè nobis optabile est, ideo potest ipse esse  
objectum immediatum spei. Ad id quod  
dicitur timorem esse actum spei, respon-  
deo ita esse actum spei, ut habeat directè  
& immediatè pro objecto id quod est con-  
trarium objecto quod prosequitur spes.  
Ejusdem enim virtutis est prosequi ali-  
quod bonum, & fugere aut metuere oppo-  
situm ejus. Quare timor est de privatione  
Dei, & consequenter de omni quod ta-  
lem privationem causat, sive demeritorie,  
ut peccata sive vindicativè, ut Deus.

8. Objicitur tertio. Idem est objectum  
spei & desperationis. Nam contraria circa  
idem versantur. At objectum desperationis  
est sola Dei visio. Ergo & spei.

9. Respondeo negando objectum des-

perationis esse solam Dei visionem. Nam  
 è contra objectum illud est sola privatio  
 Dei, si desperatio essentialiter sumatur.  
 Idque probatur assumendo ipsum obje-  
 ctionis principium, nempe quòd spes &  
 desperatio, quæ sunt contraria, circa idem  
 versentur. Et adjungendo huic principio,  
 id quod supra ostensum est, nempe obje-  
 ctum spei primum non esse visionem  
 Dei, sed ipsum Deum. Ex his enim se-  
 quitur objectum primum desperationis,  
 non esse privationem visionis sed priva-  
 tionem Dei. Neque refert quòd privatio  
 Dei non fiat nisi per privationem visionis.  
 Satis est enim quòd formaliter differunt  
 illæ privationes, & una sit objectum des-  
 perationis essentialiter sumptæ: alia non  
 sit illius sic sumptæ objectum.

#### SECTIO QUARTA.

*Quodnam sit objectum formale Spei  
 Theologica.*

**I.** **T**Res sunt præcipuæ circa hoc  
 Theologorum sententiæ. Prima  
 est Deum ut principium effectivum bo-  
 norum quæ speramus, esse motivum spei.  
 Est autem effectivum per omnipotentiam,  
 bonitatem, misericordiam, fidelitatem.  
 Ita Vasquez tom. 1. in 1. part. disp. 84.  
 c. 2. & alii.



2. Secunda sententia est Deum ut summè bonum nobis , itémque bonitatem visionis esse objectum formale Spei. Ita Suarez , & alii conformiter ad relatam sectione præcedenti ipsorum de objecto materiali Spei opinionem.

3. Tertia asserit solam Dei bonitatem quâ nobis bonus est , & nostri beatificativus , esse illud objectum. Ita sentit Divus Thomas 2. 2. q. 17. a. 2. ubi hanc rationem reddit, quòd bonitas Dei sit melior omni bonitate creaturæ. Item Cajetanus & alii.

4. Dico primò. Primarium objectum formale Spei Theologicæ , non est Deus sub ratione causæ efficientis, seu quatenus est is à quo speramus , sed sub ratione causæ finalis, quatenus est id quod speramus , éstque bonus relativè ad nos. Probatur conclusio quia spes actualis est quædam intentio , ut dictum est sect. 1. Atqui intentio primò fertur in finem , cùm finis de se sit primum in intèntione; non autem fertur in causam efficientem, nisi quatenus fertur in executionem mediorum. Et in hanc fertur tantùm secundariò, quia non media movent ad appetendum finem, sed finis ad media. Ergo cùm Deus sub ratione nostri summi boni, habeat rationem finis , & sub ratione causæ efficientis se teneat ex parte mediorum , sub illa tantùm,

non sub hac consideratione est objectum primum formale spei nostræ.

5. Confirmatur à contrario, quia primum objectum timoris qui spei opponitur, est malum pœnæ: justitia autem vindicativa judicis timetur tantum secundario ut est causa mali quod primo sub metum cadit. Ergo in spe primum objectum est bonum quod speratur. Deus autem sub ratione causæ efficientis, à qua est illius boni communicatio, est tantum objectum secundarium.

6. Dico secundo, Deus sub ratione causæ efficientis habet aliquam vim motivam, sed secundariam respectu spei. Probatur, quia bonitas mediorum movet ad efficacem intentionem finis, præsupposita bonitate per se appetibili ipsius finis. Non enim possumus intendere id quod est impossibile licet possumus habere circa illud complacentiam simplicem. Cum itaque Deus sub ratione causæ efficientis, præstet auxilia ad acquirendum bonum quod per spem expetimus, sub illa ratione habet vim motivam. Quod autem illa sit tantum secundaria respectu spei, probatur quia si tolleretur bonitas finis, nihil jam media moverent, ac proinde neque id à quo sunt media.

7. Dico tertio. Sola bonitas Dei, ut est beatificativa nostri, seu beatitudo no-

stra objectiva, est objectum formale primum spei Theologicæ. Probatur quia illa sola ratio formalis quæ in objecto materiali spei per se ab illa spectatur, & contrahit objectum illud ad ipsam spem, est objectum ejus formale, sicut universim in omnibus objectis habituum, illa ratio quæ ex omnibus inexistentibus in objecto materiali, per se ab illis spectatur, est objectum eorum formale. At talis est prædicta Dei bonitas respectu spei, & per ordinem ad illam rationem, seu vim nostri beatificativam. spes distinguitur à charitate, absolutam Dei bonitatem, & perfectionem spectante. Ergo sola bonitas Dei sic sumpta est objectum formale spei.

---

## SECTIO QUINTA.

### *Solvuntur objectiones.*

1. **O**bjicies primò. Divus Thomas in quæstionibus disputatis, quæstione unica de spe, quæ est septima de spiritualibus creaturis, sic habet. Sicut objectum formale fidei est veritas prima, per quam sicut per quoddam medium assentitur iis quæ creduntur, quæ sunt objectum materiale fidei: ita etiam objectum formale spei est auxilium divinæ potestatis, ac pietatis, propter quod motus

spei tendit in bona sperata, quæ sunt ob-  
jectum materiale spei.

2. Respondeo Sanctum Thomam po-  
nere paritatem in eo quod sicut veritas est  
motivum, ita & auxilium Dei sit mo-  
tivum: sed non ponere in eo quod sicut  
veritas est motivum ultimum & prima-  
rium, ita & auxilium sit motivum simili  
modo ultimum ac primum; Nam  
contrarium habetur ex ipso Sancto Tho-  
ma, qui hîc quæstione 17. articulo 5.  
ait spem tendere in Deum sicut in ulti-  
mam causam finalem, quod idem est ac  
dicere id quod primò & immediatè spem  
moveret, esse Deum in genere causæ fina-  
lis: siquidem ex eodem sancto Doctore  
inter ea quæ sunt volita, primum est su-  
premus finis à quo est ordo intentionis.

3. Obicies secundò, possumus ali-  
quod bonum à Deo sperare quia omni-  
potens & liberalis est, quia promissit. Ergo  
sic Deus ut principium effectivum boni,  
erit motivum spei.

4. Respondeo negando consequentiam,  
& dico Tò quia in antecedente non deno-  
tare causam primariam objectivam spei,  
sed secundariam, sine qua prudenter spe-  
rare non possumus: quod non impedit ne  
ipsa aliam præsupponat motricem ad ac-  
ceptandum talis principii auxilium. Unde  
tale principium est tantum movens secun-



darium in ratione objecti.

5. Objicies tertio. Si quis interrogetur quo motivo inducatur ad sperandam beatitudinem, non respondebit quia bona est, sed quia Deus est potens & bonus ac fidelis. Igitur Dei potentia, bonitas & fidelitas est motivum spei.

6. Respondeo ideo non assignari pro causa sperandi bonitatem beatitudinis, quia ista causa præsupponitur notissima & indubitabilis. Quæritur autem ea circa quam, posita illa ut fundamentali & primaria, potest esse deceptio, puta si quis propriis meritis, & ipso bene vivendi studio niteretur indebitè.

7. Objicies quarto, sola bonitas rei propositæ est indifferens ad terminandum actum sive spei sive desperationis. Ergo ipsa non est motivum formale spei.

8. Respondeo idem bonum terminare actum honestum, & vitiosum ipsi oppositum, sed diversimodè. Nam terminat unum ut terminus ad quem, sive ut objectum prosecutionis, alium verò ut terminum à quo, sive ut objectum fugæ.

9. Objicies quinto. Motivum formale spei opponitur motivo formali desperationis. Atqui motivum desperationis non est aliqua ratio mali in re quæ desperatur sed defectus potentiæ aut voluntatis, apparens in eo à quo esset res obtinenda. Ergo mo-

tivum formale spei non est bonitas rei speratæ, sed vel propria sperantis vis, seu potentia, vel alienæ potestatis auxilium,

10. Respondeo distinguendo majorem, opponitur in ratione motivi, in quantum ad oppositum inclinatur, concedo: opponitur directè & contrariè quoad suum esse, ita ut unum motivum sit negatio alterius, vel contrarium strictè sumptum, nego. Imò id nunquam accidit inter motiva virtutum & vitiorum. Nam motivum intemperantiæ non est turpitudine quæ est in illo vitio quæ directè opponitur honestati moderationis, quam sequitur temperantia: sed est voluptas quæ abducit ab illa honestate, inducendo ad immodicum esum & potum, non obstante contrarietate cum illa honestate: ita ut turpitudinem immoderationis intemperans velit tantum indirectè. Sic ergo motivum desperationis non est id quod per se oppositum est motivo spei, sed quidquid esse potest, quod, non obstante illo motivo, hominem inducit ad actum spei oppositum, putà difficultas virtutis, & pravæ vitæ voluptas, cui se aliquis vult addicere. Quod si quis ab impotentia opinata moveatur, movebitur tantum negativè, in quantum adimet sibi aliquid ad spem necessarium, non tamen quasi adimat sibi primum ejus motivum, ad quod necessarium esset ut beatitudinem discredere.

11. Objicitur sextò, id quod spem specificat, est objectum formale spei. Atqui omnipotentia divina, & auxilium supernaturale spem specificant, quia spes distinguitur ab aliis actibus voluntatis, & maximè à desiderio inefficaci, per hoc quod intendit per media, & auxilia divina. Ergo illa, ut spem specificant, ita sunt objectum formale illius. Respondeo data majore, distinguendo minorem, spem specificant in ratione spei ut sic sumptæ secundum suum actum primum, qui est intentio ultimi finis nostri, nego: in ratione spei taliter determinatæ ad prosecutionem sui objecti primarii, cum possit esse spei actus sine tali determinatione, concedo: & dico posse esse actus spei præscindendo à consideratione Dei auxiliantis, cujusmodi est intentio absoluta & efficax bene vivendi, & exercendi bona opera, item metus gehennæ, & dolor de peccatis quasi de impedimento beatitudinis, unde patet motiva taliter determinantia spem ad hujus vel illius spei sub illa contentæ actum, non esse motiva ejus primaria. Ad probationem minoris, dico etiam propositâ omnipotentiam divinam & auxiliis ejus menti hominis, posse illum habere tantum complacentiam simplicem circa usum illorum auxiliorum: unde ex duobus æqualiter dispositis, & eadem cogitantibus, alter habebit



actum spei, seu intentionem efficacem, alter circa illa omnia tantum velleitatem. Quare id quod distinguit actus spei efficaces ab inefficacibus, non est ipsum objectum, sed modus tendendi in illud.

12. Objicies septimò, si bonitas quæ Deus nobis est bonus, & possessio ejus sunt objectum formale spei, nunquam possemus sperare spe Theologica ullum bonum à Deo, nisi sperando simul beatitudinem supernaturalem. Consequens est falsum. Ergo. Sequela patet quia omnis actus spei Theologicæ, debet habere objectum formale spei Theologicæ: & quicumque actus non habet tale objectum, ad spem Theologicam non pertinet. Minor etiam patet, quia ægrotus potest sperare, & petere à Deo sanitatem, nihil de beatitudine cœlesti cogitando.

13. Respondeo distinguendo consequens, nunquam possemus sperare spe Theologicæ ullum bonum creatum à Deo nisi sperando simul beatitudinem, sive explicitè sive implicitè, concedo: explicitè, nego: & dico si speremus illa bona à Deo sine ullo respectu ad beatitudinem, spem illam non esse Theologicam, quamvis is à quo speramus sit Deus, quia nimirum oportet ut virtutis Theologicæ objectum primum sit Deus, quod hîc non contingeret. Nam ista spes non spectaret Dei potentiam

nisi in quantum causam, & medium ad illud bonum: quod est spectare Deum secundario, & eo genere respectus quo media & eorum causæ spectantur ab intendente qui primario movetur à bonitate rei quam per se intendit. Et confirmatur, quia aliqui qui nihil unquam audiisset de beatitudine, posset habere spem Theologicam.

14. Objicies octavo, Deus ut causa boni sperati, saltem pertinet unà cum bonitate sua finali, & bonitate visionis, ad objectum formale spei. Ergo non sufficienter constitutum est illud objectum formale in sola Dei bonitate finali & bonitate visionis. Antecedens probatur, quia illud saltem ingreditur, & partialiter constituit objectum formale spei, quod si desit in ratione motivi, non potest exerceri actus spei. At talis est Deus ut auxiliator. Ergo. Minor probatur, quia cum spes sit intentio efficax beatitudinis, oportet beatitudinem proponi ut acquisibilem, neque est acquisibilis nisi per Dei auxilium.

15. Respondeo primo negando antecedens, & ad probationem, nego majorem. Nam potest aliquid ad actum spei efficacem requiri in ratione motivi secundarii, quod non moveat nisi præsupposita motione ipsius boni finalis in quod tendit spes. Et idem in omni intentione reperitur. Nam cum intentio sit voluntas efficax ob-

tinendi finem per media , non potest esse ejusmodi actus , quin ad ipsum voluntas moveatur , non modò per bonitatem finis , quæ est objectum formale & primum talis actus , sed etiam per bonitatem mediorum , saltem implicite cognitorum , aut præsuppositorum ut possibilium : nec tamen media sunt objectum formale in tali actu , quia ideo mediorum bonitas eligitur , quia ducit ad bonitatem finis saltem prius naturâ amatam , & impellentem ad electionem utilitatis quæ est in ipsis mediis.

16. Respondeo secundò negando minorem probationis , quia , ut jam dixi , potest aliquis non cogitato Dei auxilio , dicere efficaciter apud se , volo beatitudinem acquirere bene vivendo : vel volo ad consequendam beatitudinem facere quidquid præceptum est. Neque enim necesse est ut qui propter finem eligit media , quoties id facit , cogitet sive explicitè sive implicite de causa mediorum , sed potest de ipsis operibus , præscindendo à causa à qua principaliter oriuntur , cogitare. Præterea dantur actus spei qui circa media non versantur , ac proinde nec circa mediorum causam ut sic. Nam amor simplex beatitudinis supernaturalis , etsi inefficax , modò sit liber , ut esse potest , est de se honestus , non alia honestate quàm charitatis propriæ , quâ nobis summum bonum volumus : quæ charitas

est ipsa spes. Et delectatio quam habent beati in cælo de sua beatitudine, est honesta illâ honestate, ut postea ostendetur: nec tamen habet pro motivo causam auxiliorum, cum non feratur in media. Hic adverte accidentale esse spei secundum se quod sit intentio, licet spes non sit completa in nobis, nisi habeat rationem & vim intentionis. Ratio est quia accidentale est amorì supernaturali quo Deum ut bonum nobis amamus, quod bonum illud sit absens, & acquirendum, siquidem beatis qui illum amorem habent, est præsens & possessum. Hinc in illis effectus ille non est efficax nisi in actu primo: unde nec est intentio nisi virtualiter, & potestate, cum non feratur actu in media, ac proinde nec in Deum ut causam auxiliarem.

---

## SECTIO SEXTA.

*An possimus sperare beatitudinem ex nostris meritis.*

1. **N**Ota primò non posse quemquam sperare beatitudinem primariò & principaliter ob sua merita, cum Dens solus sit causa primaria & principalis nostræ salutis, sicut & Christus in ratione causæ meritoria.

2. Nota secundò non posse quemquam

ullo modo sperare ex propriis meritis quasi ea ex seipso & propriis viribus habeat, quia id Pelagianum est, & reprehenduntur in scriptura qui in sua virtute confidunt, laudanturque qui in Dei adjutorio sperant.

3. Quæritur ergo an liceat aliquo modo, nempe secundario, & minus principaliter sperare in meritis per Dei gratiam positis, spectando illa ut sic posita, aut saltem non spectando illa ut à nobis orta, quod per se malum est. Negant hæretici apud Bellarminum libro quinto de justificatione, quia putant omnia nostra bona opera esse peccata, asseruntque insuper non licere operari spe mercedis æternæ, eo quod scriptura Joannis 12. reprehendat mercenarios. Sed contra illos cum Sancto Thoma quæstione 12. articulo 4. aliisque catholicis Doctoribus.

4. Dico, potest homo spem aliquam concipere ex bonis operibus, & meritis per Dei gratiam positis, non sistendo ultimæ in illis, sed in potentia, bonitate & fidelitate Dei, qui vult illa præmiare. Probaturn primò ex scriptura, in qua sunt talis spei exempla. David Psalmo 16. *Exaudi,* inquit, *Domine justitiam meam,* Et infra, *De vultu tuo judicium meum prodeat: oculi tui videant equitatem.* Apostolus 2. ad Corinthios 4. *Bonum certamen certavi, cursum consummavi, fidem servavi. In re-*  
liguo

*liquo reposita est mihi corona justitiæ. Tob. x  
4. fiducia magna erit coram Deo eleemosina  
omnibus facientibus eam.*

5. Probat<sup>ur</sup> secundò ratione; quia quod est medium obtinendæ salutis, potest esse motivum secundarium sperandi eam. Nam etiam medium habet aliquam bonitatem, seu efficaciam in ordine ad finem: unde supposita bonitate finis quæ per se placeat, potest secundariò movere ad prosecutionem ejus, & ei qui tale medium applicat, aliquam dare fiduciam de illo obtinendo fine. Jam autem bona opera sunt media obtinendæ salutis. Itaque sicut spectata in esse intentionali possunt movere suo modo secundariò ad sui applicationem, ita de facto applicata & posita, possunt ingenerare, quantum est de se, aliquam fiduciam.

6. Dixi ingenerare quantum est de se; quia aliunde timere quisque debet ne peccata ipsius, & neglecta opera bona, meritorumque paucitas, cujus ipse culpâ suâ sit causa, impedimentum sit salutis. Unde etiam magis ad studium bonorum operum propter ipsam salutem excitabitur, & multò justius est ut in hunc timorem magis propendeat, quàm in fiduciam ex meritis, quia cum unus affectus etsi bonus, tamen periculosus sit, alius autem & bonus & tutior, in hunc potius ferri debemus. Sic cum de nobis, & de aliis bene sentire, possit

esse veritati conforme, quia tamen de nobis bene sentire periculosum, & de aliis tutum est, idque charitas postulat, æquum est ut si quid in nobis est boni, id parum attendamus, defectus verò nostros magis inspiciamus, ut sic humilitatem acquiramus. Contra verò congruit ut aliorum bona spectemus, ut illos diligamus, & mala non facilè agnoscamus, aut judicemus, ne & illos parum amemus, & nos illis præferamus.

---

## SECTIO SEPTIMA.

*An possimus sperare beatitudinem alteri per actum spei Theologica.*

I. **A**Dverte beatitudinem alterius posse considerari dupliciter, primò ut ipsi bonam, secundò ut nobis etiam bonam, quatenus nostram beatitudinem accidentaliter auget, maximè si ille est propinquus, aut etiam parens, vel amicus. De hoc secundo modo non est quæstio. Nam certum est posse per spem Theologicam sperari ea quæ sunt, vel esse possunt accessoria beatitudini, licet non cum certitudine singula, nempe ea quæ nec Deus voluit esse accidentia annexa beatitudini, nec etiam pendent à nobis, sed ab aliorum hominum libertate; illa, inquam, certo



sperare non licet sine peculiari Dei inspiratione aut revelatione: sed si petantur à Deo, & cum aliqua pia fiducia expectentur ut nostræ beatitudinis complementum aliquod, id erit honestum honestate spei. De primo autem modo quæstio est, an, si quis beatitudinem alterius auxilio divino speret, ut illi alteri bonam, iste actus sit actus spei Theologicæ.

2. Affirmat Lorca disputatione 2. sectione 2. Negant Divus Thomas, Vasques, & alii. Utramque sententiam probabilem existimat Turrianus.

3. Dico non est actus spei Theologicæ sperare à Deo beatitudinem alterius quatenus illi bonam. Probatur primò ex Augustino, qui in Enchiridio capite 6. sic habet: *Spes non est nisi bonarum rerum, nec nisi futurarum, & ad eam pertinentium qui earum spem gerere perhibetur.*

4. Probatur secundò, quia spes actualis est amor concupiscentiæ, si quidem per hoc à charitate distinguitur, quæ est amor amicitiae. Atqui actus quo quis alteri optat beatitudinem quatenus est illi bona, non est amor concupiscentiæ, siquidem hic amor tendit semper in proprium bonum amantis, seu sperantis. Confirmatur, quia universaliter loquendo, velle sibi bonum alicujus virtutis, & illud velle aliis, non pertinet ad eandem virtutem, quia charitas erga

proximum inclinatur ad volendum aliis bonum cujuslibet virtutis. Unde, qui optat alteri castitatem, non ideo castus est, sed benevolus, & sic de cæteris. Ita ergo, si quis optat alteri beatitudinem, quatenus est illius beatitudo, non est amans sui, ac proinde nec sperans per virtutem spei Theologicæ, in qua essentialiter includitur amor concupiscentiæ erga nos, sed est amans alterius.

5. Objicies primò, Ille actus pertinet ad virtutem spei, qui habet pro objecto formali proprium motivum spei. At is quo proximo volumus possessionem Dei per auxilium divinum, habet pro objecto formali motivum primarium spei Theologicæ, & etiam secundariò fertur in secundarium ejus motivum. Ergo pertinet ad virtutem spei Theologicæ.

6. Respondeo negando minorem. Nam objectum formale & motivum spei est possessio Dei ut relata ad desiderantem, & ipsi bona. Idque pari modo intelligendum est de omnibus aliis virtutibus à charitate erga alterum distinctis. Et ratio est, quia cum illæ virtutes sint ex ratione generica quidam nostrî honestus amor, omnes differentiæ quæ rationi illi genericæ superveniunt, spectantur ut illam contrahentes, & diversificantes. Idque etiam verum est de justitia, quæ spectat effectum æqualitatis ut convenientem operanti.

7. Respondent aliqui negando eandem minorem, quia inquirunt, in amore concupiscentiæ, qualis est spes, objectum formale & specificans est bonum concupitum: in amore autem amicitiae, qualis est ille actus quo quis alteri optat beatitudinem ut bonam illi, objectum formale & specificans est persona amata. Unde fit ut actus quibus quis desiderat sibi diversa bona, sint diversæ speciei, actus verò quibus amico diversa bona desiderat, sint ejusdem speciei.

8. Sed contra est, quia si quis amico optet felicitatem æternam, & divitias quatenus sunt bonum temporale, item virtutem & gratiam Dei, & alio tempore voluptates malas, vel vindictam inimicorum, non possunt dici amores illi ejusdem speciei: siquidem actus bonus & indifferens, multoque magis bonus & malus, non sunt ejusdem speciei. Quare dicendum potius est, cum in omni amore sit quædam ratio amicitiae erga personam cui volumus bonum, & quædam ratio concupiscentiæ, in quantum volumus aliquid ipsi bonum aut in eo delectamur, idque vel per se illud bonum spectando, vel etiam per media volendo illud procurare, motivum cujusque amoris, quatenus habet rationem amicitiae, esse personam amatam, & per hoc distinguuntur amor Dei, nostrî, & proximi quatenus propter se amatur: motivum verò

eiusdem amoris quatenus habet rationem concupiscentiæ, esse bonum concupitum, & primum quidem in hoc genere motivum esse bonum per se volitum personæ, secundarium verò mediorum ad illius boni adeptionem ordinatum utilitatem. Quia verò omnes virtutes quibus varia bona nobis volumus, conveniunt in hoc quòd spectent eandem personam, nempe nos ipsos, ideo objecta distinctiva, & specificativa illarum, sunt bona ipsa concupita. Et quia hoc ipso quòd eadem bona volumus alteri, mutatur species, & hujus mutationis causa est personæ diversitas, ideo motivum quod distinguit charitatem erga alium à virtutibus illis quibus eadem bona nobis volumus, est ipsa persona alia à nobis: quod non impedit ne diversa bona relata ad alterum, & sub illò respectu volita, constituent etiam species amoris distinctas, sicuti & diversa bona ad nos relata, & nobis volita. Quare absolutè loquendo, id quod diversificat specie actus voluntatis, est diversitas objecti quod amatur, sive illud sit persona cui volumus bonum, sive ipsum bonum tali personæ concupitum.

9. Obicies secundò, Eadem charitate proximum, & nos diligimus. Ergo eadem spe proximo, & nobis bonum optamus.

10. Respondeo distinguendo antece-

dens, si tam proximum quàm nos diligimus propter Deum, quod idem est ac Deum in illo & in nobis diligere per extensionem amoris ejus in nos & in proximum, concedo: si nos propter nosmetipsos, & illum propter seipsum, nego.

---

## SECTIO OCTAVA.

*An spei nostræ insit certitudo, & quantitas.*

1. **A**dverte primò certitudinem, propriè loquendo, non convenire nisi actibus intellectûs, sed per metaphoram attribui actibus voluntatis, iis scilicet quibus bonum aliquod quod optamus, nos affecuturos speramus ac confidimus: quod analogiam quandam habet ad actum quo intellectus judicat aliquid cum exclusione dubitationis. Hæc certitudo meliùs dici potest securitas, seu motus voluntatis aut status carens anxietate & fluctuatione timoris.

2. Adverte secundò, non circa omnia quæ per quosvis actus spei honestatem habentes sperari possunt, quærendam esse illam certitudinem: siquidem potest aliquis optare, & petere à Deo divitias in ordine ad salutem, & non certò illas sperabit, sed tantum cum aliqua fiducia quæ incertitudinem non expellit, nec propterea desinit

ille actus habere honestatem spei, cum sit liber circa objectum quod ad finem spei reducitur ut medium quod esse potest utile ad talem finem. Idem dic de eo qui non modò suam felicitatem à Deo sperat, sed salutem filii, aut parentis, tanquam suæ beatitudinis complementum, quod suppono ipsum, ut possibile est, sperare sine peculiari & extraordinaria à Deo infusa fiducia. Talis enim actus erit similiter honestus honestate spei obtendentiam in finem ejus, non obstante certitudinis defectu. Quare satis est ad certitudinem spei, sive ad hoc ut ipsa simpliciter & absolutè certa dicatur, si quoad bonum quod finaliter & primariò spectat, veram securitatem speranti conferat, eumque imperturbabilem reddat circa expectationem talis boni.

3. Adverte tertiò, ad certitudinem ac securitatem quoad illud bonum, quatuor conditiones requiri. Prima est ut bonum illud sit possibile, seu à nobis acquisibile: alioqui spes omnino inanis esset. Secunda est ut detur aliquod medium ad illud assequendum planè efficax, ita ut quisquis tali medio utatur finem illum sit infallibiliter adepturus. Tertia, ut illud medium sit in potestate nostræ voluntatis, ita ut ab ipsa pendeat uti, vel non uti illo. Quarta, ut voluntas firmiter ac constanter velit profequi finem illum, & talia media qualia iam  
dictu n



dictum est, adhibere, atque ita velit ut parata sit quidvis agere, aut pati potius quàm ab ea intentione dinoveri. Quando enim aliquis vult determinatè & firmiter aliquid quod est planè in ejus potestate, etiam dependenter à virtutibus alienis ei non defuturis, dicitur esse certus de illa re. His positis.

4. Dico primò, spes nostra verè certa est, tuta, ac firma. Probatur primò ex verbis Apostoli ad Romanos. 5. ubi *spes*, inquit, *non confundit*. Et ad Hebræos 6. ubi spem appellat *anchoram animæ tutam ac firmam, incedentem usque ad interiora velaminis*, id est usque ad claram Dei visionem.

5. Probatur secundò quia in spe nostra prædictæ quatuor conditiones reperiuntur, quarum tres primæ ejus actui præsupponuntur. Nam primò beatitudo verè est possibilis per potentiam Dei, & merita Christi. Secundò dantur media efficacia quibus qui utitur infallibiliter ad illam perveniet, nempe gratiæ, sacramenta, præcepta, & consilia, etiam intus in corde à Deo intimata. Tertiò propositis illis mediis & auxiliis, voluntas nostra est indifferens, & præterea à Deo excitatur ad usum eorum: & hæc hæctenus, etsi in nobis quoad illa media proxima, tamen sine nobis, Deo hæc omnia providente



ac præparante. Quarta conditio per actum ipsius spei ponitur. Nam spes actualis est firma voluntas tendendi per illa media ad finem, donec eum assequamur. Itaque verè est certitudo in spe.

6. Dico secundò, spei nostræ certitudo tanta est, ut non quidem omnem timorem, sed primò omnem diffidentiam ex parte Dei, eorúmque quæ ab ipso pendent: secundò omnem absolutè desperationem, etiam ex parte nostri, imò & voluntariam omnem inquietudinem, seu deliberatam anxietatem, & angorem animi excludat.

7. Probatur conclusio per partes. Ac primò quidem quòd non excludat timorem, probatur tum ex Scriptura, quæ sic præcipit, *in timore & tremore salutem vestram operamini*. Tum ratione, quia cum spes aliquid includat ex parte nostri quod deesse potest ob inconstantiam nostræ voluntatis, justè quisque timere debet, ne id desit, nempe voluntas nulli peccato gravi, quod esset salutis obex, consentiendi.

8. Secundò quòd omnem diffidentiam excludat ex parte eorum quæ à Deo expectantur, probatur quia & bonitas Dei, & fidelitas post promissiones, de iis dubitare non finit.

9. Tertiò quòd omnem & despera-

tionem, & etiam deliberatum angorem excludat, probatur, quia in hoc ipso consistit virtus ac generositas spei nostræ, ut nimirum voluntatem nostram determinet ad constantiam quæ præsuppositis ex parte Dei tribus prioribus conditionibus, summè rationalis, & planè laudabilis, ac necessaria est.

10. Hîc nota quod sacri Doctores tradunt, non eandem in omnibus esse certitudinem spei, sed in quibusdam esse majorem, & in aliis minorem pro diversa dispositione voluntatis eorum. Qui enim plura peccata committunt, & pauciora bona opera faciunt, spem habent infirmiore, quia illa minùs participat de quarta conditione: & defectus ille etiam illos privat multis Dei auxiliis, quibus seipsos reddunt indignos. Contrà autem qui perfectiùs vivunt, spem habent firmiorem, etsi magis forte impugnatam motibus contrariorum affectuum. Ratio est, quia spes eorum magis participat de illa conditione, in qua sola posset esse defectus: & voluntas illa firma tendendi per media ad finem, dum bona opera & merita multiplicat, reddit illos abundantioribus gratiæ auxiliis dignos, quæ proinde illis à Deo sponte munificentissimo non deerunt.

## SECTIO NONA.

*An spes maneat in Beatis.*

1. **C**um subjectum spei, sicut & cuiusvis alterius virtutis sit duplex, unum proximum, quod est potentia aliqua animæ cui immediatè inest : & remotum, quod est ipsum suppositum, seu persona quæ sperat; circa primum illud non est dubium quin spes habeat pro subjecto voluntatem, ut docet Sanctus Thomas 2. 2. q. 18. art. 1. cum nimirum spes sit animæ motus in bonum ut sic, circa verò subjectum remotum aliqua sunt certa, & aliquid controversum.

2. Primò certum est spem tam quoad actum, quàm quoad habitum posse esse in omnibus viatoribus hujus vitæ, & reipsa esse in omnibus existentibus in purgatorio, quia ab istis omnibus desideratur, aut desiderari potest efficaciter suprema beatitudo.

3. Secundò certum est, reipsa inesse in iustis omnibus, quia charitas spem supponit, etiàmque in peccatoribus remanere, nisi peccatum cuius sunt rei, sit contrarium spei, ut postea ostendetur.

4. Tertiò, certum est fuisse olim spem in existentibus in limbo Patrum, quia illi

sine dubitatione aut vacillatione promissam beatitudinem expectabant.

Quartò. Certum est spem non esse in damnatis, sive illi sint in inferno, sive in limbo puerorum, ut docet Sanctus Thomas, quæstione 18. articulo 3. ex communi sententia, quia nimirum non est illis possibilis beatitudo supernaturalis, cujus possibilitatem spes supponit. Imò nec est fides, quæmetiam eadem spes supponit.

5. Quintò certum est spem quoad actum quitali nomine importatur, nempe quoad desiderium efficax beatitudinis ut futuræ, non esse in beatis, quia nemo sperat vel desiderat quod jam habet. Unde Apostolus ad Romanos 8. *spes, inquit, quæ videtur non est spes. Nam quod videt quis quid sperat.*

6. At vero dubium est inter Doctores an sit in Beatis habitus spei propter actus qui beatorum statui non repugnant, ut sunt amor, & gaudium de propria beatitudine tam essentiali quàm accidentali, utrâque sumptâ ut est bonum ipsorum.

7. Deinde spes alicujus beatitudinis accidentalis nondum possessæ ut est gloria corporis, item spes alicujus boni contingenter accidentis ad beatitudinem eorum, ut est salus eorum pro quibus sunt solliciti. Et circa hoc tres sunt præcipuæ sententiæ.

8. Prima negat omnino spem in Beatis tam quoad habitum, quàm quoad omnem actum, ita Cajetanus. Aragonius, & alii Thomistæ ad quæst. 18. Sancti Thomæ articulo 2. ubi & volunt hanc esse Sancti Thomæ sententiam.

9. Secunda sententia est in Beatis esse verum actum spei ante resurrectionem, quo nimirum sperant beatitudinem corporis: habitum verò spei non esse in illis ne post resurrectionem, vel sit amittendus, vel frustra in æternum permaneat. Quia in sententia supponitur habitum spei non posse versari nisi circa bonum futurum: itaque reipsa talem esse essentialiter, qualis denominatur. Ita Vasquez, in 3. partem disputatione 14. cap. 22.

10. Tertia sententia est, Beatis inesse habitum spei, non quoad actum à quo denominationem sumit, quique connotat illam imperfectionem spei, quæ est carentia beatitudinis, sed quoad alios actus qui nullam imperfectionem includunt, ut sunt amor & delectatio de omnibus & singulis bonis quæ possident, sumptis prout bona sunt ipsis. Ita Suarez in 3. partem tomo 3. quæst. 7. in commentario articuli 4. & disputatione 1. sectione 8. numero 5. post Durandum in 3. distinctione 21. quæst. 3. & 4. & Gersonem libro de vita spirituali, qui docent spem

tam quoad habitum, quàm quoad actum manere in beatis. Et huic sententiæ favet Divus Thomas 1. 2. quæst. 2. & in supplemento quæstione 95. articulo 2. ubi inter dotes animæ beatæ, seu inter ea quæ requiruntur ad beatitudinem, numerat etiam delectationem spei respondentem; & 3. parte quæstione 7. articulo 9. ad 1. ubi dicit, licet in Christo non fuerit spes quoad defectum, fuisse tamen quidquid est perfectius in spe. Quare cum loco supra citato dicit Sanctus Thomas in beatis non remanere spem, id intelligendum est de spe in ratione propria spei, prout dicit carentiam boni sperati ac futuri, quo modo includit defectum; non autem de spe prout ipsa est amor rationabilis ac perfectissimus erga nostrum summum bonum, prout est bonum nostrum, cum nullo modo Sanctus Thomas talem amorem excludat à beatis. Eidem opinioni favet etiam Alensis 3. parte quæstione 12. numero 3. ad 1. ubi ait in Christo quidem non fuisse spem in ratione spei, fuisse tamen in illo quod est perfectionis in spe, scilicet adhæSIONem ad bonum, sed non cum illa imperfectiōe quæ est expectatio boni quod nondum habetur. Quod si admittitur in Christo amor boni, qui est essentia & perfectio spei, non est cur id negetur in beatis.



11. Dico igitur, in beatis esse habitum qui in nobis appellatur spei habitus, & aliquem actum talis habitus proprium, non tamen eum à quo ille habitus spei denominationem sumit.

12. Ut hæc conclusio probetur à priori, supponenda sunt duo, unum quod satis constat ex dictis hætenus, videlicet habitum illum, qui appellatur spei, essentialiter esse habitum charitatis supernaturalis erga nos ipsos, in hoc à charitate distinctum quod Deum, quem illa respicit ut bonum in se, hic spectet & amet ut bonum nobis. Idque confirmatur quia ex quo homo elevatus est à Deo ad finem supernaturalem, non tantum propter gloriam Dei, sed etiam propter ipsius hominis bonum, quod conjunctim Deus intendit ex vera amicitia erga hominem, decuit à Deo illi dari facultatem, non modo quâ Deum ipsum propter se diligeret, sed etiam quâ sibi illud bonum amaret.

13. Alterum est beatis quoque inesse amorem felicitatis quam possident, & gaudium de illa perfecta Dei possessione. Quod probatur primò, quia rationabilis est & honestus ille amor, utpote finis proprii, ad quem sunt creati, & boni quod licet non sit possidentibus de se arduum, est tamen de se arduum homini per



se sumpto, quod sufficit ad objectum virtutis. Secundò quia esset aliquid violentum in statu beatorum, si de præsentì tanta fælicitate non gauderent ob seipso, nec eam per se amarent. Adde quòd cùm Deus velit beatitudinem illorum, non modò ut utilem ad suam ipsius gloriam, sed etiam ut illis bonam, vult hoc ipso illos gaudere de illa, & ipsâ frui subordinatè ad illum superiorem finem.

14. Neque dicas melius esse ut suam fælicitatem diligant tantùm quatenus Deo gloriosam. Nam etsi de ea gaudere ut Deo bonâ, melius sit quàm de ea præcisè gaudere ut sibi bonâ, tamen de ea gaudere simul & ut Deo, & ut sibi bonâ, ex charitate simul in Deum & ex amore honesto erga seipso, melius est quàm de ea gaudere præcisè ut Deo bonâ. Bonum enim additum bono facit aliquid melius, cùm neutrum alterum destruit, aut imminuit, ut hîc contingit, cùm amor beatitudinis propriæ nullo modo impediat ne sint parati ea carere, si id ad Dei gloriam pertineret.

15. Quòd si quia melior est amor beatitudinis ob Deum, quàm quivis alius ejusdem amor, non amarent sancti suam beatitudinem nisi ob Deum, id probaret in iis nullam aliam esse virtutem nisi charitatem, quia omnia quæ honestè aman-

tur per motiva aliarum virtutum, perfectius amantur per motivum Charitatis. Et hinc etiam sequeretur in Christo nullam fuisse virtutem, nisi Charitatem ob eandem rationem; & in primis sequeretur non fuisse in illo Charitatem propriam erga seipsum, cuius contrarium constat ex eo quod animam suam dilectam se dedisse pro nobis, ipse per Ecclesiam asserit, & liberam habebat displicentiam suæ mortis, licet inefficacem, ut testatur illa oratio ad Patrem. *Si possibile est, transeat à me calix iste.* Matth. 26. 18. Neque enim loquitur de sola repugnantia sensus interni, sed de statu quoque suæ voluntatis laudabili & per se honesto. Nam perfectissimum erat cum amore vitæ inefficaci, stante illo amare, sed inefficaci, mortem subire: quod sacrificium pretiosius, & æstimabilius facit. Quod si suam Christus vitam amavit ex amore rationali erga seipsum, quia secundum rectam rationem id cum moderatione decet, estque honestum; multò magis idem Christus beatitudinem suam, eamque essentialem amat ex eodem quoque, licet non solo, nec præcipuo, aut summo motivo. Unde & in beatis, idem quoque amor admitti necessario debet. Ex his igitur conficitur assertionis probatio in hunc modum. Amare beatitudinem ut sibi bonam, &

de ea ut tali gaudere, est actus proveniens ab illo habitu qui essentialiter est Charitatis propriæ, supernaturalis, & in nobis ob actum huic statui proportionatum, vocatur habitus spei. At sancti in cœlo suam beatitudinem amant ut sibi bonam, & de ea ut tali gaudent. Ergo habent actum qui de se provenire aptus est ab illo habitu, ac proinde & ipsum habitum. Major confirmatur, quia ejusdem virtutis est desiderare aliquod bonum cùm est absens, & de eo gaudere cùm est præsens: & in hoc manet semper idem amor, cui contingens est illa diversitas actuum pro contingenti in objecto suo accidentali diversitate absentiae vel præsentiae. Minor etiam confirmatur, primò quia in gaudio de felicitate ut propria, nullus est defectus, qualis in fide, quæ per se est obscura. Itaque nihil est cur tale gaudium non sit in beatis. Secundò quia ratio præmii id exigit ut bonum quod est præmium, ejusmodi sit, ut de eo adepto gaudere non dedeceat. Cùm itaque beatitudo nostra ut nostrum bonum est, sit præmium nobis à Deo propositum, non dedecet eos qui eam sunt adepti, gaudium de illa adeptione: ac proinde tale gaudium est in illis.

16. Objicies, Apostolus primæ ad Corinthios 13. hanc ait esse singularem prærogativam Charitatis, quòd nun-

quam excidat. Et in fine capitis ait. *Nunc autem manent fides, spes, charitas: tria hæc, major autem horum est charitas.* Unde communiter colligunt Patres solam ex virtutibus Theologicis manere in patria charitatem.

17. Respondeo quoad primum, id eminentiùs charitati tribui, quod nunquam excidat, sed non id aliis virtutibus denegari, quia etiam religio, & aliæ virtutes in patria manebunt.

18. Quoad secundum, sermonem ibi esse de spe secundum vim vocis, non autem secundum totam latitudinem habitûs accepta. Nempe sermo est de illis actibus quibus in bonum nondum possessum tendimus, non autem de illis qui boni possessionem consequuntur, sùntque ab eodem habitu supernaturalis erga nos amoris, aliter se habente objecto.

19. Dices, inter passiones gaudium, & spes differunt. Ergo similiter spes beatitudinis futuræ, & delectatio de ea specie differunt: ac proinde non pertinent ad eundem habitum.

20. Respondeo primò non differre specie morali, sive in ratione virtutis. Nam quod sperare bonum est, de eo quoque adeptò gaudere est bonum, eâdem saltem genericè bonitate quæ tantum per circumstantias diversificatur.

21. Respondeo secundò nos hîc tantùm contendere quod sint ab eodem habitu spectante per se summum nostrum bonum, qui habitus cùm habeat rationem potentiæ, est causa actuum specie differentium.

---

## SECTIO DECIMA.

*An timor sit Actus speci.*

1. **N**Ota primò, timorem esse de se honestum, si id quod timetur est vel de se malum & illicitum, vel carentia boni honesti ac per se laudabiliter expetibilis. Nam ejusdem sunt rationis in ordine ad regulam morum, prosequi bonum honestum, & fugere, aut averfari contrarium ejus: unde & timor mali quod alicujus virtutis objecto formali est oppositum, ad eandem virtutem pertinet, estque actus illius. Sic fugere impudiciam est actus castitatis: injustitiam, actus justitiæ: & sic de cæteris.

2. Nota secundò timorem Dei alium esse filialem, alium esse servilem: quæ divisio sumpta est ex Sanctis Patribus, & in primis ex Augustino, qui tractatu 9. in Epist. 1. Joannis, hoc discrimen ponit inter hos duos timores, quòd posterior pœnam metuat, vitetque culpam propter

pœnam : prior separari metuat ab amicitia Dei, & hujus separationis metu vitet culpam, utrumque verò comparat timori duarum mulierum, quarum una vitet adulterium præcisè quia timet ne à marito puniatur, altera vitat adulterium ex amore erga maritum, & ob hanc comparisonem timorem filialem idem Sanctus Doctor vocat castum timorem, quia facit ut anima timeat separari à Christo sponso suo per peccatum.

3. Nota tertio, Timorem servilem subdividi in eum qui præcisè servilis est, & in eum qui dicitur serviliter servilis. Servilis præcisè est ille quo quis ita timet pœnam de se timendam, ut propter pœnam evitandam, verè simpliciter & absolute abhorreat à peccato. Serviliter servilis est quo quis ita timet pœnam, ut ad eam quidem evitandam nolit committere id quod est prohibitum; sed & simul habeat positivam voluntatem de illo committendo, si pœna delictum non sequeretur. Unde is, licet nolit absolute ipsam executionem peccati ex parte objecti, vult tamen eam absolute ex parte subjecti, & conditionatè ex parte objecti, ita-ut nihil desit nisi conditio ex ista parte objecti, quominus omni modo absolute velit peccare, & ex vi voluntatis quam habet, peccaret si illa conditio poneretur. His præmissis.

4. Dico primò. Timor serviliter servilis non est bonus, sed omnino malus. Probatur primò quia semper malum est, velle peccare, in illo autem timore includitur voluntas peccandi absoluta ex parte subjecti, & amor actualis rei de se illicitæ. Secundò quia sicut inordinatè amare aliquid quod de se amore aliquo sit dignum, non obstantè illa amabilitate, est malum, putà patrem plùs diligere quàm Deum, ita inordinatè averfari id quod de se est odibile, non obstante illa odibilitate, est malum. Atqui is qui timore serviliter servili à culpa abstinet, inordinatè averfatur pœnam, quia illam plùs positivè timet quàm culpam; unde illam timet summo timore, seu ut supremum malum, cùm tamen culpa sit summum illud malum, & summè odibile.

5. Dico secundò, Timor qui præcisè est servilis, est bonus. Conclusio quam omnes Catholici Doctores tradunt, constat primò ex Concilio Tridentino, sessione 6. capite 6. & sessione 14. cap. 4. constat secundò, quia ille actus est honestus quo quis oppositum boni de se honestè expetibilis, sine ulla aliunde accidente inordinatione formaliter averfatur. Hæc autem omnia contingunt in illo timore. Nam primò in eo nulla est inordinatio, sicut enim cùm licet prosequi finem, licet



amplecti media quæ de se ad illum ducunt, si aliunde nihil mali causant aut inferunt. Ita si licet fugere aliquod malum, licet quoque fugere ea quæ ad illud ducunt, si in iis fugiendis nihil aliunde peccatur. Hoc autem totum hîc contingit, nam ut fugiatur malum quod ex natura rei fugere licet, nempe privatio beatitudinis & damnatio, fugitur id quod illud malum de se causat, nempe peccatum: & in fugiendo peccato nulla est ratio mali: itaque nulla est in illo timore inordinatio. Jam quod per illum timorem fugiatur malum de se oppositum bono honestè expectibili, patet, quia fugitur oppositum beatitudinis supernaturalis. Illa autem est bonum quod per se expetere honestum est, siquidem est bonum finale, quod homo tenetur prosequi, & hîc ipso quod supernaturale est, est bonum arduum, ut hîc docet Suares. Imò, etsi non esset supernaturale, esset adhuc de se arduum & difficile acquisitu, quod sufficit ad rationem honesti, si ratio ardui ad eam necessaria est. Igitur per timorem hunc fugitur oppositum boni quod de se expetere est honestum. Quare actum illum esse honestum necesse est.

6. Dices primò, per illum timorem magis homo timet pœnam quàm culpam, quia timet culpam propter pœnam.

7. Res

7. Respondeo distinguendo, magis absolute, quasi dicat sive formaliter sive æquivalenter, plus timeo pœnam quàm culpam, & si disjunctivè unum esset amplectendum, magis eligerem peccare quàm pati pœnam, nego. Hic enim actus de se esset malus: magis causaliter, in quantum pœna verè est causa motiva ad vitandam culpam, non autem culpa est causa motiva ad vitandam pœnam; concedo. Sed in hoc nihil est mali, quia non tenetur homo ad certum ac perfectiorem modum fugiendæ culpæ, sed tantum ad eam fugiendam; aut, si admisit culpam, non tenetur ad certum ac perfectiorem modum ejus abolendæ, sed ad ejus abolitionem quærendam aliquo modo sufficiente quicumque ille sit. Est autem sufficiens ille timor, & odium culpæ ex illo conceptum cum Sacramento. Unde non peccat contra ullum præceptum obligans ad aliquid perfectius.

8. Dices secundò. Qui timet culpam ob solam pœnam, excludit Charitatem erga Deum. Ergo peccat. Antecedens probatur, quia bonum ejus est illi finis ultimus.

9. Respondeo negando antecedens. Ad probationem distinguo, ultimus positivè, quasi dicat, nolo quidquam ulterius quærere quàm bonum meum, nec fugere

nisi malum meum, nego: ultimus negativè, in quantum per illum actum nihil de facto ulterius quærit, & circa alia non versatur, concedo. Non semper autem homo tenetur quærere suum ultimum finem positivè, ipsúmque actu amare, & intendere.

10. Dico tertidò. Timor qui præcisè est servilis, seu quo quis modo supradicto timet pœnam æternam, sive damni, sive sensûs, aut etiam pœnas temporales purgatorii, est actus spei infusæ. Assertionem communiter docent Theologi, & probatur, quia ejusdem virtutis est ferre voluntatem in eam bonitatem quam respicit pro objecto, & ab opposito malo avertere. Atqui spei est ferre voluntatem ad prosecutionem beatitudinis. Ergo ejusdem est voluntatem avertere à malis quæ beatitudinis consecutionem impediunt. Quia ergo pœnæ inferni & purgatorii beatitudinem tollunt; illæ quidem in perpetuum, hæ verò ad tempus, spei est ab illis voluntatem avertere: quod fit per timorem. Dixi pœnas inferni aut purgatorii, quia si quis timeat mala pœnæ quæ à Deo nobis in hac vita infliguntur, iste timor non erit actus spei Theologicæ, nisi timeantur illa quatenus apprehendantur fore impedimentum salutis, & aliquorum peccatorum occasio. Alioqui non

spectaretur objectum formale spei Theologicæ quod est Deus ut nobis bonus.

11. Dices , satis esse si à Deo temporalia mala timeantur. Respondeo id supponere objectum primum, & distinctivum spei esse Dei potentiam, eamque non præcisè ut effectivam salutis , sed cujusvis boni , quod est falsum. Addo si quis ab homine improbo , vel Dæmone timeat periculum salutis ob prava consilia , vel malas suggestiones, hunc esse actum spei , quia per illum homo averfatur malum bono oppositum, quod spes per se intendit.

12. Dico quartò. Timor filialis est actus ab habitu Charitatis elicitus. Ita Theologi communiter. Probatur ex eodem principio ac suprà , quia nimirum ejusdem virtutis est prosequi bonum aliquod honestum , & vitare oppositum ejus quatenus tali bono oppositum est. Atqui Charitatis est amare divinam bonitatem secundum se , & velle placere Deo. Ergo ejusdem est fugere , & timere ea quæ divinæ bonitati contrariantur , eique displicent.

13. Quæres quomodo intelligendum sit illud Joannis. *Charitas forasmittit timorem*. Respondeo sensum esse per illam expelli anxietatem atque inquietudinem, maximè deliberatam , quâ quis sine congrua spe dubitat an sit salvandus. Ratio cur expellat

illam liberam saltem anxietatem & fluctuationem, est, primò quia quò quis magis diligit aliquem, magis in eo fidit, si suum amorem scit esse alteri notissimum, ut pote causativum amoris reciproci. Secundò quia charitas excludit obices salutis, nempe peccata omnia mortalia, quibus sublatis minor est causa cum tali inquietudine timendi.

---

## SECTIO UNDECIMA.

### *De peccatis spei oppositis.*

1. **N**Ota triplici modo posse aliqua vitia virtuti esse contraria. Primò formaliter, cum quod de se prosequitur virtus, vitium de se averfatur. Sic Charitati contrarium est odium Dei, quod averfatur bonum, & gloriam Dei, quam Charitas per se intendit. Secundò causaliter & antecedenter, cum vitium de se est formaliter oppositum alicui quod ad virtutem illam prærequiritur, estque aliquo modo causa illius. Sic charitati opponitur infidelitas & desperatio, quia hæc duo tollunt de se fidem & spem, quæ sunt aliquòd prærequisitum ad Charitatem, & aliquam in illam causalitatem habent: fides quidem, ut necessarium illius principium: spes verò, ut dispositio, etiam con-

naturaliter necessaria. Tertiò indirectè, cùm vitium tendit in aliquid quod licet sit oppositum bono quod est objectum virtutis, non tamen tendit in illud sub tali ratione, sed sub alia. Sic Charitati opponuntur varia particularia peccata, putà ebrietas aut luxuria, quæ intendunt voluptatem contrariam quidem gloriæ Dei, non tamen quatenus illi oppositam, cùm eam intendunt ut conformem sensui.

2. Dico, spei formaliter opponitur desperatio; causaliter atque antecedenter infidelitas; indirectè omnia alia peccata. Assertio est conformis communi Theologorum doctrinæ. Prima pars probatur, quia desperatio est actus quo quis statuit directè & formaliter non prolequi beatitudinem, neque media ad eam obtinendam necessaria adhibere, itaque per se ab eo recedit quod per se prosequitur spes. Et hinc desperatio habitum spei supernaturalem demeritoriè totum in instanti tollit, juxta communem & certam Theologorum doctrinam.

3. Dicunt aliqui apud Turrianum in 2. 2. disputatione 74. quæstione 1. desperationem esse actum intellectûs, quo quis liberè, & deliberatè judicat se non esse salvandum.

4. Sed contra est primò, quia cùm spes sit actus à voluntate elicitus, etiam

desperatio, quâ nihil magis ipsi directè oppositum est, debet esse actus voluntatis. Secundò quia iudicium illud potest esse tantum consequens illam quam dixi, voluntatem non prosequendi beatitudinem. Nam sit aliquis voluptatum illecebris irretitus, & statuatur nunquam eas abjicere, ac proinde non prosequi beatitudinem, sciens se inde damnandum, & suo malo consentiens; nemo est qui non dicat illum hoc ipso peccare peccato desperationis; & tamen iudicium quo cognoscit se nunquam esse salvandum, est posterius tali voluntate, in qua illud fundatur, & ante quam illud non est verum. Et hinc collige, posse aliquem desperare absque eo quòd iudicet, beatitudinem sibi esse impossibilem, quamvis sæpius & connaturalius ex tali iudicio culpabili, & divinæ bonitati maximè injuriolo oriatur.

5. Secunda pars probatur quia infidelitas, itémque hæresis destruit totaliter, & in instanti habitum fidei demeritoriè seu ob formalem oppositionem cum eo. Itémque per infidelitatem tollitur actus fidei, & per hæresim tollitur saltem supernaturalitas actûs fidei. Spes autem infusa supponit fidem supernaturalem; habitualis habitualem, & actualis actualem: & verè causatur spes à fide ut à causa anteriore necessariò ad eam requisita. Ergo



per ipsam destructionem fidei infidelitas itémque hæresis causaliter & radicaliter opponuntur spei.

6. Tertia pars probatur, quia omnia alia vitia intendunt aliquid quod verè est oppositum bono quod intendit spes, nempe beatitudini, non tamen illud intendunt quatenus contrarium illi bono: itaque indirectè opponuntur spei.

7. Dices Præsumptio videtur plùs quàm indirectè opponi spei. Nam videtur esse vitium ei oppositum per excessum, ita ut desperatio & præsumptio se habeant ad spem, sicut avaritia & prodigalitas ad liberalitatem, & similia.

8. Respondeo præsumptionem, si sit confidentia in propriis viribus, opponi potius humilitati, & esse superbiæ speciem: si autem sit confidentia in bonitate Dei, non obstante defectu bonorum operum & demerito peccatorum, esse primò quemdam errorem contra rectam de Deo fidem, & sic opponi spei radicaliter, in quantum reductivè pertinet ad infidelitatem aut hæresim. Secundò esse spem falsam, & depravatam ex circumstantia intrinseca injuriæ quæ fit Deo per illam fiduciam, quòd sit semper auxilia efficacia collaturus, etiam iis qui negligunt bona opera, & se in vitia effundunt. Illa autem circumstantia non habet malitiam directè

oppositam spei quæ est amor beatitudinis, sed oppositam recto Dei cultui. Est enim contra cultum Dei & religionem, sic expectare auxilium Dei : idque repugnat sanctitati ejus, & est quædam impietas, sicut & desiderare, & expectare auxilium Dei ad faciendum malum.

9. Instabis, Præsumptio nimis sperat in divinæ bonitatis auxilio, in quo spes sperat eo modo quo decet, nempe conjungendo bona opera cum illo. Ergo est vitium spei oppositum per excessum.

10. Respondeo hanc instantiam supponere objectum formale & disjunctivum spei esse bonitatem Dei, ut est causa auxilii ad salutem : quod esse falsum ostensum est, sectione tertia. Quia igitur præsumptio non recedit directè ab hoc bono, non est peccatum formaliter & directè oppositum spei. Consequentia probatur, quia ut actus sit formaliter oppositus alicui virtuti, debet per se recedere ab eo bono in quo tendit illa virtus, sicut prodigalitas recedit à mediocritate in dando, quam per se prosequitur liberalitas. Quod si quis actus tendit in idem bonum, in quod aliqua virtus, sed cum aliqua inordinatione circa media, non directè opponitur illi virtuti. Sic qui egenum juvat, dando eleemosinam ex pecunia divitis, non peccat peccato quod per se fit

sit oppositum misericordiæ. Pari ergo modo quia præsumptio tendit in idem bonum in quod spes, sed cum inordinatione quæ versatur circa media, aut causam mediorum, nimium confidendo in Dei bonitate, est quidem opposita spei, & magis quàm aliqua alia peccata, putà quàm ebrietas, sed non ut species directè & formaliter spei opposita, quo modo desperatio eidem spei, & odium eidem charitati opponitur. Confirmatur, quia ex communi sententia per peccatum præsumptionis non amittitur spes, cum tamen virtutes theologice per peccata directè ipsis opposita amittantur.

11. Adverte ad desperationem reductivè pertinere actus illos qui ad eam disponunt, aut aliquo modo ejus rationem participant, nempe fluctuationem voluntatis circa propositum amplectendi constanter media ad salutem necessaria. Itémque voluntatem adeundi periculi de æterna damnatione, ut si quis videns se damnandum, si in singulari certamine vulnus accipiat quo in corde lædatur, se tamen illi discrimini exponat.

12. Quæres quantum peccatum sit desperatio, & an sit gravius infidelitate. Respondeo ad primum esse mortale gravissimum, quia graviter lædit Deum, ut super omnia nobis amabilem, & capacem beati-

ficandi omnes visione sui, & maximè repugnat obligationi quam habet homo tendendi ad illud suum summum bonum, & finem ultimum.

13. Ad secundum, respondeo infidelitatem esse ex genere suo graviolem, quia in infidelitate continetur etiam atheismus, qui est peccatum gravius desperatione, cum neget Dei existentiam, ejusque omnes perfectiones. Hoc autem non impedit ne desperatio ob prædictas causas sit peccatum de se gravius iis contra fidem peccatis, quibus non negatur existentia Dei, nec veracitas ejus, sed tantum negatur Deum aliquid dixisse quod re ipsa dixit, aut illud in alienum sensum contra evidentem credibilitatem veri sensus explicatur, quia sic non tam graviter læditur Deus.

---

## SECTIO DUO-DECIMA.

*An possit Deus alicui revelare suam damnationem ob peccata futura.*

I. **A**Dverte primò, ut revelet Deus alicui damnationem propter peccata futura, duo necessaria esse. Primum est, ut verum sit tam peccata quæ erunt causa damnationis, quàm ipsam consequenter damnationem futuram esse independentem à revelatione, & antecedenter ad eam, si

nimirum homo sit in tali peccandi occasione, ita ut hâc præcisè positâ, sit peccaturus. Nam ad veritatem propositionis speculativæ, seu merè declarativæ, requiritur ut veritas objecti ipsi præsupponatur, in quo talis propositio distinguitur à practica, quæ sui veritatem facit, faciendo objectum quod significat. Atqui revelatio quâ Deus alicui prædiceret suam damnationem ob aliquod certum ac determinatum peccatum, quod quoad omnes circumstantias declarabitur, esset propositio merè declarativa, non autem practica. Nam Dæmonis est in Angelum lucis transfigurati, revelare alicui damnationem revelatione quam velit esse practicam objecti sui, & inductivam mediante desperatione in damnationem. Ergo requiritur ut ipsa damnatio, & peccata ob quæ continget, habeant suam futuritionem antecederet ad revelationem, idque Deus per scientiam conditionatam prænoscat, quæ etiam posito decreto de homine ponendo in tali occasione transibit in absolutam præno- tionem rei infallibiliter eventuræ, etsi nondum de ea habeatur scientia visionis, non determinatis quæ addi possunt circumstantiis antecedentibus positionem rei, putà quòd peccet non obstante cognitione revelationis.

2. Secundum est, ut illa damnatio, &

peccata ob quæ continget, sint etiam futura conditionatè in ipsa circumstantia talis revelationis si fiat, idque Deus videat per alium scientiæ mediæ actum, qui sic exprimitur: Si revelavero illi homini damnamandum ipsum propter illud peccatum quod tali tempore est commissurus ex hypothesi quòd sit in tali peccandi occasione, adhuc non obstante revelatione peccabit, & revelatio non impediet determinationem ejus ad peccatum, quæ ut foret per se absolutè, si non fieret revelatio, ita erit quoque ipsâ positâ, nec mutante propositum ejus. Ratio cur id requiratur, est quia alioqui revelatio antecederet ad talem futuritionem, & cognitionem, posset esse falsa, quia poneretur causa capax de se impediendi objectum ejus, nempe alia dispositio hominis, & cognitio ob quam posset nolle id quod ipsâ sublatâ voliturus fuisset, nam ex natura rei potest homo audiens tale malum eventurum ex peccato, spernere peccati illecebram, & velle tantum illud malum cavere, & conari ut impediat. Quare ut Deus revelet damnationem ob tale peccatum, requiritur ut verum sit ipsum peccatum esse futurum, etiam tali posita revelatione, quod omnino contingere potest, homine vel non credente revelationem, vel obliviscente cum peccati occasio advenerit, vel spernente

perinde ac si facta non fuisset. Id totum Deus prænoscere debebit, cum nihil debeat ignorare pertinens ad veritatem rei quam revelat. Sic revelatio & ipsum decretum faciendæ revelationis erunt posteriora tum futuritione effectûs ab homine ponendi, si non fieret revelatio, tum futuritione effectûs ab homine ponendi non obstante revelatione, tum cognitione quam Deus habebit de utraque illa futuritione. Et positis istis omnibus, si Deus decernat talem facere revelationem, jam præsciet absolutè peccatum futurum cum circumstantia revelationis. Nam qui scit aliquid futurum sub conditione aliqua contingenti, si sciat præterea futuram de facto illam conditionem, hoc ipso scit rem illam absolutè futuram. Quia igitur Deus sciet per scientiam mediam peccatum futurum in ipsa circumstantia revelationis si ipsa fiat, hoc ipso quod sciet revelationem futuram, quia volet ipsam ponere, absolutè præsciet illius circumstantiæ futuritionem. Et hæc omnia antecedunt scientiam visionis de peccato illo futuro, & de damnatione taliter secutura, quia ex quo Deus habet scientiam visionis quæ supponit ipsam existentiam rei pro sua differentia temporis, estque ipsâ existentiam posterior, implicat poni adhuc vel ponendam decerni causam illius rei impeditivam, etsi non



impedituram, cujusmodi est revelatio, ut dixi, ex natura rei. Quare ut Deus decernat revelare peccatum, oportet ut huic decreto præluceat cognitio antecedens existentiam peccati, quæ hîc est duplex, una quòd si hic homo ponatur in talibus circumstantiis, sit peccaturus, alia quòd etsi ei reveletur tale peccatum & damnatio inde secutura, adhuc sit idem factururus.

3. Adverte secundò, ut illa duo necessaria sunt ad hoc ut Deus revelet damnationem alicujus ob peccatum futurum, ita & sufficere ut ex iis intelligamus nullam esse in tali revelatione, aut ejus objecto implicantiam. Nam si qua esset, consisteret in altero ex his duobus, vel quòd homo accepta illa revelatione non esset liber ad peccatum ob quod damnandus esset, vel quòd illam revelationem falsificare posset. Atqui neutrum ex his continget si revelationem præcedat tum futuritio peccati independens à revelatione, ipsamque antecedens, tum futuritio ejusdem peccati in ipsa circumstantia talis prædictionis. Ergo ex illis duobus præsuppositis, seu ex duplici illa prioritatem actûs tum per se, tum sub tali conditione spectati, & posterioritate revelationis ad utramque illam futuritionem, constat nullam hîc occurrere implicantiam. Primò enim homo restabit liber, quia id quod

est posterius actu , non tollit libertatem ejus , cum non impediat antecedentem indifferentiam principii proximi , ipsum producentis. Atqui revelatio erit naturâ posterior determinatione illius actûs , quia supponet tum futuritionem illius absolutam , tum futuritionem conditionatam in ipsa circumstantia & sensu composito ipsius revelationis. Ergo revelatio nullo modo obstabit libertati actûs.

4. Neque dicas ipsam esse priorem actu in quantum hominem avertit ab illo actu , nempe si homo excitetur ad abstinendum ab actu , ut revelationem falsificet , vel ut prænunciatum malum avertat. Nam sic est prior per se spectata & secundum suum esse absolutum , quod de se relinquit indifferentiam ad agendum , sicut eam relinquunt alia principia avertentia à malo , ut sunt Dei inspirationes & consilia ; sic , inquam , illo modo est prior , ut quatenus prævisa , ac proinde etiam ut renunciata inefficax , sit posterior , sicut & gratia sufficiens , licet secundum suum esse absolutum sit prior omissione actûs boni aut commissione actûs mali à quo avertit , tamen formaliter ut sufficiens est posterior actu malo , à quo habet ut sit tantum sufficiens. Sicuti igitur hæc gratia , licet infallibiliter sufficiens & non efficax , non tollit libertatem ob postero-

ritatem sufficientiæ respectu actûs , ita etiam revelatio quæ erit prævisa & præ-nunciata inefficax , etsi ei inefficacitas ista infallibiliter conveniat , non tamen tollet libertatem , sive antecedentem indifferen-tiam actûs , quia similiter inefficacitas ista , & ejus infallibilitas sunt aliquid de se posterius actu non impedito , & aliunde à principiis ipso anterioribus suam deter-minationem habente.

5. Jam quòd homo positâ illa postero-ritate revelationis ad determinationem peccatû tum per se , tum sub tali conditione futuram , non posset falsificare ipsam reve-lationem , probatur , quia causa libera , etsi libera , non potest per exercitium suæ li-bertatis falsificare id quod verum est ve-ritate consequente id ad quod se determi-nabit , ex quo oritur infallibilitas præ-scientiæ Dei , & prædictionum quæ ab eo fiunt circa actus liberos , quia nimirum hæc omnia supponunt illam determinationem sive absolutè , sive conditionatè futuram , & ex ea ita oriuntur ut impossibile sit esse nisi ab ea , priùs naturâ se habente , pro-veniant. Et ratio ulterior est quia , etsi vo-luntas sit libera ad utramque partem con-tradictionis , aut etiam contrarietatis , non potest conjungere unam partem cum iis quæ sunt posteriora ad aliam , nec possunt esse nisi ex hypothesi illius. Sic licet ali-

quis sit liber ad ambulandum aut non ambulandum, sive ad ambulationem aut stationem, non potest conjungere negationem ambulationis seu stationem, cum iis quæ sunt posteriora ambulatione, eamque supponunt, putà cum visione quâ alius videat ipsum ambulare. Hinc quia veritas ista, Antichristus peccabit, est aliquid consequens determinationem ejus ad peccatum, & multò magis præscientia Dei, quæ adhuc illam veritatem supponit, & multò adhuc magis prædictio illius peccati, quæ est veritate & præscientiâ posterior, etsi sit liber Antichristus ad peccandum aut non peccandum, non habet libertatem nec potestatem ad conjungendam negationem peccati, cum veritate hac quòd sit peccaturus, neque cum Dei præscientia, neque cum prædictione peccati quæ sit à Deo, quia sic posset conjungere unam partem contradictionis cum effectibus, alterius existentiam aut futuritionem supponentibus: quod per se implicat, cum impossibile sit dari potentiam ad conjungenda incompatibilia. Pari igitur modo censendum est de impossibilitate falsificandi revelationem damnationis factam à Deo, eo quòd hæc supponat præscientiam peccati, & damnationis, & veritates istas, homo ille peccabit tali peccato, & propterea damnabitur: quæ omnia sunt consequentia determina-

tionem quâ homo ille etiam revelationem de suo peccato & damnatione cognoscens, illud peccatum liberè committeret. Unde si ex hypothefi istorum omnium non peccaret nec damnaretur, conjungeret unam partem contradictionis ad quam est liber, cum iis quæ non possunt esse nisi ex præsuppositione alterius, & sunt naturâ posteriora ad illam, & non essent si illa tolleretur. Nam si non esset ille se determinaturus ad peccatum, nec esset veritas illa damnationis aut peccati præsciti, nec præscientia, nec revelatio. His præmissis.

6. Dico, potest Deus absolutè alicui suam damnationem revelare ob peccata futura. Ita plurimi Theologi post sanctum Thomam, qui quæst. 23. de veritate art. 8. ad 2. docet talem revelationem de potentia Dei absoluta esse possibilem, licet nunc ex hypothefi universalis præcepti de speranda ab omnibus felicitate, impossibilem esse censeat, eo quòd is cui Deus damnationem prædixisset, desperare cogeretur. Qua de re agetur infra sect. 14. Nunc ad præsentem assertionem, satis est quòd id fieri possit absolutè, & non implicet.

7. Probatur autem hæc sententia primò, quia potest fieri ut nihil desit eorum quæ suprâ ostensum est, ut necessaria esse, ita & sufficere ad possibilitatem ejusmodi revelationis. Potest enim contingere ut homo

antecedenter ad talem revelationem , sua libertate sit usus , ad peccatum ob quod Deus illum sit damnaturus. Item fieri potest ut verum sit , si Deus tali homini revelet suam damnationem ob illud peccatum , adhuc illum esse cum circumstantia talis cognitionis peccatorum. Quibus suppositis , Deus utramque illam futuritionem & peccati , & talis circumstantiæ illud non impedituræ , cognoscet. Nihil autem ultrà requiritur ad hoc ut possit Deus salva hominis libertate infallibiliter prædicere illud peccatum & damnationem inde secuturam. Et posito quòd velit revelare , hoc ipso habebit non modo scientiam conditionatam de futuritione peccati in circumstantia revelationis , sed præscientiam absolutam modo suprà explicato.

8. Probatur secundò , quia tam potest Deus alicui revelare suum peccatum finale ut finale , quàm potuit revelare illud cujus venia non obtinenda esset , aut quodvis aliud. Nam contra hoc tam valent , si quam vim habent difficultates illæ præcipuæ , seu rationes quibus adversarii contendunt vel hominem non fore liberum , vel habiturum potestatem falsificandi revelationem Dei ; tam , inquam , contra hoc valent quàm contra illud. Atqui Christus revelavit Judæ peccatum cujus veniam non obtinuit , nempe sui proditionem quam

nondum actu peregerat : & divo Petro tri-  
nam negationem, quam solum commina-  
toriè prædictam esse, rationabiliter dici  
non potest, siquidem nullus est sanctorum  
Patrum qui sic accipiat talem revelationem,  
& verba ipsa satis indicant fuisse absolutam  
assertionem, *Amen, amen dico tibi*, &c. ubi  
vides particulam assertivam quâ nunquam  
solitus est Christus nisi assertivè uti. Adde  
quod si significasset Christus dispositionem  
causarum, & Petrus ipsum non negasset,  
nemo est qui non dicat apparituram fuisse  
in verbis Christi falsitatem. Cum igitur  
hæc & similia, quæ pendebant ab homi-  
num, quibus prædicebat, libertate, ab-  
solutè prædixerit, potest quoque absolutè  
peccatum ultimum sub ratione ultimi & im-  
pœnitentiam finalem alicui prædicere.

9. Probatur terciò, quia potest alicui re-  
velare suam salutem, ac beatitudinem futu-  
ram dependenter ex futuris bonis operibus,  
aut saltem ex futura perseverantia, & ita  
plurimis revelavit, ut Deiparæ, divo Pe-  
tro, cujus martyrium reipsa prædixit, &  
divo Joanni Evangelistæ quem asserit  
mansurum incolumem donec ipse veniat, id  
est donec eum morientem in gloriam acci-  
piat. Item divo Paulo, qui ait, *Reposita*  
*est mihi corona justitiæ quam reddet mihi in*  
*illo die justus judex*. Divo item Francisco,  
qui inde totus in extasim raptus est, &



aliis. Ergo licet non eodem modo conveniat revelari damnationem, quia id viatori non congruit; tamen æquè possibile est, loquendo de potentia absoluta, quia quæ scientia sufficit ut unum fiat, stante libertate hominis & infallibilitate revelationis, eadem sufficit ut aliud iisdem quoque stantibus fiat.

---

## SECTIO DECIMA-TERTIA.

### *Solvuntur Objectiones.*

**O** Ejicies primò, qui verissimè judicat se aliquid esse facturum, non est liber ad oppositum in sensu composito talis judicii. Atqui ille cui facta fuerit revelatio de hoc numero peccato, ob quod incurrenda damnatio prænuntiatur, certissimè judicat se esse hoc facturum. Ergo non est liber.

2. Respondeo negando majorem, quia alioqui Christus non fuisset liber ad suos actus, quos omnes certissimè præsciebat, & in Deo etiam videbat. Et præscientia Dei de omnibus ab illo faciendis libertatem ejus tolleretur, quod est falsum. Ratio à priori est, quia ad volendum liberè, satis est si objectum cum indifferentia objectiva proponatur, & à Deo non negetur concursus ad ullum ex oppositis actibus, & nihil libertati nocet si is qui acturus est, certò sciat ad quid sese determinaturus sit, cum

hæc scientia determinatione ejus, & libertate ejus sit posterior. Et licet posita illa certitudine, si summa est, ut in Deo & in Christo, impossibile sit ex hypothese illius non poni talem volitionem, volitio tamen oppositi non desinit esse possibilis, cum prædictæ volitionis necessitas seu eam non ponendi impossibilitas, non sit antecedens, sed consequens determinationem libertatis. Talis enim necessitas integram relinquit indifferentiam objecti, & tantum arguit infallibiliter oppositum non esse futurum, quod non est illud esse impossibile.

3. Objicies secundò, is qui acceperit à Deo revelationem de suo peccato & damnatione futura, poterit velle illud malum impedire, & obtinere à peccato, itaque immutabitur, ita-ut possit spernere illecebras peccati, quibus seclusa tali cognitione captus fuisset. Ergo sic poterit falsificare revelationem.

4. Respondeo distingo antecedens poterit si revelatio secundum se spectetur sicut una ex cogitationibus avertentibus à peccato, concedo; si spectetur ut prævisa inefficax, subdistinguo, poterit potestate antecedente & absoluta, seu quæ sit expers omnis necessitatis antecedentis & absolutæ, iterum concedo; nam neque revelatio ut prævisa inefficax, arguit in homine necessitatem antecedentem committendi pec-

catum : poterit potestate quæ sit experts omnis necessitatis consequentis & hypotheticæ circa oppositum, nego. Nam ex hypothesi quodd Deus præviderit revelationem non impedituram peccatum, quæ hypothesis petitur ex aliquo consequente in statu conditionato determinationem futuram voluntatis ad peccandum non obstante revelatione si fiat; necessariò, id est per necessariam consequentiam verum est ipsum peccaturum & damnandum.

5. Hic adverte non implicare & fieri posse, spectando naturam libertatis nostræ, ut aliquis homo existens in eo statu in quo esset ille cui fieret à Deo revelatio de suo peccato finali, abstineat ab illo peccato: quod maximè ostendit indifferentiam antecedentem in qua esset ille homo de quo verum est ipsum si talis revelatio fieret, non propterea se cohibiturum à peccato. In illa autem hypothesi in qua verum est hominem accepta revelatione non peccaturum, revelatio Dei non spectatur ut se tenens ex parte ipsius Dei, & ipsi inexistentis, quo modo argueret illum hominem peccaturum liberè, sed spectatur tantùm objectivè, prout ingreditur objectum istius propositionis, si talis revelatio quasi à Deo fieret homini de tali peccato finali, non desineret illud committere. Et hoc modo cum revelatione ita conditionata ex parte Dei, & merè obje-

&ivè se habente , stat hæc veritas quòd homo ille non committeret tale peccatum. Unde talis revelatio est impossibilis , sicut & præscientia conditionata de objecto ejus , quia impossibile est ut Deus revelet , aut ullo modo judicet falsum. Et hinc addo non esse verum quòd omnibus qui sunt damnati , Deus potuerit revelare suam damnationem ob illa ipsa peccata quæ commiserunt , quia credibile est ex iis plurimos , si fuissent in eo statu in quo esset is qui revelationem à Deo acciperet de suo peccato , & damnatione inde secutura , non fuisse peccaturos , sicut secluso illo statu peccarunt. Igitur Deus non potuit illis omnibus hoc revelare , quia objectum talis revelationis non est quoad omnes verum.

6. Quod si dicas implicare ut revelatio Dei sit falsa. Itaque si Deus illis omnibus revelasset ipsos esse peccaturos , ut peccarunt , & damnandos , id in omnibus fuisset eventurum. Respondeo distinguendo antecedens , implicat falsum esse revelationem quæ vel sit absolutè in Deo , vel esset re ipsa si tale quid poneretur , concedo : revelationem quæ indebitè & contra rationem in aliqua hypothesis malè conficta , concipitur esse in Deo , nego. Hinc si Deus diceret de quadam gratia quæ in homine malè disposito in talibus circumstantiis , etsi valde intensa fuit inefficax , & in eodem  
melius

melius disposito, & extra talem tentationem, fuisset efficax, & in plurimis aliis, maximèque in sanctis viris habuisset effectum suum, omnis qui talem accipiet gratiam quomodocunque aliunde sit dispositus, & in quibuscunque circumstantiis, & extra talem tentationem eam accipiet, ipsam contemnet, diceret falsum. Unde impossibile est ut id dicat. Et par est ratio de revelatione damnationis, quæ unum non avertit à peccato, alios autem melius affectos, retenta cætera dispositione eorum, & additis gratiis actualibus ad accursum novæ cogitationis illi dispositioni congruis, ab illo peccato averteret. Unde, quia non est verum omnes qui peccant in circumstantia talis revelationis, peccaturos, Deus id illis revelare non potest: & talis revelatio non potest esse absoluta ex parte subjecti sive revelantis, sed tantum conditionatè se habet in objecto propositionis falsæ. Porro ad veritatem positæ assertionis satis est si verum sit de aliquo, ipsum, etsi fieret ei talis revelatio, peccaturum: quo posito, Deus id cognoscet, nihilque ad possibilitatem revelationis deerit. Et licet nullus esset de quo id verum esset, res tamen secundum se est possibilis sine ulla implicantiâ morali, cujusmodi est in futuritione eorundem peccatorum ab omnibus qui sunt damnati, committendorum in circumstantia

434      *De Ente Supernaturali,*  
revelationis, retenta omni alia dispositione  
per quam parum abfuit quin multi ex illis  
à talibus peccatis abstinerent. Possibilitas  
autem peccati in tali circumstantia vel ab  
uno committendi sufficit ad possibilitatem  
talis revelationis, seu ad non implicantiam  
illius ex natura rei, quæ non implicantia  
est id potissimum quod asserta sententia  
docet.

7. Objicies tertio, ut homo sit liber, ne-  
cesse est ut cum omnibus quæ se tenent ex  
parte principii antecedendo actum, possit  
componere negationem actûs. Hoc autem  
dato, poterit cum revelatione de peccato,  
quæ antecedit peccatum, & avertit ab ipso  
componere negationem peccati, & sic fal-  
sificare revelationem.

8. Respondeo satis esse ad libertatem, si  
possit homo componere actum, aut nega-  
tionem actûs, cum omnibus illis principiis  
aut moventibus ad actum, aut avertentibus  
ab eo, per se spectatis, non autem necesse  
esse ut possit componere utrumlibet cum  
illis ut præscitis à Deo cum sua efficacitate,  
vel sufficientia & inefficacitate, quia sic  
ad libertatem requireretur aliquid impossi-  
bile, nempe ut homo posset cum una parte  
contradictionis ad quam est liber, conjun-  
gere ea quæ sunt aliquid consequens ex  
alia, & eam supponunt necessario. Sic non  
potest homo cum gratia efficaci ut efficaci,



& prævisa à Deo tali, etsi sit liber, conjugere dissensum, licet possit cum illa gratia per se sumpta illum dissensum componere in sensu diviso efficaciam ejus. Et similiter cum gratia sufficiente ut sic, & prævisa tali, non potest conjugere consensum, quem cum illa secundum suam entitatem spectata potest. Et similiter etsi sit liber, non poterit cum revelatione ut futura conditionatè inefficaci dependenter ab ipso, & prævisa tali in statu conditionato per scientiam mediam, imò, & absolutè prævisa tali hoc ipso quòd per illam scientiam Deus revelare decernet, componere negationem peccati; quam tamen potest componere cum illa revelatione per se sumpta, ut est aliquid ingenerans metum illius mali, sicut & aliæ cogitationes quæ ab eodem avertunt inefficaciter. Porro licet revelatio illa possit de se avertere à malo, sicut alia signa pœnæ ex peccato secuturæ, non datur à Deo in hunc finem, quia jam scit Deus futurum malum antecedenter ad ipsam, & plane independentem. Quare, si illam dat, id faciet vel in pœnam peccatorum præteritorum, quia jam magna pœna est scire talis mali futuritionem: vel ob aliquem alium finem qui per eam videatur ab ipso posse obtineri.

9. Objicies quartò, si Deus posset alicui revelare suam damnationem propter peccatum futurum, præscientia quam haberet



de illo peccato, supponeret aliquid posterius se ipsa, quia illa præscientia deberet terminari ad omnes circumstantias peccatum illud antecedentes, in quibus esset ipsa revelatio, quæ est posterior præscientiâ.

10. Respondeo verè præscientiam illam spectare aliquid quod secundum suum esse absolutum est posterius ipsâ, nempe revelationem quæ ipsam sequitur, sed non supponere illam nisi conditionatè futuram, & non impedituram peccatum, etsi fiat, & ab homine credatur. Ad quod accedit quòd cum Deus decernit facere talem revelationem, habet etiam absolutam præscientiam de futuritione peccati in circumstantia revelationis, & sic dum revelat, clarissimè videt totum objectum suæ revelationis.

11. Obicies quintò, si Deus potest homini revelare suam damnationem propter peccata futura, poterit quoque illi revelare damnationis gradum, & intensiorem pœnam. Hoc autem implicat, quia id non potest fieri nisi prævisis omnibus peccatis propter quæ homo damnabitur. Illa autem pro instanti quo fit revelatio, prævideri non possunt, quia multa consequenter ad illam futura esse possunt, si nimirum homo tali accepta revelatione desperet de salute, & se in omnia vitia præcipitem effundat. Respondeo conformiter ad prædicta, antequam Deus decernat ponere revelationem, ipsum pec-

cata illa omnia consequenter ad eam futura prævidere per scientiam mediam quæ antecederet illam revelationem : & posita revelandi voluntate per quam constat conditio sub quâ illa futura prævidebantur, Deum jam habere de illis omnibus præscientiam absolutam , quæ distinguitur à scientia visionis supponente ipsum esse rei visæ secundum suam propriam actualitatem. Posito autem quòd habeat talem præscientiam, poterit revelare gradum pœnæ ob illa omnia peccata incurrendæ, & illa ipsa peccata, modò, ut primo notabili dictum est, antecederet ad ipsorum revelationem quæ est veluti secunda alteri superaddita revelatio, essent futura in talis revelationis circumstantia. Sed & fieri potest ut nullum novum peccatum præter illud quod revelatum fuerit, revelationem consequatur, idque Deus prænoscat ; quo posito, nulla erit difficultas in revelando damnationis & pœnæ gradu.

---

#### SECTIO DECIMA - QUARTA.

*An is cui facta esset revelatio damnationis sperare aut desperare posset.*

1. **D**Ivus Bonnaventura in 2. disputatione ultima dicit, si Deus alicui revelaret suam damnationem, talem fore perplexum, quia teneretur sperare ob

præceptum spei, à quo non eximeretur, & non sperare, quia certò sciret se non adepturum beatitudinem : unde, quia non potest homo in tali perplexitatis statu à Deo constitui, ipse contra communioem Theologorum doctrinam negat Deum alicui posse revelare suam damnationem. Alii simpliciter negant eum cui facta esset talis revelatio, posse aut debere sperare. Alii denique docent quosdam spei actus ei esse possibiles, eosque debitos, aliquem verò non esse possibilem, ad quod intelligendum ac determinandum.

2. Adverte spei varios esse actus, inter quos appositè ad præsentem quæstionem, tres potissimùm distingui possunt. Primus est intentio beatitudinis. Secundus electio mediorum & conatus ad ipsam obtinendam beatitudinem. Tertius est fiducia & gaudium de concepta beatitudine : qui actus maximè ipsius spei nomine significatur, estque amor finalis boni ex probabili saltem suppositione futuritionis.

3. Hac posita diversitate actuum, Respondeo cum sancto Thoma quæstione 23. de veritate, articulo 8. eum cui facta esset revelatio assertoria de sua damnatione, non teneri sperare, intelligendo per actum spei fiduciam & gaudium de præconcepta beatitudine ut futura, quia talis actus esset ei impossibilis si revelationem crederet,

cum supponat iudicium quo sperans probabiliter putet se adepturum bonum quod optat. Imò proposita revelatione cum evidenti credibilitate, actus ille esset illicitus, quia illicitum est iudicare futurum quod Deus asserit non futurum, & circa illud affici ut circa futurum, unde positivè posset iudicium illud, & fiduciam ex eo consequentem, gaudiūque excludere & & in hoc sensu desperare. Dico tamen eum teneri ad actus qui aliter ad spem pertinent, nempe ad intendendam antecedenter prosecutionem beatitudinis, ipsamque beatitudinem, & adhibenda media ex voluntate eam consequendi. Ratio est, quia tenetur ad illos actus, quandiu sunt illi possibiles. Atqui erunt in illo statu possibiles, quia objectum ipsum, & media sunt antecedenter possibilia. Potest autem homo antecedenter velle & intendere, quod antecedenter possibile est, & ex hypothese quod id sit bonum finale, tenetur illud prosequi cum de se præceptum urget ad quod observandum habet adhuc auxilium sufficiens. Atqui hæc omnia reperiuntur in eo cui Deus revelaret damnationem. Nam nullam ei gratiam negat consequenter ad illam revelationem, sed tantum notificat id quod futurum est culpā ejus, ac proinde ex defectu cooperationis eum auxilio gratiæ. Ergo adhuc tenetur



ad illos actus qui spectant beatitudinem ut antecedenter ab eo acquisibilem.

4. Confirmatur, quia tam tenetur ille intendere, & prosequi beatitudinem, quàm sanctus Petrus, cui revelata erat negatio Christi, conservationem fidei & gratiæ habitualis. Et hæc obligatio stetit, etsi actu cogitasset de tali prædictione, & illam veram credidisset. Item tam tenetur quàm Judas abstinere à revelata prodicione Christi, quidquid enim dicetur ad probandam in istis obligationem intendendi fugam illorum criminum, & conservationem gratiæ, ac perseverantiam in fide quoad sanctum Petrum, valebit quoque ad probandam obligationem illorum actuum, quorum objectum æquè antecedenter possibile est. Et sicut sanctus Petrus non licitè dixisset, certa est amissio fidei & gratiæ: itaque nolo efficaciter earum conservationem, quantum est ex me, intendere, neque curam & media ad eam adhibere. Item sicut is cui jactura castitatis à Deo prædicta esset, non deberet dicere, certa est illa jactura: itaque nolo constantiam in ea intendere, nec fugere pericula ejus amittendæ; ita neque is cui revelata esset damnatio, licitè diceret, certa est amissio beatitudinis: itaque nolo eam intendere quantum in me erit antecedenter, nec prosequi media ad eam acquirendam. Ratio

tio istarum omnium universalis à priori est, quia licet & decet velle id quod est intrinsecè bonum & debitum aut necessarium, quandiu antecederet est possibile, licet sit consequenter impossibile. Non licet autem quod intrinsecè malum est velle, si est antecederet evitabile, etsi sit consequenter & hypotheticè inevitabile. Atqui beatitudo est bonum de se honestum, & debitum homini, & necessarium: privatio autem ejus est malum de se odibile, cujus fuga est honesta: ergo quandiu beatitudo est antecederet possibilis, licet sit consequenter & ex hypothesis impossibilis, licitum est, & decet eam velle atque intendere; & quandiu privatio ejus erit antecederet evitabilis, etsi consequenter & hypotheticè inevitabilis, quod non est propriè & secundum se esse inevitabilem, non licebit eam velle. Alioqui castitatem cujus prædicta erit jactura, licebit non velle, & licebit positivè velle crimen quo illa amittenda est; idémque est de blasphemia, & cæteris.

5. Objicies, spes fertur in bonum desideratum, tanquam in bonum probabiliter acquirendum, quia spes est desiderium boni, non qualecunque, sed efficax de se. Atqui is cui facta esset revelatio de damnatione, non posset spectare beatitudinem ut bonum probabiliter acquiren-

442 *De Ente Supernaturali*,  
dum. Ergo illam sperare non posset. Con-  
firmatur, quia nemo fertur in finem ali-  
quem per media quæ scit fore inefficacia.  
Is autem cui esset facta revelatio damna-  
tionis, omnia media scit fore inefficacia  
ad acquirendam felicitatem. Ergo non po-  
test illa eligere.

6. Respondeo distinguendo majorem,  
spes secundum actus gaudii de præcon-  
cepto bono, concedo: secundum actus  
intentionis & electionis mediorum, nego  
id esse universaliter verum, quia ad hoc  
satis est bonum esse antecedenter possi-  
bile, quod est verè esse possibile, & judi-  
cari tale. Ad confirmationem distinguo.  
Nemo potest ferri in finem per media quæ  
scit esse antecedenter, sive ex insufficientia  
sui ad illum finem inefficacia, concedo:  
quæ scit esse inefficacia consequenter, cum  
sint de se sufficientia, seu potentia ad illum  
finem obtinendum, nego. Quia etiam con-  
tingit ut in rebus humanis, aliquis falsò  
putans aliquod medium fore inefficax,  
quia tamen illud novit antecedenter utile,  
applicet illud, ut bono suo decipiatur.  
Concedo autem, si cognitio de ineffica-  
citate mediorum antecedenter utilium vera  
est, ut in posito casu contingeret, eum  
qui sic judicat, non electurum de facto illa  
media, cum quo stat quod possit eligere.

7. Quòd si valeret objectio, sequeretur



eum cui facta esset revelatio de peccato sacrilegii, non posse intendere omissionem istius peccati, & absolutè, ob paritatem rationis, Deum non posse ulli homini revelare ullum actum liberum, posito quòd ille revelationem crediturus esset, & de ea cogitaturus quando esset peccaturus. Sequela probatur, quia simili modo argumentarer & dicerem, ut ille homo intendat evitare sacrilegium, oportet ipsum judicare quod ab eo possit abstinere, alioqui non erit indifferens. Atqui facta tali revelatione non poterit id judicare. Detur enim disparitas, cur homo posita revelatione de peccato finali & damnatione, non possit intendere fugam peccati illius & damnationis, & consequenter adeptionem beatitudinis: is vero cui facta esset revelatio de sacrilegio, possit judicare se posse illud evitare. Quod si non posset intendere talem evitationem, non esset liber ad oppositum, ac proinde Deus non prædixisset verum, dum asservisset illum esse commissurum peccatum sacrilegii. Unde judicans se non posse abstinere, consequenter judicaret Deum falsum dixisse. Quæ cum absurda sint, dicendum est eum posse intendere evitationem sacrilegii non obstante revelatione; & simili modo eum cui facta esset revelatio de damnatione, posse intendere evitationem ejus, & consequen-

444 *De Ente Supernaturali* ,  
ter adeptionem beatitudinis.

8. Instabis , is cui facta esset revelatio de damnatione , si conaretur assequi beatitudinem , hoc ipso conaretur falsificare revelationem Dei , & ita ageret ac si crederet eam posse falsificari. Sic autem agere est illicitum. Ergo ad nullum actum spei teneretur.

9. Respondeo negando majorem , quia si rectè sentit ille homo , judicabit se non habere potestatem ad illam falsificationem ; unde non debet cavere malitiam quæ esset in illa , quia nemo tenetur cavere malitiam quæ est in re sibi impossibili. Quod si ex metu falsificandi prædictionem Dei de sua damnatione , deberet à prosecutione beatitudinis abstinere , is cui prædicta foret culpa sacrilegii , aut infidelitatis , non deberet illud crimen nolle , ne revelationem Dei falsificaret : quod est absurdum. Sicut ergo is non deberet timere falsificationem revelationis de illis criminibus , & tenetur ea cavere , ita is cui facta esset revelatio de damnatione , non deberet illius prædictionis falsificationem timere , & teneretur ad satisfaciendum præcepto spei , & ex vi illius præcepti obligaretur ad non omittenda media quæ judicaret necessaria ad obtinendam salutem , putà ad restituendam pecuniam alienam : & si id nollet , advertens retentionem , esse ali-

quid impossibile cum salute, peccaret contra præceptum spei. Et temerarium esset negare talem hominem ad hoc teneri, etiam ex præcepto spei. Eadēque est ratio de obligationibus ad ea quæ non supponunt opinionem de obtinenda de facto beatitudine. Licet autem posset, & teneretur re ipsa tamen illi obligationi culpā suā deesset, sine ulla impotentia, aut gratiæ defectu: idque esset certissimum propter infallibilitatem divinæ prædictionis, hæc ipsa in statu conditionato prævisa subsequens.



## QUÆSTIO SEPTIMA.

### *De Charitate Theologica.*

**S**uppono hîc ex quæst. 2. de gratia, Charitatis habitum à gratia habituali realiter distingui; quæ doctrina Theologorum maximè communis, & in primis sancti Thomæ, etsi non esset vera, tamen hoc loco ubi de virtutibus Theologicis agitur, charitas gratiæ habituali identificata, non spectaretur sub ratione naturæ cujusdam supernaturalis, quomodo esset propriè gratia habitualis & sanctificans, sed sub ratione virtutis, seu principii activi respectu amoris quo homo Deum prop-

446 *De Ente Supernaturali,*  
ter ipsum Deum diligit. Et de hac sic  
sumpta est præsens quæstio.

---

## SECTIO PRIMA.

*Quodnam sit objectum formale Charitatis  
Theologica.*

1. **U**T fidei & spei natura est petita ex earum materiali simul & formali objecto, ita eodem modo charitatis essentia explicanda est. Quia verò constare non potest quodnam sit objectum ejus materiale adæquatum, seu quæ sit hujus amplitudo, nisi constet quodnam sit formale ejus objectum, eo quòd nimirum hujus extensio & communicatio ad varia subjecta reddat illa per charitatem amabilia, ideo de formali priùs hac sectione agendum est.

2. Divus Thomas quæstione 23. art. 4. bonum divinum ait esse objectum Charitatis, quatenus est objectum beatitudinis, quod aliqui sic interpretantur, ut velint charitatem supernaturalem ferri in Deum ut auctorem & finem bonorum supernaturalium: naturalem verò, ut in auctorem & finem bonorum naturalium. Et sic utramque charitatem objecto distinguunt.

3. Hanc doctrinam Scotus, & alii meritò rejiciunt, quia vel per hoc quòd Deus sit auctor supernaturalium, id spe-



ctari volunt quòd sit nobis principium & causa tantorum bonorum, quibus supra naturam elevamur: vel quòd Deus in se habeat illam perfectionem & bonitatem, ex qua illa promanant. Si primo modo id intelligatur, Deus sic non erit objectum amoris amicitiae, sed concupiscentiae; itaque erit objectum spei non charitatis. Si secundo modo, contra est, quia hoc posito impossibile esset exerceri actum charitatis infusae nisi cogitata, & proposita ratione illa principii supernaturalis, quod est falsum: quia fieri potest ut quis spectet in Deo illam perfectionem, bonitatem, omnipotentiam, quâ auctor est naturæ, & hinc eum diligat amore supernaturali, quia erit ille amor ex lumine supernaturali, quo illam Dei amabilitatem cognoverit. Neque enim illam sic sumptam practicè & efficaciter ad amandum Deum ex nobis ipsis sine Dei gratia cogitare possumus. Quare non est quærendum objectum charitatis infusae circa quod versari non possit amor Dei naturalis, cum etiam amor naturalis ferri possit in Deum ut auctorem supernaturalium. Nam si quis audiens Deum tantæ esse bonitatis ut bona supernaturalia vel sibi vel aliis concedere velit: careat tamen gratia actuali, ut absolutè possibile est, poterit Deum sic spectatum amare, non amore supernaturali, cujus princi-

448      *De Ente Supernaturali,*  
pium non habebit : ergo naturali , qui  
proinde ferri potest in ea omnia quæ spe-  
ctabit charitas infusa.

4. Ad testimonium Divi Thomæ , dico  
ipsum nihil aliud velle nisi illud totum  
bonum quod beati vident intuitivè , spe-  
ctatum per se , cum sit speciale bonum, ac  
proinde objectum alicujus virtutis , non  
alterius esse quàm charitatis. Jam autem  
illud quod beati vident , quódque est ob-  
jectum beatitudinis eorum , est bonitas  
Dei prout continet omnes perfectiones  
quæ illum secundum se amabilem reddunt,  
non verò ipsa sola vis quâ est<sup>us</sup> supernatu-  
ralium ut sic effectuum auctor.

5. Suarez disp. 1. de charitate. sect. 2.  
docet formale objectum charitatis esse  
summam Dei bonitatem , quæ est quod-  
dam bonum ita excedens humanæ naturæ  
ordinem, ut nullam habeat cum tali natura  
connexionem vel communicationem , sed  
ut est prorsus alterius ordinis: unde econtra  
amoris naturalis objectum vult esse  
Deum , prout est summum quoddam bo-  
num naturæ accommodatum , & habens  
cum illa necessariam connexionem , &  
communicationem. Hanc sententiam prio-  
ri affinem probat , quia diversis inclinatio-  
nibus diversa correspondent objecta in  
quæ ferantur. Quia igitur charitatis habi-  
tus infusus addit amoris naturali inclina-

· *QUÆST. VII. De Char. Theol.* 449  
tionem altioris ordinis , oportet diversum  
esse formaliter utriusque objectum mo-  
tivum in quod de se tendit ; non nisi per  
illam jam dictam differentiam. Quod con-  
firmatur , quia certum est Deum habere  
duplicem rationem finis ultimi respectu  
naturæ humanæ , scilicet naturalis & su-  
pernaturalis , & sub utraque ratione esse  
per se amabilem. Nam finis ultimus ut sic,  
non amatur propter alium. Quare cum  
Divus Thomas loco citato speciale obje-  
ctum charitatis voluerit esse bonum divi-  
num , ut est beatitudinis objectum : inde  
concludit Suarez illud bonum divinum  
prout quidem est objectum beatitudinis  
naturalis , esse quoque objectum amoris  
naturalis : at verò prout objectum beatitu-  
dinis supernaturalis, esse objectum formale  
charitatis infusæ.

6 Refellitur hæc doctrina, quia falsum  
supponit ut superior sententia , nempe  
supponit charitatem naturalem & super-  
naturalem debere differre objecto motivo,  
cum satis sit si differant per diversum mo-  
dum tendendi in ipsum , seu adhærendi  
ei. Ad rationem ejus , dico aliquas incli-  
nationes esse diversas ex parte termini ,  
sicut habitus virtutis & vitii : & alias di-  
versas, seu potius differentes ex parte prin-  
cipii , & modi quo idem objectum formale  
proponitur : quo modo erga eandem ra-



tionem boni sensibilis diversæ, aut potius differentes sunt, inclinationes in appetitu sensitivo, & in voluntate humana. Et dico hoc differentię genus inveniri in inclinationibus amoris naturalis, & supernaturalis, in quantum uterque amor ferri potest absolutè in idem objectum per se summè amabile, sed duplici modo, nempe cognitione naturali, & supernaturali propositum; Nam in bonum divinum, etiam prout utramque illam rationem ac perfectionem complectitur, amor quidem naturalis ferri potest modo imperfectiore ac naturali; Charitas autem infusa præstantiori ac supernaturali hominem in illud inclinat: quod & in aliis omnibus virtutibus evenit, cum circa quamvis rationem boni honesti possit dari amor naturalis & supernaturalis, nulla ratione objectiva mutata sed tantum eadem proposita nunc per cognitionem naturalem, nunc per lumen infusum. Et per hoc respondetur ad illam duplicem rationem finis, quæ utraque potest absolutè imperfectiori modo amari per amorem naturalem, præsupposita sola cognitione naturali, si Deus circa rationem finis supernaturalis negaret cognitionem supernaturalem, non negando tamen ejus cognitionem quæ esset tantum supernaturalis extrinsecè, in quantum necessario supponit saltem propositionem

QUÆST. VII. *De Char. Theol.* 451  
externam statûs supernaturalis.

7. Dices omnis inclinatio , qualis est Dei amor , sequitur aliquam formam , seu naturam. Sed natura non inclinat nisi in seipsam , aut in id in quo tanquam in principio aut effectu aut simili continetur. Ergo amor nunquam inclinat in alium nisi in eo natura amantis aliquo modo contineatur , & consequenter amor naturalis non potest ferri in Deum , nisi ut in auctorem naturæ. Unde supernaturalis amor , prout supernaturalis , non feretur in eum nisi ut in rerum supernaturalium principium.

Respondent aliqui , majorem esse veram de sola inclinatione naturali quæ unicuique rei insita est ad sui conservationem ac perfectionem : secûs autem esse de amore quem liberè elicimus , præsertim si est amor amicitiae , qui ita fertur in alterum , ut non respiciat ulla ratione bonum ipsius amantis.

8. Sed contra hanc responsionem dici potest , si detur amor intra naturæ limites quo voluntas creata feratur in Deum , etiam ut bonum bonitate naturam excedente , & ut in auctorem supernaturalium , illum non modò liberum fore quoad deliberatos , sed etiam necessarium quoad modos indeliberatos qui præcedent actus liberos. Unde absolutè dici potest non

dari libertatem naturalem nisi ad id ad quod voluntas priùs se habere potest ut natura per actus necessarios. Quare si inclinatio naturalis, seu voluntas non potest ferri in actus quibus necessariò diligatur Deus ut auctor supernaturalium, nec poterit in actus quibus id liberè fiat.

9. Respondeo ergo aliter, concedendo inclinationem naturalem se qui naturam, & naturam non ferri nisi in seipsam, vel in id in quo ipsa contineatur, vel quod ipsa contineat aliquo modo: & dico bonitatem illam quâ Deus naturam excedit, estque principium supernaturalium, contineri in natura & ratione hominis aliquo modo, nempe secundum vim repræsentativam: quâ potest homo illam naturali actu cognoscere, non quidem absolute sine ullo præsupposito, sed tantum supposita propositione externa statûs supernaturalis: quæ propositio, si lubet, nihil habeat supernaturale in substantia. Quia igitur homo sic potest per actum naturalem, & scientiam acquisitam, ut est habitus Theologiæ, perfectionem illam Dei naturæ ordine superiorem cognoscere, potest quoque conformi ac proportionato amore per ipsas vires naturæ, si Deus auxilium supernaturale non daret, diligere, licet inutiliter ad finem supernaturalem, & ad statum in quo nunc sumus. Refutatis illis sententiis.

10. Dico, objectum formale charitatis Theologicæ est omnis Dei perfectio, spectata prout se tenet ex parte ejus, eumque reddit per se actuabilem, seu dignum amore ad se terminato. Ita sanctus Thomas in præsentî quæstione 23. articulo 4. in corpore, & ibidem articulo 5. ad 2. ubi ait Deum propter se diligi charitate. Item Theologi communiter. Probatur, quia illud totum, & solum est objectum formale charitatis Theologicæ, & infusæ, quod ex parte objecti illam distinguit ab omni alio amore, at bonitas Dei sit sumpta, prout non modò bonitatem moralem seu sanctitatem, sed omnes alias perfectiones, putà omnipotentiam, sapientiam &c. distinguit charitatem ex parte objecti ab omni alio amore. Nam à spe distinguit per hoc quòd spes ista omnia diligit ut objectum bonum homini: aliæ verò virtutes voluntatis aliquid spectant non divinum, sed ad summum connotans Deum tantum in abliquo. Quod pertinet ad amorem Dei naturalem, charitas infusa non debet ab eo distingui per objectum formale, sed per modum superiorem ac perfectiorem tendendi in idem objectum. Ergo omnis Dei perfectio sic sumpta, seu tota bonitas Dei absoluta, est objectum formale charitatis.

11. Confirmatur quia debet dari aliqua virtus quæ tale habeat objectum formale:

454 *De Ente Supernaturali*,  
siquidem bonitas illa est per se amabilis, &  
reddit suum subjectum summè amabile.  
Non datur autem nisi charitas. Ergo hoc  
est objectum formale charitatis. Majorem  
probat sanctus Thomas citata quæst. 23.  
art. 4. quia ibi ponenda est specialis virtus,  
ubi invenitur speciale objectum.

---

## SECTIO SECUNDA.

### *Solvuntur Objectiones.*

1. **O**bjicies primò, objectum formale  
charitatis sic debet assignari, ut  
ipsa sit unica virtus. Atqui si omnis Dei  
perfectio absolutè sumpta est tale obje-  
ctum, ipsa non erit unica virtus. Nam  
poterit aliquis amare Deum ob omnipo-  
tentiam, alius ob sapientiam, &c. Et isti  
amores erunt specie distincti, sicut si quis  
diligat Petrum quia pius est, alius autem  
eundem, quia doctus est, alius quia no-  
bilis, vel quia aliquam artem callet, erunt  
diversi specie amores. Ergo charitas di-  
vina non erit una virtus sed multiplex  
seu complexum ex multis.

2. Respondeo negando minorem. Ad  
probationem nego paritatem, & dico  
illos quidem amores quibus Petrus amari  
supponitur, specie differre, etiam morali,  
quia unus non æquivalet alteri, cum unus  
sit laudabilis, alius indifferens. At verò

amorem Dei ob omnipotentiam ejus, & amorem ob sapientiam infinitam, etsi quoad actum, specie physicè seu entitati-  
vè sumptâ differat, non differre specie morali moraliter sumptâ, quia unus æqui-  
valet alteri, & per utrumque Deus super omnia diligitur amore ad ipsum terminato. Item uterque avertit ab omni peccato: uter-  
que parit amorem reciprocum Dei: uter-  
que est justificativus: uterque est Theolo-  
gicus, & differt essentialiter à spe, quæ est amor concupiscentiæ: ipsa motiva sibi mutuò æquivalent. Nam sunt ambo infi-  
nite amandi motiva: quæ omnia non in-  
sunt in diversis illis amoribus ejusdem ho-  
minis. Præterea isti ambo Dei amores, & quotquot simili modo differunt, physicè sunt ab eodem habitu supernaturali, qui hoc habet commune cum potentiis, quod ad actus specie physicè sumptâ differentes inclinet: illi autem varii amores quibus diligitur Petrus, sunt à diversis habitibus acquisitis, cum unusquisque habitus ac-  
quisitus ad unum tantum actum inclinet. Quare etsi diversi illi Petri amores sint ve-  
rè specie differentes, & à diversis habiti-  
bus: charitas quæ habet pro motivo, nunc unam Dei perfectionem, nunc aliam, sufficienter est una, non obstante illa sui objecti formalis amplitudine. Quod si charitatis objectum formale restringeretur

ad unam specialem Dei perfectionem, putà ad bonitatem moralem, darentur plures quàm tres virtutes Theologicæ. Nam diligere Deum ob sapientiam, & diligere ob omnipotentiam, essent duæ virtutes Theologicæ, quæ ad unam non reducerentur ut actus inadæquati circa objectum formale inadæquatum. Et charitas sic non haberet illam proprietatem potentia, quæ consistit in extensione ad actus aliquo modo differentes. Melius igitur est dicere, singulas illas Dei perfectiones esse objectum formale amandi Deum per charitatem Theologicam: sed objectum formale inadæquatum, eo quòd sint veluti partes objecti totalis, & adæquati formalis, quod est bonitas omnimoda Dei, continens omnes ejus perfectiones, quibus constituitur integrè bonus. Et hinc sequitur actus amoris qui feruntur in singulas divisi Dei perfectiones, non esse adæquatos actus charitatis, licet singuli sint ad prædicta omnia sufficientes, nempe ad præferendum omnibus aliis Deum, ad avertendum hominem ab omni peccato, ad promerendum Dei amorem reciprocum, ac proinde ad justificationem, & ad distinctionem charitatis à spe, & aliis omnibus à quibus debet differre charitas.

3. Objicies secundò, Amamus Deum propter beneficia nobis ab ipso collata, quæ sunt



sunt aliquid creatum. Ergo non solæ Dei perfectiones sunt objectum formale charitatis. Respondeo Deum posse duobus modis amari ob beneficia. Primò ita ut ipsa beneficiorum utilitas, & rerum datarum bonitas sit motivum illius amoris: & talis amor est à virtute gratitudinis. Secundò ita ut ipsa dantis liberalitas, munificentia, & bonitas sit motivum amandi, & per se placeat voluntati. Et talis amor est elicitive à charitate quia habet pro objecto formali ac motivo perfectionem divinam summè per se amabilem.

4. Objicet tertio. Perfectiones divinæ possunt esse objectum materiale charitatis. Ergo non sunt formale illius motivum. Antecedens probatur, quia potest aliquis velle Deo sapientiam, potentiam, & alia attributa. Sicut ergo cum volo Deo cultum, ipsius cultus est objectum materiale, ita cum volo illi talia attributa, ipsa quoque erunt tale objectum amoris. Neque refert quod cultus sit aliquid extrinsecum, & attributa aliquid intrinsecum. Nam cum volo Petro pecuniam & doctrinam, ratio boni intrinseci & extrinseci non variat in doctrina & pecunia rationem formalem objecti materialis.

5. Respondeo negando consequentiam, & dico posse aliquid esse objectum materiale simul & formale amoris, si nimirum

quis gaudeat aliquam virtutem, aut perfectionem inesse alicui, quia ipsius virtus & perfectio est. Et quoties amamus finem propter seipsum non tendendo ad media, quo modo finis non est finis nisi in actu primo, idem est objectum materiale & formale, nempe est id quod placet, & ratio placendi. Item quoties assentimur principiis propter seipsa, idem quoque est objectum materiale & formale talis iudicii, quia idem est id quod iudicatur & ratio iudicandi.

6. Instabis. Volumus perfectiones divinas esse in Deo propter Deum. Sic ergo ipsæ sunt objectum materiale quod amatur propter aliud.

7. Respondeo illud, propter, non significare objectum formale propter quod, sed objectum-cui, nempe ipsum Deum, qui est amabilis propter omnes suas perfectiones, sive essentielles, sive attributales, sive personales: ita ut tota bonitas ex illis integrata, sit objectum formale propter quod charitatis.

8. Objicies quartò. Quando aliquis optat Dei gloriam extrinsecam, quam vult illi procurare per bona opera, in hoc exercet actum charitatis: & tamen objectum formale hujus amoris non est aliqua perfectio, sed aliquid extrinsecum & creatum, nempe gloria illa Deo extrin-

seca. Ergo charitatis datur aliud objectum formale præter perfectiones & bonitatem Dei. Antecedens probatur, quia si quis intendat Petri sanitatem per medicinam, sanitas est objectum formale, & motivum ob quod vult medicinam Petro. Igitur eodem modo censendum est de gloria illa ad quam ordinantur opera bona.

9. Respondeo in illo actu quo quis Deo intendit gloriam per bona opera, duo esse distinguenda, primum est quod intendat gloriam Dei per illa opera; secundum quod id intendat propter ipsum Deum; quæ duo ita differunt ut unum possit esse sine alio. Nam potest aliquis intendere Deo gloriam per bona opera, quia sic placabit Deum sibi, & satisfaciet pro peccatis, sicut qui aliquem læsit, & tenetur reparare injuriam, metu pœnæ & vindictæ vult ei quem læsit honorem aliquem, quem exhibet, fatendo culpam, & se illi submittendo ac petendo veniam. Si quis gloriam Deo sic intendat, non habebit actum charitatis, sed amoris erga se supernaturalis, qui ad spem reductivè pertinet. Quia igitur intentio gloriæ Dei potest esse sine actu charitatis, clarum est gloriam illam, quæ est objectum formale talis intentionis, non esse objectum formale charitatis nisi secundarium, in quantum charitas Dei ad illam intentionem se ex-

460 *De Ente Supernaturali,*  
tendit. Quare dicendum est absolutè, &  
simpliciter loquendo, esse tantùm aliquod  
objectum materiale ad quod sese extendit  
charitas, in quo nulla implicantia est.  
Nam sæpissime contingit id quod est ob-  
jectum formale unius actûs, esse objectum  
materiale alterius. Quod probatur ex illa  
intentione sanitatis quæ in exemplum alla-  
ta est. Nam ejus quidem per se sumptæ  
quatenus est talis intentio, objectum for-  
male est sanitas. At verò si spectemus il-  
lam intentionem oriri ex amore amicitia  
erga Petrum, cùm posset oriri ex amore  
proprio ejus qui illam intendit, si ideo in-  
tenderet, quia Petrum sibi futurum utilem  
conservare vellet, in prædicta illa hy-  
pothesi motivum talis amoris ita efficacis  
erit id quod placet in Petro, éstque causa  
amandi ipsum; sanitas verò erit tantùm  
objectum materiale, ad quod sese extendet  
illius benevolentia activitas: aut saltem  
erit objectum formale secundarium, quod  
non specificat amorem in ratione cha-  
ritatis, sed in ratione charitatis certo modo  
in suum objectum formale amicitia cau-  
sativum tendentis.



SECTIO TERTIA.

*De objecto materiali charitatis Theologica.*

1. **A**Dverte primò præter communes distinctiones objecti materialis adæquati, inadæquati, primarii, sive objecti attributionis, & secundarii, sive objecti considerationis, quæ in objectum materiale alicujus habitûs cadunt, aliam dari propriam objecto materiali amoris de cujus genere est charitas. Nam ex doctrina sancti Thomæ hîc q. 25. a. 3. aliud est objectum materiale cui volumus bonum; & aliud quod quidem volumus esse, & esse bonum, sed non ita ut ipsum sit illud cui volumus tale bonum. Sic, si quis diligit Petrum qui filium habeat & equum vel agrum, filium quoque & equum aut agrum ejus amabit, sed filium ita ut sit objectum cui volet bonum, equum verò, & agrum ita ut sit objectum quod volet bonum esse, sed non volendo illi per se bonum.

2. Adverte secundò, ad hoc ut aliquid sit objectum materiale-cui amoris, tria requiri. Primum ut sit creatura rationalis, cujus rei ratio duplex à sancto Thoma affertur. Prima est, quia non est proprium creaturæ irrationalis habere bonum, sed solum creaturæ rationalis, quæ est domina

utendi bono quod habet, per liberum arbitrium, etiámque est capax fruendi bono quod necessariò possidet, & non est materia, neque objectum usûs Rationem illam confirmat ex Philosopho, lib. 2. Phys. textu 59. ubi ait, nos non dicere quòd rebus rationis expertibus aliquid bene vel malè contingat, nisi secundum similitudinem. Secunda est, quia cùm velle bonum alicui enti sit actus amicitiae erga illud, creaturæ irrationales non sunt capaces amicitiae, quæ fundatur super aliqua communicatione vitæ, unde illis non volumus bonum, sed tantùm quidquid in illis boni est, alteri volumus.

3. Secundum quod requiritur ad objectum-cui amoris, est ut in eo insit vel ratio objecti formalis per se sumpta, & hoc erit objectum materiale-cui primum; vel aliqua similitudo & representatio rationis illius, aut connexio cum ea, & hoc est objectum materiale-cui secundarium, modò cum tali similitudine aut connexione nulla sit aliunde contrarietas, atque oppositio cum illo quod per se primariò est amabile. Et hæc est tertia conditio hîc requisita. Hinc si quis diligit Petrum ob aliquas dotes & qualitates quas in eo suspicit, Petrus quidem in quo sunt illæ dotes, erit objectum materiale-cui primum talis amoris, filius autem ejus,

maximè si quæ in illo earundem qualitatum similitudo , aut spes appareat : item amicus qui Petro placet , & servus qui est ei fidelis , erunt objectum materiale cui secundarium, ad quod amor ille se extendet volendo illis bonum , modò tamen filius non sit aliunde inimicus Patri, aut amicus prava ei & perniciofa consilia non suggerat , aut servus non fiat rebellis ac perfidus : quæ omnia essent contraria illi amabilitati , quæ apta erat consurgere ex illis aliis relationibus ad Petrum. His positis.

4. Dico primò. Objectum materiale cui charitatis complectitur & Deum, qui in hoc genere est objectum primum, sive attributionis : & creaturas omnes rationales , exceptis damnatis. Ita Divus Thomas 2. 2. q. 25. per omnes ferè articulos , ex quibus efficitur , omne ens rationale beatitudinis non incapax , esse objectum ejusmodi. Et idem docent omnes Theologi. Probatur conclusio, quia conditiones prædictæ ad objectum materiale cui requisitæ , reperiuntur in Deo primò respectu charitatis : & in creaturis beatitudinis capacibus, secundariò. Nam præter rationem entis intellectualis , quæ est illis omnibus communis , Deus illam infinitam bonitatem , & perfectionem quæ est ratio motiva summi amoris , per se habet : unde est per se, sine ordine ad aliud,



464     *De Ente Snpernaturali*,  
summè diligibilis. In creaturis autem omnibus intellectualibus est repræsentatio, & expressio aliqua bonitatis illius ac perfectionis. Quare in illis objectum formale charitatis per similitudinem reperitur: unde sunt eodem amore per extensionem ejus amabiles. Deinde illæ omnes sunt aliquod Dei bonum, ipsi charum, in quantum vult illis beatitudinem: quod etiam verum est de peccatoribus in via, quos non odit absolutè, in quantum spectat adhuc ut corrigibiles, & capaces amicitiae cum ipso ac possessionis sui, quam illis vult verè & sincerè. Quare nulla in illis est contrarietas quæ absolutè prævaleat amabilitati secundariæ, quam de se generant tum similitudo quam habent cum Dei esse & attributis, saltem quibusdam; quæ similitudo est quædam participatio objecti formalis, ac motivi charitatis divinæ: tum aliæ relationes quibus ad ipsum attinent, & cum eo sunt conjuncti.

5. Quoad damnatos autem, cum sit in illis dissimilitudo, & oppositio moralis cum Deo, eaque liberè contracta, & indestructibilis, non possunt diligi ex charitate, ita ut velimus illis bonum, prævalente scilicet in iis quoad moralem appreciationem, illa oppositione cum Deo rationibus, & respectibus aliis, licet ita amari possit eorum esse ut placeat nobis similitudo

QUÆST. VII. *De Char. Theol.* 465  
tudo perfectionum divinarum quæ est in  
illo, & velimus illos existere, ut suâ poenâ  
ad Dei gloriam utiles. In quo sunt adhuc  
objectum materiale-quod charitatis, sed  
non objectum materiale-cui.

6. Dico secundò, ad objectum materiale-  
quod charitatis pertinent omnes creaturæ,  
& rationabiles, sine damnatorum, ut jam dixi,  
exclusionem, & irracionales. Ita sanctus  
Thomas citatâ q. 25. a. 2. & 3. Probatur,  
quia ad hoc sufficit quòd in eis eluceat ali-  
qua Dei similitudo, & participatio per-  
fectionum ejus, ipsasque esse velit, quæ  
omnia de illis singulis verificantur.

---

#### SECTIO QUARTA.

*An charitas habeat rationem vere amicitie  
erga Deum.*

1. **N**Ota primò, amicitiam esse amo-  
rem benevolentiaæ mutuum, &  
utrinque cognitum, in bonorum commu-  
nitione, & honestate fundatum. In qua  
definitione quatuor conditiones requirun-  
tur ad amicitiam, ipsi essentialia. Primò  
debet esse amor benevolentiaæ, quia amor  
qui erga suppositum amatum non est be-  
nevolentiaæ, sed tantum concupiscentiaæ,  
ejusmodi est ut eo diligamus ea quæ sunt  
irrationalia, & inanimata, ut equos,  
agros, & similia, in quæ non fertur

amicitia. Quare talis amor genere ipso differt ab amore amicitiae, quæ necessarium hoc includit ut supposito amato velimus bonum propter ipsum. Et hinc, si quis alium diligit ob solam utilitatem, aut propter solam voluptatem quam ex eo capit, quo modo prata, flores, horti diligi possunt, non habet amicitiam, ut rectè docet Philosophus 8. Eth. c. 3. & 4.

2. Secunda conditio est ut amor sit mutus, quia per hoc amicitia distinguitur ab ea benevolentia quæ in persona amata reciprocum affectum non invenit, sed forte aversionem, & inimicitiam, etiam injustam in quo casu nemo dicit reperiri rationem amicitiae.

3. Tertia est ut sit cognitus utrinque mutus ille amor, seu, ut loquitur Aristoteles, 8. phys. c. 4. redamatio non latens, quia hoc necessarium est ad præcipuos effectus amicitiae, & ad hoc tendit qui amat ut suum amorem manifestet.

4. Quarta est ut sit amor ille fundatus in honestate, & bonorum communione, quia amicitia debet esse amoris perfectio, quod non esse potest sine honestate motivi, ex quo amor procedat, nec sine communicatione aliqua, aut participatione quâ an antes reddantur aliquo modo similes, ut tradit Philosophus 8. Eth. c. 7. Hinc est amicitia inter consanguineos,

in quibus est communio sanguinis, & inter eos qui sunt socii ejusdem instituti, sive officii, ut inter commilitones: maximè autem inter eos qui in amore virtutis consentiunt, quæ amicitia est de se firmissima, cùm virtus sit habitus constans, & de se aptus mutationem non pati: quod non cadit in eam amabilitatem quæ ex voluptate, aut utilitate nascitur.

5. Nota secundò ex eodem Aristotele 8. Eth. c. 12. duplicem inveniri amicitiam, quarum una æqualitatem invenit, ut inter fratres, commilitones, & cives, alia verò hinc excellentiam, inde inferioritatem: sed cum proportionem inter personas quæ habent aliquid sine æqualitate commune, ut inter principem qui bonus sit, rectèque affectus, & subditos: itèmq; inter patrem, qui ut pater summæ auctoritatis est, & filium. Et in hac amicitia non servatur simpliciter æqualitas officiorum, sed proportio, sicut inter ipsas personas: ita ut unus alteri exhibeat id amoris, honoris, & officii, quod illi pro sua conditione competit; & qui est præstantior, plus beneficiorum conferat, quia est potentior: & alius plus venerationis, quia inferior. *Regis quidem,* inquit ibidem Philosophus, *cum iis quibus imperat; amicitia in excellentia quadam beneficiorum consistit. Bene enim de suis me-*



retur siquidem cum bonus sit, id magnam diligentiam procurabit ut sint quam beatissimi. Quo etiam in genere est paterna amicitia, sed magnitudine beneficiorum praestat. Pater enim est qui, quod omnium maximum censetur, filiis, ut sint, causa est & alimenti, & eruditionis. Ita ille qui subdit. Ius ergo inter eos intercedit, non ut eadem utrinque praestentur, sed ut pro cuiusque dignitate. Et paulo ante. Ideoque parentes iusta veneratione prosequimur. His suppositis.

6. Dico, charitas Theologica habet veram rationem amicitiae erga Deum. Probatur primò ex scriptura, Psalmo 138. *Nimis honorificati sunt amici tui Deus.* Ioan 15. *Vos amici mei estis, si feceritis quae ego precipio vobis.* Et inferius. *Iam non dicam vos servos, sed amicos.*

7. Probatur secundò ratione, quia in amore quo Deum homo diligit, reperiuntur omnes conditiones suprà ad amicitiam requisitae. Primò homo Deum diligit amore benevolentiae, nempe propter ipsum, in quo consistit ratio & differentia charitatis. Et confirmatur ex illis verbis Apostoli, *Charitas non querit quae sua sunt.* Secundò Deus quoque, & prior hominem diligit, & simili amore benevolentiae erga ipsum, quod probatur primò ex scriptura Psal. 145. *Dominus diligit iustos* & Ioan 14. *Qui diligit me, diligetur à patre meo,*

& Prov. 8. *Ego diligentes me diligo.* Secundò ratione, quia verè homo est diligibilis secundùm se amore benevolentia, in quantum est ens intellectuale, virtutis capax, & felicitatis, ipsiusque Dei possidendi: itémque capax amandi Deum amore benevolentia, quo posito, congruum est ut Deus qui bonitate præcellit, ipsum præveniat. Qui potest redamare, potest prævenire per amorem; & hoc decet eum qui melior est, ne melius diligatur. Et præterea, posito quòd homo Deum diligit ex benevolentia affectu, æquum est ex quadam specie gratitudinis ut benevolentia amore prosequatur, quia benevolentia ex se mutuam benevolentiam exigit. Denique is qui, si haberet virtutem cujus est capax, esset dignus amore, jam est amabilis sine merito in quantum bonum est ipsi velle illam virtutem, & dare media ad illam, quo modo propter se diligitur ut sit, qui potest esse, bonus. Tertio hic amor est mutuò cognitus. Nam quoad Deum quidem, omnia aperta sunt oculis ejus. Quoad hominem verò, etsi non sciat certitudine absoluta se à Deo diligi, tamen si Deum diligit, maximè constanter, & rectè vivit cum intentione placendi Deo, id scit evidentiâ morali, fundatâ tum in supradictis, aliisque Dei verbis, tum in bonitate illius infinita, quam constat esse summè sui diffusivam, ac sui amoris, ut ita

dicam, prodigam. Quartò fundatus est hic amor in communione bonorum quæ de se apta sunt amicitiam ingenerare, ut sunt intellectualitas ex qua homo est capax virtutis, & felicitatis, & mutuæ benevolentia; nec non aliquo modo similis Deo, ut cum suo exemplari: virtus ipsa in justo est participatio supernaturalis divinæ naturæ per gratiam, per quam constituitur filius Dei. Deinde voluntatum consentio, mutua benevolentia, & confidentia, & beneficia ex parte Dei, officia verò ex parte hominis, quæ cum ex amicitia procedant, eam quoque augent & perficiunt. Et licet ex parte Dei omnia summa sint & infinita; in homine verò infinitè distantia, id tamen non probat non esse amicitiam, sed non esse æqualitatis, cum sit potius in Deo cum summa eminentia, & in homine cum quadam ad illam proportionem & correspondentia, qualem homo debet & potest ex parte sua conferre, & Deus ipse probat ac redamat, compensatque ultima sui communicatione, quâ se perfectè possidendum tradit.

---

## SECTIO QUINTA.

### *Solvuntur Objectiones.*

- I. **O** Bjicies primò, Deus homines diligit ut media ad suam gloriam,



quam intendit ut finem omnium ad extra. Ergo non diligit eos propter ipsos, sed propter se. Hoc autem est contra rationem amicitiae, quæ exigit ut is qui amat, redametur propter seipsum: alioqui non amaretur amore benevolentiae. Antecedens probatur primò ex scriptura, *omnia propter seipsum operatus est Dominus.* Prov. 16. Secundò ex sancto Augustino, qui lib. 1. de doctrina christiana cap. 77. dicit, Deum non frui creatis sed uti. Tertiò ratione, quia ea quæ inferiora sunt, per se & ex natura sua ordinantur ad id quod supremum est. Itaque Deus ea amat secundum hanc illorum conditionem. Et præterea nullum est objectum infinitæ voluntati proportionatum, ita ut eam per se moveat ad amorem sui in ratione finis, quod necessarium est ad amorem benevolentiae quo intenditur per se bonum personæ amatae, nisi bonitas ipsa infinita.

2. Respondent Suarez, Valentia & alii Deum non referre bonum quod nobis vult, nostramque beatitudinem ad suam gloriam quasi iis indigeat, aut quidpiam utilitatis commodive inde percipiat: sed quòd cum ipse sit naturaliter finis omnium, omne bonum habet hoc ex natura sua quod ad ultimum suum finem refertur, si honestè ametur. Jam autem quòd aliquod ens honestè & debito modo ametur,

id non præjudicat amicitia quæ honesta esse debet. Et inter homines etiam, si amicus debito modo diligitur, debet ab amico diligi cum subordinatione ad id ad quod de se ipse refertur, nempe ad Deum ut finem omnium.

3. Refellitur hæc responsio, quia stando in ipsa non explicatur ratio benevolentia Dei, ac proinde nec amicitia erga hominem. Quod enim Deus non indigeat nostra beatitudine, id non impedit ne dum refert illam ad gloriam suam, amor iste sit concupiscentia, sicut quod homo adhibeat medium aliquod ad consequendum bonum quo non indiget, id non impedit ne verè illud medium ex amore concupiscentia eligat: quia universaliter loquendo, qui amat aliquod bonum, sive ipso indigeat, sive non indigeat, & ad tale bonum obtinendum medium aliquod adhibet, si medium tantum amat in ordine ad illud bonum quod amat per se & intendit, etsi absque indigentia talis boni, medium amat tantum amore concupiscentia. Quod autem dicitur Deum nullam ex nostra beatitudine utilitatem percipere, verum quidem est hoc sensu quod non sit ei utilis eo modo quo utilia sunt homini ea quibus id obtinet ut sit ditior, doctior, illustrior, cum per hæc fiat ipsi accessio alicujus quo ita carebat, ut non illud contineret per se

cum summa eminentia; sed verum est tamen Deum utilitatem ex nostra beatitudine percipere hoc sensu quòd per eam ipse consequatur bonum verè bonum à se intentum: in quo includitur ea ratio utilitatis quæ est de essentia mediæ ut sic, & ab ea inseparabilis, estque conducibilitas ad placitum atque intentum finem. Denique quòd omne bonum ex natura sua ad suum ultimum finem referatur, si honeste ametur, id non tollit ab amore illo rationem concupiscentiæ, sed concupiscentiam illam honestam facit, & necessariam reddit respectu voluntatis perfectissimè agere volentis. Item id probat talem amorem non repugnare amicitia ipsius creaturæ quæ sic amatur, & cum ea compatibilem esse, & tali fini amicitiam erga creaturam debere subordinari: sed non probat in tali amore consistere amicitiam, aut in eo per se formaliter sumpto benevolentiam reperiri erga ipsam creaturam, quæ sic tantùm amabitur ut medium ad ipsum ultimum finem, seu Deum per se dilectum. Quare restat semper quærendum & explicandum quomodo amor ipsius Dei erga nos nostramque beatitudinem habeat rationem benevolentia.

4. Respondeo ergo cum Lessio, Delugo, Salas, Turriano & aliis distinguendum esse in amore illo Dei duplicem virtualiter actum: unum quo nos, & nostram beati-

tudinem propter suam gloriam diligit, in quantum per illam beatitudinem elucescunt divina attributa, & accedit Deo clara cum laudè notitia à creaturis, & hic actus non habet rationem benevolentiae erga nos, sed concupiscentiae erga bonum quod sibi vult Deus: alterum quo vult illam nobis ut nostrum bonum proprium, quod non est impossibile cum illa priori ordinatione ad gloriam ejus. Et hæc secundaria intentio, minúsque principalis est actus benevolentiae erga nos. Neque Deum dedecet talis actus, quia cum unum duobus modis est honestè amabile, potest utroque amari, dummodo non sint impossibiles, sed potius connexi: quo modo virtus rectè amatur ab homine, & ut per se honesta, & ut medium ad beatitudinem. Est autem nostra felicitas duobus modis honestè à Deo amabilis; primò, ut medium ad gloriam ejus; secundò, ut bonum nostrum, & beneficium quod confert homini, qui per se etiam est diligibilis. Nam ille per se est diligibilis amore benevolentiae, cui quatenus tali propter perfectionem ejus intrinsicam omnis recta voluntas potest velle jus utendi ac fruendi aliquo bono atqui omni enti creato intellectuali, si per se spectetur, idest antecederet ad omne meritum ac demeritum, in illo priori, propter perfectionem ejus intrinsicam, idest propter

ipsam ejus intellectualitatem, omnis recta voluntas potest, velle usum aliquorum bonorum, nempe usum nobilissimarum facultatum, intellectûs & voluntatis, & concursûs divini ipsi debiti ad exercitium virtutis, & consecutionem beatitudinis, sive naturalis in statu puræ naturæ, sive supernaturalis in præsentî statu; ita ut una per se considerabilis ratio volendi hoc, sit quia est ens habens naturam intellectualem. Et Deus ipse debet illi velle consecutionem felicitatis voluntate saltem antecedente, quia ipsa natura talis entis intellectualis id exigit. Et hoc est velle ei tale bonum propter ipsum, ac proinde est amare amore benevolentia. Et præterea potest esse homo ab ipso Deo considerabilis propter obsequia quæ ipsi exhibuerit, & amorem quo persecutus fuerit, & sic mutuam benevolentiam exigit. Nam omnino decet amantem redamari. His omnibus modis Deus nostram felicitatem vult tanquam nobis bonam.

5. Quæ autem allata sunt in oppositum nihil efficiunt. Nam auctoritas scripturæ, & prima ratio tantum probant nos amari à Deo ut media, sed nihil continent unde ullo modo colligi possit non dari in Deo alium amorem ad nos terminatum.

6. Ad testimonium Augustini, dico per hoc quod Deus non fruatur creaturis,

non excludi amorem erga illas qui aliquo modo illarum bono, sed non ultimè acquiescat. Frui enim tantùm de fine ultimo dicitur. Et hoc solum in Deo respectu nostri non admittit Augustinus, quia hoc solum quoad hanc rem implicat.

7. Ad secundam rationem, seu ad id quod dicitur, nullum objectum aliud à bonitate infinita esse infinitæ voluntati proportionatum, respondeo distinguendo, in ratione finis primarii, concedo: in ratione finis secundarii, nego. Nam omne ens per se diligibile amore benevolentia est ei finis-ei secundarius: & felicitas ejus finis-qui item secundarius, quia voluntas infinita debet omne bonum amare amore congruo, & per se diligere id quod per se diligibile est. Quia igitur homo est per se diligibilis, modò amabilitati quæ in ipso est non ponatur obex, ut in damnatis, debet Deus ipsum propter se & immediatè diligere. Neque meritum hac in re requiritur, sed capacitas recipiendi boni juncta cum intelligentia & virtute redamandi. Quod declaratur à fortiori in misericordia objecto. Nam objectum ejus est ipsa miseria in ente intellectuali, sublevabilis per communicationem boni quod est in misere. Quare ut homo sit, non quidem dignus amore, sed capax terminandi amorem Dei, quod solum dicit diligibilitas de qua hîc agitur,



satis est quod possit ab eo recipere esse, & tale donum intelligere, & redamare: unde potest præveniri per amorem.

8. Confirmatur primò quia homo secundum se est capax inimicitiae Dei. Ergo & amicitiae alicujus. Nam quod est capax unius contrarii deterioris, & sibi mali, quo excluditur melius, est quoque capax melioris, & non est capax deterioris nisi per accidens, ut hîc contingit per malum usum suæ libertatis. Est, inquam, capax deterioris tantum per accidens, cum non possit de se ordinari ad id quod est sibi malum. Et certum est inimicitiam Dei posse ab illo destrui positivè, quod non fiet nisi per oppositam ipsi benevolentiam.

9. Confirmatur secundò, quia ex veriori doctrina plurimorum Theologorum, Deus cognoscit creaturas, non modo in seipso, sed etiam in ipsis creaturis, quia creaturæ sunt illo etiam modo cognoscibiles sine defectu, & pertinet ad intellectum infinitum cognoscere secundum se omnia quæ per se, & secundum se cognoscibilia sunt sine defectu cognoscentis. Ergo cum aliqua creatura, nempe rationalis, sit duplici modo amabilis amore benevolentiae, & prout Deo connexa, & per se absolutè spectata secundum bonitatem sibi propriam, utroque modo diligitur ab infinita voluntate, quæ omne secundum se bonum habet pro ob-



478 *De Ente Supernaturali,*  
jecto, & unum quodque diligit modo ipsi  
proportionato.

10. Objicies secundò, Qui secundùm se  
est alicujus servus, non potest esse ejusdem  
amicus. Atqui homines secundùm se sunt  
servi Dei, & non tantùm per accidens, ut  
servi inter homines. Ergo non possunt esse  
apud eum amici. Major probatur, quia ser-  
vus ut sic, non diligitur propter se. Qui  
ergo secundùm se est servus, nullo modo  
propter se diligitur.

Respondeo distinguendo majorem, si  
ratio præcisè subjectionis attendatur, con-  
cedo: quia ut subjectus & possessus dili-  
gitur amore concupiscentiæ ob utilitatem.  
Si ratio illa cui servi subiectio advenit,  
nempe ratio entis rationalis attendatur,  
nego. Et dico ex utraque resultare ut Do-  
minus omnia quidem bona servi ad se re-  
ferat; sed illi etiam cum benevolentia affe-  
ctu bene esse velit intra limites servitutis.  
Intra limites autem servitutis divinæ conti-  
netur beatitudo & possessio ejus.

11. Confirmatur, quia servus potest  
amare dominum. Ergo & à Domino, non  
tantum amari, sed etiam præveniri, quia  
hoc melius. Item cùm servus Dominum  
amantem sui, & amore prævenientem re-  
damarit, potest quoque ut gratus, & redamans  
adhuc redamari. Item potest inimi-  
citiam promereri, in quo differt à brutis,

quæ mereri non possunt nisi odium abominationis, siue odio esse in quantum nobis nociva sunt, habentque respectu nostri rationem mali, atque incommodi. Ergo juxta prædicta, ex hoc quoque capite potest homo esse respectu Dei objectum benevolentiae.

12. Objicies tertio, Aristoteles 8. Ethicor. cap. 6. & 7. ait Dei ad homines non esse amicitiam, ob summam scilicet inæqualitatem.

13. Respondeo non esse amicitiam æqualitatis, sed excellentiæ cum proportionem quam ratio requirit. Quod confirmatur ex eodem Aristotele, qui testatur sapientes & bonos amoris esse Deo, ipsique charissimos. Adde quod Deus factus est homo, & homines ad suæ divinitatis supernaturalem participationem extulit, ut tanta similitudine amicitia magis constaret.

14. Objicies quarto, amicitia requirit quasi convictum, & societatem, ut innuit Philosophus 8. Eth. c. 5. at inter Deum & hominem non est talis convictus. Ergo.

Respondeo justos perfectissimè cum Deo agere, & Deum in illis, ita ut ipsi non dubitent Deum sibi adesse, & se ab illo audiri, quod ad perfectam amicitiam sufficit, cum hæc possit esse inter absentes.

## SECTIO SEXTA.

*An, quomodo, & quando homo teneatur  
Deum diligere super omnia.*

1. **P**rimus perfecti amoris actus est quo Deum propter summam ejus amabilitatem super omnia efficaciter diligimus: qui actus differt tum a simplici complacentia, seu amore inefficaci tum etiam ab illo amore qui licet quoad aliqua sit efficax, non tamen id habet quoad omnia quæ sunt ad placendum Deo necessaria. De hoc actu qui solus est justificativus.

2. Quæritur primò, an detur obligatio seu præceptum de ipso. Ad quod respondent omnes Theologi affirmativè. Et probatur primò ex scriptura Deuteronomii 6. *Diliges Dominum Deum tuum ex toto corde tuo, &c.* De quo præcepto Christus Matth. 22. dixit: *Hoc est maximum, & primum mandatum* Quibus verbis ostendit ipsum esse speciale, & distinctum ab aliis præceptum.

3. Probatur secundò ratione. Quia Deus est primum, summum, & infinitum bonum, à quo, & in ordine ad quem cætera bonitatem habent ad ejus perfectione infinitè distantem. Ergo debet super omnia diligere.

4. Quæritur secundò, an teneamur diligere

ligere Deum super omnia intensivè. affirmant Scotus in 3. d. 28. q. 1. Durandus dist. 29. & alii. Communis tamen sententia est, etsi sit maximè conveniens diligere Deum super omnia intensivè, non tamen ad id ex præcepto nos teneri. Prima pars probatur, quia infinitum bonum decet omni modo magis quàm alia omnia, perfectiùsque diligi. Secunda pars probatur primò, quia non est in potestate nostra diligere intensiùs id quod non cadit sub sensus, quàm ea quæ sunt cognita cognitione accepta per sensus, nec universim id quod extra nos est, quàm nos ipsos, à quibus secundùm naturam est amandi initium, & origo. Nam ut Divus Thomas 2. 2. q. 25. à 4. in c. refert ex Aristotele 9. Eth. c. 8. *Amicabilia quæ sunt ad alterum, veniunt ex his quæ sunt ad seipsum.* Hinc amor noster erga Deum plus habet de libertate: erga nos autem plus de necessitate naturali: unde intensiorem hujus majorem sine insigni gratia impedire non possumus.

5. Probatur secundò, quia quando quis amat proximum, vel seipsum propter Deum, tunc eodem amoris actu amat Deum, & aliquid aliud à Deo, & iste actus est veræ charitatis secundùm omnes, & meritorius: nec tamen diligitur Deus, intensiùs quam illud aliud, siquidem est unustantum actus.

6. Probatur tertio, quia cum actum nostrorum intensio sit nobis ignota, diligendo Deum dubitare possemus num peccaremus, quia nesciremus an eum intensius quàm alia amaremus.

7. Jam ex hoc quòd non teneamur Deum magis diligere intensivè, quàm cætera, sequitur nos teneri ad eum magis appetitivè diligendum, quia cum ex antedictis sit præceptum de eo super omnia diligendo, non apparet quis sit alius modus quo in amore nostro Deum omnibus aliis præferre sit sufficiens & necessarium. Dicimur autem Deum super omnia appetitivè diligere cum eum tanti facimus, ut parati simus omnia potius quàm ipsum relinquere; vel cum sine tali comparatione, eum ut summum bonum, infinitè in se perfectum, amamus efficaciter, ita-ut simus parati facere quidquid necessarium est ad placendum ei.

8. Dices, sufficit Deum amare magis objectivè, idest velle ei majora bona. Respondeo id quidem nos debere, & sic teneri Deum super omnia diligere, quia nulli alteri quàm Deo id velle possumus ut sit bonum infinitum quoad essentiam in omni genere entis sed id non sufficere, quia cum hoc stat quòd quis Deo displicere velit ut aliquo bono creato fruatur: quo in casu bonum illud, vel seipsum Deo ante-

QUÆST. VII. *De Char. Theol.* 483  
ponit : ac proinde maximam Dei injuriam facit.

9. Quæritur tertio , quandonam homo teneatur diligendi Dei præceptum implere. Ad hoc statuendum Nota primo , cum duplex sit præceptum illud , affirmativum scilicet , & negativum , quæstionem esse de solo affirmativo , eò quòd extra controversiam sit negativum obligare semper & pro semper , ut loquuntur , ad nihil scilicet agendum quod sit contra Deum.

10. Nota secundo , duplicem distinguendam esse exercendi amoris Dei obligationem : unam quæ petitur ex objecto præcepti , quàmque ipsum per se præceptum ex sua propria ratione constituit : alteram , quæ ex alio præcepto , ejusque objecto provenit. In primo casu charitas est per se debita : in secundo , per accidens , puta cum quis in statu peccati mortalis existens , tenetur solemniter aliquod sacramentum administrare , neque habet copiam confessarii. Tenetur enim tunc actum contritionis elicere , quo illud deleatur. Quæritur ergo quandonam per se obliget præceptum charitatis , ita-ut seposita omni alia obligatione , charitas sit per se debita , & motivum ejus proprium , sit causa talis obligationis.

11. Respondet sanctus Thomas 1. 2. q. 89. à 6. quemlibet hominem statim ac-

que ad usum rationis pervenit; teneri sub peccato mortali se ad Deum convertere per actum dilectionis, & omnia sua in eum tanquam in ultimum finem dirigere. Hæc sententia tamen extra scholam sancti Thomæ non est communis, & refellitur, tum quia non est sufficiens fundamentum asserendi tam gravem pro tali præcisè instanti obligationem; tum quia non est divinæ providentiæ, quæ suaviter omnia disponit, obligationis initium in eo quod per se difficillimum est, constituere. Rectè ergo dici potest tunc hominem teneri ad Deum toto corde, seu super omnia appetitive diligendum, cum acquisito rationis usu perfectò, advertit periculum esse ne, nisi tunc id faciat, in longum tempus omitat. Nam omnino gravis inordinatio esset velle multos annos, vel totam vitam, usque ad articulum mortis transigere, absque ullo debitæ in Deum benevolentia signis in quo est quidam Dei sic neglecti contemptus. Quare per se tenetur homo, etiam aliquoties in vita, dilectionem Dei iterare: idque nolle est per se malum, quia Deo injuriosum. Est autem valde difficile determinare quanta sit necessaria dilatio ad gravitatem peccati contra hoc præceptum. Ledesma dilationem unius anni, Palao trium judicat esse gravem. Advertit autem hic auctor vix ullum fidelem nisi moribus



QUÆST. VII. *De Char. Theol.* 485  
valde depravatus sit, hujus violati præcepti  
reum existere, quia quisque ut plurimum  
conatur ad absolutionem in sacramento re-  
cipiendam, se per actum contritionis dis-  
ponere: et recurrunt sæpe in mentem divi-  
na beneficia: unde facile est ut animus  
noster ad amorem largitoris excitetur.

---

## SECTIO SEPTIMA.

### *De augmento charitatis.*

II. **S**uppono primò charitatem habitua-  
lem in hac vita augeri posse, quod  
probatur primò ex scriptura. Paul. Philipp.  
*ut charitas vestra magis ac magis abundet.*  
Et Coloss. 2. *Hoc oro ut charitas vestra ma-  
gis ac magis augeatur.* Secundò ex Concil.  
Trid. sess. 6. cap. 10. & can. 24. & 31.  
ubi docetur justitiam acceptam augeri co-  
ram Deo per bona, opera, & hominem  
per gratiam seu charitatem inhærentem  
justificatum, posse proficere in hac sancti-  
tate donec vivit, & per bona opera illius  
augmentum mereri. Tertiò ratione, quia  
de ratione qualitatium & habituum est ut  
fuscipiant magis & minus, & per actus  
quomodocunque augeantur. Ergo id quod  
genericè omni convenit qualitati & ha-  
bitui, charitati habituali non repugnat,  
ipsaque de se est illius capax. Adde quòd,  
cùm charitas sit virtus quâ diligimus Deum,

potest semper, ut debet, esse major Dei amor, absque eo quòd in ejus augmento sint limites. Ergo pari modo augeri poterit principium ejus à quo connaturaliter produ-  
citur.

2. Suppono secundò charitati habituali maximè convenire id quod proprium est habituum supernaturalium, ut nimirum per nostros actus non effectivè, sed meritoriè augeatur. Ratio cur non augeatur effectivè per nostros actus, est quia quod non habet vim effectivam alicujus qualitatìs, non habet vim intendendi eam. Siquidem intensio qualitatìs est quædam ejus productio, cum quod additur, sit ejusdem rationis cum eo cui additur. Atqui actus charitatìs non habent vim producendi effectivè habitum charitatìs. Ergo nec intendendi eum. Minor probatur, quia ex sacra Scriptura, charitas habitualis ad Deum solum, ut ad causam efficientem refertur ad Rom. 5. *Charitas Dei diffusa est in cordibus nostris per spiritum sanctum qui datus est nobis.* Idem definivit Concilium Milevitanum can. 4. sub Innocentio I. Et Tridentinum sess. 6. cap. 6. & can. 3. Et ratio est, quia omnia in entitate supernaturalia à Deo solo producuntur præter actus nostros, qui ut vitales, possunt & debent esse quoque à nobis. Et absolutè omnes effectus supernaturales, quatenus supernaturales, à Deo

solo producuntur, à quo uno est supernaturalitas, ut ostensum est in quæstione de ente supernaturali in genere. Quod si actus charitatis habitum producerent, illum ut supernaturalem producerent, quia producerent, ut aptum causare alios actus sibi ipsis similes. Quia igitur implicat ut producant rem supernaturalem ut sic, non possunt illum producere physicè. Adde quòd actus universaliter loquendo, si quid producant, nihil producant nisi species tum sui tum objectorum à se representatorum, à quibus speciebus habitus naturales non distinguuntur ex veriore philosophia. Atqui charitas habitualis est habitus alterius rationis, etiam à speciebus supernaturalibus, cum habeat in nobis locum potentia ad operandum supernaturaliter, sitque aliqua una qualitas ad omnia quæ sub aliquo altissimo objecto formali continentur, eique subsunt, se extendens. Ergo talis habitus per nostros actus non producitur effectivè. Unde restat ut per tales actus meritoriè, aut primò producat, quod in peccatore contrito contingit per meritum de congruo; aut jam inexistens in anima, intensivè augeatur, quod fit in iusto per meritum de condigno. His positis.

3. Certum est apud omnes auctores charitatem habitualement augeri per actus amoris intensiores ipso habitu præexistenti.

te. Sed difficultas est primò an per minus intensos augeatur : Secundò an statim ac producti sunt actus minus intensi, augmentum illud conferatur.

4. Negant augeri Durandus & Alensis, fuitque olim opinio Divi Thomæ in dist. 17. q. 2. a. 3. & in 2. dist. 27. a. 5. ad 2. quam sententiam mutavit in summa hîc q. 4. a. 6. & 1. 2. q. 114. a. 8. ut probant nobiliores Thomistæ.

5. Negant augmentum remissioribus actibus correspondens statim conferri Scotus, Cajetanus, Bannes, volûntque tunc dari cum actus habitu præexistente intensior elicitur. Atque id videtur sentire D. Thomas in locis ubi priorem sententiam retractavit : Nam ibi adhuc satis apertè significat augmentum non dari statim, unde restare videtur conferri post intensiorem actum. Quod si quis in hac vita intensiorem actum numquam eliciat, dicunt aliqui illud conferri in altera vita, ut Scotus. Alii numquam, ut Conradus & Bannes, quorum opinionem multi post Concilium Tridentinum parum tutam putant.

6. Contraria Sententia est communis, & certa habetur à Theologis qui eam docent, cum quibus.

7. Dico primò habitus charitatis intenditur per actus ipso remissiores, sive illi sint charitatis, sive etiam cujuscunque virtutis.

Probatur,

Probatur, quia quoties augetur gratia habitualis, simul etiã augetur habitus charitatis. Atqui per omnia bona opera augetur gratia habitualis. Ergo. Major probatur quia gratia & charitas habitualis vel sunt eadem realiter forma, ut multi volunt, vel se habent ut natura & proprietas quæ ipsi naturæ proportionatur. Unde in Baptismo ipsa, sicut & fidei ac spei habitus, cum gratia habituali infunditur.

8. Confirmatur primò ex Augustino qui libro de natura & gratia, capite ultimo, ait. *Inchoata charitas, inchoata justitia est; provecta charitas, provecta justitia est; perfecta charitas, perfecta justitia est.* Secundò, quia alioquin esset aliquis in cælo beatissimus ob gratiam auctam multis bonis operibus, in quo tamen non esset æquè intensus habitus charitatis, quia bona illa opera fuissent actus habitu charitatis remissiores: Unde videns Deum intensissimè & clarissimè, vel minùs diligeret quàm videret, vel in eo dilectionis actus intensissimus quoad multos gradus, quibus habitum charitatis superaret, non connaturaliter produceretur, quia sine principio in ipsa voluntate proportionato produceretur. Quare necesse est ex æquo simul crescere cum gratia sanctificante charitatem habitualem.

9. Minor probatur primò ex scriptura quæ omnibus bonis operibus in statu gratiæ factis, vitam æternam promittit, ut si quis potum aquæ frigidæ det in nomine Christi vel discipuli, Matthæi 10.

10. Probatur secundò ex Concilio Tridentino Sess. 6. Can. 32. qui est ejusmodi, *si quis dixerit hominis justificati bona opera, ita esse dona Dei, ut non sint etiam bona ipsius justificati merita, aut ipsius justificatum bonis operibus, quæ ab eo per Dei gratiam, & Jesu Christi meritum, cujus vivum membrum est fiunt, non verè mereri augmentum gratiæ, vitam æternam, & ipsius vitæ æternæ, si tamen decesserit in gratia, consecutionem, & augmentum gloriæ, anathema sit.*

11. Probatur tertio ex Patribus, qui omnibus operibus bonis, sine ulla exceptione actuum minùs intensorum, promittunt vitam æternam, ut videre est apud Suarem hîc eorum testimonia referentem.

12. Probatur quartò rationibus, quarum prima est à priori, quia omnis actus liber & honestus à puro viatore in statu gratiæ factus, est meritorius vitæ æternæ, quia ut honestus quidem & bonus, est factus ex auxilio in entitate supernaturali, ac proinde est ipse similiter supernaturalis: ut factus autem in gratia, est per eam dignificatus, ac proinde nihil ipsi deest ad



condignitatem meriti respectu vitæ æternæ. Quod si est meritorius vitæ æternæ, prius naturâ est meritorius gratiæ. Talis autem actus potest esse remissior habitu præexistente: Ergo.

Secunda est, quia qui admisit peccata mortalia gravissima, auget demeritum per minora: cur non ergo gratiam & jus ad gloriam augebit qui cum actus charitatis intensissimos antè produxerit, postea producit remissiores. Tertia est, quia alioqui si duo homines ponantur in gratia æquales, & unus ex illis moriatur, alter verò per centum annos ulterius vivat, exercendo innumeros actus, omnes remissiores habitu quem habuit, cum alius est mortuus, nihil supra illum meritis fuerit, nec erit in cælo beatior. Item sequeretur actum charitatis per multas horas continuatum sine intensificationis augmento, non plus mereri quàm actum ejusdem intensificationis instantaneum. Quæ & alia ejusmodi cum sint absurda, dicendum est omnibus bonis operibus augeri gratiam habitualement, ac proinde & habitum charitatis.

13. Respondent primò aliqui ex adversariis satis esse si actus remissiores mereantur pro alia vita præmium accidentale. Sed contra est, quia scriptura, Concilia & Patres dicunt illis correspondere



vitam æternam, quo nomine non intelligitur gloria accidentalis ut seorsim sumpta ab essentiali, sed ipsa substantia totius beatitudinis cum omnibus accidentibus ejus. Præterea ex Concilio Tridentino jam citato, omnia bona merentur augmentum gratiæ, ibique est sermo de sanctificante.

14. Respondent secundò alii actus charitatis remissiores, & alia bona opera virtutum inferiorum mereri in justo gratiam & gloriam, non tamen diversam ab ea quæ jam debita est, sed ut novo titulo possidendam. Sed contra est, quia hoc est expressè contra Concilium, quod dicit terminum meriti esse augmentum gratiæ & gloriæ non verò novos titulos. Contra est secundò quia sic uno gratiæ & gloriæ gradu Deus sufficiens omnia cujusque sancti opera, etsi innumera-bilia compensaret. Ratio à priori implicantiæ quæ in hoc reperitur, est quia ut aliquid sit merces, vel oportet illud antecedenter ad opus non fuisse debitum, vel si aliquid aliunde debitum sit merces operis alicujus, oportet necessariò non attendi debitum illud aliud, quod proinde non debet esse debitum stricti juris, nec promanans ex opere cui merces debeatur. Hinc ut Christo daretur beatitudo, & gloria corporis ex merito, oportuit non

attendi meritum proveniens ex dignitate personæ ejus. Nam si Deus illud attendisset, ex eoque illi talem gloriam dedisset, non posset dici opera Christi per illam compensasse. Quod si Deus dat uni actioni Christi idem præmium quod alteri, oportet non singulis præmium seorsim dari, sed omnibus simul. Quare ex hypothefi quod velit singula per se opera hominis justî compensare, ut certum est fieri, & scriptura testatur, non potest quod est merces unius, esse merces alterius. Alioqui non res ipsa esset merces, sed tituli qui non essent æque considerabiles ac augmenta rei, in qua jus obtentum est per opera. Unde nec illi tituli essent sufficiens & digna merces, & iniquè ageret inter homines qui sic debita solverit.

15. Respondent alii tertio, per singulos actus remissos augeri gratiam in ratione gratiæ, & amicitiae, & prout jus dicit ad gloriam; sed non augeri in ratione habitûs, & secundum suam physicè sumptam entitatem. Sed contra est quia gratia non reddit gratos, sicut nec sanctos, seu justos nisi per suam entitatem. Quod si acceptatio hominis in filium adoptivum, jus ad gloriam sunt favor, & beneficium à gratiæ entitate distinctum, ista sunt semper gratiæ proportionata. Ita-

que hæc omnia non crescunt nisi crescente ipsâ entitativè gratiæ formâ, alioquin augmentum justitiæ, majorque dignitas amicitiae divinæ, itémque major acceptatio in dignitatem filii adoptivi, vel amplius jus ad gloriam non consisterent nisi in permanentia morali, & justa æstimabilitate operum, sicut in pari permanentia & prudenti æstimabilitate consistunt inter homines merita eorum qui propter res præclarè gestas, digni sunt honoribus, ac præmiis. Hoc autem non est admittendum. Ergo.

16. Dico secundò, augmentum charitatis & gratiæ remissioribus actibus correspondens, statim post ipsos exercitos datur. Probatur primò ex eo quòd Concilium Tridentinum, loco suprà relato, loquens universaliter de merito, & effectu bonorum operum quæ fiunt ab homine justo, cum pro augmento gloriæ apponat hanc conditionem, si in gratia decesserit, pro ipso augmento gratiæ, à quo inseparabile est augmentum charitatis, nullam conditionem apponit. Quod argumento est effectum illum ipsa statim opera posterius naturâ sequi. Quòd si liceret fingere conditiones, pari jure quis diceret gratiam per Sacramenta non conferri dum ipsa Sacramenta recipiuntur sed aliquo alio tempore, putà in fine vitæ.

17. Probatur secundò, quia præmium quod quis de condigno meritus est, debet ipsi statim conferri, si nullum sit impedimentum ex parte subiecti, vel statûs, atqui illud augmentum charitatis est præmium quod quis de condigno meritus est bene agens in statu gratiæ, nec ullum est impedimentum ab eo recipiendo retardans, aut etiam dispositionis defectus. Nam quod sufficit ad meritum præmii, satis disponit ad illud recipiendum. Ergo debet ipsi statim conferri.

18. Probatur tertio quia nullum aliud potest afferri tempus quo rationabiliùs conferatur. Nam vel expectabitur donec actus intensior fiat, vel instans ultimum vitæ, vel instans post mortem, quo fiet actus intensior. Non primum, primò quia fortè nunquam fiet actus intensior, & sic meritum, quod secundùm Conciliûm est verè meritum, careret præmio; secundò, quia cùm fiet actus intensior, erit quidem, dispositio proportionis physicæ ad intensiorem habitûs, correspondentem tali actui, sed non ad totam intensiorem, & ipsi & prioribus correspondentem remissioribus. Itaque semper daretur illud totum augmentum sine dispositione physica æquali; & gradus augmenti correspondentes prioribus actibus remissioribus sine dispositione darentur.



Secundum item dici non potest, quia tunc etiam nulla esset physica dispositio æqualis. Nec tertium, primò, quia non est ille status viæ: itaque non est tempus crescendi in gratia, sed accipiendi gloriam acquisitæ gratiæ correspondentem. Secundò, quia actus intensior qui tunc exerceretur, vel esset sequens visionem beatificam, vel præcedens illam: primum dici non potest, quia non confertur gratia post visionem, sed visio eam totam supponit: sed nec secundum, quia suppono eum qui moritur, nihil habere unde visio retardetur, nempe nullum debitum pænæ in purgatorio exolvendæ, eò quòd vel satisfecerit adæquatè pro suis omnibus peccatis, vel debitæ illis pænæ relaxationem obtinuerit per indulgentiam plenariam. Quis ergo pro illa anima novus status ponetur qui nec beatitudinis sit nec purgatorii? Satis patet quidquid hîc dicatur frustra confingi, & arbitrariè dici. Quare nullum rationabilius reperiri potest conferendi illius augmenti tempus, quàm illud ipsum quo opus primum exercitum est.

19. Probatur quartò, quia si post actus remissiores non datur statim augmentum charitatis & gratiæ, nec dabitur post æquè intensos, etsi diutissimè continuatos. Consequens rationi repu-

gnat. Ergo & antecedens. Sequela probatur, quia actus æquè intensus non excedit intensiōem habitûs. Ergo neque ille habebit id quod ponitur necessarium ad augmentum, nempe excessum gradualis intensiōis in actu supra habitum. Minor probatur, quia nihil rationabiliter exigī potest ab eo qui habet habitum, nisi ut operetur secundum totam potentiam ejus. Quare cum id aget, durum est asserere eum nihil mereri gratiæ, & nullum ejus augmentum accipere.

20. Objicies primò, Habitus supernaturales eo modo cum proportione intenduntur ac naturales. Atqui isti non intenduntur nisi per actus intensiores: quia agens debet operari cum proportione majoris inæqualitatis. Ergo neque illi.

Respondeo primò negando minorem in sententia quæ non distinguit habitus acquisitos à speciebus, quia per actus novos similes, plures acquiruntur species, saltem ipsorum actuum circa talia objecta exercitorum: Unde major erit facilitas ad taliter operandum: quod est habitum esse factum intensiorem.

22. Respondeo secundò, negando majorem. Ratio disparitatis est, quia habitus naturales producuntur, & augentur physicè per actus. Posito ergo quod habitus sit aliqua qualitas simplex, non po-

terit intendi nisi à causa quæ sit in proportionem majoris inæqualitatis, ac proinde non poterit produci ab actu nisi intensiori. At verò habitus supernaturales producantur tantum moraliter, & meritorie per actus. Et ratio meriti respectu novi gradus est in actu remisso, quia ille meretur ut novus gradus ad præsuppositos adjiciatur, præcindendo ab eorum præexistente multitudine, sive intentione.

23. Objicies secundo, cum Deus primam gratiam in sacramento infundit adulto se disponenti per suos actus ad ejus susceptionem, non infundit illam supra mensuram intentionis quæ est in dispositione. Ergo eodem modo se gerit in augmento ejusdem gratiæ, ut numquam detur supra intentionem dispositionis, & meriti præcedentis.

24. Respondeo primo, in susceptione Sacramenti esse aliquam gratiam quæ est merè gratuita ex opere ipso operato.

25. Respondeo secundo quoad eam quæ infunditur proportionatè ad dispositionem susipientis, illam junctam ei quæ datur merè gratuitò componere effectum formalem qui est supra illam dispositionem: & licet nihil detur nisi cum proportionem ad præcedentem dispositionem, per accidens esse in primæ gratiæ productione, quòd id contingat ex defectu



QUÆST. VII. *De Char. Theol.* 499  
gratiæ præexistentis. Nam si Sacramen-  
tum suscipiatur ab aliquo qui jam habeat  
gratiam valde intensam, gratia quæ con-  
feretur iuncta præexistenti constituet gra-  
dum intensiōis qui erit supra dispositio-  
nem cum qua recipitur Sacramentum.  
Quare idem continget cum quis per actus  
remissos meretur novum augmentum gra-  
tiæ & charitatis.

26. Quæritur an habitus charitatis  
per unum actum tot gradibus augeatur,  
quot ipse ante actum illum continet.

Respondeo negativè, quia si quis  
viator liberè produceret actum in quo tot  
essent gradus intensiōis simul & appre-  
tiationis quot sunt in actu qui producit  
à beato, habente habitum æquè intensum,  
non meretur ad summum nisi tot gra-  
dus gratiæ & charitatis, quot fuissent in  
habitu charitatis à quo ille actus proces-  
sisset: quia nulla causa plus producit quàm  
in se continet. Atqui nullus fit actus à  
viatore qui tot habeat gradus intensiōis  
atque appretiationis, quot sunt in actu  
beati habentis talem habitum, quia idem  
semper habitus voluntatis nobiliùs agit  
objecto clarè, quàm obscurè proposito.  
Ergo nullus actus viatoris tot meretur  
gradus augmenti, quot in se quomodo-  
cunque continet. Quod si hoc verum est  
de actibus charitatis, multò verius est de

500 *De Ente Supernaturali*,  
actibus aliarum virtutum, qui licet ha-  
beant tot gradus intensiōis quot habe-  
bunt ipsi actus charitatis, non tamen  
habent tantum meriti, sicut libra argenti  
aut stanni, licet æqualis ponderis cum li-  
bra auri, non tantum habet valoris.

---

## SECTIO OCTAVA.

*An Charitas possit imminui; & Quomodo  
corrumpatur.*

**A**Ltissiodorensis 3. p. tract. 3. cap. 1.  
5. existimavit per peccata venialia  
minui charitatem quoad intensiōem,  
idque probabile censuit Victoria rele-  
ctiōe de augmento charitatis parte 2.  
2. Contrarium sentiunt cum Divo  
Thoma hinc q. 24. a 1. Theologi commu-  
niter tum ibidem, tum in primum dist.  
17. Et primam illam opinionem fere ut  
temerariam rejiciunt Bannes, Valentia &  
alii.

3. Dico primò, habitum charitatis  
peccata venialia non minuunt quoad in-  
tensiōem & perfectiōem intrinsecam  
sed quoad modum agendi, nempe quoad  
extensio-rem actus fervorem atque con-  
stantiam. Prima pars probatur, quia si  
minuunt intensiōem habitus, vel id fa-  
ciunt physicè, vel moraliter. Non pri-  
mum, quia nec per se ei opponuntur op-

QUÆST. VII. *De Char. Theol.* 501  
positione physica, cum actus non oppo-  
nantur per se habitibus: nec ratione ha-  
bituum quos producant, quia habitus  
naturales vitiorum stant simul cum ha-  
bitibus infusis, ut patet in eo qui dum  
primò gratiam habitualement recipit, non  
amittit inclinationes ex peccandi consue-  
tudine contractas. Non secundum, primò  
quia graviùs punirentur illa peccata, si  
pæna esset amissio gradûs charitatis, ac  
proinde & gratiæ habitualis, quam seque-  
retur amissio æterna unius gradûs gloriæ;  
id enim esset multò gravius, & malum  
alterius ordinis, quàm omnes pænæ pur-  
gatorii, quas nemo ex iis qui eas ferunt,  
vellet evitare vel minimo deperdito gra-  
tiæ gradu. Secundò, quia sequeretur pos-  
se aliquem per peccata venialia multipli-  
cata totam amittere gratiam, & sic pri-  
vari beatitudine et si nullum admisisset  
mortale. Sequela probatur, quia quæ qua-  
litatem minuunt, multiplicata totam  
destruunt.

4. Respondet Altissiodorensis per pec-  
cata venialia non tolli semper æqualem  
partem gratiæ, quamvis æqualia sint, sed  
semper minorem & minorem, prout quis-  
que peccans venialiter minorem habebat  
gratiam antecederet ad peccatum: quia  
tanta, inquit, pæna est, si ab habente  
duos gradus charitatis auferatur unus

quanta si ab habente decem, auferantur, quinque : sicut pauper tam læditur unius aurei ablatione , quàm dives ablatione quinquaginta aureorum.

5. Sed contra est quia in infligendis pœnis non tam respicitur illud nocumentum patientis quod per accidens se habet ad bonum ablatum , aut inflictum malum, quàm , proportio ipsius pœnæ , idest boni ablati aut mali inflicti ad culpam. Idque verius est in pœna privativa : unde Deus peccatum veniale potest punire, & punit de facto plurima venialia subtractione gratiæ, ex qua occasionaliter sequitur peccatum mortale & damnatio hominis. Itaque si peccata venialia puniret destructione gratiæ habitualis , magis spectaret quanta per se jactura debeat correspondere cuique peccato veniali quàm an is à quo auferretur , sit habiturus aliquid reliqui. Et saltem istud non deberet esse per se regula decrementi & privationis , ita ut quantumcunque multiplicatis peccatis semper ei aliquid relinquatur.

6. Confirmatur quia alioqui si unus habeat unum gradum & alter duos gradum milliones , & per peccatum veniale admittant, ille non deberet perdere nisi medium gradum , & iste unum graduum millionem. Et inter homines si unus habens unicum tantum assem eandem cul-

QUÆST. VII. *De Char. Theol.* 503  
pam committeret, quàm, alius habens  
duos nummorum milliones, & culpa illa  
esset punienda multâ pecuniariâ servata  
eadem proportionē, prior ille non deberet  
perdere totum assē sed dimidium tantum,  
alter verò deberet solvere unum millio-  
nem; quod est absurdum.

7. Secunda pars probatur, quia pri-  
mò qui peccat venialiter, etsi possit di-  
ligere Deum super omnia quæ adversan-  
tur ipsi charitati, quæ quidem est essen-  
tialis ratio diligendi Deum super omnia,  
ut rectè declarat Vasques in 1. 2. tom.  
2. disp. 194. numero 19. non tamen in  
sensu composito sui peccati; potest dili-  
gere simpliciter & positivè super omnia  
quæ non sunt Deus, cum in actu secun-  
do præferat aliquid, nempe objectum, seu  
motivum peccati venialis, alicui legi  
divinæ prohibenti illud. Itaque charitati  
ejus deest quoad actum aliquid appretia-  
tionis, & extensionis, cum Dei bene-  
placitum non perfectissimè præferat om-  
nibus aliis bonis, & aliquod bonum, quod  
est in potestate hominis, nolit Deo, vi-  
delicet obsequium quod ei exhiberetur,  
fugiendo illud peccatum. Dixi, quoad  
actum, quia semper ille charitatis habi-  
tus, qui in peccante venialiter non desi-  
nit esse secundum se in ratione principii,  
sufficit & ad Deum omnibus quæ non

sunt Deus, positivè præferendum, & ad volenda illi omnia bona, tum quæ ipse possidet Deus, tum quæ sunt in potestate hominis, siquidem omnis charitatis habitus id præstat in cælo.

Jam quoad intensiorem gradualement, clarum est eum qui inordinate afficitur erga aliquid creatum, non diligere Deum totâ quâ potest vehementiâ, & fervore affectûs, sequidem virtus divisa in plura minorem vim habet ad singula. Adde quod peccata venialia generant pravos habitus, & hominem privant multis specialibus Dei auxiliis sicque contingit hominem assuefieri legis divinæ transgressionem atque contemptui, ut docet Divus Thomas 1. 2. q. 88. a 2. & 3. unde est periculum lapsûs in gravia peccata, & æterni interitûs.

8. Dico secundò. charitas habitualis per quodvis peccatum mortale amittitur totaliter. Conclusio est primò contra asserentes charitatis habitum à justis non posse amitti quam doctrinam tenuerunt Iovinianus apud Hieronymum in eundem, Pelagius apud Augustinum, de hæresibus cap. 88. Vicleffus & Calvinus quos referunt & refellunt Bellarminus l. 1. de justificatione à cap. 14. & Valentia hîc q. 2. puncto 3. secundò est contra asserentes charitatem & gratiam Dei solo infide



QUÆST. VII. *De Char. Theol.* 503  
delitatis peccato deperdi, quod subin-  
de docuit Lutherus ut refert Tannerus  
tomo. 2. disp. 4. 9. 5. dub. 1. & multi  
alii sectarii docuerunt. Est autem sancti  
Thomæ q. 24. a. 12. & omnium Catho-  
licorum Doctorum.

9. Probatur primò ex scriptura, Eze-  
chielis 8. *Si autem averterit se justus à  
justitia sua, & fecerit iniquitatem secundum  
omnes abominationes quas operari solet im-  
pius; nunquid vivet. Omnes justitie ejus  
quas fecerat, non recordabuntur. In prava-  
ricatione quâ pravaricatus est, & in peccato  
sua quod peccavit, in ipsis morietur.* Idem  
aliis locis innumeris asseritur, & constat  
specialiter ex canonica Epistola sancti Ja-  
cobi cap. 2. ubi loquens de peccatis mor-  
talibus, ait. *Qui peccat in uno, factus  
est omnium reus, quatenus videlicet æquè  
perdit gratiam Dei & charitatem, ac per  
innumera.*

10. Probatur secundò ex Concilio  
Tridentino qui hanc totalem amissionem  
expressè docet sess. 6. cap. 15. & can. 27.  
Probatur tertio ratione duplici. Primâ est  
quia amicitia tollitur per quamvis gra-  
vem offensionem. Cum itaque omne pec-  
catum mortale sit gravis Dei offensio, per  
ipsum amicitia Divina tollitur, ac proin-  
de habitualis gratia desinit esse in homine,  
& consequenter habitus charitatis qui



nunquam est sine gratia. Secunda est, quia habitus infusi perduntur quolibet actu per se illis contrario. Atqui omne peccatum mortale est contrarium per se charitati divinæ, & impossibile cum ejus actu: quia per quodvis peccatum homo agit contra voluntatem Dei aliquid graviter prohibentis, cum quo non stat ipsum propter se super omnia saltem quæ ab ipso separant, diligere.

II. Dico tertio, habitus charitatis non expellitur physicè per peccatum mortale, sed tantum moraliter & demeritoriè. Prima pars probatur primò, quia si peccati mortalis actus expelleret physicè habitum charitatis, vel per se id faceret, vel per habitum extra quem nihil producit. Non primum, quia actus per se non sunt contrarii habitibus. Non secundum, quia cum habitus vitiosi stent cum gratia, ut dictum est supra, stant etiam cum habitu charitatis gratiam semper comitante. Probatur secundò quia quæ se expellunt physicè, debent esse duæ species sub eodem genere proximo aut non valde remoto, ut calor & frigus sub prima qualitate, albedo & nigredo sub colore. At peccatum mortale, quod realiter est actus naturalis, formaliter autem relatio contrarietatis contra legem, non ita se habet cum charitate habituali: quæ est princi-

QUÆST. VII. *De Char. Theol.* 509  
pium supernaturale activum à Deo infu-  
sum. Ergo.

12. Secunda pars constat ex refuta-  
tione prioris. Nam cum certum sit ex-  
pelli habitum charitatis per peccatum  
mortale, & non expellatur physicè, re-  
stat ut moraliter & demeritoriè expella-  
tur: quod solum evincunt rationes quibus  
ipsa expulsio probati est.

---

## SECTIONO.

*An Charitas in via possit esse aequè perfecta  
atque intensa, sicut in patria.*

1. **N**Ota quæstionem esse de actu cha-  
ritatis cum certum sit charitatem  
habitualement in patria esse eandem quæ  
fuit in ultimo instanti viæ. Nam illa om-  
nino manet, multo potiori jure quàm  
spes, cum evidens sit Deum in patria  
propter se supernaturaliter diligendum  
esse: quod præstat charitas viæ sine ulla  
imperfectione quæ se teneat ex parte ip-  
sius habitûs charitatis, nam quæcunque  
est imperfectio, illa provenit ex eo quod  
obscurè proponatur objectum ipsius, &  
alia simul cum eo in tali propositionis  
obscuritate, etsi non prudenter, at abso-  
lutè comparabilia sint, nempe creata  
bona, quæ etiam in tali statu præferri  
contingit. Quia igitur apta est de se ha-  
bitualis charitas circa objectum suum per-

508 *De Ente Supernaturali,*  
fectè propositum, nobilissimè operati &  
multò præstantiùs quàm spes, cùm in il-  
lud per se sumptum secundùm suas om-  
nes perfectiones feratur, ideo debet in  
patria remanere, nec illic quicquam ei  
addetur intensiõis, quia habitus chari-  
tatis non augetur nisi auctâ gratiâ habi-  
tuali, quæ extra viam nullum accipit  
incrementum. Hinc certum esse debet  
eandem esse habitualement charitatem in pa-  
tria, quæ fuerit in via, facta igitur com-  
paratione actûs quem elicit charitas in  
via, cum eo quem elicit in patria.

2. Dico, charitas patriæ est perfectior  
objectivè, appretiativè, & intensivè cha-  
ritate viæ ita ut quoad illa omnia nullus  
sit amor in patria, qui non præstet cuivis  
amori viæ. Probatur primò generaliter  
ex sancto Thoma qui 1. parte q. 117. a. 2.  
ad 3. & 1. 2. q. 67. a. 6. ad 3. & 3. parte  
q. 34. a. 4. docet charitatem postremi  
beati esse perfectiorem quavis viæ chari-  
tate. Jam autem ille excessus perfectionis  
non meliùs quàm in his tribus constitui  
potest. Ergo. Probatur secundò item ge-  
neraliter ratione petita ex evidenti, &  
intuitiva propositione infiniti boni. Nam  
infinitum bonum per se intuitivè cogni-  
tum, debet omni modo meliùs amari,  
etiam sine habitu, cum solo Dei concur-  
su tali propositioni debito, quàm quovis

alio modo per quodvis aliud principium  
sive actuale sive habituale. Quod confir-  
matur quia tale bonum sic in se visum  
necessitat voluntatem ad ipsum omni alte-  
ri præferendum, idque non tantum per  
accidens, ut contingit cum unum bonum  
finitum solum nobis proponitur, sed per  
se, & facta quavis aliorum propositione.  
Quod autem sic determinat præ omnibus  
aliis, & nullam in contrarium potestatem  
voluntati relinquit, melius amatur illis  
omnibus aliis.

3. Probatur præterea conclusio per  
partes. Ac primò quidem quod sit amor  
ille perfectior objectivè, quia videns  
Deum vult necessariò Deo omnia bona  
quæ in Deo videt, & quæ scit ab illo pos-  
sideri, & quæ à se ipso pendent; nempe  
ipsum Dei amorem totum sibi possibilem,  
& amorem item omnium quæ scit Deo  
esse grata, & ob ipsum amabilia: non  
tanta autem bona novit viator nisi im-  
plicitè. Ergo non tanta vult expressè, &  
sic minor est objectivè amor ejus. Nam  
ille actus latius patet objectivè qui ea-  
dem, quæ per alium attinguntur tantum  
implicitè, attingit distinctè & expressè:  
alioqui nulla quantumlibet distincta co-  
gnitio singulorum entium possibilium  
major esset objectivè eâ quâ concipimus  
confusè omne ens in communi.

4. Quod sit perfectior appetitativè, probatur primò quia ille est major appetitativè Dei amor, qui excludit omnem peccandi potentiam. At talis est amor patriæ solus. Ergo. Probatur secundò quia quando cognitio determinat ac necessitat voluntatem ad amorem boni, tantò ipse est clarior, & objectum quod proponit præstantius atque amabilius cæteris, tantò amorem generat appetitativè majorem. Et ubi talis deerit cognitio, impossibile erit tanti fieri objectum, etsi aliunde virtus amoris effectiva sit major.

5. Et ex his duobus excessibus, nempe extensionis objectivæ & appetitionis, collige amorem patriæ specie differre ab amore viæ, quia primò diversitas objecti, etiam secundarii, actum facit specie physicè, seu entitativè sumpta differentem. Deinde sicut in intellectu circa idem objectum specie differunt actus quibus illud idem, vel certò, vel probabiliter judicatur, ita in voluntate specie differunt actus quibus idem vel summo, vel minori in pretio habetur.

Denique quòd ille amor sit intensivè perfectior, probatur quia voluntas videntis Deum sic rapitur, ut in eodem actu per totam æternitatem perseveratura sit absque potestate desistendi ab illo actu. Igitur illam esse vehementissimum necesse est, nec

quicquam extra visionem intuitivam infiniti boni tale dari potest. Adde quòd intensio actuum per se maximè petitur ex claritate cognitionis, supposita identitate objecti : unde intensio non pendet ex libertate nisi ipsa sit objectum, & intellectus proponat voluntati bonitatem amoris intensi. Nam alioqui voluntas amabit cum ea intensione quâ poterit, & in hoc voluntas se habebit ut natura.

6. Dico secundò, amor viæ secundum quid est perfectior amore patriæ. Probatum quia in quantum est liber, est meritorius, quod non convenit amor patriæ. Quòd autem per hoc præstet tantum secundum quid, sed non absolutè, probatur, quia necessitas amoris circa summum & infinitum bonum præstat tam libertati circa illud idem bonum, quàm merito, si quidem amare necessariò summum & infinitum bonum est perfectio simpliciter simplex, unde Deus circa sui ipsius amorem necessitatur: libertas autem circa infinitum bonum, sicut & meritum in universum, dicunt aliquem defectum : Unde sunt bona illa necessitate inferiora.











